




5529

45
268



MANUALE
THOMISTARUM,
S E U
BREVIS THEOLOGIÆ
CURSUS,

*In gratiam & commodum
Studentium*

EDITUS


AB ADM. REV. PATRE
F. JO. BAPTISTA GONET

Biterrensi, Ord. FF. Prædicatorum,
Provinciæ Tolosanæ, strictioris Observantie,
in Academia Burdigalensi
Antecessore.

Tomus Quartus.



PATAVII, MDCCXXIX.
Ex Typographia Seminarii.
Apud Joannem Manfrè.
Superiorum Permissu, & Privilegio.



TRACTATUS IV. DE LEGIBUS.

UM juxta Apostolum ad Roman. 6. peccati cognitio per legem habeatur, ipsumque peccatum legis transgressio sit, ad perfectiorem tractatus de peccatis intelligentiam, tractationem de legibus sub jungimus, in qua agemus primo de lege in communi, deinde varias ejus species, nempe legem aeternam, naturalem, humanam, & divinam, tam veterem, quam novam, exponemus.

C A P U T I.

De lege in communi.

§. I.

De existentia, & essentia legis.

E XISTENTIAM, seu necessitatem legum, ut certam, & manifestam supponimus: eam enim insinuat ipsa natura creaturæ intellectualis, quæ cum non possit sibi esse regula moralium operationum, necessario eget aliquo superiore, a quo certa lege, & norma in suis operationibus dirigatur, ne a fine, ad quem creata est, aberret. Cum enim ejus natura defectibilis sit, & a fine honestatis, ad quem inclinat, deflectere possit, necessaria ei est aliqua lex, quæ illam per certam normam ad finem suum dirigat. Ipsa quoque experien-

tia necessitatem , ac utilitatem legum demonstrat , cum constet nullam Rēpublicam absque legibus stare posse ; unde leges dicuntur esse quasi fundamenta Rēpublicæ , quibus nixa hæret , & veluti vincula , & funiculi , quibus constricta , firma , & fixa in cœpto bono perseverat . Hinc Cicero orat. pro Cluentio , leges nervos , & sanguinem Rēpublicæ appellat , aitque , quod sicut corpora nostra sine sanguine , & nervis subsistere nequeunt , ita nec Rēpublica sine legibus . Et Aristoteles 3. Rētoric. Rēpublicæ salutem in legibus constitutam esse asserit .

Lex consistit essentialiter in actu intellectus , ut docet D. Thomas 1. 2. qu. 90. art. 1. & probat : tum quia legis est præcipere , & imperare , hoc autem essentialiter pertinet ad intellectum , ut ostendimus in tractatu de actibus humanis , agendo de actu imperii : tum etiam , quia lex est regula quædam , & mensura humanorum actuum : regulare autem , & mensurare actus humanos , ad rationem pertinet , cum illa sit primum principium actuum humanorum , & in unoquoque genere id , quod est principium , sit mensura , & regula illius generis ; sicut unitas , quæ est principium numeri , est mensura omnium numerorum , & motus primi cœli , qui est primus in genere motuum , est mensura omnium motuum corporum inferiorum .

Lex tamen præsuppositive , & de connotato importat actum voluntatis : tum quia proprium est legis movere subditos ad aliquid agendum : solus autem intellectus absque voluntate non potest movere : tum etiam , quia lex non pertinet ad intellectum spe-

speculativum, sed ad practicum: intellectus vero practicus actum voluntatis, a quo moveatur, & efficaciam, ac vim movendi participet, presupponit. Consistit ergo lex essentialiter in actu imperii, quo Princeps ordinat subditum ad aliquid agendum, intimando, vel denuntiando: vel potius in aliquo per ipsum constituto: Lex enim habet se ad intellectum, & ejus actum, sicut idea se habet ad intellectum artificis, & artem, utraque enim est mensura, regula, & exemplar; illa quidem morum, ista vero rerum per artem faciendarum: Sed idea est terminus media arte in intellectu productus: Ergo & lex erit terminus medio imperio productus, & verbum practicum illius.

Confirmatur: Lex est in intellectu Principis, non tantum subjective, sed etiam objective, tanquam cognitum in cognoscente; Princeps enim dum legem profert, ad eam attendit, & ipsam cognoscit: Ergo non est actus intellectus practici, sed potius ipsum verbum practicum, & terminus conceptionis practicæ, & imperii, quo Princeps subditos ordinat ad aliquid faciendum.

Leges debent esse firmæ, stabiles, ac permanentes, subindeque aliquo modo perpetuæ: Sunt enim, ut supra dicebamus, veluti fundamenta, quibus Respublica innititur, & quasi nervi, quibus subsistit. Unde Jurisperiti hoc discriminem statuunt inter legem, & præceptum ab homine factum, quod purum præceptum expirat per mortem præcipientis, non vero lex, quæ cum ipso non moritur, ut observavit Abbas in cap. *Irrefragabilis §. Cæterum, de officio ordinarii.*

Leges debent ferri pro tota communita-

te : nam in hoc etiam differt lex a præcepto , quod præceptum uni , lex multis imponitur ; quatenus illud ad privatam directionem partis , hæc ad publicam gubernationem Reipublicæ ordinatur ; unde lex est actus prudentiæ politicæ , vel regalis , quæ per se primo respicit bonum communitatis . Addo , quod lex debet esse perpetua , ut mox dicebamus : Ergo non imponitur uni privatæ personæ , quæ mortalis est , sed communitati , quæ perpetua est , quatenus durat per continuam successionem .

Ex hoc infertur , de ratione legis esse , quod sit propter bonum commune , & ad illud utilis sit ; nam potestas condendi leges non est data hominibus , sive a Deo , sive a Republica , nisi propter bonum commune . Unde Isidorus lib. 5. Etymol. ait , quod *lex* est nullo privato commodo , sed pro communi utilitate civium conscripta : juxta illud duodecim tabularum , *Salus populi suprema lex est* . Addo , quod lex , cum subjectetur in intellectu practico , & sit regula actuum humanorum , regulari debet per primum principium praxis , & actuum humanorum : primum autem principium in practicis est ultimus finis , & beatitudo : Ergo lex omnis regulari debet , & reduci ad ultimum finem , seu beatitudinem , quæ est bonum commune . Unde lex naturalis ordinatur ad beatitudinem naturalem , quæ est bonum commune sibi proportionatum ; lex vero supernaturalis ad beatitudinem supernaturalem ; civilis autem ordinat homines ad beatitudinem politicam civitatis , & regni , quæ est bonum sibi proportionatum , maximeque in tranquillitate , & pace Reipublicæ consistit .

Un-

Unde Plato lib. 1. de legibus ait, leges condendas esse publicæ pacis gratia.

Nec obest, quod sint aliquæ leges, quæ bonum privatum videntur respicere, ut lex naturalis de tuenda propria vita, & privilegium, quod respicit bonum particula-re illius personæ, in cuius favorem con-ceditur. Nam aliud est loqui de materia proxima, circa quam versatur lex, aliud de motivo formalí, propter quod versatur circa talem materiam; cum enim lex sit regula humanorum actuum, sicut in acti-bus humanis illa duo distinguimus, ita in lege ea distinguere debemus. Lex ergo na-turalis de tuenda propria vita respicit bo-num privatum personæ particularis, ut materiam proximam, circa quam versat-ur, habet tamen bonum commune pro-motivo, quod per se primo respicit; cum enim quilibet homo sit pars naturæ hu-manæ, & pars per se ordinetur ad totum, sicut imperfectum ad perfectum, hinc fit, quod bonum cuiuslibet hominis in parti-culari per se ordinetur ad bonum totius naturæ humanæ: Unde author, & conser-vator totius naturæ, cuius interest respi-cere tale bonum, recte præcipit, ut quili-bet conservet propriam vitam, ut conser-vetur bonum totius naturæ, quod non ni-si in individuis potest subsistere.

Ex hoc patet responsio ad id, quod subditur de privilegio. licet enim illud respiciat bo-num privatum alicujus personæ, ut mate-riam proximam; hoc tamen cedit in bonum commune, quod aliqui sint privilegiati, pro-ppter strenue facta in obsequium Reipublicæ, ut alii accendantur ad promovendum bonum commune per opera studiosa, & ardua.

Addo, quod privilegium, ut infra dicemus, non habet proprie rationem legis.

Ex dictis colligitur primo, potestatem condendi leges pertinere ad communatem, seu Rempublicam, vel ad eum, qui curam habet illius: quia lex (ut jam ostensum est) primo, & principaliter ordinatur ad bonum commune: Sed ordinare aliquid in bonum commune pertinet ad communatem, vel ad eum, qui ejus curam habet; quia sicut pars respicit bonum particulare, ut finem sibi proportionatum, & proprium, ita tota communitas bonum commune: Ergo condere leges civiles solum pertinet ad communatem, vel ad eum, qui ei praest, & habet curam illius.

Observandum tamen est, potestatem legislativam immediate, & jure naturæ residere in communitate, in Rege vero, aut quolibet alio habente potestatem condendi leges, mediate solum, & jure humano. Cum enim potestas condendi leges civiles non possit commode a tota communitate exerceri per seipsum, transferri solet ad unum, qui sit caput morale communitatis, & Princeps supremus reliquorum omnium, si monarchicum regimen instituatur; vel in paucos, & optimos, si aristocraticum; vel in plures, & plebejos, si democraticum. Potestas tamen condendi canones, & leges Ecclesiasticas, apud Summos Pontifices, & Concilia legitime congregata residens, non ab Ecclesia, sed a Christo immediate illis communicata est, sicut & potestas regendi Ecclesiam. Unde in capit. *Novit*, de judiciis, sic loquitur Pontifex de pontificia authoritate: *Cum non humanae constitutioni, sed divine inni-*

tatur; quia potestas nostra non ex hominibus, sed ex Deo est.

Colligitur secundo, hæc tria, præceptum, sententiam, & privilegium, non habere veram rationem legis. Triplex enim inter simplex præceptum, & legem reperitur differentia. Prima est, licet præceptum possit imponi toti communitati, hoc tamen non exigit necessario, sed potest imponi personæ particulari: lex vero semper communitatem personarum respicit necessario. Secunda, præceptum expirat morte, vel amotione imponentis, lex non expirat morte legislatoris, cum ex natura sua perpetua sit. Tertia, præceptum potest imponi a quocumque superiore, lex vero ferri nequit nisi ab eo, qui a Deo, vel a Republica habet potestatem legislativam.

Similiter sententia differt a lege; lex enim est ipsa ordinatio superioris, sententia vero potius est applicatio, & executio legis circa privatam personam, & eventum, quam legis impositio. Unde ad ferendam sententiam non requiritur suprema potestas legislativa Principis, sed inferior iudex per authoritatem derivatam ab illo potest eam ferre, ut ex usu constat. Et ratio est, quia sicut in artificialibus disponere formam dominus pertinet ad architectum, applicare tamen illam, inducendo eam in aliquam singularem materiam, dolando scilicet ligna, & aptando lapides, spectat ad inferiores artifices: sic in moralibus ad Principem, qui est architectonicus regiminis, pertinet disponere formas legum ad bonum commune procurandum, applicare vero illas ad singulares casus, & personas,

ad particulares judices attinere potest.

Demum lex a privilegio differt, quia lex semper respicit pluralitatem personarum, & bonum commune Reipublicæ, privilegium autem potest respicere particularem personam, & illius bonum particula-re. Unde privilegium ex Isidoro lib. I. Etymol. cap. 8. dicitur quasi privata lex, seu lex privatorum. De quo fusius infra, cum de privilegiis.

Quæres primo, an promulgatio sit ne-cessaria, & essentialis legi?

Respondeo, quod ut lex obliget in actu secundo, ejus promulgatio necessario re quiritur; illa tamen non est de essentia legis, aut ratio formalis illius, sed dun-taxat conditio necessario requisita, ut a-ctualiter obliget subditos.

Prima pars hujus resolutionis patet: lex enim se habet per modum regulæ, & men-suræ actuum humanorum, quam homines sequi debent, eique suas actiones confor-mare: Sed id præstare nequeunt, nisi lex eis innotescat, cum voluntas non possit ferri in incognitum; neque lex potest eis innotescere, nisi per promulgationem: Er-go ut lex obliget, ejus promulgatio ne-cessario requiritur. Non tamen æqualiter in omnibus legibus, sed diversimode, juxta naturam cuiuslibet; nam lex divina positiva non eget tam solemnii promulga-tione, sicut lex humana; aliquando enim lex divina promulgatur sola interna revela-tione, ut multis Prophetarum contigit: lex vero humana semper debet promulgari per signa externa, cum aliqua solemnitate, & sic obtinuit usus tam in Republica sæ-culari, quam Ecclesiastica. Ratio vero hujus discri-

discriminis est, quia cum Deus legis divinæ institutor sit supremus dominus simpliciter, & omnibus modis, potest modo quo voluerit intimare suam legem, & obligare ad ejus observantiam: homo vero, qui non habet tam supremum dominium, id non potest, sed cum agat veluti duplē personam, publicam scilicet, & privatam, Princeps sic debet proponere legem, ut ex modo proponendi significet se proponere illam ut principem condentem legem, & non ut particularem personam, quod non fit, nisi adhibita aliqua solemnitate publica id significante.

Dices. Ad revocationem legis non requiritur promulgatio: Ergo nec ad ejus institutionem. Respondeo negando Antecedens: dum enim lex non revocatur per solemnem promulgationem, censetur moraliter perseverare cum sua prima, & legitima promulgatione, subindeque obligare in actu secundo: Sicut dum valor monetæ non revocatur revocatione solemnī intimata subditis, moraliter loquendo, censetur manere, ut constat ex usu.

Secunda vero pars, quæ asserit promulgationem non esse de essentia legis, est D. Thomæ hic quæst. 90. artic. 4. ubi ait, promulgationem esse applicationem legis ad illos, qui per eam obligantur: Sed applicatio alicujus rei supponit rem jam constitutam in sua ratione formalí: Ergo promulgatio supponit essentiam, & rationem formalem legis jam constitutam, subindeque eam non constituit. Ratio etiam id suadet: nam ad essentiam, & rationem legis sufficit, quod habeat aptitudinem

ad obligandum; quia res per aptitudinem, & actum primum, ut docent Philosophi, definiuntur, & non per exercitium, & actum secundum, qui modo est, modo non est: Atqui lex nondum promulgata apta est ad inducendam obligationem, licet eam actu non inducat, donec promulgetur: Ergo habet veram rationem legis, licet promulgatio sit conditio requisita ad hoc, ut actu obliget. Non est tamen conditio pure accidentalis, & mere extrinseca, sicut approximatio agentis ad passum, sed intrinseca, & essentialis, cum requiratur per modum propositionis objecti voluntatis, quæ cum sit appetitus rationalis, id est sequens ductum rationis, & cognitionem intellectus, non potest ferri in incognitum. Non sufficit tamen ad hoc, ut lex humana obliget in actu secundo, quod innotescat, & applicetur hominibus per quamcumque notitiam (ut tacitæ objectioni occurramus) sed debet ipsis applicari per notitiam legi humanæ proportionatam, quæ solum habetur, cum Princeps eam facit intimare, & promulgare cum aliqua solemnitate, ut ex supra dictis constat.

Quæres secundo, an sit de ratione legis, quod scriptis mandetur?

Respondeo, quod non, ut constat primo ex Aristotele 10. Ethic. cap. ultimo, ubi sic ait: *Scriptæ sint, an non scriptæ leges, interesse nihil videtur.* Secundo ex jure civili instit. de jure naturali, gentium, & civili §. Sed & quod constitutum est, ubi sic dicitur: *Quodcumque constituit imperator per epistolam, vel cognoscens decretum, legem esse constat.* Ubi dividit decretum a Scriptura, & utrumque legem esse affirmat. Tamen ad melius esse, &

ut suavis ordo constituendi legem observeatur, oportet illam scripto tradi; quia cum natura sua sit stabilis, immobilis, & perpetua, connaturaliter petit modum illum ad sui consistentiam, quo melius immobilitas, & perpetuitas illius conservetur, & tenacius, ac firmius memoriæ hominum infigatur: hic autem modus est scriptura, ut de se patet. Unde D. Thomas hic art. 4. ait, quod *promulgatio presens ad futurum extenditur per firmitatem scripture, que quodammodo semper legem promulgat.*

Ex dictis intelliges, legem a D. Thomas ibidem sic recte definiri, seu describi: Lex est quædam rationis ordinatio ad bonum commune, ab eo, qui curam communitatis habet, promulgata. Ut enim supra ostendimus, lex essentialiter consistit in actu intellectus, & respicit bonum commune, debetque ferri ab eo, qui curam communitatis habet. Addit vero illam esse ab illo promulgatam, quia licet promulgatio non sit de essentia legis, ut supra diximus, est tamen modus intrinsecus illius, ut obligantis in actu secundo. In definitione enim alicujus non solum potest ingredi id, quod se habet ut ratio formalis, sed etiam id, quod se habet tanquam modus, vel conditio intrinseca; sic enim in definitione fidei ingreditur obscuritas, & in definitione objecti voluntatis apprehensio intellectus.

§. II.

Quænam sit legis divisio?

LEX generaliter dividitur in divinam, & humanam. Lex divina est illa, quæ a Dei au-

authoritate immediate vim habet, licet ejus promulgatio non fiat a Deo immediate, sed interventu Angeli, vel hominis: Cujusmodi fuit lex vetus, a Deo tradita Moysi per Angelos, & per eum promulgata, & lex Euangelica, a Christo lata, & partim per ipsum, partim per Apostolos publicata. Lex humana est illa, quæ fertur immediate humana authoritate, licet a Deo accepta. Primus vero inter homines legislator fuit Moyses apud Hebræos, Phoroneus apud Græcos, Trismegistus apud Ægyptios, Solon apud Athenienses, Lycurgus apud Lacedæmones, & Numa Pompilius apud Romanos.

Lex divina subdividitur in æternam, naturalem, & positivam: quia lex Dei spectari potest vel ut ab æterno concepta, vel ut impressa cujuslibet hominis intellectui, vel ut publica promulgatione manifestata. Lex vero divina positiva in veterem, & novam subdividitur. Prima est illa, quam Deus dedit Moysi, per ministerium Angelorum, in monte Sinai, & per Moysen populo Istraelitico. Secunda ea est, quam tulit Christus, novi testamenti author, & partim per seipsum, partim per Apostolos promulgavit. Sicut autem vetus triplicis generis præcepta continebat, nempe moralia, cæremonia, & judicialia; sic nova etiam triplicia præcepta complectitur, nempe fidei, sacramentorum, & morum, ut fusius exponemus infra, cum de lege nova differemus.

Lex humana in Ecclesiasticam, & civilem subdividitur. Illa fertur potestate Ecclesiastica, ut Papæ, & Conciliorum; ista potestate seculari, ut Regum, & Imperatorum. Prima jus Canonicum, altera jus Civile appellatur.

Cor-

Corpus juris Canonici dividitur in decretum, & decretales. Decreti collector, & ordinator est Gratianus Monachus Ordinis S. Benedicti, qui post veteres canonum, & decretorum collectores, ingens illud opus contexuit, & composuit, partim ex Summorum Pontificum decretis, partim ex Canonibus Conciliorum, partim ex dictis, & sententiis Sanctorum Ecclesiæ Patrum. Hoc autem corpus correctum, & editum fuit auctoritate Gregorii XIII. Summi Pontificis.

Decretum vero in tres partes dividitur. Prima pars continet distinctiones centum, & unam, in quibus de jure divino, & humano, deque his, quæ ad mores componendos, quæque ad disciplinam Ecclesiasticam spectant, tractatur. Secunda continet causas triginta sex, & quælibet causa in varias quæstiones distribuitur. Causæ autem trigesimæ sextæ inserit Tractatus de pœnitentia, qui distinctionibus quinque perficitur. Tertia denique pars decreti, quæ agit de consecratione, quinque distinctiones complectitur.

Quod attinet ad decretales, quo nomine proprie significantur rescripta, seu Epistolæ Summorum Pontificum, ad petentium processos, aut relationes emissæ, fuerunt collectæ auctoritate Gregorii IX. Summi Pontificis per S. Raymundum, Ordinis Prædicatorum, ipsius Capellatum, & Pœnitentiarium, & divisæ in quinque libros. Quoties autem decretales simpliciter allegantur, Gregorianæ per excellentiam intelliguntur.

His quinque libris decretalium Gregorii additus est aliis liber decretalium a Bonifac. VIII. Summo Pontifice, quem librum ideo sextum nuncupari voluit. Hoc Bonifacii vo-

lumen quinque libros comprehendit.

Sunt & aliæ constitutiones, seu decretales, quæ authorem habent Clementem V. Fuerunt autem editæ, & publicatæ ab e-
jus successore Joanne XXII. solentque ap-
pellari Clementinæ, & divisæ sunt in quin-
que libros.

Clementinæ adjunctæ sunt ab eodem Jo-
anne Papa constitutiones viginti, quæ *Ex-
travagantes* appellantur, quasi vagæ, & excur-
rentes extra prædictos decretalium libros.

Denique sunt aliæ constitutiones a di-
versis Romanis Pontificibus editæ, quæ *Ex-
travagantes communes* inscriptæ sunt, & quin-
que libros continent.

Affignat autem Gratianus a dist. 14. usque
ad 25. sex principia, seu fontes, ex quibus to-
tum jus canonicum eruitur, seu derivatur,
nimirum Scripturam Sacram, Traditiones,
quæ ab Apostolis tanquam ab Euangelii præ-
conibus promulgatae sunt, Canones Aposto-
lorum, qui tantæ authoritatis non sunt, quan-
tæ sunt Traditiones, Decreta Summorum
Pontificum, & Conciliorum generalium,
Concilia particularia, Summi Pontificis cal-
culo confirmata, & Epistolas decretales Sum-
morum Pontificum.

Librorum vero juris civilis, ab Imperatore
Justiniano collecti, ordo, & divisio est hu-
iusmodi. Justinianus cum animadverteret jus
Romanum, quod civile per excellentiam ap-
pellatur, in immensam, & confusam molam
excreuisse, statuit illud certis, & breviori-
bus finibus concludere. Erant autem ante i-
psius tempora tres Codices, quibus contine-
bantur leges, & Cōstitutiones anteriorum Im-
peratorum, Gregorianus, Hermogenianus,
& Theodosianus, ex quibus unum confecit,
quem

quem de suo nomine nuncupavit. Peracto Codice Justinianus animum adjecit ad veterum Jurisconsultorum volumina, quorum infinitam prope multitudinem, & in duo milia librorum dispersam coarctavit, ac digessit in quinquaginta libros, qui ideo libri Digestorum appellantur, vel Pandectarum, ducto nomine a Græcis vocibus πανδέκται, hoc est totum capio, quia universam veteris Jurisprudentiæ scientiam continent. Deinde ut haberent legum cupidi adolescentes facilem, & simplicem viam, qua progredi possent ad amplissimam juris scientiam, Justinianus componi curavit quatuor Institutionum libros, ut essent totius juris elementa, atque principia. Sed quoniam priori illi Codici pleraque deesse videbantur, Justinianus alium auctiorem, & emendatiorem edidit, quem vocavit Codicem repetitę prelectio-
nis, & hic est Codex, quem habemus, & quo utimur. Denique idem Imperator varias con-
stitutiones, quas deinceps imperii sui tempo-
re promulgavit, in unum librum redegit,
& has constitutiones modo Novellas, mo-
do Authenticas appellamus: Ergo totum
jus civile constat, & compositum est ex
Codice, qui duodecim libris absolvitur, &
quinquaginta libris Institutionum, & uni-
co libro Novellarum.

§. III.

Officia, effectus, & actus legis.

Duo sunt præcipua legis officia, nempe dirigere, & obligare. cum enim habeat rationem regulæ, & mensuræ actuum huma-
no-

norum, est directiva hominum, eisque ostendit quid agere, vel omittere debeant; quapropter vocatur lux Proverb. 6. *Mandatum lucerna est, & lex lux.* Cum vero emanata sit a superiori, ejusque voluntatem contineat, habet vim obligandi. Unde lex a ligando dicitur, quia ut ait S. Thomas hic art. 4. *per eam obligantur subditi ad eius observantiam*, vel (ut loquitur Cassiodorus) *eo quod animos nostros liget, suisque teneat obnoxios constitutis.*

Præcipuus effectus legis est reddere homines bonos, vel simpliciter, vel secundum quid. Lex enim divina, præsertim Evangelica, intendit, ut homo fiat simpliciter bonus, non modo in exteriori opere, sed etiam in interiori animo. Lex naturalis, ut fiat bonus virtutibus moralibus, quæ naturæ commensuratae sunt. Lex civilis, ut fiat bonus civis, faciatque ea, quæ ad pacem Reipublicæ sunt necessaria. Lex ecclesiastica, ut fiat bonus Clericus, qui satisfaciat suo muneri.

Quatuor sunt actus legis, nimirum præcipere, & prohibere, permittere, & punire. Nam actus humani sunt vel ex genere boni, vel ex genere mali, vel ex genere, seu objecto indifferentes: primi præcipiuntur, secundi prohibentur, tertii permittuntur. Et quia lex efficaciter actus malos prohibere non posset, nisi homines metu pœnarum posset a malo retrahere, ponitur quartus actus, qui est punitio.

C A P U T II.

De lege æterna.

LEx æterna est ratio Divinæ sapientiæ existens in Deo ab æterno, secundum quod est directiva omnium actuum, & motionum singularum creaturarum, in ordine ad bonum commune totius universi. Ita D. Thomas hic quæst. 93. artic. 1. ubi sic discurrit: Sicut ratio rerum faciendarum per artem vocatur ars, vel exemplar rerum artificiarum; ita etiam ratio gubernantis actus subditorum rationem legis obtinet, servatis aliis, quæ supra diximus esse de essentia legis: Deus autem per suam sapientiam conditor est universarum rerum, ad quas comparatur sicut artifex ad artificata: est etiam gubernator omnium actuum, & motionum, quæ inveniuntur in singulis creaturis. Unde sicut ratio Divinæ sapientiæ, inquantum per eam cuncta sunt creata, habet rationem artis, vel exemplaris, vel ideæ: ita ratio divinæ sapientiæ, mot ventis omnia ad debitum finem, obtinet rationem legis. Et sic lex æterna nihil aliud est, quam ratio divinæ sapientiæ, secundum quod est directiva omnium actuum, & motionum singularum creaturarum, vel ut loquitur D. Augustinus lib. 1. de lib. arbitr. Lex æterna est *ratio in mente Dei existens, quæ res omnes per congrua media in suos fines ordinantur, & diriguntur.*

Ex quo colligitur primo, legem æternam multipliciter ab idea differre. Idea enim respicit rem ut creabilem, lex æterna ut gubernandam. Idea se habet per modum deter-

determinantis Deum ad specificationem operis ex parte objecti , lex vero per modum obligantis ad operis executionem. Ideæ in Deo multiplicantur , quia dicunt respectum ad diversas creaturas , secundum proprias , & distinctas earum rationes , & quidditates ; lex vero æterna unica est , quia respicit actiones , & motiones omnium creaturarum sub una ratione communi , nempe quatenus ordinantur ad bonum commune universi .

Colligitur secundo , legem æternam differre a providentia : illa enim per se primo respicit bonum commune universi : hæc vero bonum singulare uniuscujusque creaturæ. Illa dicit in sua ratione vim obligandi , non vero ista . Item lex æterna in Deo tradit regulas generales gubernationis ; v. g. lapidem deorsum , ignem sursum inclinari ; providentia vero juxta illas regulas de motibus creaturarum in particulari disponit , & ideo providentia legem æternam habet pro principio .

Colligitur tertio , universas leges ab æterna derivari , & ab illa tanquam a fonte profluere : Tum quia primum in quolibet genere est causa , & mensura cæterorum : Tum etiam , quia in omnibus moventibus ordinatis virtus secundi moventis derivatur a primo ; unde cum lex æterna sit ratio gubernationis in supremo gubernante , necesse est , quod omnes rationes gubernationis , quæ sunt in inferioribus gubernantibus , a lege æterna deriventur : Non tamen eodem modo omnes leges ab æterna promanant : divinæ enim immediate ab ea profluunt , naturalis medio lumine rationis ; humanæ vero , media potestate vel ab ipso Deo immediate , vel mediante Reipublicæ consensu Principibus communicata .

Col-

Colligitur quarto, quod cum lex æterna sit directiva omnium actuum, & motionum singularum creaturarum, omnes operationes creaturarum sive rationalium, sive irrationalium ei subjiciuntur; cum hoc tamen discrimine, quod actiones creaturarum rationalium subjiciuntur legi æternæ, ut præcipienti, & obliganti; actiones vero, quibus creaturæ insensibiles, & rationis expertes ad suos fines diriguntur, non subjiciuntur legi æternæ, ut formaliter præcipienti, & obliganti, quia illæ non sunt capaces obedientiæ, & obligationis, sed ut ordinanti, & moventi illas ad suos fines.

Colligitur quinto, legem æternam esse vere, & proprie legem, cum sit ordinatio rationis in bonum commune ab eo, qui curam habet communitatis, in quo ratio legis essentialiter consistit, ut constat ex ejus definitione capite præcedenti tradita. Nec obstat, quod illa ab æterno promulgata non fuerit, cum ab æterno nullæ fuerint creaturæ, quibus promulgari potuerit. Promulgatio enim est solum conditio intrinseca, ut lex obliget in actu secundo, non vero ut habeat rationem legis, & sit obligativa in actu primo, ut cap. præcedenti ostensum est.

Probabilius tamen videtur, licet lex æterna respectu creaturarum rationalium, quibus modo intelligibili notificatur, exerceat rationem, & munus veræ legis, nihilo minus respectu irrationalium, quibus non modo intelligibili, sed per impressionem inclinationis, & activi principii, quo moventur ad suos fines, notificatur, & promulgatur, non exercere rationem, & munus veræ, & propriæ legis, sed tantum eujusdam provi- den-

dentiæ, sive principii gubernationis. Unde D. Thomas hic qu. 90. art. 1. ait, quod lex proprie dicta est mensura humanorum actuum, subindeque rationem veræ, & strictæ legis, respectu creaturarum irrationalium, non videtur admittere.

C A P U T III.

De lege naturali.

§. I.

Quid sit lex naturalis.

LEx naturalis est dictamen quoddam rationis naturalis, a natura, vel ab Authore naturæ nobis inditum, non solum ostensivum boni, & mali, sed etiam præceptivum.

Prima pars patet: lex enim consistit essentialiter in actu intellectus, seu dictamine rationis, ut cap. 1. ostendimus; unde lex naturalis debet consistere in judicio, seu dictamine rationis naturalis, & a natura, seu Authore naturæ nobis indito, juxta illud Apostoli: *Habemus legem scriptam in cordibus nostris.* Unde Augustinus lib. 2. de serm. Domini in monte cap. 9. ait, *Nullam animam esse, quæ ratiocinari possit, in cuius conscientia non loquatur Deus.* *Quis enim legem naturalem in cordibus hominum scribit, nisi Deus?* Et Ambrosius lib. 9. epist. 71. Ea lex (inquit) *non inscribitur, sed innascitur, nec aliqua percipitur lectione, sed profluo quodam naturæ fonte in singulis exprimitur.*

Secunda vero pars, nempe quod tale dictamen non solum sit ostensivum boni, & mali,

mali, sed etiam præceptivum, constat ex dictis cap. I. ubi ostendimus legem essentia-liter consistere in actu imperii, cum legis sit præcipere, seu imperare, & illa sit actus prudentiæ, quæ præceptiva est.

Confirmatur: Lex naturalis nihil aliud est, quam participatio legis æternæ in crea-tura rationali, ut docet D. Thomas hic quæst. 91. artic. 2. & constabit ex infra dicendis. Ergo non consistit in dictamine, & judicio solum ostensivo boni, & mali, sed etiam præceptivo. Consequentia patet, quia lex æterna, prout sic, est præcepti-va: Ergo id, quod per modum legis eam participat, participat essentialiter vim præ-cipiendi.

Ex his colligitur primo, hæc tria, quæ a-lias eadem putari possent, esse distinguenda, legem naturæ, conscientiam, & synderesim. Nam lex naturæ est ipsa ordinatio divinæ vol-luntatis, nobis impressa. Synderesis lumen ipsum naturale intellectus, per quod ipsam Dei ordinationem naturaliter cognoscimus. Conscientia vero est ipsa actio mentis, qua formaliter illam cognoscimus, seu judicium practicum, quo apprehendimus, seu judica-mus, aliquid esse faciendum, vel non facien-dum. Addo, quod conscientia est de aliquo a-gibili in particulari, lex vero naturæ est re-gula universalis de agendis, & vitandis in communi. Conscientia est de futuris, de præ-fentibus, & jam factis: lex naturæ tantum disponit de futuris, nec respicit jam facta. Demum conscientia potest esse erronea, ratio-ni autem veræ legis erroneam esse repugnat.

Colligitur secundo, legem naturalem esse veluti partem quandam legis æternæ; nam lex æterna extendit se ad omnes creaturas tam

nam rationales, quam irrationales, sicut di-
vina providentia: at lex naturalis ad so-
lam creaturam rationalem, id est ad homi-
nes, & Angelos extenditur. Unde lex na-
turalis in brutis proprie non residet; quia
licet ad ea, quæ sibi naturaliter conve-
niunt, inclinationem ab Authore naturæ
habeant, hæc tamen inclinatio non se ha-
bet per modum cuiusdam directionis, &
præcepti, sicut in homine, sed per modum
cuiusdam impressionis, quatenus scilicet
Deus illis imprimit principia intrinseca ad
agendum conformiter ad suam naturam,
quæ impressio magis instinctus naturalis,
quam lex naturæ appellari debet.

Colligitur tertio, legem naturalem esse
in se simpliciter unam; quia licet præcepta
legis naturæ sint plura, omnia tamen con-
nectuntur in fine ultimo naturæ humanæ,
ad quem ordinantur, & radicaliter conti-
nentur in illo primo, & universalissimo
principio, *Bonum est faciendum, & malum*
fugiendum, quod est unum: unde ab unitate
finis, & radicalis, ac primi principii lex ipsa
naturalis simpliciter una dicitur.

§. II.

Quænam pertineant ad legem naturæ?

AD legem naturæ pertinent in primis
novissima illa, & universalissima prin-
cipia practica, cuilibet naturaliter nota:
Bonum est faciendum, malum est fugiendum.
Quod tibi fieri non vis, alteri ne feceris. Quæ
non tam dicenda sunt præcepta, quam pre-
ceptorum omnium principia.

Secundo ad eandem legem pertinent omnia
præ-

præcepta Decalogi; ea enim ex illis duobus principiis lumine naturali inferuntur, ut constat de cultu Dei, de honore parentum, de homicidio, furto, & adulterio non faciendo, & de aliis, quæ non sunt bona, quia præcepta, & mala, quia prohibita; sed e contrario sunt præcepta, quia bona, & prohibita, quia mala, & naturaliter indecentia. Excipiendum tamen est præceptum de sabbato observando, quod aliquid habet juris positivi divini, & aliquid juris naturalis: Quatenus enim cultum Dei præcipit, est de jure naturæ; siquidem natura docet, ac dictat, Deum, ob supremam ejus excellentiam, & propter collata beneficia, esse colendum. Sed quatenus præscribit certum diem potius, quam alterum, est juris divini positivi: natura enim hunc diem non præscribit, sed Deus solus eum observandum Adamo, & Evæ expresse præscriptis, eo quod, ut ait Scriptura, a creatione, seu ab omni opere, quod patrarárat, die septimo requieverit; & sic duntaxat fuit veteris legis abrogatione antiquatum per evangelicam, in qua Sabbato dies Dominica, resurrectioni Christi consecrata, colenda a nobis successit.

Tertio omnes actus virtutum moralium sunt de lege naturæ, si spectentur secundum suam rationem genericam, sive inquantum sunt virtuosi, non vero si considerentur secundum seipso, & in propriis speciebus. Ita docet D. Thomas hic q. 94. art. 3. ubi primam partem hac ratione demonstrat: *Ad legem naturæ pertinet omne illud, ad quod homo inclinatur secundum suam naturam: inclinatur autem unumquodque naturaliter ad operationem sibi convenientem secundum*

suam formam , sicut ignis ad calefaciendum ; unde cum anima rationalis sit propria forma hominis , naturalis inclinatio inest cui libet homini ad hoc , quod agat secundum rationem , & hoc est agere secundum virtutem ; unde secundum hoc omnes actus virtutum sunt de lege naturali , dictat enim hoc naturaliter unicuique propria ratio , ut virtuose agat .

Secundam vero ex eo probat , quod multa secundum virtutem fiunt , ad quæ natura non primo inclinat , sed per rationis inquisitionem ea homines adinvenerunt quasi utilia ad bene vivendum , ut patet in actibus justitiae commutativæ , qui in emptione , venditione , aliisque humanis contractibus exercentur .

Utraque pars declarari potest hoc exemplo : Actus temperantiae v. g. secundum suam genericam rationem , seu ex genere suo , id est , quatenus est actus virtuosus , talis est , ut in eum natura inclinet , sive ad legem naturæ dicitur pertinere : Quod autem per abstinentiam a carnibus , & per jejunium quadragesimale debeat exerceri , hoc non est a lege naturali , sed positiva , pendet enim ex voluntate , & præcepto Ecclesiæ .

Dices . Omnia peccata non sunt contra naturam : Ergo nec omnes actus virtutum moralium ad legem naturæ pertinent .

Respondeo , quod licet omnia peccata non sint contra naturam animalem , seu omnibus animalibus communem , eo modo quo concubitus masculorum dicitur esse contra naturam ; omnia tamen sunt contra naturam rationalem , id est contra rationem , quæ est natura hominis . Quod ut melius percipiatur : Observandum est , in natura hominis tres distingui gradus , viventis , animalis ,

lis, & rationalis. Si illa spectetur secundum gradum viventis, seipsum interficere dicitur peccatum contra naturam; quia quisque, quatenus est vivens, suam vitam conservare tenet, juxta illud Tullii c. 1. Officiorum: *Principio generi animantium omni est a natura tributum, ut se, vitam, corpusque tueratur.* Si juxta gradum animalis consideretur, peccata nefanda carnis, ut sodomia, bestialitas, & mollities, dicuntur contra naturam, quia contra inclinationem naturalem, omnibus animalibus insitam, pugnant. Demum si natura hominis secundum gradum rationalem, & propriam differentiam, qua a brutis animalibus secernitur, inspi ciatur, omnia peccata dicuntur contra naturam hominis pugnare, quia omnia contrariantur rationi, quæ est hominis natura, ut docet D. Thomas supra quæst. 71. artic. 2. Nihilominus per antonomasiam duo priora genera peccatorum pugnare contra naturam dicuntur, quia nefandissimum est id committere, a quo bruta ipsa, nec non omnia viventia abhorrent.

§. III.

Utrum lex naturalis pati possit mutationem, dispensationem, aut interpretationem?

Dico primo, legem naturalem non posse pati mutationem proprie dictam, sed solum mutationem impropriam, seu ex parte materiae.

Prima pars probatur: Tunc mutatio legis proprie dicta contingit, quando lex ipsa mutatur in se, vel quia definit in se, ut quando ad tempus est lata, vel cum de justa fit injusta, vel quia abrogatur a super-

riori , vel ab illo per dispensationem restringitur. At nullo ex his modis lex naturæ mutationem pati potest ; non enim potest per seipsum desinere , quia non est lata ad tempus , sed sine termino . Neque potest de justa fieri injusta , cum nihil præcipiat , quod non sit intrinsece , & ex natura rei bonum , nihil prohibeat , quod non sit intrinsece , & ex natura rei malum ; neque enim bonum , aut malum facit , sed ostendit . Non potest etiam a Deo abrogari , quia Deus non potest non præcipere , aut non prohibere , quæ jure naturali necessaria , vel illicita sunt . Unde Tullius apud Lactantium lib. I. divin. instit. c.8. *Est vera lex recta ratio , naturæ congrua , diffusa per omnes , constans , sempiterna , quæ vocet ad officium jubendo , vetando a fraude deterreat .* Huic igitur legi nec prorogari fas est , neque derogari aliquid licet , nec tota abrogari potest . Nec vero per senatum , aut per populum solvi hac lege possumus ; nec est querendus explanator , aut interpres alius . Non erit alia lex Romæ , alia Athenis , alia nunc , alia posthac , sed & omnes gentes , & omni tempore , una lex , & sempiterna , & immutabilis continebit . Denique dispensatio in illam cadere non potest , ut dicemus conclusione sequenti : Ergo mutationem proprie dictam pati non potest . Unde Gratianus dist. 5. c. 1. *Naturale jus (inquit) inter omnia primatum obtinet tempore , & dignitate , cœpit enim ab exordio rationalis creaturæ , nec variatur tempore , sed immobile semper permanet .*

Quod vero mutatio improoria , & ex parte materiæ in legem naturalem cadere possit , manifestum est : materia enim , circa quam lex naturæ versatur , non semper eodem

dem modo se habet, sed interdum variatur propter aliquas circunstantias occurrentes; ex quo fit, ut illud, quod erat de lege naturæ, postea non sit de lege naturæ: v.g. de lege naturæ est, quod depositum sit reddendum, quando res in deposito constituta non petitur in damnum alicujus; sed quia potest contingere, quod petatur in alicujus perniciem, tunc mutatur materia legis depositi, subindeque lex de reddendo debito mutatur improprie; nam antea dictabat depositum esse reddendum, quando scilicet non considerabatur hæc circunstantia, postea vero contrarium dictat ratione talis circumstantiæ. Semper tamen ratio legis naturalis invariata manet: illa enim solum dictat depositum esse reddendum, servatis debitibus circumstantiis, subindeque dummodo id, quod petitur, non vergat in detrimentum alicujus, & non aliter: Hoc autem nunquam variatur, nec variari potest, cum sit intrinsece bonum, sicut cole re Deum, & honorare parentes.

Dico secundo, nullam potestatem neque humanam, neque divinam posse dispensare proprie in lege naturali, relaxando obligationem, immutata materia præcepti; bene tamen improprie, mutando materiam, ex qua proxime legis obligatio oriebatur.

Probatur prima pars: Dupliciter tantum intelligi potest, quod fiat dispensatio in lege naturæ: Primo, manente illicito, ac inhonesto, & naturæ rationali dissono actu, in quo dispensatur, mendacio v.g. vel adulterio: Secundo, ita quod per dispensationem actus definat esse illicitus, & dishonestus, atque naturæ rationali dissonus: Sed neutro modo potest fieri dispensatio in lege naturæ: Ergo

repugnat ullam potestatem humanam, vel divinam propriam, & directe dispensare in lege naturae. Major patet, Minor etiam quoad primam partem videtur manifesta: si enim Deus ita in lege naturali dispensaret, ut homo eliceret aliquem actum, qui non obstante dispensatione maneret illicitus, in-honestus, & naturae rationali dissonus, dispensaret illum, ut peccaret, & actum intrinsece malum eliceret, quod infinitae ejus sanctitati repugnat. Probatur vero quantum ad secundam: Praecepta negativa legis naturalis prohibent tantum actiones per se intrinsece, & ex natura sua malas, & dissentaneas naturae rationali, ut mentiri, furari, adulterium committere, falsum testimonium proferre, &c. Res autem per se, & intrinsece mala non potest non esse mala, quia essentiæ rerum sunt invariabiles: Ergo non potest dispensatio efficere, ut non sit mala, ita ut illi auferat naturalem malitiam.

Quod diximus de præceptis negativis legis naturae, cum proportione dicendum est de affirmativis; præcepta enim affirmativa legis naturalis obligant tantum in illis occasionibus, in quibus omissio actus præcepti esset intrinsece, & per se mala: Ergo hæc omissio non potest non esse mala, & fieri nequit, ut per dispensationem admittatur illi malitia, ita ut actus illi omissioni oppositus non sit adhuc moraliter necessarius.

Secunda vero pars conclusionis, quæ asserit posse dispensari improprie in his, quæ sunt de jure naturae, mutando scilicet materiam, ex qua legis obligatio oriébatur, patet in dispensatione votorum, quæ sunt de jure naturae, & tamen per potestatem Ecclesiasticam in illis dispensatur improprie,

quare-

quatenus auctoritate superioris dispensantis fit, ut hoc, quod continebatur sub voto, non contineatur, in quantum determinatur in hoc casu, hoc non esse congruam materiam voti, ut ait D. Thomas 2. 2. qu. 88. art. 10. ad 2. Idem magis constabit ex infra dicendis.

Dico tertio, legem naturalem nonnunquam egere declaratione, & interpretatione. Cum enim omnia legis naturæ præcepta non sint æque nota, & æque intellectu facilia, quædam ex illis aliqua declaratione, & interpretatione indigent, ad hoc ut verus eorum sensus haberi possit. Exempli gratia lex naturalis, quæ jubet servari secretum, eget aliqua interpretatione, cum illa non obliget in omni casu, in eo scilicet, in quo custodia secreti noceret Reipublicæ. Similiter in lege naturali prohibente homicidium explicandum est, id non intelligi de occidente cum moderamine inculpatæ tutelæ, vel alia justa de causa. Et in lege naturali præcipiente restituï alienum, intelligendum est, si fieri possit sine periculo vitæ, vel famæ, quæ majus bonum est; vel sine damno domini, vel alterius, puta si furiosus ensem suum repeatat ad occidendum, vel prodigus pecuniâ ad profundendum.

Quæres, an Epikria in lege naturali locum habeat? Respondeo negative: Epikria enim est interpretatio mentis legislatoris, quando expressa ab eo haberi non potest; unde si præsens ipse mentem suam explicet, talis mentis expressio a legislatore facta, Epikria non est: At in lege naturali non est opus hac interpretatione, cum ipsa legislatrix ratio, quæ legem tulit, & dictavit, v. g. depositum esse restituendum, dicit illud non esse restituendum, dum petitur in damnum alicujus: Ergo

in lege naturali Epikia locum non habet.

Objicies primo contra primam conclusionem: Lex vere, & proprie mutatur per derogationem; Sed legi naturali derogari potest: Ergo illa potest vere, & proprie mutari. Major constat, Minor probatur. Per leges civiles derogatur juri naturali, ut constat in legibus usucaptionis, & præscriptionis, quæ auferunt a vero domino quod suum est, illudque transferunt in dominium usucipientis; cum tamen sit legis, & juris naturalis, ut nullus propriis bonis ab altero spolietur: Ergo juri naturali per positivum derogari potest.

Respondeo, concessa Majori, negando Minorem: nam per leges usucaptionis, & præscriptionis non derogatur proprie legi naturali præcipienti, quod nullus propriis bonis ab altero spolietur, sed solum sit mutatio materiae legi antea subjectæ. Lex enim naturalis prohibet tantum, ne retineatur alienum, domino rationabiliter invitato: cum vero per leges usucaptionis, & præscriptionis transfertur dominium bonorum præscriptorum, dominus non est rationabiliter invitatus; quia nimis leges illæ institutæ sunt ad bonum commune tuendum, & conservandum, ne scilicet rerum dominia diu incerta maneant, & ne lites interminabiles fiant, & supra numerum multiplicentur.

Objicies secundo contra secundam conclusionem: Homicidium, furtum, fornicatio, polygamia, & dissolutio matrimonii legi, & juri naturali repugnant: At Deus in his omnibus dispensare potest, imo & de facto dispensavit: Ergo in lege, & jure naturali dispensare potest. Major constat, Minor vero variis exem-

exemplis ex Scriptura desumptis declaratur. Deus enim dispensavit cum Abrahamo, ut filium suum interficeret, & immolaret, Genes. 22. Item cum Israelitis, ut Ægyptum spoliarent, & vasa aurea, & argentea, quæ commodato ab Ægyptiis accepterant, secum abducerent, Exodi 12. Jussit quoque Oseæ Prophetæ, ut assumeret sibi mulierem fornicariam, & ex ea filios fornicationis susciperet, Oseæ 1. Demum dispensavit cum Judæis, ut plures haberent uxores, eisque permisit uxores dimittere per libellum repudii, & alias ducere, ut appareat ex Genesi, Exodo, ac Deuteronomio.

Respondeo, concessa Majori, negando Minorern, & ad ejus probationem dico, Deum in prædictis casibus non dispensasse proprie in lege, & jure naturæ, sed improprie tantum, mutando materiam, & eam per mutationem subtrahendo legi naturali. Nam in primo exemplo, tanquam supremus dominus vitæ, & necis omnianam, dedit jus Abrahæ in vitam innocentis, vel eo tanquam ministro, & executore uti voluit: Lex autem naturalis non prohibet homicidium innocentis in tali casu.

In secundo tanquam supremus dominus bonorum omnium, habens in manu sua dominium creaturarum, transtulit dominium Ægyptiorum in Israelitas, vel tanquam iudex supremus punivit Ægyptios hac pœna, propter crudelitatem commissam in Israelitas, & usum sacrilegum vasorum illorum, quæ ad idolorum cultum applicaverant, ut innuit Augustinus lib. 22. contra Faustum cap. 7. Vel denique Israelitis reddidit mercedē laborum suorum, qua fuerant fraudati ab Ægyptiis,

ut loquitur Scriptura Sapient. 10.

In tertio casu Deus tanquam supremus dominus corporum, potens efficere per se, quod faciunt mas, & fœmina per mutuum consensum legitimum, quoad corporum traditionem, dedit hanc meretricem Oseæ in uxorem, antequam ad eam accederet, propter mysterium, quod eo facto tunc representabatur, quatenus scilicet ipse Deus debebat in sponsam assumere naturam humana-
nam, quæ per peccatum primorum parentum, & innumera alia seipsum turpiter pro-
stituerat, & meretrici infami similem se redi-
diderat. Alii tamen existimant, verum, &
legitimum consensum conjugalem inter Os-
eam, & mulierem illam ante copulam carnalem intercessisse; quia (inquiunt) con-
sensus est causa formalis matrimonii, quæ a Deo suppleri nequit. Nec obstat, quod talis mulier in Scriptura appelletur fornica-
ria; ideo namque sic appellatur, non quod esset tunc meretrix, sed quia antea fuerat talis; non enim est insolitum in Scriptura, res interdum retinere denominationem eorum, quæ antea fuerant. Eva enim, post formationem suam, appellata est ab Adamo os, Genes. 2. *Hoc nunc os ex ossibus meis.* quia ante formationem talis erat. Et serpens a Moysi ex virga ejus productus, non desinit adhuc appellari virga, Exodi 7. *Devoravit virga Aaron virgas eorum.* Eodem quoque modo mulier Oseæ tradita fornicaria appellatur, quia ante suum cum Osea matrimonium talis erat: Filii vero ex tali matrimonio progeniti, propter matris opprobrium, filii fornicationum nuncupantur.

In quarto casu, qui duas continet partes, alteram de polygamia, alteram de dimissio-

ne

ne uxoris per libellum repudii , dicendum est , Deum tanquam naturæ authorem , cui subjacent matrimonii jura , in ordine ad naturæ propagationem , & commune bonum totius speciei instituta , & tanquam supremum dominum corporum , dominium corporum ab una uxore in plures divisiſſe , quando Iudeis simul habere plures uxores permisit ; & irritasse prioris matrimonii vinculum , dum illis concessit uxores dimittere per libellum repudii . Unde in utroque casu fuit solum mutatio materiæ , non vero stricta legis naturalis dispensatio ; quia lex naturalis nunquam obligavit , ut non fieret matrimonium unius cum pluribus , Deo sic disponente de jure , & contractu matrimonii . Similiter lex naturæ tantum prohibet repudium uxorum , quandiu matrimonium manet insolutum ; soluto autem matrimonii vinculo non vetat , quod conuges possint transire ad alias nuptias .

§. IV.

An possit dari ignorantia invincibilis juris naturalis , seu præceptorum legis naturæ .

PRO resolutione hujus celebris difficultatis observandum est , præcepta legis naturalis ad tres classes , seu ad tria genera posse reduci . Prima sunt universalissima , quæ (ut supra dicebamus) non tam dicenda sunt præcepta , quam præceptorum omnium principia : Cujusmodi sunt ista : *Bonum est faciendum . Malum est fugiendum . Quod tibi fieri non vis , alteri ne feceris . Deus est colendus . Parentes sunt honorandi .* Alia sunt , quæ ex ipsis per facilem discursum deducuntur , qua-

lia sunt præcepta non furandi , non forniciandi , non mentiendi , & similia . Demum alia sunt , quæ ex primis non nisi longo , ac difficulti discursu deducuntur , qualia sunt præcepta , quæ prohibent aliquos contractus , qui revera usurarii , vel simoniaci sunt , at tales evidenter non apparent , sed de hoc difficultas , & controversia est inter Doctor. aliis affirmantibus , aliis negantibus . Hoc premisso , pro resolutione difficultatis propositæ

Dico , non posse dari ignorantiam invincibilem , & inculpabilem de præceptis naturalibus primi , & secundi generis , bente tamen de illis , quæ sunt tertiae classis .

Prima , & secunda pars hujus conclusionis docentur expresse a D. Thoma hic qu. 94. art. 6. ubi sic discurrit:,, Ad legem naturalem pertinet primo quedam principia communissima , quæ sunt omnibus nota , quedam autem secundaria præcepta magis propria , quæ sunt quasi conclusiones propinquæ principiis . Quantum ergo ad illa principia communiua , lex naturalis non potest a cordibus hominum deleri in universali , deletur tandem in particulari operabili , secundum quod ratio impeditur applicare commune principium ad particulare operabile , propter concupiscentiam , vel aliquam aliam passionem . Quantum vero ad alia præcepta secundaria , potest lex naturalis deri de cordibus hominum , vel propter malas persuasiones (eodem modo quo etiam in speculativis errores contingunt circa conclusiones necessarias) vel etiam propter pravas consuetudines , & habitus corruptos ; sicut apud quosdam non reputantur latrocinia peccata , vel etiam vitia contra naturam , ut Apostolus dicit ad Rom. i.,,

Ex

Ex quibus probatæ manent duæ primæ partes nostræ conclusionis. Nam prima, & universalissima præcepta legis naturæ sunt cuilibet notissima, cum sint prima principia syndesis. Unde Augustinus concione 25. in Psalm. 118. dicit, quod nullus sinitur ea ignorare. Et in Psal. 57. loquens de isto legis naturalis primo principio, quod tibi fieri non vis, alteri ne feceris, ait, quod illud manu formatoris nostri in ipsis cordibus veritas scripsit. Hoc & antequam lex daretur, nemo ignorare permisus est, ut esset, unde judicarentur etiam quibus non est data. Sed ne sibi homines aliquid defuisse viserentur, scriptum est in tabulis, quod in cordibus non legebant; non enim & scriptum non habebant, sed legere solebant. Ergo de primis, & universalissimis præceptis legis naturæ non potest dari ignorantia invincibilis.

Quod vero non possit etiam dari de secundariis, quæ ex ipsis per facilem discursum deducuntur, patet etiam ratione D. Thomæ, quia etsi aliquæ gentes talia præcepta ignorent, existimantes licitum esse futari, & fornicari, tamen hæc ignorantia vincibilis, & culpabilis est (non ex eo quod per peccatum primi parentis in hominum mentes inventa sit, ut docet Jansenius, quem in tract. de peccatis c. 5. cōfutavimus) sed quia oritur ex propria hominis culpa, nempe ex prava consuetudine, & habitibus corruptis, ob quos in eam opinionem quis adducitur, ut credat illud esse licitum, quod illicitum esse cerneret, & cito judicaret, nisi esset pravorum affectuum tenebris obnubilatus, & excectatus, & nisi peccatis, quæ contra legem naturalem committit, divinæ illuminationi, & legis naturalis radiis obstaculum culpabile poneret. Nam ut ait D. Augustinus lib. 2. de serm. Domini in monte

cap. 3. Deus semper paratus est dare suam lucem nobis , non visibilem , sed intelligibilem , & spiritualem , sed nos non semper parati sumus accipere , cum inclinamur in alia , & rerum corporalium cupiditate obtenebramur . Cui concinit fidelissimus ejus Discipulus S. Thomas quæst. 3. de malo art. 7. his verbis . Deus , quantum in se est , omnibus se se communicat pro captu eorum ; unde quod res aliqua a participatione bonitatis ipsius deficit , est ex hoc , quod in ipsa invenitur aliquod impedimentum participationis divinæ . Sic ergo quod gratia alicui non apponatur , non est causa ex Deo , sed ex eo quod ipse , cui gratia non apponitur , impedimentum gratiae præstat , in quantum avertitur a non avertente se lumine , ut Dionysius dicit . Similia habet 3. contra Gent. cap. 159.

Ex his probata manet tertia pars conclusio-
nis : Ideo namque dari nequit ignorantia in-
vincibilis præceptorum primi , & secundi ge-
neris , quia illa sunt cuilibet immediate , &
per se nota , utpote prima principia synde-
sis , ista vero sine magno labore per facilem
discursum immediate ex illis deducuntur : At
præcepta legis naturalis , a primis remotissi-
ma , nec sunt immediate , & per se nota , ut
constat , nec ab illis nisi magno labore , &
discursu difficiili deducuntur : Ergo possunt in-
vincibiliter ignorari a rusticis , & indoctis ,
qui hujusmodi discursus sunt incapaces , &
qui a Prælatis , Confessariis , vel Doctoribus
non possunt interdum instrui , & scire , an ta-
lia præcepta sint de jure naturæ , & obligent
indispensabiliter : tum quia non possunt sem-
per illos adire : tum etiam quia interdum hoc
ab illis ignoratur , cum de hoc inter Magi-
stros , & Doctores saepe sit lis , & controversia ,
aliis

aliis affirmantibus, aliis negantibus. Unde Medina in 1. 2. q. 76. art. 2. sic ait: *Circa præcepta naturalia, quæ elicuntur ex præceptis Decalogi per consequentiam non valde evidentem, potest esse ignorantia invincibilis per multum tempus, &c.* Mercurius etiam Inquisitor Mantuanus, in libro de praxi opinionum, docet posse dari aliquam ignorantiam invincibilem juris naturalis. Cui subscribit Vincentius Baronius in posteriore parte manuductionis ad moralem Theologiam disp. 4. sect. 1. §. ultimo.

Ratio etiam id suadet. Lex enim vim obligandi non habet, nisi applicetur hominibus per promulgationem, seu intimationem, ut supra cap. 1. declaravimus. Sed lex naturalis non intimatur, nec promulgatur omnibus hominibus, quantum ad omnia præcepta, quæ continent, nimicum quantum ad illa, quæ sunt remotissima a primis præceptis universalissimis, quæ sunt prima principia syndesis: Ergo non obligat omnes homines, quantum ad illa præcepta; subindeque potest dari de illis ignorantia invincibilis, & excusans a peccato. Major constat, minor vero sic ostenditur: Promulgatio, seu intimationis naturæ fit per dictamen rationis intimantis homini agenda, vel omittenda. Sed tale dictamen, quantum ad præcepta, quæ sunt remotissima a primis præceptis universalissimis, non habetur ab omnibus, cum non habeatur, nisi per discursum difficultem, & magno labore, & studio, cuius plures viri simplices, rustici, & ignari sunt omnino incapaces: Ergo lex naturalis non intimatur, nec promulgatur omnibus, quantum ad præcepta remotissima a primis præceptis universalissimis, omnibus notis.

Addo,

Addo, quod, nisi admittatur aliqua ignorantia juris naturalis invincibilis, & a peccato excusans, sequitur incredibilis conscientiae perplexitas, imo & peccandi hic & nunc inevitabilis, & dura necessitas; quotiescumque aliquis probabiliter, & bona fide judicat aliquid sibi agendum esse, neque posse omitti sine peccato, & tamen illud naturali jure illicitum est. Peccabit enim id faciendo, si nulla ignorantia juris naturalis excuset a peccato. Peccabit etiam non agendo, quia aget contra conscientiam, quæ ipsi dictat hoc esse agendum. Peccabit igitur quocumque se vertat, & sive hoc faciat, sive non faciat, subindeque necessario peccabit, quod non solum est contra fideli dogmata, sed etiam contra prima luminis naturalis principia, nempe contra hoc principium: *Nemo peccat in eo, quod vitare non potest*, quod D. Augustinus lib. de duabus animabus cap. II. usque adeo notum, & per se manifestum esse afferit, ut non solum a nemine ignoretur, sed insuper a toto genere humano decantetur, & declaretur. Nonne (inquit) ista cantant & in montibus Poetae, & indocti in circulis, & docti in bibliothecis, & Magistri in scholis, & Antistites in locis sacris, & in orbe terrarum genus humanum?

Ex hoc sequitur aliud absurdum, & inconveniens, nimirum plerumque esse fortunæ, & non voluntatis, quod homines peccent, vel non peccent, prout videlicet id, quod agunt, est conforme, vel difforme iuri naturali ab eis ignorato, quod etiam absurdissimum est; cum vera, & sola causa peccati sit voluntas creata, ut operans difformiter ad regulas morum.

Nec

Nec valet, si dicas, prædictam conscientiæ perplexitatem, & peccandi duram necessitatem esse voluntariam indirecte, & per accidens his, qui contra jus naturale peccant; quia oritur ex propria illorum culpa, & ex pravis habitibus, & concupiscentiis, quibus divinæ illuminationi ponunt impedimentum. Licet enim hoc sit verum in his, qui peccant ex ignorantia juris naturalis, prout continet præcepta secundaria, quæ ex primis per facilem discursum deducuntur, qualia sunt præcepta non surandi, non mentiendi, non fornicandi, & similia, ut in solutione argumentorum declarabitur; non tamen in illis, qui ignorant præcepta naturalia, a primis remotissima; quia illa non deducuntur ab istis, nisi magno studio, & labore, atque difficiili, & longo discursu, cujus cum plurimi rustici, & ignari sint incapaces, nec interdum possint ab aliis instrui, illorum ignorantia non potest censeri voluntaria per accidens, & indirecte, ex eo nempe, quod eorum notitiae ponant impedimentum, sicut ignorantia præceptorum non fornicandi, non surandi, & similium.

Solvuntur objectiones.

Contra primam partem conclusionis nullum militat argumentum difficile, sed contra secundam objicitur primo: Ut aliquid sit peccatum, debet esse voluntarium, quod usque adeo verum esse testatur Augustinus lib. de vera Religion. cap. 14. *ut nulla Doctorum paucitas, nulla indoctorum turba dissentiat.* Sed ignorantia juris naturalis facit actum esse prorsus involuntarium: Ergo excusat a pec-

peccato, subindeque invincibilis, & inculpabilis est. Major patet, minor probatur. Advertentia, seu cognitio malitiæ requiritur, ut peccatum sit voluntarium; cum de ratione voluntarii sit esse a principio intrinseco cum cognitione, ut ex ejus definitione constat: Sed ignorantia juris naturalis tollit advertentiam, seu cognitionem malitiæ actus mali, qui elicitur: Ergo facit, quod tale peccatum non sit voluntarium. Unde S. Thomas q. 3. de malo art. 8. ait: *Cum aliquis nescit fornicationem esse peccatum, voluntarie quidem facit fornicationem, sed non voluntarie facit peccatum.*

Huic difficulti argumento varie respondent Authores. In primis Jansenius ait, ignorantiam juris naturalis per culpam primi hominis in mentes hominum invectam esse: unde cum culpa Adami sit hominibus voluntaria, quia omnium hominum voluntates in voluntate Adami, ut capitis totius generis humani, quodammodo continebantur; ignorantia juris naturalis, ex ea fluens, & proveniens, ipsis voluntaria censemur, subindeque mala, & culpabilis. Verum hæc responsio, & doctrina Jansenii tr. præcedenti cap. 5. a nobis impugnata est; ostendimus enim, quod licet ad peccatum originale sufficiat, quod sit voluntarium voluntate capitis, non tamen ad rationem peccati actualis, seu personalis, ut expresse docet D. Tho. in 2. dist. 30. qu. 1. art. 1. his verbis: *Oportet, quod secundum hoc, quod aliquid rationem culpe habet, secundum hoc ratio voluntarii in ipso reperiatur. Sicut autem est quoddam bonum, quod respicit naturam, & quoddam, quod respicit personam; ita etiam est quædam culpa naturæ, & quædam personæ.* Unde ad cul-

*culpam personæ requiritur voluntas personæ,
ad culpam vero naturæ (id est originale pec-
catum) non requiritur nisi voluntas in na-
tura illa. Idem constat ex Augustino lib. de
duabus animabus cap. 11. ubi dicit, quod
nec peccatum, nec recte factum imputari cui-
quam justè potest, qui nihil fecerit propria vo-
luntate . Quibus ultimis verbis aperte de-
clarat, ad peccatum actuale, seu personale
non sufficere, quod sit voluntarium volun-
tate capit, sicut sufficit ad peccatum o-
riginale , sed requiri necessario , quod sit
voluntarium voluntate propria illius , qui
peccat.*

Respondet secundo Estius in 2. dist. 22. §. 14.
 quod „ ignorantia juris naturalis nunquam
 „ facit actum prorsus involuntarium , etiam
 „ qua ratione peccatum est? quia non facit, ut
 „ malum prorsus ignoretur , sed semper per-
 „ mittit ipsum aliquo modo sciri. Quamvis e-
 „ nim qui hac ignorantia laborat, ignoret hoc
 „ malum, quod agit, sub ratione generis, id est
 „ nesciat esse peccatum , novit tamen sub ra-
 „ tione speciei , cui naturaliter , & essentiali-
 „ ter tale genus competit. Exempli causa ,
 „ qui mentitur officiose , putans tale menda-
 „ cium esse licitum, is quidem nescit tale men-
 „ dacium pertinere ad genus peccati, ideoque
 „ putat non esse peccatum, scit tamen se men-
 „ tiri, & proinde actum, qui essentialiter ma-
 „ lus est , voluntarie committit. Eadem est
 „ ratio in fornicatione, usura , simonia, ac ce-
 „ teris per se malis , id est quæ non ideo mala
 „ sunt, quia prohibita , sed ideo prohibita ,
 „ atque illicita , quia mala sunt „ . Hæc solu-
 „ tio, & doctrina consona videtur menti Augu-
 „ stini l. 1. retrah. c. 15. sic dicentis. *Qui nesciens
peccavit, quia voluit, fecit, etiam si non quia*

volut, peccavit, nesciens peccatum esse, quod fecit: ita nec tale peccatum sine voluntate esse potuit, sed voluntate facti, non voluntate peccati, quod fieri non debuit. Quibus verbis negat S. Doctor, opera ex ignorantia juris naturalis facta esse involuntaria; quia sic operans bene cognoscit actum intrinsece malum, ac legi naturali disformem, tametsi ex sua culpa non reflectat supra ejus malitiam, & supra disformatatem, seu contrarietatem, quam habet ad legem naturalem. Quod ut magis declaretur, & elucidetur

Respondeo tertio ad objectionem, concessa majori, negando minorem, & ad ejus probationem dico, ignorantiam juris naturalis tollere quidem cognitionem, seu advertentiam malitiæ peccati, & disformatatis actus ad legem naturalem, non excusare tamen a peccato; quia licet talis parentia cognitionis, seu advertentiæ malitiæ peccati, & disformatatis ejus ad legem naturalem non sit voluntaria directe, & in se, bene tamen indirecte, & in sua causa, nempe pravis affectibus, concupiscentiis, & passionibus, quas voluntarie aliqui non reprimunt, & quibus divinæ illuminationi, & radiis legis naturalis obstaculum culpabile ponunt. Unde Ambrosius lib. de hono mort. cap. 9. *Errat oculus, ubi errat affectus. Affectus ergo deceptio est deceptio visus.* Quia, ut ibi observat, sic corruptus querit ut concupiscat, non ut verum cognoscat. Quam rationem eleganter prosequitur in Ps. 118. serm. 4. his verbis: *Terra ista, quam gerimus, meretriciis nos quibusdam illecebris capit, & quasi vultus quosdam voluptatum, corporaliumque delectationum fucis illinit, ut lateat in his veritas, & forensi quadam specie decipient appropinquantes.*

Hanc

Hanc solutionem, & doctrinam recte explicat Cajetanus supra qu. 74. ubi hæc scribit.
„ Contrarietas intrinseca ipsi peccato, a
„ scienter peccante est scienter, & per se
„ volita, ab ignorantе, aut errante, per
„ accidens tripliciter: Primo ex parte actus,
„ quia est volita ad volitionem actus. Secun-
„ do ex parte ignorantiae voluntariae, quia in
„ ipsa volita sunt voliti omnes ejus effectus,
„ quorum unus est incurrere in hoc contra-
„ rium. Sicut homo voluntarie oculis velatis
„ incedens, vult in sua causa quidquid mali
„ inde sequi natum est; unde si impingat in
„ laesivum aliquod, voluntarie impingit,
„ voluntate causæ, scilicet velationis, vel
„ velati incessus. Tertio, &c.

Ex his facile intelligitur, & explicatur testimonium D. Thomæ, desumptum ex q. 3. de malo ar. 8. ubi ait: *Cum aliquis nescit fornicationem esse peccatum, voluntarie quidem facit fornicationem, sed non voluntarie facit peccatum.* His enim verbis solum intendit, quod cum aliquis nescit fornicationem esse peccatum, voluntarie quidem formaliter facit fornicationem, sed non voluntarie formaliter facit peccatum, quia facit peccatum non cum advertentia malitiæ, sed ex ignorantia, seu inadvertentia malitiæ, per accidens voluntaria. Quod vero hæc interpretatio legitima sit, constat ex verbis istis, quæ idem S. Doctor scribit in hac parte supra q. 19. ar. 6. *Si ratio errans dicat, quod homo tenetur ad uxorem alterius accedere, voluntas concordans huic rationi erranti est mala, eo quod error iste provenit ex ignorantia legis Dei, quam scire tenetur.* Quibus verbis aperte declarat, ignorantiam juris naturalis (prout continet secundaria legis naturæ præcepta, quale est præceptum

ptum non fornicandi) non excusare a peccato; quia nimis semper est volita, saltem indirecte, per accidens, & in sua causa, modo superius explicato. Quod adeo verum est, ut Augustinus expositione inchoata in Epist. ad Roman. de peccatis carnalibus doceat, ne in ipsis quidem pueris, & adolescentibus a mortali malitia expurgari per ignorantiam.

Objicies secundo: Potest dari ignorantia invincibilis, & excusans a peccato juris positivi: Ergo & juris naturalis, prout secundaria legis naturalis præcepta complectitur.

Sed nego consequentiam, & paritatem: cum enim jus naturale, prout includit præcepta secundaria legis naturæ, intimam habeat cum principiis lumine naturali notis colligationem, & ex communissimis morum notiōnibus, in ipsis humanæ mentis medullis, & visceribus indelebiliter impressis, certa connexione dependeat, ejusnotitiam quilibet in sua manu, & potestate habet, nisi corruptæ voluntatis pravitate fuerit impedita; ex quo fit, quod tale ius, quantum ad illa præcepta, non possit invincibiliter ignorari. E contra vero, cum ea, quæ sunt juris positivi, & pendent a libera voluntate legislatoris humani, vel divini, nullam habeant cum principiis lumine naturali notis connexionem, eorum notitiam non habemus in nostra potestate, subindeque de illis possumus habere ignorantiam invincibilem, & inculpabilem.

Addo, quod ignorans legem positivam, & præcepta, quæ ad illam pertinent, non cogitat se illorum scientiam debere comparare, nec aliquod lumen in se habet, in quo possit talis obligationem intueri: secus vero est de igno-

ignorante præcepta secundaria legis naturæ: nam ex conscientia ad illa instigante emergunt plerumque cogitationes bonæ, quibus nullus homo per totam vitam caret; unde si aliqui talia præcepta ignorent, ipsis imputandum est, qui conscientiam illorum admonentem audire noluerunt, vel, ne moneret, voluntarium obicem posuerunt.

Objicies tertio: Licet lumine naturali constet, actus intrinsece malos, & legi naturali repugnantes, secundum se, & absolute consideratos, nunquam esse licitos, nec posse excusari a peccato; aliqui tamen existimant, eos esse bonos, ac licitos, si considerentur ut vestiti circumstantia boni finis; v. g. licitum esse furari ad dandam eleemosynam, mentiri ad propriam, vel alienam vitam tuendam, sese polluere ad conservandam, vel recuperandam sanitatem: Ergo potest dari aliqua ignorantia juris naturalis, prout complectitur præcepta secundaria legis naturæ.

Respondeo, in prædictis casibus, seu exemplis ignorantiam vincibilem esse: potest enim vinci, & depelli per istud principium lumine naturali notum, & cuilibet a natura insitum: *Non sunt facienda mala, ut eveniant bona.* Ex quo quilibet ratione utens facile colligere potest, non esse licitum furari ad dandam eleemosynam, mentiri ad propriam, vel alienam vitam tuendam, & multo minus sese polluere ad conservandam, vel recuperandam sanitatem, imo nec ad vitandam mortem. Unde S. Casimirus, gravi oppressus infirmitate, mori potius, quam castitatis jacturam ex Medicorum consilio subire, constanter voluit; & de Verino Poeta Gallo hi-versus extant posteritati consecrati:

Sola

*Sola Venus poterat lento succurrere morbo.
Ne se pollueret, maluit ille mori.*

Quare nedum improbabilis, sed & abominabilis est doctrina Caramuelis, afferentis in sua Theologia morali numer. 1603. mollitiem jure naturæ prohibitam non esse: unde si Deus eam non interdixisset, nunquam esset mala, sæpe esset bona, & aliquando obligatoria sub peccato mortali. Hoc probabilitatis monstrum in dissertatione de probabilitate contrivimus, ubi & hos Martialis versus in Ponticum se poluentem retulimus:

*Hoc nihil esse putas? scelus est, mihi crede,
sed ingens,*

Quantum vix animo concipis esse tuo.

Ipsam crede tibi naturam dicere verum.

*Istud, quod digitis, Pontice, perdis,
homo est.*

Objicies quarto contra tertiam partem conclusionis: Nullum probabile falsum, & legi naturæ dissonum excusat a peccatis, quæ sunt contra jus naturale, quamvis appareat, & existimetur verum, & legi naturæ consonum: Ergo nulla prorsus datur ignorantia invincibilis, & inculpabilis juris naturalis. Consequentia patet, Antecedens vero probatur primo triplici testimonio D. Thomæ. Primum habetur quodlib. 8. ar. 13. ubi S. Doctor ait: *Illud, quod agitur contra legem (æternam, vel naturalem) semper est malum, nec excusat per hoc, quod est secundum conscientiam.* Secundum sumitur ex quodlib. 9. art. 15. ubi hæc habet: *Error, quo non creditur esse peccatum mortale, quod est peccatum mortale, conscientiam non excusat a toto, licet forte a tanto.* Tertium habetur quodlib. 3. art. 10. ubi hæc scribit: *Nullus excusat, si sequatur*

oppi-

opinionem erroneam alicujus Magistri, in talibus enim ignorantia non excusat.

Probatur secundo ex SS. Patribus, qui id etiam aperte videntur docere. Augustinus enim epist. 154. sic ait: *Si quis bonum putaverit esse, quod malum est, hoc putando utique peccat: ea sunt omnia peccata ignorantiae, quando quisque bene fieri putat, quod male fit.* Bernardus etiam lib. de præcepto, & dispensat. c. 14. hæc habet: *Sive itaque malum putas bonum, quod forte agis, sive bonum malum quod operaris, utrumque peccatum est.* Item Tertullianus de spectaculis c. 20. *Erramus (inquit) nusquam, & nunquam excusatur quod Deus damnat: nusquam, & nunquam licet, quod semper, & ubique non licet.*

Probatur tertio idem Antecedens ex hac definitione peccati a S. Augustino tradita: *Peccatum est factum, dictum, concupitum contra legem Dei æternam: Ergo omne opus a lege æterna, & naturali, quæ est ejus participatio, dissidens, malum est, & illicitum, quamvis bonum, ac licitum existimetur.* Unde D. Thomas supra quæst. 19. art. 4. docet, *bonitatem voluntatis pendere ex lege æterna.*

Hæc sunt præcipua fundamenta illorum, qui docent, nullam prorsus dari posse ignorantiam juris naturalis, quæ non sit vincibilis, & culpabilis, quibus facile responderi potest, iuxta principia a nobis statuta. Unde ad primum locum D. Thomæ respondeo, *Illud quod est contra legem, semper esse malum, nec excusari per hoc, quod est secundum conscientiam, erroneam errore crasso, & affectato, qui non excusat a peccato: bene tamen id quod est secundum conscientiam erroneam errore invincibili, & inculpabili, quem a peccato exime-*

re docet S. Doctor, non solum locis in tract. de peccatis c. 5. relatis, sed etiam in illo artic. 13. quodlibeti 8. in argumento sed contra, ubi sic ait: *Si aliquis adhibet diligentiam inquirens, an habere plures præbendas sit licitum, nec invenit aliquid, quod ipsum moveat ad hoc, quod sit illicitum, videtur, quod sine peccato plures possit præbendas habere:* At fieri potest, quod sit contra legem divinam habere plures præbendas: Ergo ex S. Thoma ille non peccat, qui ex ignorantia invincibili facit aliquid legi divinæ repugnans. Unde idem S. Doctor in eodem quodlibeto artic. 15. sic ait: *Error autem conscientiae quandoque habet vim absolvendi, sive excusandi, quando scilicet procedit ex ignorantia ejus, quod quis scire non potest, vel scire non tenetur.* Ex quibus liquet, nostram interpretationem legitimam esse: Unde traditur a S. Antonino 1. p. tract. 3. c. 10. §. 10. ubi sic ait. *Hec verba D. Thome* (quibus asserit in dicto quodlibeto, illud, quod est contra legem, semper esse malum) *non possunt intelligi nisi de his, ubi manifeste patet ex Scriptura, vel determinatione Ecclesie, quod sint contra legem Dei, & non de illis intelligit, ubi non appareat, alias sibi contradiceret.*

Ex his patet responsio ad alium locum ex quodlibeto 9. desumptum: quando enim S. Doctor ait: *Error, quo non creditur esse peccatum mortale, quod est peccatum mortale, conscientiam non excusat a toto, licet forte a tanto, loquitur de errore crasso, & affectato, vel de errore vincibili, qui oritur ex negligencia addiscendi, non vero de errore invincibili, & inculpabili.* Idem prorsus dicendum ad tertium textum quodlibet. 3. art. 10. ubi ait, *quod nullus excusat, si sequatur opinio-*

opinionem alicujus Magistri; hoc enim intelligendum est de eo, qui ex ignorantia vincibili, & culpabili opinionem illam sequitur; secus vero de illo, qui invincibiliter, & inculpabiliter talem errorem ignorat.

Ad testimonia SS. Patrum similiter dicendum est, illos tantum locis adductis significare voluisse, eos, qui ex errore crasso, & affectato, aut errore vincibili, qui oritur ex negligentia addiscendi, putant bonum esse, quod malum est, aut malum, quod bonum est, peccare ex conscientia erronea, quæ non excusat a peccato, ut in tractatu de actibus humanis capite ultimo ostensum est. Unde quando Tertullianus ait, *nunquam excusari quod Deus damnat*, hoc debet intelligi, quando scienter, & voluntarie fit, vel quando fit ex errore vincibili, non vero si ignoranter, & involuntarie fiat, vel ex errore invincibili.

Ad tertiam probationem desumptam ex definitione peccati respondeo, quod quando D. Augustinus definit peccatum, *factum, dictum, vel concupitum contra legem æternam*, hoc intelligendum est de lege æterna, ut intimata, & participata a dictamine rationis, quod est proxima regula actuum humanorum, & quedam æternæ legis impressio, participatio, & denuntiatio, ut docet S. Thomas supra quæst. 19. artic. 4. Unde quando lex æterna per cognitionem intellectus, seu dictamen rationis homini non intimatur, sed invincibiliter, & inculpabiliter ignoratur, seu quando nullum est dictamen rationis prohibens actum, quamvis legi æternæ contrarius sit, non est peccatum formaliter, sed tantum materialiter. Ex quo intelliges, quod quando

D. Thomas ait, *bonitatem voluntatis pendere a lege æterna*, loquitur de lege æterna, ut per divinam revelationem, aut dictamen naturale rationis nobis intimata, ut patet ex solutione ad 3. ubi sic ait: *Licet lex æterna sit nobis ignota, secundum quod est in mente divina, innotescit tamen nobis vel per rationem naturalem, quæ ab ea derivatur ut propria ejus imago, vel per aliquam revelationem superadditum.*

Dices: Idem S. Doctor quodlib. 8. art. 13. docet, duobus modis aliquem peccare, videlicet agendo contra legem Dei, & a gendo contra conscientiam, ita ut ad peccandum sufficiat alterum ex illis duobus: Ergo censet ad peccandum non requiri necessario intimationem legis æternæ, vel naturalis, quæ fit per dictamen conscientiæ.

Sed nego consequentiam: ut enim supra ostendimus, D. Thomas ibi non loquitur de conscientia secundum se, & absolute considerata, prout importat dictamen rationis, legem æternam, aut naturalem intimantis; sed de conscientia erronea errore crasso, & vincibili. Unde solum intendit, quod ut aliquis actus sit bonus, requiritur, quod sit secundum legem divinam, & secundum conscientiam talem legem nobis intimantem; ut vero sit malus, alterutrum ex his duobus sufficit, nempe vel quod sit contra legem divinam, tametsi non sit contra conscientiam; vel quod sit contra conscientiam erroneam, licet non sit contra legem divinam; quia conscientia erronea non excusat a peccato, sed illud causat, ut idem Doctor Angelicus docet supra quæst. 19. art. 5. & 6.

Objicies ultimo: Plures antiqui Theologi eruditione insignes, ut Alensis, D. Bonaventura,

ventura, Albertus Magnus, Durandus, Hugo Victorinus, Guillelmus Parisiensis, Altisiodorensis, & alii docent nullam dari ignorantiam invincibilem juris naturalis. Unde Gerson lib. de vita Spirituali lect. 14. corol. 3. testatur, eam sententiam suo tempore inter Theologos fuisse concordem: *Quidquid sit (inquit) de ignorantia facti , aut juris humani positivi , concors est sententia , nullam in his quæ legis divine sunt , cedere ignorantiam invincibilem . Id etiam videtur docere D. Thomas 3. p. quæst. 8o. art. 4. ad 5. his verbis: Hoc quod non habet aliquis conscientiam sui peccati , potest contingere dupliciter : uno modo per culpam suam , vel quia per ignorantiam juris , quæ non excusat , reputat non esse peccatum , quod est peccatum ; puta si quis fornicator reputaret simplicem fornicationem non esse peccatum mortale , &c. Quibus verbis aperte declarat , ignorantiam juris naturalis non excusare a peccato , subindeque non esse invincibilem , & inculpabilem , sed culpabilem , & vincibilem . Unde Gratianus 1. quæst. 5. Ignorantia (inquit) juris naturalis omnibus adultis damnabilis est.*

Respondeo, quod quando illi celebres, & antiqui Theologi docent, nullam dari ignorantiam invincibilem juris naturalis , loquuntur de jure naturali , ut dicit notissima illa , & generalissima principia morum , quæ nullo indigent discursu , sed statim habita notitia terminorum , ipso lumine naturalis rationis innotescunt ; vel de aliis , quæ per faciliem discursum ex istis deducuntur , non vero de illis , quæ non nisi longo , ac difficulti discursu ex primis deduci possunt , de quibus solum afferimus dari posse ignorantiam invinci-

bilem . Eodem modo intelligendus est S. Thomas, cum ait, quod *ignorantia juris non excusat a peccato*, loquitur enim de ignorantia juris naturalis, quantum ad præcepta secundaria legis naturæ , quæ ex primis sine labore , & per discursum facilem deducuntur, ut constat in exemplo, quod affert de fornicatione ; præceptum enim non fornicandi ad secundaria legis naturalis præcepta pertinet. In eodem sensu intelligi , & explicari debet Gratianus, dum ait, quod *ignorantia juris naturalis omnibus adultis damnabilis est* .

C A P U T I V .

De lege humana.

§. I.

De existentia , & quidditate legis humanae .

PRÆTER legem naturalem , & divinam, adhuc necessarias esse leges humanas , probat D. Thom. hic qu. 91. art. 3. ex eo quod lex naturalis , vel divina generalis est , & solum complectitur quædam generalia principia morum per se nota , & ad summum extenditur ad ea , quæ necessaria illatione ex illis principiis deducuntur : præter illa vero nonnulla alia sunt necessaria in Republica humana , ad rectam ejus gubernationem , & conservationem : ideoque necessarium fuit , ut per humanam rationem magis in particulari determinarentur generalia illa principia morum , quod fit per leges humanas . Idem ostendit qu. 95. art. 1. ubi docet , necessarium fuisse ad pacem hominum , & virtutem , aliquas leges ab hominibus imponi , quibus improbi , & protervi metu pœnarum a vitiis cohiberentur ,

etur, & ad virtutem impellerentur; quia ut Philosophus dicit 1. Politic. c. 2. Sicut homo, si sit perfectus virtute, est optimum animam; ita si sit separatus a lege, & justitia, est pessimum omnium. Hanc rationem tangit Isidorus lib. 5. Etymol. c. 20. his verbis: *Factæ sunt leges, ut humano metu humanæ coercerentur audacia, tutaque sit inter improbos innocentia, & in ipsis improbis formidato supplicio refrænetur nocendi facultas.* Unde si nullæ essent leges humanæ, quæ licentiam agendi cohiberent, adulteria, furta, homicidia, & quælibet alia scelera, quæ statim Rempublicam funditus evertebant, impune grassarentur, juxta illud vulgatum Augustini: *Remota justitia (quæ per leges humanas potissimum statuitur) quid sunt regna, nisi magna latrocinia?*

Lex humana est ordinatio rationis humanae ad bonum commune, ab eo, qui curam communitatis habet, sufficienter promulgata. Bonitas hujus definitionis patet ex dictis supra c. 1. cum definitionem legis in communi exposuimus. Sed circa ultimam particulam difficultas est, & controversia apud Theologos, qualem promulgationem requirat lex humana, ut obliget? Pro resolutione

Dico primo, stando in solo jure naturali, ut lex tam civilis, quam pontifícia censeatur sufficienter promulgari, sufficit, quod publicetur in curia. Ratio est, quia ad promulgationem sufficientem ex natura rei sufficit, quod lex taliter publicetur, quod de facili possit venire in notitiam subditorum: Sed promulgatione facta in curia, lex in notitiam subditorum facile devenire potest: nam cum ad Principis sedem frequens sit recursus, & concursus ex

civitatibus omnibus , quæ ejus imperio subfunt , facile est , quod in curia agitur , in omnium notitiam venire : Ergo ad promulgationem legis sufficientem ex natura rei sufficit , quod promulgetur in curia .

Dico secundo , attento jure positivo civili , leges Imperiales non obligant provincias , nisi in earum metropoli promulgantur : imo non valent , neque obligant in provincia , nisi post duos menses a promulgatione ibi facta .

Probatur prima pars ex Authentica , *Ut factæ novæ constitutiones* , quæ est constitutio 66. inter Novellas Justiniani , ubi decernitur constitutiones novas non valere , usque dum per Metropolitam palam factæ sint , id est usque dum publicentur in civitatibus metropolitanis . Ubi licet Imperator loquatur de legibus testamentorum , Glossa tamen ad omnes leges extendit , & hanc regulam Jurisperitorum affert ; Quotiescunque verba rubricæ faciunt perfectum sensum , & non repugnant corpori legis , nigris litteris exarato , & sub rubris contento , rubrica habenda est pro textu : cum igitur rubrica illius authenticæ loquatur universaliter de omnibus legibus , constitutio illa Justiniani , tametsi loquatur solum de legibus testamentorum , ad omnes tamen leges extendenda est ; subindeque nullæ leges Imperiales obligant provincias , nisi in earum metropoli promulgantur .

Ex quo probata manet secunda pars : nam Authentica illa decrevit , quod leges non obligent in provincia , nisi post duos menses a promulgatione earum , ut patet ex rubrica , quæ est : *Ut factæ novæ constitutiones post continuationem earum post duos menses valeant* . Idem constat ex Bulla quadam

Pii IV. super declaratione temporis observationis Concilii Tridentini , ubi sic ait : *Jure communi sancitum est , ut Constitutiones novae non nisi post certum tempus vim obligandi obtineant .* His enim verbis alludit haud dubie ad prædictam authenticam , cum nullibi , nisi in ea , reperiatur aliquid sanctum circa tempus , quo novæ constitutiones vim obligandi habent.

Quod diximus de legibus Imperialibus , dicendum est etiam de legibus latis a Principibus , vel Regibus subjectis Imperatori ; quia jus ferendi leges , quod habent ab Imperatore , fuit illis concessum secundum jus commune imperii , & juxta modum , ac limitationem , quam servant ipsi Imperatores .

Dico tertio . Stando juri positivo communī , & nisi sit constitutio , vel consuetudo contraria , leges Principum , qui imperio non subduntur , ut leges Regis Galliæ , & Regis Hispaniæ , non requirunt promulgationem in singulis provinciis , nec duos menses post promulgationem , sed sufficit promulgatio , quæ fit in curia Principis , id est in urbe , in qua residet , ex qua ad alia loca divulgetur .

Patet hæc conclusio : nam jure communī nihil aliud sancitum est , quod arctius possit obligare , quā prædicta Justiniani authentica : Sed illa , cum sit Imperatoria , non habet vim obligandi in terris imperio nō subditis : Ergo , &c.

Dixi , si non est constitutio , vel consuetudo contraria , quia fere ubique consuetudo est , aut lex regni , ut Reges , qui plures habent provincias , curēt suas leges in singulis provinciis promulgari , neq; aliter illæ obligēt . Et in Gallia Regiæ leges non obligant , nisi a Parlamentis recipientur . Unde aliquæ leges servantur

ur Parisiis, quæ non obligant Tolosæ, aut Burdigalæ.

Dico quarto, stando etiam in jure positivo, ad sufficientem promulgationem legum Pontificiarum non requiritur alia promulgatio, quam quæ Romæ sit; nec spatium duorum mensium, ut leges illæ habeant vim obligandi.

Probatur ex praxi, & consuetudine curiæ Romanæ: nam leges Pontificiæ solent tantum Romæ promulgari, & secundum illas Rotæ Auditores, Cardinales, & alii Judices Pontificii judicant de causis aliarum Provinciarum; licet in illis promulgatio facta non fuerit, sed simplex tantum divulgatio, nisi ex concessione, vel consuetudine gaudeant eo privilegio, quod leges Pontificiæ ibi non obligent, nisi ibidem promulgentur, aut etiam recipiantur, ut fit in regno Galliæ. Item qui Romæ non servant leges Pontificias, statim post promulgationem, nondum elapsis duobus mensibus, puniuntur, teste Navarro consil. 1. de constitut. q. 4. num. 18. Ergo, &c.

Confirmatur ex illo receptissimo axiomate, *Papa habet pedes plumbeos, & non plumeos,* quod ideo verum esse asserunt Joannes Monachus cap. *in generali*, de regulis juris in sexto, & Navarrus in dicta quæst. 4. num. 20. quia Papa neque solet, neque tenetur discurrere per singulas provincias, deferendo per illas promulgationem suarum legum: eo quod sit totius orbis unicus Pastor, ac Vicarius Christi, in rebus spiritualibus ad animæ salutem conducentibus, de cuius proinde decretis agnoscendis majorem curam debent habere fideles, quam de legibus temporalibus, a Principibus sacerularibus editis.

Quæ-

Quæres, an, ut lex humana obliget, requiratur consensus, sive acceptatio populi?

Respondeo negative, quia obligatio legis oritur ex subjectione, quia subditi prælati subsunt, & obedientia, quam illis præstare tenentur: At obedientiæ vis non oritur a subditi acceptatione, sed ab excellentia authoritatis, quam superiores habent in subditos; nam sicut in naturalibus oportuit, ut per quandam necessitatem moveantur inferiora a suis superioribus ad suas actiones naturales, puta corpora sublunaria a cœlestibus, per excellentiam naturalis virtutis divinitus illis communicate; ita in rebus humanis oportet, quod inferiores per voluntatem moveantur a suis superioribus, secundum quandam necessitatem moralem, in qua consistit obligatio legis, ut docet D. Thomas 2. 2. q. 104. art. 5. his verbis: *Obediens movetur ad imperium præcipientis quadam necessitate justiæ, sicut res naturalis movetur ex virtute sui motoris necessitate naturæ.* Ergo obligatio legis non pendet a consensu, seu acceptatione populi. Et certe pene inutilis esset potestas legislatoris, si non posset cogere subditos ad acceptandam, & observandam legem justam, & utilem. Imo et si lex cogeret subditos, & obligationem induceret, absque dependentia ab eorum approbatione, & acceptatione, subditique possent dissentire, & talem legem respuere, esset bellum utrinque justum; nam & Prælatus juste exigeret obedientiam, & observationem legis, & subditus juste resisteret; cum acceptatio legis ejus arbitrio commissa esset. Hoc autem videtur absurdum; Ergo & illud.

Hoc præcipue habet locum in legibus Pon-

tificiis , & Ecclesiasticis : cum enim Summus Pontifex suam potestatem immediate recipiat a Christo , non potest in usu illius pendere ab Ecclesiæ consensu : unde certum omnino videtur , posse Summum Pontificem obligare Ecclesiam legibus independenter a consensu , & acceptatione illius . Immo Suarez lib. 4 de legibus cap. 16. ait ; id tutu fide negari non posse .

Dices , saltem legislator civilis accipit potestatem legislativam a Republica : Ergo dependenter a consensu illius leges fert , subindeque saltem leges civiles sub hac tacita conditione feruntur , ut vim habeant , si fuerint acceptatae , & usu receptæ . Unde apud Romanos non antea leges obligabant , quam fuissent a populo acceptatae , ut refert Alexander ab Alexandro lib. 6. dierum genial. cap. 16.

Respondeo , concesso Antecedente , negando consequentiam : nam semel a populo in Principem translata potestate legislativa , penes ipsum tantam est leges condere , iisque populum obligare , independenter ab ipsius consensu , & acceptatione . Nec ullum fundamentum est afferendi populum potestatem legislativam in Principem transtulisse sub hac conditione , ut leges vim habeant , si fuerint acceptatae , & usu receptæ ; præsertim cum talis conditio valde debilitet obedientiam , & subordinationem subditorum erga superiores , quæ ad rectam gubernationem maxime necessaria est , ut passim docet Aristoteles in libris Politicorum . Unde licet populus Romanus initio sub hac conditione suam potestatem in legatores transtulisset , ideoque tunc temporis eorum leges antea

non obligarent, quam a populo acceptatae fuissent; postea tamen idem populus totam suam potestatem transluit in legislatores, & capita Reipublicæ, eaque sine ulla limitatione usi sunt.

§. II.

De potestate legis humanae.

QUæres primo, utrum lex humana possit præcipere, vel prohibere actus internos?

Respondeo, illam non posse præcipere, aut prohibere actus pure internos, qui nullam cum exterioribus connexionem habent, nec illos, qui tantum per accidens cum illis conjunguntur, bene tamen illos, qui per se requiruntur ad integratatem exteriorum in genere moris.

Prima pars hujus resolutionis patet, quia potestas legislativa per se primo tendit ad externum, & commune Reipublicæ regimen: Sed actus pure interni non sunt apta materia humani regiminis; unde communiter dicitur, quod Ecclesia non judicat de internis: Ergo potestas legislativa ad actus pure internos, qui nullam cum exterioribus connexionem habent, extendi nequit.

Ex hoc probata manet secunda pars: nam actus interni, qui per accidens tantum conjunguntur cum exterioribus, cum non sint per se sensibiles, non sunt apta materia humani regiminis: Ergo non possunt a lege humana præcipi, vel prohiberi. Sic quando lex humana præcipit jejunium observandum tempore quadragesimæ, non præcipit internum motivum vel pœnitentiæ, vel temperantiæ; quia illud per-

per accidens coniunctum est externo jejuno , cum non referat , ex quo motivo præceptum jejunii impleatur , modo impleatur ex honesto motivo .

Tertia vero pars , quam negant plures ex Recentioribus , hac ratione suadetur : Qui habet potestatem præcipiendi aliquid , habet etiam potestatem præcipiendi illud , quod necessariam connexionem cum eo habet , ut illud subsistat : Ergo lex humana potest præcipere illos actus , qui per se requiruntur ad integritatem exteriorum in genere moris . Quo pacto attentio connectitur cum oratione vocali ; non enim est vera oratio exterior in genere moris considerata , nisi procedat ex aliqua attentione interiori . Unde præceptum Ecclesiasticum de horis canonicis recitandis non solum ad attentionem , & devotionem exteriorem , sed etiam ad interiorum obligat , ut in dissertatione de opinionum probabilitate fuse contra Caramuel ostendimus .

Quæres secundo , an leges humanæ , tam civiles , quam Ecclesiasticae , si justæ sint , habeant vim obligandi ad culpam , & in foro conscientiæ ?

Respondeo affirmative cum D. Thoma hic qu. 96. art. 4. , quod probat hac ratione : Lex humana , sive civilis , sive Ecclesiastica , derivatur a lege æterna : Ergo habet vim obligandi in foro conscientiæ . Antecedens constat ex dictis supra cap. 2. corollario 3. in quo ostendimus universas leges ab æterna derivari . Consequentia vero probatur : quod derivatur ab aliquo , participat rationem ejus suo modo , scilicet juxta suam naturam ; cum igitur de ratione legis æternæ sit obligare posse in foro conscientiæ creaturam rationalem ,

lem, unde peccatum definitur ab Augustino dictum, factum, vel concupitum contra legem æternam, id ipsum etiam erit de ratione legis humanæ, sive civilis, sive Ecclesiasticae, suo modo, & juxta suam naturam.

Dices: Potestas Principum Sæcularium est mere temporalis, & politica: Ergo non potest se extendere ad aliquid spirituale, nec per consequens obligare ad culpam, & in foro conscientiæ.

Respondeo potestatem Principum sæcularium dici temporalem, ratione objecti, quia secundum se tota est de personis, rebus, & actionibus temporalibus; ratione tamen obligationis, quam inducit, dici potest spiritualis, & in conscientia obligare. Licet enim per se primo respiciat bonum tempore Reipublicæ, & per se primo non intendat ligare conscientias, sub poena damnationis æternæ, sed solum præcipere aliquid ad promovendum tale bonum, sub poena temporali, proportionata ad consequendum suum finem; ex consequenti tamen, quia hoc præcipit, ut stat sub ordine divinæ potestatis, & in virtute illius potentis obligare in foro conscientiæ, quantum ad culpam, & poenam æternam, ad culpam, & in foro conscientiæ obligat, si justa sit. Unde Apostolus ad Roman. 13. *Qui resistit potestati, Dei ordinationi resistit: qui autem resistunt, ipsi sibi damnationem acquirunt.* Quod de damnatione etiam apud Deum Chrysostomus, & alii interpretes ibidem intelligunt.

Dixi, si justa sit, quia ut docet D. Thomas hic q. 96. art. 4. leges humanæ injustæ non obligant in foro conscientiæ, nisi forte propter vitandum scandalum, aut turbationem.

„ Tri-

„ Tripliciter vero (*inquit*) leges humanæ
 „ possunt esse injustæ , nempe vel ex fine ,
 „ sicut cum aliquis præsidens leges imponit
 „ onerosas subditis , non pertinentes ad u-
 „ tilitatem communem , sed magis ad pro-
 „ priam cupiditatē , vel gloriam . Vel ex
 „ authore , sicut cum aliquis legem fert ul-
 „ tra sibi commissam potestatem . Vel et-
 „ iam ex forma , puta cum inæqualiter o-
 „ nera multitudini dispensantur , etiamsi or-
 „ dinentur ad bonum commune . Et hujus-
 „ modi magis sunt violentiæ , quam leges ;
 „ quia , ut ait Augustinus , lex esse non vi-
 „ detur , quæ justa non fuerit . „ Quæ si ad
 particulares leges quis sciat applicare , inde
 (subdit Cajetanus) multos casus conscienc-
 iæ in gabellis , & gravaminibus , & hu-
 jusmodi oneribus publicis clarificabit .

Quætes tertio , an leges humanæ obliga-
 re possint ad sui observationem cum per-
periculo , & dispendio vitæ ?

Respondeo affirmative : nam quando peri-
 clitur salus publica , nisi ei cū manifesto dis-
 pendio vitæ aliquorum suorum civium subve-
 niatur , Princeps , vel Respublica potestatem
 habet obligandi subditos ad exponendam vi-
 tam pro salute Reipublicæ , & ad agendum a-
 liquid , non obstante evidenti periculo vitæ .
 Sic in bello iusto milites a ducibus jubentur
 servare stationem periculosam , vel facere ir-
 ruptionem cum periculo , & dispendio vitæ .
 Sic etiam tempore pestis possunt Prælati , &
 Magistratus præcipere , ut aliqui Presbyteri , &
 Medici maneant in civitate , ut ei in tanta ne-
 cessitate succurrant . Ratio est , quia omnis
 perfecta communitas debet habere medium
 conservandi salutem totius , etiam cum dispen-
 dio alicujus suæ partis : cum non minus de jure
 natu-

naturæ sit, ut totum se conservet etiam cum destructione partis, quam ut pars se periculo exponat propter conservationem totius. Unde leges illæ, quæ cives obligant ad expendam vitam pro salute Reipublicæ, non sunt pure humanae, sed aliquid juris naturalis includunt.

Quod si petas, unde cognosci possit, an lex humana obliget cum dispendio vitae? Respondebo breviter id ex hac potissimum regula colligi posse. Quotiescumque id, quod præcipitur lege humana, ita conductit ad bonum commune, ut majus bonum commune sit observare legem, quam servare propriam vitam, tunc lex obligat etiam cum dispendio vitae. Si autem sit majus bonum commune conservare vitam propriam, quam servare legem, tunc lex humana non obligat cum vita dispendio: Et ratio est, quia conservatio vita civium spectat ad bonum commune, sicut observatio legis: Ergo nisi obligatio legis sit majoris momenti in ordine ad bonum commune, quam conservatio vita civium, legislator cum tanto dispendio non potest obligare ad legis observationem; obligaret enim irrationaliter, cum non ordinaret minus bonum ad majus, sed e contra majus ad minus.

Ex hac regula colligitur, Carthusianum in extrema necessitate ægritudinis constitutum non solum posse licite a carnibus abstinere, sed etiam ad id teneri; quia majoris momenti est conservatio strictioris observantiae, ac discipline in toto Carthusianorum Ordine, quam vita unius Carthusiani. Similiter possunt, ac debent aliorum Ordinum Religiosi, ex amore, & reverentia suæ regulæ, ita illam servare, ut a morbo liberari nolint, si necesse sit constitutiones suæ Religionis violare, et si ex earum

earum violatione observatio regulæ non pa-
rum teperceret , & disciplinæ religiosæ vi-
gor multum imminueretur.

§. III.

Quinam legibus humanis subjiciantur?

Dico primo , non solum subditi , sed et-
iam Principes , & Legislatores sub-
duntur legibus suis , quantum ad vim di-
rectivam , sed non quoad coactivam , seu
coercitivam . Ita D. Thomas hic q. 96. ar.
5. ad 3.

Prima pars patet , nam caput , quantum fie-
ri potest , debet conformari corpori , & mem-
bris communitatis , alias deformitas maxima
esset in illa , juxta illud Augustini 3. Confess.
cap. 8. *Turpis est omnis pars suo universo non
congruens.* Ergo conveniens est , quod Prin-
ceps , vel Legislator , qui est caput Reipublicæ ,
servet leges suas , non minus quam subditi ,
subindeque illis subditur , quantum ad vim di-
rectivam , ex ipsa lege naturali , quæ dictat non
minus contra rationem esse caput discordare a
membris , quam membra a capite . Unde L.
*Digna vox C. de legibus sic dicitur: Digna vox
majestate regnantis est , legibus alligatum se
Principem profiteri.* Et L. Princeps ff. de le-
gibus : *Paret legi quisquis legem sanxeris.* Si-
milia habentur in jure Canonico cap. Justum
dist. 9. his verbis : *Justum est Principem legibus
obtemperare suis.* Tunc enim jura sua ab omni-
bus custodienda existimat , quando & ipse il-
lis reverentiam præbet . Et ne videatur id con-
silio tantum causa dici , subditur : *Principes
legibus teneri suis , nec in se posse damnare ju-
ra , quæ in subjectis constituant ; justa est e-*

nim authoritas eorum, se quod populis prohibent, sibi licere non patientur. Demum Ambrosius ad Valentinianum Imperatorem epist. 32. ita loquitur: *Quod cum præscripsiisti aliis, præscripsiisti & tibi. Leges Imperator fert, quas primus ipse constituit.*

Secunda pars probatur ex discrimine, quod reperitur inter vim directivam, & coactivam, seu coercitivam legis. Vis enim directiva respicit actus licitos, vel illicitos, aut indifferentes; coactiva vero, seu coercitiva, pœnam inductivam ad observantiam legis. Sed Princeps non potest cogi, vel puniri pœna inductiva ad legis observantiam, cum nullum habeat superiorem, a quo cogatur, & nemo propriè a seipso cogi possit: Ergo Princeps non subditur suis legibus, quoad vim coactivam, seu coercitivam, sed ab eis quantum ad obligationem pœnæ subeundæ solutus est.

Dico secundo. Clerici non obligantur legibus civilibus Principum secularium, quoad vim coactivam, bene tamen quoad vim directivam, & ex naturali æquitate, qua tenentur se conformare aliis membris Reipublicæ.

Prima pars est certa, cum Clerici sint exempti a jurisdictione Principum secularium, cap. *Decernimus de judiciis*, ca. *Sanctæ Mariæ*, de constitutionibus, cap. *Seculares*, de foro competenti in 6. Quam exemptionem aliqui putant esse de jure divino, idque colligunt ex Scriptura Sacra; ex novo quidem testamento, ex illa Christi illatione Matth. 17. *Ego liberi sunt filii*, a legibus scilicet tributorum: ex veteri autem ex Genes. 47. ubi Joseph omnem terram Ægypti subjecit Pharaoni, *præter terram sacerdotum*. Alii vero censent,

sent, hanc Clericorum exemptionem solum esse de jure humano, nimurum ex prædictis Summorum Pontificum constitutionibus, & Principum sacerdotalium favore, quod tamen jus humanum juri naturali, & divino maxime consentaneum est. Cui sententia favere videtur D. Thomas in illud ad Roman. 13. *Ideo tributa*, nam ibi loquens de obligatione solvendi tributa, sic ait: *Ab hoc debito liberi sunt Clerici ex privilegio Principum*, quod quidem æquitatem naturalem habet.

Secunda pars ex eo constat, quod Clerici, non obstante clericatu, sunt cives Reipublicæ, & ejus membra: Ergo ex naturali æquitate, & ratione conformitatis, quam cum aliis Reipublicæ membris habere debent, tenentur servare leges civiles Principum sacerdotalium, quæ non derogant Privelegiis Clericorum, & ad pacem, ac tranquillitatem Reipublicæ spectant.

Dico tertio. Illi, qui sunt in territorio alieno, sive transeundo, sive immorando, non tenentur servare leges proprii territorii. Ratio est, quia jurisdictionis authoritas limitatur intra proprium Principis territorium, sicut vis activa agentium naturalium limitatur, & coaretur intra sphæram suæ activitatis: Ergo sicut illa non possunt agere ultra propriam sphæram, ita nec leges Principum obligare extra proprium illorum territorium. Unde c. 2. de constitutionibus in 6. dicitur, pœnam latam per statutum Episcopi non incurri ab eo, qui extra illius territorium non servat tale statutum: quia (inquit) *extra territorium jus dicenti non paretur impune*, ut habetur lege ultima *si de jurisdictione omnium judicum*.

Dico quarto. Peregrini, & advenæ obligan-

gantur ad servandas leges territorii, per quod transeunt. Hæc conclusio sequitur ex dictis in præcedenti: Si enim brevis absentia sufficit ad eximendum viatores a subjectione legis proprii territorii, a quo discedunt, debet quoque sufficere brevis præsentia ad subjiciendum illos legibus alieni territorii, per quod transeunt. Par enim est, ut sentiat onus, qui sentit commodum, ut dicitur regula 55. de regulis juris in 6. Unde advenæ, & peregrini transeuntes per loca, in quibus festum aliquod celebratur, si sint ibi toto mane diei festi, tenentur sacramentum audire, non tamen ibi commorari, ut audiant. Similiter tenentur, quandiu ibi sunt, abstinere ab opere servili die festo, & cibis prohibitis in die jejunii. Illi vero, qui mane discedunt ex proprio territorio, in quo jejunium obligat, & nocte perveniunt ad locum, ubi jejunium non obligat, possunt nocte cœnare, carnesque comedere; cum discedens non teneatur servare leges sui territorii, sed possit sequi leges favorabiles loci, per quem transit. Ex quo inferes, ratum, ac validum esse matrimonium clandestinum, celebratum in loco, ubi Tridentinum non servatur, ab incola loci, in quo servatur. Sed de hoc fusius in Tractatu de matrimonio cap. 3.

C A P U T V.

De aliquibus speciebus legum humanarum.

Hucusque diximus de lege humana in communi, jam de quibusdam illius speciebus breviter differendum est. Et primo de lege

lege pœnali, secundo de lege non scripta, quæ consuetudo appellatur, tertio de lege favorabili, seu de privilegiis.

§. I.

De lege pœnali.

LEx pœnalis dicitur omnis illa, quæ præcepto, vel prohibitioni pœnam expresse apponit: cuiusmodi sunt plurimæ leges Ecclesiasticæ, & civiles, quarum istæ sæpe apponunt pœnas temporales mortis, exilii, verberationis, &c. illæ vero pœnas vel pure spirituales, ut censuras, & irregularitates, vel mixtas, ut privationes officii, aut beneficii, aut vocis activæ, vel passivæ; vel denique interdum pure temporales, ut jejunia, corporis macerationes, & similia.

Circa hanc legem triplex est difficultas, & controversia inter Theologos. Prima est, an quando legislator concedendo legem pœnalem, nihil exprimit de obligatione ad culpam, lex pœnalis ad eam obliget, vel solum ad pœnam? Respondeo illam obligare non solum ad pœnam, sed etiam ad culpam, nisi legislator contrarium expresserit: obligatio enim ad culpam consequitur legem per modum proprietatis, impedibilis tamen a legislatore: Ergo posita vera lege, qualis est pœnalis, statim sequitur obligatio ad culpam; nisi legislator ferendo talem legem declareret se non intendere obligare ad culpam.

Confirmatur: Leges humanæ, quæ absque pœnæ comminatione ponuntur, ad culpam obligant, ut constat ex dictis capite precedenti: Ergo & illæ, quæ statuuntur cum commi-

na-

natione pœnæ. Probatur consequentia, quia comminatio non tollit obligationem ad culpam, sed indicat illam. Nam ut ait Augustinus lib. I. retract. c. 9. *Omnis pœna, si justa est, peccati pœna est, & supplicium nominatur.*

Dices. Omnis lex, maxime pœnalis, benigne interpretanda est, quando aliud non constat de mente legislatoris: Ergo quando in lege pœnali legislator suam non exprimit voluntatem obligandi ad culpam, existimandum est, ipsum obligare ad solam pœnam. Consequentia manifesta videtur; nam alias non benigne, sed valde odiose mentem legislatoris interpretamur.

Respondeo, quod licet omnis lex, maxime pœnalis, benigne interpretanda sit, hoc tamen debet fieri juxta naturam ipsius legis, non vero extrahendo illam a suo statu connaturali; unde cum pertineat ad statum connaturalem legis, ut obliget ad culpam, nisi contrarium legislator exprimat, eam ad culpam obligare censendum est, nisi oppositum legislator expresserit.

Secunda difficultas est, an leges pœnales obligent ad pœnam ante sententiam Judicis, vel solum post ejus sententiam?

Respondeo illas ante sententiam Judicis obligare ad pœnas privativas, quales sunt excommunicatio, irregularitas, suspensio, privatio vocis activæ, & passivæ; non tamen ad pœnas activas, quæ requirunt aliquam actionem executivam, v. g. pœna mortis, exilii, aut spoliationis bonorum.

Prima pars patet: nam leges, quæ ipso facto imponunt pœnas excommunicationis, suspensionis, interdicti, irregularitatis, privationis, vocis activæ, & passivæ, & fructuum beneficiorum.

non recitantibus officium, sortiuntur statim suum effectum, ante sententiam Judicis. Idem dicendum de lege Ecclesiastica, quæ in pœnam criminis reddit aliquos inhabiles ad matrimonium ipso facto, nimirum adulteros spe futuri matrimonii adulterantes, aut mortis conjugis reos: talium enim matrimonium ante omnem sententiam irritum est.

Secunda vero pars, quæ est de pœnis acti-
vis, seu ad sui executionem aliquā rei actionem requirentibus, videtur manifesta: tum quia lex obligans hominem ad exequendum in se pœnam legis per propriam actionem, ante sententiam Judicis, nimis rigida videtur, ac dura, ipsique naturæ repugnans; præsertim si pœna ipso facto subeunda gravis, & acerba sit, & aliunde non sit necessaria ad bonum commune Reipublicæ; sufficit enim bono communi, si reus patiatur talem pœnam post sententiam Judicis. Tum etiam, quia exequi pœnam requirentem aliquam actionem, per se loquendo, non ad reum, sed ad Judicem, & ejus ministrum pertinet. Unde D. Thomas 2. 2. q. 62. ar. 3. sic ait: *Quantum ad culpam adhibetur remedium per pœnam, cuius inflictio pertinet ad judicem. Et ideo antequam sit condemnatus per Judicem, non teneatur restituere plusquam accepit, sed postquam condemnatus est, tenetur pœnam solvere.*

Tertia difficultas est, an transgressor legis penalis teneatur in conscientia subire pœnam legis post judicis sententiam?

Resp., illum teneri in conscientia subire pœnam, quæ ad sui executionē requirit actionem, quæ commodius exercetur a reo: non vero illā, ad cuius executionem requiritur actio, quæ cōmodius exercetur a judice, vel ejus ministro.

Pri-

Prima pars videtur manifesta: nam quando quis exilio, vel pœna pecuniaria multetur, tenetur egredi e regno, vel civitate, aut pecuniam solvere, hoc enim nihil crudelitatis, aut injustitiae continet. Secunda vero probatur ex eo, quod sententia pœnalis, sicut & lex, benigne est interpretanda, cum sententia sit applicatio illius legis, quam benigne esse interpretandam est communis animi conceptio, & dispositio juris: Ergo non tenetur reus ad equeudam illam pœnam in seipso, cuius executio commodius fit a judice, vel ministris, sed sufficit, quod sit paratus ad illam sustinendam, quando infligetur ab illis. Patet consequentia, nam alias non benigne, sed durissime interpretaremur sententiam illam. Unde D. Thomas 2. 2. quæst. 69. artic. 4. ad 2. Nullus ita condemnatur, quod ipse sibi inferat mortem, sed quod ipse mortem patiatur; & ideo non tenetur facere id, unde mors sequatur, tenetur tamen non resistere agenti, quin patiatur, quod justum est eum pati. Sicut etiam, si aliquis sit condemnatus, ut fame moriatur, non peccat, si cibum sibi occulte ministratum sumat, quia non sumere, esset seipsum occidere.

S. II.

De Consuetudine.

Consuetudo est *jus quoddam moribus institutum, quod pro lege suscipitur, cum deficit lex*. Unde cum lex tripliciter possit deficere, primo cum non est, secundo cum est inutilis, tertio cum est dubia, vel obscura, pro illo triplici legis defectu consuetudo suscipitur. Nam primo ubi non

est lex, suscipitur consuetudo legis introduc-tiva, seu vim habens legis. Secundo ve-nit in defectum legis inutilis consuetudo ab-rogrativa illius. Tertio cum lex obscura, vel dubia est, venit in ejus defectum con-suetudo, quæ vim habet interpretandi legem dubiam, vel obscuram. Quare Theologi do-cent, consuetudinem legitime introduc-tam triplicem habere vim, nempe instituendi, abrogandi, & interpretandi legem, eam-que posse novam instituere legem, vete-rem abrogare, & dubiam interpretari. Un-de cap. *Cum dilectis de consuetudine, con-suetudo dicitur optima legum interpres.*

Duo tamen breviter observanda sunt. Pri-mum est, quod sicut de ratione legis est, ut præcipiat actus bonos, ita ut consuetudo vim legis habeat, requiritur, ut id, de quo est, sit actus bonus; unde consuetudo de re il-llicita, aut indifferenti vim legis non habet. Ex quo fit, nullam introduci posse consue-tudinem, quæ vim obligandi habeat contra legem naturalem; cum lex naturæ id solum præcipiat, quod est intrinsece bonum, & vetet solum id, quod est intrinsece malum.

Alterum est, quod cum omnis lex pro-cedere debeat a voluntate, & ratione Prin-cipis, ut secundo vim legis habeat, requiri-tur, ut Princeps, vel alia potestas superior, ad quam pertinet condere leges, ei con-sentiat personaliter, vel legaliter, seu juridi-ce. Dicitur autem consentire personaliter, quando per se immediate consentit tacite, vel expresse. Legaliter vero, seu juridice con-sentire censetur, quando vel ipse, vel prædecessores tulerunt aliquando legem, vi-cujus talis consuetudo approbatur.

Quod vero spectat ad tempus necessa-rium

rium pro justa, & legitima consuetudine, variae circumferuntur Doctorum sententiae. Sed illis brevitatis causa prætermissis, dicendum est, quod quando consuetudo introducitur a populo, cum expresso consensu Principis, non est opus expectare tempus aliquod determinatum; quia cum consuetudo non minorem vim habeat, quam lex scripta, si accedat consensus Principis, vivæ vocis oraculo expressus, non est dubium, quin firmet illico consuetudinem; subindeque non est expectandum determinatum aliquod tempus ad ejus validitatem. Si autem consuetudo introducitur a populo, ex tacito, seu præsumpto consensu Principis, tunc servandum est tempus a jure determinatum; quia tunc Princeps non præsumitur consentire, nisi evoluto tempore a jure determinato, præsumitur enim velle servare ea, quæ jure communi statuta sunt. Cæterum, cum nec in jure civili, neque in canonico ullum certum tempus legatur determinatum pro introducendâ consuetudine, hinc fit, quod tempus a jure requisitum ad præscriptionem requiri censeatur ad consuetudinem. Unde juxta hanc regulam consuetudo contra legem civilem requirit decem annos, contra ecclesiasticam quadraginta.

§. III.

De Privilegiis.

Privilegium est lex a jure communi eximens, & jus aliquod privatum, seu speciale, & favorable concedens. Vel ut dicitur in cap. *Abbate*, de verb. signif. est *lex privata speciale aliquid indulgens*. Un-

de sicut de essentia legis non est, quod sit scriptis exarata, ita nec ad essentiam, aut valorem privilegii scriptura necessaria est, sed potest verbo statui, sicut & lex. Item sicut lex permanens est, nec expirat morte legislatoris, ita nec privilegium. Differt tamen a lege in duobus. Primo quia lex jus commune, privilegium vero jus speciale respicit. Secundo, quia lex, quandiu est in vigore, semper obligat subditum: privilegium vero a legis observatione privilegiatum excipit.

Dividitur autem primo in reale, & personale. Reale est, quod datur immediate alicui rei, muneri, & conditioni distinctae a persona, ut causæ piæ, templo, prædio, statui clericali, vel regulari, muneri Episcopali, conditioni pupillorum, vel scholasticorum, &c. Personale est, quod immediate datur personæ ratione sui, & ex intentione ut ei provideatur; ut si alicui concedatur, ut non solvat decimas, ut sit immunis a tributis, ut absolvere possit a reservatis, vel dispensare ab irregularitatibus. Reale est perpetuum, & durat cum re, officio, statu, dignitate, aut conditione, cui annexitur. Personale est ad tempus, extinguiturque cum persona, cui conceditur, juxta regulam septimam juris in sexto: *Privilegium personale personam sequitur, & extinguitur cum persona.*

Dividitur secundo in privilegium gratiosum, remunerativum, & conventionale. Gratiosum est, quod datur gratis, sine ullis meritis privilegiati. Remunerativum, quod datur in præmium meritorum ipsius. Conventionale, quod datur pacto, seu conditione interveniente.

Dividitur tertio in locale , & generale .
Isto licet uti ubique , illo non nisi in loco , pro quo concessum est .

Dividitur quarto in favorable , & odiosum : favorable est illud , quod nemini affert incommodum , ut vesci lacte , vel butyro in quadragesima . Odiosum , quod licet faveat privilegiato , alteri tamen simul nocivum , vel incommodum est , ut eximi a vectigalibus , aut tributis , cum onere aliorum .

Dividitur quinto in affirmativum , quo facultas aliquid faciendi conceditur , & negativum , quod dat facultatem ad aliquid omittendum . Plures sunt aliæ divisiones privilegii , pro quarum notitia recurrendum est ad eos , qui de privilegiis ex professo , & fusius tractaverunt .

Quæres primo , an , ut profint privilegia , debeant privilegiato esse nota , vel sufficiat , quod ea a Principe data , & subscripta fuerint , & in curia authentice expedita ?

Respondeo , si ea privilegia non possint habere effectum , vel usum sine periculo peccati , antequam innotescant , non valere sine notitia præhabita ; quia probabilitas est , Principem non velle dare occasionem illius pravi usus , nec velle dispensare nisi propter usum honestum . Unde dispensatio contrahendi matrimonium cum consanguinea debet partibus innotescere , ut valide contrahant , nec sufficit dispensationem in curia Romana authentice expeditam , & subscriptam , seu bullatam esse , si adhuc partes id ignorent . Privilegia vero , quæ antequam innotescant , possunt habere effectum , sine periculo peccati , effectum habent ante ullam notitiam a

privilegiario habitam , ab ipsa die expedi-
tionis , & acceptationis illorum per procu-
rаторem ; quia cum procurator faciat u-
num cum ipso privilegiario , ut morale in-
strumentum cum principali agente , quid-
quid agit procurator nomine privilegiarii ,
privilegiarius id agere censetur .

Quæres secundo , an cessante causa pri-
vilegii , ipsum privilegium cesseret ?

Respondeo affirmative : Sic privilegium
non solvendi decimas alicui Ecclesiæ , quia
habet aliunde , unde ministri sustententur ,
cessat , quando Ecclesia desinit habere , un-
de illi sustententur . Sic etiam cessat pri-
vilegium indultum Canonicis , ut absentes
recipient fructus præbendarum suarum , in
gratiam studiorum , quando illi studiis in-
cumbere desinunt .

C A P U T V I .

De interpretatione legum humanarum per epikiam .

LIET interdum agere contra verba legis
per epikiam , sive benignam , & pru-
dentem ejus interpretationem , quando sci-
licet observatio litteralis esset communi
bono , & saluti perniciosa , periculumque
non patitur , ut ad superiorem recurri pos-
sit ; tunc enim ipsa necessitas dispensatio-
nem habet annexam , quia necessitas non
subditur legi . Exempli gratia : Lex gene-
ralis est , ne aperiantur noctu portæ civi-
tatis : sed non obligat in eo casu , quo no-
ctu advenirent copiæ auxiliares , urbis de-
fensioni necessariæ , essetque periculum , ne
si mox in urbem admitterentur , interfice-
rentur ab hostibus urbem obsidentibus . Li-

cet

cet etiam interpretari legem, quando ejus observatio litteralis vergit in damnum notabile alicujus: v. g. lex generalis est, depositum esse reddendum; æqua tamen, & rationabilis interpretatio est, non debere reddi in eo casu, quo noceret repetenti, aut alteri innoxio; ut si furiosusensem suum repeatat ad seipsum occidendum, vel alium, sine justa causa. Item licitum est verba legis interpretari in eo casu, in quo nimis dura esset, ac molesta ejus observatio. David enim 1. Regum 21. judicavit legem prohibentem aliis, quam Sacerdotibus edere panes propositionis, non obligare in ea necessitate, (quamvis non extrema) in qua erat ipse cum suis constitutus. Similiter Apostoli Matth. 12. interpretati sunt legem Sabbati non obligare ad non vellendas spicas, in simili necessitate edendi. Quod sapienter factum esse dubitari non potest, cum utrumque factum Christus loco citato laudaverit.

Si vero quæras, an in dubiis liceat uti ejikia, & mentem legislatoris interpretari?

Respondeo id non licere, manente dubitatione. Nam ut ait D. Thomas hic quæst. 96. artic. 6. ad 2. *Si dubium sit, debet vel secundum verba legis agere, vel superiorem consulere.* Et quodl. 8. art. 13. *Si quis in quandam dubitationem incidat contrarietate opinionum, & manente dubitatione plures præbendas habeat, periculo se committit, & sic procul dubio peccat.* Nec obstat, quod idem S. Doctor 2. 2. quæst. 120. artic. 1. ad 3. oppositum docere videatur, his verbis: *Dicendum, quæd interpretatio habet locum in dubiis, &c.* Hoc enim non debet intelligi de dubiis, stante judicio

dubio, sed quando dubietas deponitur, & tollitur per rationem aliquam, quæ verior, aut probabilior judicatur; tale enim judicium sufficit ad prudenter operandum, quando necessitas agendi instat, & non potest regula certior haberi. Alioquin enim cum in rebus moralibus, & in casibus particularibus sæpiissime dubia occurrant, neque pateat recursus ad superiorem, qui legem interpretetur, intolerabile onus esset, & excedens humanam conditionem, si non possemus in hujusmodi casibus sequi sententiam, quæ nobis verior, & probabilior apparet, quamvis forte a veritate deviet. De quo fusius in tractatu de actibus humanis.

C A P U T VII.

De dispensatione a legibus humanis.

Dispensatio est juris relaxatio: unde differt a legis interpretatione in eo, quod hæc declarat tantum legem non habere vim obligandi in aliquo casu, vel persona particulari; illa, adhuc vigente legis obligatione, subditum ab ea eximit. Quo fit, ut legem interpretari non sit tantum superioris, sed etiam subditi, qui per ejikiam potest in casu particulari declarare legem non obligare: e contra vero in lege dispensare non potest nisi superior, cum sit actus jurisdictionis, qui superioritatem requirit in dispensante, & subjectiōnem in eo, cum quo dispensatur.

Licet in legem divinam non possit cadere dispensatio proprie, & stricte sumpta, quia Deus omnia singularia, & contingentia prævidet; nec in legem naturalem, cum illâ nihil

hil aliud sit , quam impressio legis divi-
næ , & æternæ facta in mentibus nostris ;
bene tamen in legem humanam , quia ni-
mirum legislator humanus , quantumcum-
que prudens , non potuit singulos casus e-
mergentes , & contingentes prævidere , jux-
ta illud Sapient. 9. Cogitationes mortalium
timide , & incerte providentiae nostræ . Ad-
do , quod sicut ad bonum commune con-
ducit eximere aliquas personas a lege com-
muni per speciale privilegium ; ita ad idem
bonum commune promovendum convenit
cum aliquibus personis in eadem lege dis-
pensare ; cum non minus per privilegium ,
quam per dispensationem fiat a communile-
ge relaxatio.

Quæres primo , an liceat superiori subdi-
tum sine iusta causa a lege humana dispensare ?
Respondeo negative cum S. Thoma hic qu.
97. artic. 4. ubi docet , quod superior sine cau-
sa , & pro sola voluntate dispensans cum infe-
riori peccat contra fidelitatem erga Rem-
publicam , quæ ei potestatem legislativam , in
qua includitur dispensativa , commisit , ut il-
la uti posset in ejus bonum , & commodum ,
non vero in ejus destructionem , & nocumen-
tum . Agit etiam contra prudentiam , exi-
mendo a lege communi eum , qui non est exi-
mendus . Item peccat contra justitiam , quia
eximere ab onere communi eum , qui non est
eximendus , est vitium acceptionis persona-
rum , oppositum justitiae distributivæ . Unde
Bernardus lib. 3. de considerat. c. 4. Ubi ne-
cessitas viget , excusabilis dispensatio . Ubi u-
tilitas provocat , dispensatio laudabilis est .
Cum nihil horum est , non plane fidelis dispen-
satio , sed crudelis dissipatio est . Non peccat
tamen inferior utendo dispensatione concessa

a superiori sine legitima causa ; quia nullus peccat utendo jure suo : At sic dispensatus utitur jure suo , utendo indulgentia dispensationis sibi concessæ : Ergo non peccat.

Nec valet, si dicas cum P. Martinono, quod licet utens tali dispensatione non peccet contra legem humanam , quæ desinit ipsum obligare , peccat tamen contra jus naturale , quia turpis est pars , quæ toti non consentit . Non valet, inquam , quia licet turpis sit pars , quæ a toto sine causa discordat , non tamen quæ discordat a toto cum causa : At ille, qui utitur tali dispensatione , non discordat a toto sine causa ; nam ad non servandum legem illam , in qua est dispensatus , habet causam , & titulum legitimum , scilicet beneficium dispensationis : Ergo nec contra legem humanam , nec contra jus naturale peccat.

Observandum tamen est , dispensationem factam a Summo Pontifice in votis , vel in aliis , quæ sunt de jure divino , aut naturali , sine legitima causa , invalidam esse , subinde que sic dispensatum non posse tali dispensatione uti , tuta conscientia ; quia Summus Pontifex non accepit a Christo potestatem dispensandi in jure divino , aut naturali , sine rationabili causa ; ut recte observant Cajetanus in summa , verbo *Dispensatio* , Sylvester verbo *Votum* 4. quæst. 3. , & Soto de Justitia , & Jure quæst. 7. art. 3. ad 3. Quantum vero ad ea , quæ spectant ad jus humanum , & Ecclesiasticnm , potest Summus Pontifex , ex plenitudine sue potestatis , valide in illis dispensare , non tamen licite , si nulla justa causa talis dispensationis existat . Unde Bernardus lib. 5. de considerat. ad Eugenium Papam hæc scribit :

Sic facient probari vos habere plenitudinem

potestatis, sed justitiae forte non ita. Hoc faciis quia potestis, sed utrum & debeatis, quæstio est.

C A P U T V I I I .

De abrogatione legum humanarum.

A Brogatio differt ab irritatione, derogatione, correctione, & cessatione legis. Irritare enim legem est impedire, ne illa obligandi robur habeat. Abrogare est, postquam vim obligandi lex obtinuit, illam in universum tollere. Derogare est illam non in totum, sed in partem tollere: Corrigere legem est illam moderari, addendo, vel demendo aliquid. Demum lex cessare dicitur, quando vel finitur tempus, pro quo illa ad obligandum posita fuit, vel cessat causa, propter quam lata fuerat.

Legislator potest abrogare legem a se latam, eadem potestate, qua illam condidit. Idemque possunt illius successores, æqualem potestatem habentes, & a fortiori superiores. At inferiores non possunt abrogare leges superiorum, cum inferior nullum jus, aut potestatem habeat in superiorem, ejusque constitutiones, ac leges.

Licet legislator peccet abrogando leges absque ulla causa, & utilitate, abrogatio tamen sic facta valida est, nec tenentur amplius subditi legem sic abrogatam servare; quia lex essentialiter constituitur voluntate, & imperio Principis, unde eo ob quamcumque tandem rationem sublato, cessat lex, subindeque obligatio ejus; nam ubi lex non est, nec legis obligatio esse potest.

Tribus modis lex antea accepta abrogari potest : primo per expressam revocationem Principis : secundo per constitutionem novæ legis priori repugnantis : tertio per contrariam consuetudinem ; sicut enim consuetudo habet vim instituendi legem , ita & eam abrogandi , ut supra cap. §. 2. dicebamus .

Justæ vero causæ abrogationis legis humanæ sunt primo , si ejus observatio reddatur nociva . Secundo , si ejus observantia reddatur incompossibilis cum lege naturali , vel divina . Tertio , si ratione subjecti , vel alicujus circumstantiæ , lex fiat observatu moraliter impossibilis . Quarto , si legum multitudo sit magna , expeditaque multitudo abrogari , & subditorum libertatem non adeo restringi circa res indifferentes .

Quæres , an quando cessat tota , & integra ratio , propter quam lex lata fuit , eo ipso cesseret legis obligatio .

Respondeo affirmative contra Suarem lib. 6. de legibus cap. 9. ubi licet fateatur , quod quando leges præcipiunt actus de se indifferentes , ut ferre , aut non ferre arma , exportare triticum , & similia , cessent , deficiente fine ad aquato , ad quem leges illæ ordinantur ; contendit tamen , quod quando lex præcipit actum de se bonum , non cessat , deficiente fine extrinseco , quem legislator intendit ; quia (inquit) bonitas intrinseca , qua pollet , est finis proximus , & intrinsecus legis . Opposita tamen sententia videtur probabilior , quia nimis lex non obligat , nisi juxta voluntatem legislatoris , a quo fertur , neque continuat obligationem , nisi perseverante moraliter eadem voluntate : Atqui cessante tota , & integra ratione , propter quam legem tulit , non

per-

perseverat moraliter voluntas obligandi : Ergo cessante tota illa ratione , lex non amplius obligat. Major patet, Minor probatur . Legislator non habuit voluntatem obligandi , nisi dependenter ab illa ratione , & propter illam , sive actus alioquin habeat intrinsecam bonitatem , sive non : At cessante ratione motiva , vel causa finali , propter quam aliquid volumus , definimus illud velle , cum impossibile sit stare actum voluntatis , sublato ejus objecto formalis : Ergo cessante tota , & integra ratione , propter quam legislator legem tulit , & voluit eam obligare , cessat quoque voluntas obligandi .

Confirmatur : Si lex præcipiat jejunium semel in hebdomada , ad Deum placandum , propter aliquam necessitatem publicam , cessante publica necessitate , cessat obligatio jejunii , quamvis citra illam necessitatem jejunium sit actus virtutis , habens bonitatem & honestatem intrinsecam temperantiae : Ergo quamvis lex præcipiat actum intrinsece bonum , si tamen cesset causa adæquata legis , seu tota ratio motiva , propter quam fuit lata , cessat ejus obligatio .

Dixi , cessante causa adæquata , quia si lex lata fuerit ob plures causas , cessante una , dummodo non cessent aliæ , propter quas lata est , non cessat obligatio legis . Sicut quia lex baptismi lata est non solum ad tollendum originale , sed etiam ad consignandum hominem Christianæ Religioni , eumque a cæteris sectis distinguendum , & reddendum idoneum , & capacem ad reliqua Sacra menta suscipienda ; tametsi prima causa cessaret , & peccatum originale per sanctificationem in utero matris esset sublatum , nihilominus adhuc lex baptis.

baptismi, propter alias causas, propter quas data est, obligaret.

C A P U T I X.

De lege divina veteri.

§. I.

*Præmittuntur, quæ de lege veteri
apud omnes sunt certa.*

LEDEM veterem esse vere divinam, & non hominum, sed Dei ipsius auctoritate immediate latam, de fide certum est, ac definitum in Tridentino sess. 4. decreto de Canonicis Scripturis, ubi sic dicitur: *Omnes libros tam veteris, quam novi testamenti, cum utriusque unus Deus sit author, Ecclesia Catholica pari pietate, affectu, reverentia suscipit, & veneratur.* Colligitur etiam aperte ex Scriptura. Nam Christus Matth. 15. loquens de lege Mosaica appellat eam *mandatum Dei*, cum ait: *Irritum fecistis mandatum Dei, propter traditiones vestras.* Et Apostolus ad Rom. 1. ad Hebr. 1. affirmat, Patrem Christi fuisse auctorem veteris testamenti. Ratio etiam suffragatur, nam ut discurrit D. Thomas hic qu. 98. art. 2. ejusdem est proponere finem, & disponere media ad finem: Sed lex Evangelica est finis legis Mosaicæ, juxta illud Apostoli ad Rom. 10. *Finis legis Christus:* Ergo idem Deus, qui est author legis Evangelicæ, est etiam author legis Mosaicæ.

Constat etiam ex Scriptura, legem veterem fuisse a Deo traditam Moysi per Angelos, in monte Sina, & ab eodem promulgatam.

Nam

Nam S. Stephanus Act. 7. de Moysé sic ait: *Hic est, qui fuit in Ecclesia in solitudine cum Angelo, qui loquebatur ei in monte Sina, & cum Patribus nostris, qui accepit verba vitae dare nobis.* Non deest etiam ratio, seu congruentia ad id suadendum: nam ut ait D. Thomas q. citata art. 3. lex vetus erat imperfecta, & quasi dispositio quædam ad legem novam: Ergo conveniens fuit, ut nova daretur a Christo Domino, vetus autem a ministris. Sic enim fit in artibus ordinatis, ut supremus artifex per suos ministros disponat ea, quæ necessaria sunt ad opus, ipsæ vero ultimam perfectionem adhibeat.

Tertio certum est, legem veterem fuisse bonam, & sanctam, utpote a Deo traditam, a quo nihil malum, vel iniquum prodire potest. Unde Apostolus ad Rom. 7. *Lex quidem sancta, & mandatum sanctum, & justum, & bonum.* Ubi mandatum legis Mosaicæ dicitur sanctum propter præcepta cærimonialia; justum, propter judicialia; bonum, propter moralia, ut observat D. Thomas hic q. 99. art. 4.

Dices: Præcepta legis Mosaicæ Ezechiel. 20. dicuntur *non bona*. Et Apostolus 2. ad Corinth. 3. ait, quod *littera occidit, spiritus autem vivificat*, ubi nomine litteræ veterem legem intelligit. Et ad Hebræos 8. dicit, *vetus testamentum culpa non vacasse.* Demum lex vetus permittebat odium inimicorum, usuram, pluralitatem uxorum, libellum repudii, quæ mala sunt, & a recta ratione aliena. Ergo non erat bona, & sancta.

Respondeo, quod quando præcepta veteris legis dicuntur *non bona*, hoc debet intelligi de præceptis cærimonialibus, quæ appellantur *non bona*, id est non perfecta, quia gratiam

non

non conferebant , per quam homines sanctificarentur , & a peccato mundarentur . Ita S. Thomas hic q. 98. art. 1. ad 1. Similiter lex vetus ab Apostolo occidere dicitur , eo quod spiritus vitam , id est gratiam , via sua largiri non posset , & concupiscentiam prohibendo augeret , ut explicat Augustinus de spiritu , & littera cap. 4. Cum vero idem Paulus ait , vetus testamentum culpa non vacasse , culpam non sumit pro peccato , sed pro imperfectione , defectu , & infirmitate ; & somum significare vult ipsum imperfectum fuisse , & habuisse aliquem defectum , eo quod gratiam non conferret , ad perfectum non adduceret , & ad æternam salutem immedieate suos observatores non eveneret .

Ad illud , quod additur de odio inimicorum , dicendum est , illud non fuisse in veteri lege permisum , cum Levitici 19. dicatur : *Non quæres ultionem , nec memor eris injuriæ civium tuorum* . Unde cum Matth. 5. dicitur : *Audistis , quia dictum est antiquis , diliges proximum tuum , & odio habebis inimicum tuum* : non significatur (ut aliqui existimant) eodium inimicorum fuisse aliquando in antiqua lege præceptum , aut permisum ; sed solum fuisse deductum a Judæis , seu a quibusdam Rabinis , odio habendos esse universaliter inimicos , ex eo quod Deus illis præceperat , ut amicos diligenter , & Gentes quasdam tanquam inimicas persequerentur , & perderent . Unde idem est , ac si diceretur : *Audistis , quia dictum est antiquis , Diliges proximum tuum (& per malam consequentiam Rabiorum , & Pharisæorum deductum) & odio habebis inimicum tuum : Ego autem dico vobis , diligite inimicos vestros* .

Ad id , quod subditur de usura , respondet
D. Tho-

D. Thomas 2. 2. q. 78. art. 1. ad 2. usuram erga alienigenas non fuisse approbatam , aut permissam in veteri lege , sed tantum impune toleratam pro foro externo , & non pro interno , quemadmodum in Republica minora mala , ad vitanda majora , interdum impune a Principibus , & Magistratibus tolerantur.

Demum ad id , quod ultimo loco de pluralitate uxorum , & libello repudii objicitur , dicendum est , Deum dispensasse cum Judæis , ut plures haberent uxores , & ut per libellum repudii possent uxores dimittere , & alias ducere . De quo fuse in Tratatu de matrimonio cap. 1. & 4.

Quarto certum est , legem Mosaicam , quamvis bonam , & sanctam , fuisse imperfectam , comparative ad legem Evangelicam . Nam ut discurrit S. Thomas supra q. 91. art. 5. ,, At ,,, tenditur perfectio , & imperfectio legis se- ,,, cundum tria , quæ ad legem pertinent . Pri- ,,, mo enim ad legem pertinet , ut ordinetur ad ,,, bonum commune sicut ad finem . Quod ,,, quidem potest esse duplex : scilicet bonum ,,, sensibile , & terrenum , & ad tale bonum or- ,,, dinabatur directe lex vetus , unde statim ,,, Exodi 3.in principio legis invitatur populus ,,, ad regnum terrenum Chananiorum : Et ite- ,,, rum bonum intelligibile , & cœleste , & ad ,,, hoc ordinat lex nova , unde statim Christus ,,, ad regnum cœlorum in suæ prædicationis ,,, principio invitavit , dicens : Pœnitentiam ,,, agite , appropinquavit enim regnum cœlo- ,,, rum , Matth. 4. Et ideo Augustinus dicit 4. ,,, contra Faustum , quod temporalium rerum ,,, promissiones in testamento veteri continen- ,,, tur , & ideo vetus appellatur ; sed æternæ vitæ ,,, promissio ad novum pertinet testamentum . ,,, Secundo ad legem pertinet dirigere huma- nos

„ nos actus secundum ordinem justitiae, in
 „ quo etiam superabundat lex nova legi veter-
 „ ri, interiores actus animi ordinando, secun-
 „ dum illud Matth. 5. Nisi abundaverit justi-
 „ tia vestra plusquam Scribarum, & Phariseo-
 „ rum, non intrabitis in regnum cœlorum: &
 „ ideo dicitur, quod lex vetus cohibet ma-
 „ num, lex nova animum. Tertio ad legē per-
 „ tinet inducere homines ad observantias
 „ mandatorum, & hoc quidem lex vetus facie-
 „ bat timore pœnarum. Lex autem nova facit
 „ hoc per amorem, qui in cordibus nostris in-
 „ funditur per gratiam Christi, quæ in lege no-
 „ va confertur, sed in lege veteri figurabatur;
 „ & ideo dicit Augustinus contra Adamantiū
 „ Manichæi Discipulum, quod brevis diſfe-
 „ rentia est legis, & Evangelii, timor, & amor.

§. II.

De præceptis legis veteris.

Triplicia fuerunt præcepta legis Mosai-
 cæ, moralia, cæremonalia, & judicialia.
 Finis enim illius erat dirigere populum Judai-
 cum, & convenienter ordinare, tum in iis, quæ
 spestant ad restitutionem naturalem ratio-
 nis humanæ, tum etiam in iis, quæ ad cultum
 divinum, & justam politiam pertinent. Ad
 primum data erant præcepta moralia; ad se-
 cundum cæremonalia; ad tertium judicialia.
 Et per hæc tria simul sumpta homo conve-
 nienter ordinabatur circa seipsum, circa
 Deum, & circa proximum; ac per ea, si be-
 ne observarentur, Respublica Judæorum in
 felici, & florenti statu conservanda erat,
 ut Deus illis promiserat Deuteronomio. 28.

Præcepta moralia (ut notat S. Thomas hic
 quæst.

„ quæst. 100. artic. 11.) sunt in triplici dif-
„ ferentia: nam quædam (inquit) sunt com-
„ munissima , & adeo manifesta , quod sunt
„ quasi fines præceptorum , unde in eis nul-
„ lus potest errare secundum judicium ra-
„ tionis . Quædam vero sunt determinata ,
„ quorum rationem statim quilibet etiam
„ popularis potest de facilis videre ; & ta-
„ men quia in paucioribus circa hujusmodi
„ contingit judicium humanum perverti ,
„ hujusmodi editione indigent ; & hæc sunt
„ præcepta Decalogi . Quædam vero sunt ,
„ quorum ratio non est adeo cuilibet ma-
„ nifesta , sed solum sapientibus . Et ista
„ sunt præcepta moralia superaddita Deca-
„ logo , tradita a Deo populo per Moysem ,
„ & Aarón . Sed quia ea , quæ sunt mani-
„ festa , sunt principia cognoscendi ea , quæ
„ non sunt manifesta , alia præcepta mora-
„ lia superaddita Decalogo reducuntur ad
„ præcepta Decalogi per modum cuiusdam
„ additionis ad ipsa : nam in primo præce-
„ pto Decalogi prohibetur cultus alienorum
„ Deorum , cui superadduntur alia præce-
„ pta prohibitiva eorum , quæ ordinantur
„ in cultum idolorum ; sicut habetur Deu-
„ teron. 18. *Non inveniatur in te , qui lu-*
„ *stre filium suum , aut filiam suam , ducens*
„ *per ignem , nec sit maleficus , neque incanta-*
„ *tor , nec Pythones consulat , neque Divinos ,*
„ *nec querat a mortuis veritatem . Secundum*
„ *autem præceptum prohibet perjurium : su-*
„ *peradditur autem ei prohibitio blasphemie ,*
„ *Levit. 14. & prohibitio false doctrinæ , Deu-*
„ *teron. 13. Tertio vero præcepto superad-*
„ *duntur omnia cœrimonalia . Quarto au-*
„ *tem præcepto de honore parentum su-*
„ *peradditur præceptum de honorificatio-*

„ ne

„ ne senum , secundum illud Levit. 19. *Coram*
 „ *cano capite consurge , & honora personam*
 „ *senis ; & universaliter omnia præcepta in-*
 „ *ducentia ad reverentiam exhibendam ma-*
 „ *joribus , vel ad beneficia exhibenda vel*
 „ *æqualibus , vel minoribus . Quinto au-*
 „ *tem præcepto , quod est de prohibitione*
 „ *homicidii , additur prohibitio odii , & cu-*
 „ *juslibet molitionis contra proximum , sic-*
 „ *ut illud Levit. 19. Non stabis contra san-*
 „ *guinem proximi tui ; & etiam prohibitio*
 „ *odii fratris , secundum illud : Nec oderis*
 „ *fratrem tuum in corde tuo . Præcepto au-*
 „ *tem sexto , quod est de prohibitione a-*
 „ *dulterii , superadditur præceptum de pro-*
 „ *hibitione meretricii , secundum illud Deu-*
 „ *teron. 24. Non erit meretrix de filiabus*
 „ *Israel , neque fornicator de filiis Israel ; &*
 „ *iterum prohibitio vitii contra naturam ,*
 „ *secundum illud Levit. 18. Cum masculo*
 „ *non commisceberis , cum omni pecore non*
 „ *caibis . Septimo autem de prohibitione*
 „ *furti adjungitur præceptum de prohibitio-*
 „ *ne usuræ , secundum illud Deuteronom. 18.*
 „ *Non fœneraberis fratri tuo ad usuram : &*
 „ *prohibitio fraudis , secundum illud Deu-*
 „ *teron. 15. Non habebis in sacculo diversa*
 „ *pondera ; & universaliter omnia , quæ ad*
 „ *prohibitionem calumniæ , & rapinæ pertain-*
 „ *nent . Octavo vero præcepto , quod est de*
 „ *prohibitione falsi testimonii , additur pro-*
 „ *hibitio falsi judicij , secundum illud Exodi*
 „ *23. Nec in judicio plurimorum acquiesce*
 „ *sententiæ , ut a veritate devies : & prohi-*
 „ *bitio mendacij , sicut ibi subditur , Menda-*
 „ *cium fugies : & detractionis , secundum*
 „ *illud Levit. 9. Non eris criminator , &*
 „ *susurro in populis . Aliis autem documen-*

„ tis

„ tis (puta præcepto de non concupiscen-
„ da uxore alterius ad coeundum, & præ-
„ ceptio de non concupiscenda re qualibet,
„ vel qualicunque possessione alterius ad
„ possidendum illegitime præter consensum
„ ejus, & voluntatem) nulla adjunguntur;
„ quia per ea universaliter omnis mala
„ concupiscentia prohibetur. „ Hæc San-
ctus Thomas, quibus differentiam præce-
ptorum moralium veteris legis luculenter
exponit.

Quoad præcepta vero cæremontialia Gene-
brardus sub finem Chronologiæ, ex Bur-
gensi, & aliis Doctoribus, asserit, ea in an-
tiqua lege usque ad numerum sexcentorum
tredecim ascendisse; ex quibus erant ducenta
quadraginta octo affirmativa, tot scilicet, quot
sunt in homine membra, & ossa, & trecen-
ta sexaginta quinque negativa, quot in anno
dies numerari solent. Omnia tamen ad qua-
tuor genera revocari possunt. Alia enim e-
rant de sacrificiis, quorum tria erant genera
in antiqua lege, nempe holocaustum, hostia
pacifica, & hostia pro peccato, quorum dif-
ferentiam explicabimus in Tractatu de vir-
tutibus cardinalibus, cum de religione age-
mus. Alia de Sacramentis, quæ varia extute-
runt in antiqua lege, tam pro laicis, quam
pro Sacerdotibus, & ministris templi, ut cir-
cumcisio, Agnus Paschalis, consecratio Sa-
cerdotum, usus panis propositionum, ablutio
manuum, & pedum, rasio pilorum, & simi-
lia, de quibus agit S. Thomas hic quæst. 102.
art. 5. Item in veteri lege quædam erant præ-
cepta cæremontialia de rebus sacris, quæ ad di-
vinum cultum tanquam instrumenta, & ad-
minicula ordinabantur, inter quas iste erant
præcipuæ, Tabernaculum, Arca fœderis

CON-

continens duas legis tabulas, virgam Aarons, quæ fronduerat, & urnam auream cum manna; propitiatorium, quod erat ad instar cuiusdam mensæ ex auro purissimo, mensa panum propositionis, altare thymiamatis, seu incensi, in quo incendebatur thus, & alia aromata suavissimi odoris, altare holocausti, in quo omnes victimæ offerebantur, & demum varia vasorum genera, nempe acetabula, phialæ, thuribula, cyathi, lebites, hydriæ, mortariola, lucerna, &c. de quibus accurate differunt Josephus lib. 3. antiquitatum, & Ribera lib. 3. de Templo Salomonis. Denique in veteri lege aliqua erant præcepta cærimonialia de aliquibus observantiis legalibus, quibus ex decreto Dei populus Judæorum discernebatur ab aliis gentibus, inter quæ præcipue erant, abstinentia a suffocato, sanguine, pinguedine, carne suilla, ab animalibus, quæ non haberent ungulam divisam, sed solidam, & unitam, quæque etiam non ruminarent; manducatio panum azymorum, lactucarum agrestium, & aliorum id genus, quorum significacionem fuse, ac erudite explicat S. Thomas qu. 102. art. 6. Ejusdein generis hæc erant: *Non coques hædum in lacte matris sue. Non arabis in bove, & asino. Veste, quæ ex duobus texta est, non indueris. Non indueris vestimento, quod ex lana, linoque contextum est. Qui tetigerit mortuum, immundus erit usque ad vesperam.*

De præceptis judicialibus abunde differit S. Thomas q. 104. & 105. ubi ea ad quatuor capita revocat. Nam quædam præscribunt certum ordinem justitiæ inter Principem, & populum; quædam inter ipsos cives; quædam inter populum, & extraneos; quædam denique

que inter domesticos ejusdem familiæ. Exempla passim sunt in Scriptura: v. g. pro Principe dantur præcepta quomodo creandus sit, quomodo se gerere debeat erga populum, & vicissim populus erga illum. Similiter pro populo, & civibus inter se dantur præcepta emptionis, & venditionis, & aliorum contractuum. Pro extraneis dantur præcepta de susceptione advenarum, & peregrinorum, & de modo belli gerendi contra hostes. Denique pro domesticis leges sunt de viro, & uxore, de parentibus, & liberis, de dominis, & servis, de consanguineis, & affinibus, an sint inter eos ineunda matrimonia, & cætera alia.

Differunt autem hæc præcepta a moralibus, quod moralia ad legem naturæ proxime pertinent; judicialia vero valde remote, cum tantum sint determinationes eorum, quæ generaliter in jure naturali continentur: v. g. iure naturali fures puniendi sunt, jure autem illo judiciali pœna mortis eis infligitur. A cæmonialibus vero tripliciter differunt. Primo, quia cæmonialia pertinebant ad cultum diuinum, judicialia ad iustitiam cum proximo servandam. Secundo, quia cæmonialia per se primo instituta erant ad Christum, & mysteria Christianæ religionis significanda, & figuranda, non autem judicialia. Ex quo sequitur tertium discrimen, nempe quod cæmonialia omnia defierint, imo & mortifera sint, judicialia vero aliqua adhuc remaneant, non quidem quatenus a veteri lege sunt prescripta, sed solum quatenus sunt a Regibus, & Legislatoribus in utilitatem publicam assumpta; alia vero mortua quidem sint, non tamen mortifera, cum absque peccato observari possint, ut ex dicendis §. sequenti patebit.

§. III.

§. III.

An, & quando lex vetus abrogata sit?

DIco primo. Lex vetus de facto abrogata est, & desit obligare.

Conclusio est certa de fide, & definita ab Apostolis in Concilio Jerosolymitano super hac quæstione habito, eamque passim docet Paulus in suis Epistolis, præsertim ad Roman. 6. versu 15. ad Galat. 3. versu 19. ad Ephes. 2. versu 14. & ad Coloss. 2. versu 16.

Confirmatur ex illo ad Hebr. 7. Translato *Sacerdotio necessere est, ut legis translatio fiat;* Atqui Sacerdotium veteris legis translatum est in sacerdotium novæ legis, ut tota epistola ad Hebræos contendit Apostolus: Ergo & ipsa lex translata est in novam, sicque tandem abrogata de facto desit obligare.

Si autem quæras, cur abrogata fuerit? Respondeo primo, illam abrogatam esse, propterea quod vetus testamentum imperfictum esset, & infirmum. Unde Apostolus ad Hebræos 7. *Reprobatio (inquit) fit præcedentis mandati, propter infirmitatem, & inutilitatem: nihil enim ad perfectum adduxit lex.* Secundo, quia grave jugum erat. Quam abrogationis rationem indicavit D. Petrus Act. 15. cum dixit: *Quid tentatis Deum impone-re jugum super cervices Discipolorum, quod nec patres nostri, nec nos portare potuimus?* Tertio, quia continebat tantum figuræ, quæ per Christum impletæ sunt. Unde Bernardus homil. I. super Missus est: *Prodeunte fru-ctu, flos decidit, quia veritate apparente in carne, figura pertransit.* Vel, ut ait Hieronymus

mus

mus in caput 4. ad Galatas; *Priusquam Christi in toto orbe Evangelium coruscaret, habuerunt suum fulgorem præcepta legalia, postquam vero maius Evangelicæ gratiæ lumen effulgit, & Sol justitiae toti mundo se prodidit, stellarum lumen absconditum est, & earum radii caligaverunt.* Demum Christus (teste Apostolo ad Ephesios 2.) fecit utraque unum, id est ex duobus populis, Ethnico, & Judaico, fecit unum ovile, ac proinde debuit dissolvere medium parietem legis Mosaicæ, qui separabat unum populum ab alio, & ambos una eademque lege Evangelica concludere.

Dices, legem Mosaicam in sacris literis prædicari in æternum duraturam: Baruch. 3. *Hic liber mandatorum Dei, & lex, quæ est in æternum.*

Respondeo cum D. Thoma hic qu. 103. art. 3. ad 1. legem veterem duobus modis dici posse æternam: primo quoad præcepta moralia, quæ partim in Decalogo, partim vero in aliis Scripturæ locis continentur; hæc enim semper vigent, & vigebunt, cum sint juris naturalis: secundo etiam quoad cæremonialia, quandoquidem licet hæc abrogata sint, quoad significationem, durant tamen adhuc, & durabunt, quoad rem significatam, nempe Christum, & religionem Christianam. Addo, quod lex vetus, ejusque præcepta vocantur æterna, quia ad tempus valde longum fuere statuta, & sine certo termino in ipsa legis promulgatione definito: statuta enim, & præcepta, quæ ita feruntur, solent vocari perpetua; in communi usu loquendi s; eodem sensu, quo leges omnes dicuntur esse perpetuæ.

Dico secundo, legem Mosaicam non cessasse ante Christi mortem. Ita communiter

docent Theologi, paucis exceptis, qui volunt legem Mosaicam cessasse ante mortem Christi, in ipsa institutione Baptismi, per quam cessavit obligatio Circumcisionis, & consequenter totius legis Mosaicæ, cuius obligatio in illa fundatur, & ab illa oriebatur, ut significat Paulus ad Galat. 3.

Probatur conclusio multipliciter. Primo quia lex Mosaica umbratilis erat, & figurativa, subindeque non cessavit, donec ejus umbræ, & figuræ impletæ fuerint. At illæ non fuere impletæ usque ad mortem, & passionem Christi, & antequam Christus jam expiraturus diceret, *Consummatum est*: Ergo lex Mosaica non cessavit ante Christi mortem, & passionem.

Secundo, Christus usque ad mortem legem servavit, & servari præcepit: nam Matth. 8. leproso sanato præcepit adire sacerdotem, ut secundum legem munus offerret, quod Moyses mandaverat. Et Matth. 23. dixit: *Super Cathedram Moysis sedderunt Scribæ, & Pharisei; omnia ergo quæcumque dixerint vobis, servate, & facite*. Item pridie quam pateretur, cum Discipulis agnum paschalem immolavit: Ergo ante ejus mortem lex Mosaicæ non cessaverat, sed adhuc obligabat. Unde Lucæ 22. dicitur: *Venit dies azymorum, in qua necesse erat occidi Pascha, &c.* id est necessitate præcepti, quod Christus, antequam moreretur, adimplere voluit.

Tertio, sicut translato sacerdotio, necesse est, ut & legis translatio fiat, ut ait Apostolus ad Hebræos 7. ita manente Sacerdotio legem manere necesse est: Sed sacerdotium legis Mosaicæ non fuit translatum usque ad passionem, & mortem Christi; Apostolus enim ad Hebræos 9. affirmat prius

prius tabernaculum habuisse statum, donec per Christi mortem propalaretur sanctorum via : quandiu autem tabernaculum illud Mosaicum habuit statum, habuit & sacerdotium . Ergo lex Mosaica ante Christi mortem, & passionem non fuit abrogata .

Quarto, testamentum vetus, quod est idem, atque lex, non cessavit nisi per novum: Sed hoc non cœpit obligare nisi per mortem Christi , eo quod testamentum non valeat , nisi intercedat mors testatoris, ut ait Paulus ad Hebræos 9. & probat Ulpianus I. 1. ff. de testamentis : Ergo testamentum non cessavit usque ad mortem Christi .

Dices primo. Lucæ 16. dicitur : *Lex, & Prophetæ usque ad Joannem.* Et Matth. 11. *Omnes Prophetæ, & lex usque ad Joannem prophetarunt :* Ergo lex vetus cessavit , quando Joannes Baptista prædicare cœpit.

Sed nego consequentiam : sensu enim horum verborum est , quod lex , & Prophetæ usque ad Joannem prædixerint Christum esse venturum , ille autem jam venisse ostenderit . Vel quod lex , & Prophetæ , usque ad Joannem, promissiones temporales prædicaverint ; exinde vero cœperit evangelizari regnum Dei , consistens in bonis spiritualibus . Hoc enim Christus dixit respondens Pharisæis ipsū irridentibus , quod nimium affectum erga diuitias reprehenderet , earumque contemptum doceret , quasi in hoc dissentiret a lege , & Prophetis promittentibus bona temporalia .

Dices secundo : Baptismus , qui est primum novæ legis sacramentum , fuit a Christo institutus ante mortem : Ergo præceptum Baptismi cœpit obligare ante mortem Christi , subindeque præceptum circumcisionis obligare desit ante passionem Christi .

Respondeo , concessio Antecedente , negando consequentiam . quamvis enim Baptismus fuerit a Christo institutus ante mortem , non fuit tamen in præcepto nisi post passionem , & resurrectionem Christi , ut docet D. Thomas 3. p. qu. 66. art. 2. his verbis : „ Ne-
 „ cessitas utendi hoc sacramento indicta fuit
 „ homini post passionem , & resurrectionem ;
 „ tu quia in passione Christi terminata sunt
 „ figuralia sacramenta , quibus succedit Ba-
 „ ptismus , & alia sacramenta novæ legis ; tum
 „ etiam quia per Baptismum configuratur
 „ homo passioni , & resurrectioni Christi , in
 „ quantum moritur peccato , & incipit novæ
 „ justitiæ vitam ; & ideo oportuit , Christum
 „ prius pati , & resurgere , quam hominibus
 „ indiceretur necessitas se configurandi mor-
 „ ti , & resurrectioni Christi . „ Unde licet
 instituto Baptismo , ante Christi mortem , &
 resurrectionem , non fuerit circuncisio necel-
 faria necessitate medii , cum ad delendum pec-
 catum originale illa non esset unicum me-
 dium , sed ad hoc sufficeret Baptismus ; erat
 tamen necessaria necessitate præcepti , nam
 ita erat legi antiquæ inserta , ut signum es-
 set fidelium , qui legem illam profiteban-
 tur , illoque proinde uti , dum lex illa per-
 sisteret , necessarium fuit ex Dei præcepto .

Dico tertio , legem Mosaicam cessasse in
 ipsa Christi morte , & resurrectione . Est con-
 tra Scotum , Suarez , & alios , existimantes
 legalia non fuisse omnino , & complete extin-
 eta , nisi ipso die Pentecostes , in quo facta
 fuit solemnis promulgatio legis Evangelicæ .
 Est tamen D. Thomæ hic quæst. 103. artic. 3.
 ad 2. ubi hæc scribit : „ Mysterium redemptio-
 „ nis humani generis completum fuit in pas-
 „ sione Christi : unde tunc Dominus dixit , con-
 „ sum-

„ summatum est , ut habetur Joan. 19. & ideo
 „ tunc totaliter debuerunt cessare legalia ,
 „ quasi jam veritate eorum consummata ; in
 „ cuius signum in passione Christi velum tem-
 „ pli legitur esse scissum , Matth. 27. , & ideo
 „ ante passionem Christi , Christo prædicant-
 „ te , & miracula faciente , currebant simul
 „ lex , & Evangelium ; quia jam mysterium
 „ Christi erat inchoatum , sed nondum con-
 „ summatum ; & propter hoc mandavit
 „ Christus Dominus ante passionem lepro-
 „ so , ut legales cæremonias observaret .

Idem docent SS. Patres . Augustinus enim
 serm. 124. de tempore sic ait : *Velum templi*
scinditur , quia Synagoga honore nudatur , ob-
servatio antiqua dissolvitur . Ambrosius lib.
 10. in Lucam c. 25. *Etiam velum templi scin-*
ditur , quo mysteriorum Synagogæ prophanatio
declaretur . Cæsarius homil. 6. in Paschate ,
 sub finem : *Velum templi scinditur . Velum*
ornamentum tabernaculi est : Coruscante igitur
gratia , Ecclesia ædificatur , Synagoga destrui-
tur . Demum Leo Papa serm. 6. de Passione ,
 Caipham vestes proprias scindentem , quasi
 Christus blasphemasset , lepide irridet di-
 cens , Pontificem legis mox interituræ , per
 hanc vestium suarum scissuram , ostendisse
 se mox sui sacerdotii honore spoliandum .

Confirmatur ex communi consensu Hieronymi , & Augustini in Epistolis , quas
 sibi mutuo de legalibus scripsere , quibus
 docent , post mortem , & resurrectionem
 Christi legales cæremonias mortuas fuisse ,
 id est vim obligandi amisisse , quamvis Hieronymus existimaverit , illas post mortem ,
 & resurrectionem Christi nedum mortuas ,
 sed etiam mortiferas fuisse , adeo ut qui-
 cumque eas servasset (seclusa ignorantia ,

aut errore invincibili) peccasset: Ergo im-
merito, & sine sufficienti fundamento Sco-
tus, & Suarez ab illis dissentunt.

Potest insuper conclusio quatuor rationibus
suaderi. Prima est: Cum lex Mosaica um-
bratilis, & figurativa fuerit, debuit, adve-
niente veritate, quam figurabat, cessare: Sed
per Christi mortem, & resurrectionem im-
pletæ fuerunt omnes figuræ antiquæ legis, ut
Christus jam mortuus significavit, cum dixit,
Consummatum est: Ergo in morte, & resurrec-
tione Christi lex Mosaica cessavit, & peni-
tus fuit abrogata. Unde Leo Papa serm. 7. de
passione: Unde umbræ cederent corpori, antiqua
observantia novo excluditur sacramento; hostia
in hostiam transit, sanguine sanguis aufertur,
& legalis festivitas, dum mutatur, impletur.

Secunda: Christus in coena ultima no-
vum condidit testamentum, quod morte
deinde, & resurrectione sua confirmavit:
Ergo vetus quasi senio jam consecutum, ac-
cedente tunc novo, extinctum est. Conse-
quentia patet, valot enim testamenti poste-
rioris revocat vim prioris, quotiescumque po-
sterius conditur ad revocandum prius, ut pa-
tet in humanis: Atqui novum testamentum
conditum est, ut prius revocaretur, ut fa-
tentur omnes, docetque Apostolus ad He-
breos 10. his verbis. *Aufert primum, ut se-*
quens statuat. Et cap. 8. Dicendo novum,
veteravit prius. Quod autem antiquatur,
& senescit, prope interitum est: Ergo &c.

Tertia ratio: Ad Romanos 7. ex eo
quod sumus liberati a peccato, infert Pau-
lus, quod sumus pariter & a jugo legis ex-
empti: Sed in morte, & resurrectione
Christi sumus a peccato liberati: Ergo &
a lege veteri. Unde idem Apostolus ibi-
dem

dem ait , quod sicut mulier in morte viri libera fit a lege matrimonii , ita Synagoga in morte Christi a legis obligatione liberata est.

Quarta ratio sumitur ex illo Apostoli ad Hebr. 7. *Translato sacerdotio , necesse est , ut & legis translatio fiat . Ergo cessante sacerdotio veteris legis , ipsam quoque legem veterem cessasse necesse est ; quandoquidem juxta Paulum , & rei veritatem , erat conexio , & concomitantia necessaria inter legem , & sacerdotium : Atqui sacerdotium veteris legis in ipsa Christi morte , & resurrectione cessavit : tunc enim sacerdotium Aaronicum totaliter fuit evacuatum , & in sacerdotium Christi translatum , ut colligitur ex illo Apostoli ad Heb. 9. *Christus assistens Pontifex futurorum bonorum , per amplius , & perfectius tabernaculum , non manufactum , idest non hujus creationis , sed per proprium sanguinem introivit semel in sancta , eterna redēptione inventa :**

Ergo lex vetus in ipsa Christi morte , & resurrectione cessavit , & penitus abrogata est , etiam quoad præcepta moralia : nam quamvis hæc etiam nunc retineant vim obligandi , non tamen quatenus præcepta legis Mosaicæ sunt , sed quatenus sunt præcepta legis naturalis , quorum obligatio perpetua est.

Dixi autem , in ipsa Christi morte , & resurrectione : tum quia cum lex vetus non solum passionis , & mortis Christi , sed etiam ejus resurrectionis figura , & umbra extiterit , ante resurrectionem Christi nondum fuit perfecte completa , nec proinde totaliter extincta . Tum etiam , quia sacerdotium Aaron , quod erat proprium legis veteris , non debuit aboleri , donec sacerdotium Christi esset consummatum , & in per-

fectione , atque indefectibilitate constitutum , quod non habuit usque ad ejus resurrectionem , in qua ipse Christus vitam immortalem , & indefectibilem reassumpsit ; unde tunc solum adimpta fuit hæc prophetia Davidis : *Tu es sacerdos in æternum secundum ordinem Melchisedech.* Adde , quod obligatio Baptismi , qui est totius legis Evangelicæ fundamentum , cœpit solum post resurrectionem Christi , cum ipsa die resurrectionis Christus ejus præceptum proposuerit , dicendo Apostolis : *Euntes docete omnes gentes , baptizantes eos , &c.* Ergo tunc solum , & non ante cessavit lex vetus .

Contra istam conclusionem objiciunt Adversarii : Lex Mosaica non prius desit , quam Evangelica cœperit obligare , cum generatio istius sit corruptio illius , juxta illud Apostoli ad Ephes. 2. *Legem mandatorum decretis evanquans* , id est legem Mosaiam decretis Evangelicis excludens , ut exponunt Chrysostomus , Theophylactus , & Oecumenius ibidem : Atqui lex Evangelica nō cœpit obligare ante diem Pentecostes : Ergo ante illum diem lex Mosaica obligare non desit . Majorem ut certam supponunt , minorem vero sic probant . Lex ante sui promulgationem non obligat , ut docet S. Thomas supra quæst 90. art. 4. Sed lex Evangelica non fuit promulgata ante Pentecosten : Ergo ante diem Pentecostes obligare non cœpit . Minor probatur ; tum quia usque ad tempus Pentecostes Apostoli non propoſuerunt populo publice Evangelium ; tum etiam , quia quemadmodum lex vetus non fuit promulgata , nisi quinquagesimo die a Paschate Judæorum ; ita non debuit lex nova promulgari , nisi post quinquaginta dies a Paschate , sive resurrectione Christi ; promulgationem

nem enim legis Mosaicæ figuram fuisse promulgationis legis Evangelicæ, supra art. 2. in fine ostensum est.

Huic argumento, quod est præcipuum Adversariorum fundamentum, respondeo, concessa Majori, negando Minorem, & ad illius probationem dico, duplœcēm esse legis promulgationem; unam essentialem, legi sufficientem, quæ fit, quando Princeps ut publica persona illam proponit, & intimat suis subditis in curia existentibus; altera est solemnis, & accidentalis, atque ad tollendam subditorum ignorantiam ordinata; quæ fit, cum lex a præcone per singulas provincias, aut per omnes præciuas civitates publicatur. Quamvis ergo lex Evangelica hoc secundo genere promulgationis solum die Pentecostes promulgata fuerit ab Apostolis ut Christi præconibus: ipso tamen die resurrectionis fuit a Christo proposita, & intimata Discipulis, his verbis: *Euntes docete omnes gentes, baptizantes eos, &c.* Unde a die resurrectionis cœpit habere vim legis ex se obligantis, quamvis hec promulgatio non sufficeret ad tollendam ignorantiam illius, nec proinde ad reddendum homines inexcusabiles ab ejus transgressione. Ex quo patet ad primam probationem Minoris. Ad secundam vero similiter dico, legem Mosaicam promulgatione sufficienti ad rationem legis fuisse promulgatam ab eo tempore, quo Deus eam dedit Moysi in monte Sina; tunc enim locutus est Deus ut Princeps, & Legislator, subindeque ex eo tempore præcepta illius legis lata a Deo vim legis habuerunt; ad eo ut ipsius publicatio facta deinde a Moysè toti populo non habuerit vim promulgationis necessariæ ad essentiam legis, sed tantum

declarationis, ne homines ignorantia ab ejus obligatione excusari possent. Quare licet publicatio illa veteris legis facta per Moysem fuerit figura promulgationis legis Evangelicæ, faciendæ per Apostolos in die Pentecostes; hinc tamen non fit, istam finisse necessariam ad rationem, & essentiam legis Evangelicæ, sed tantum ad tollendam ignorantiam ipsius.

Ad solutionem alterius argumenti, quod contra nostram conclusionem fieri posset, advertendum est, quod licet a passione, & resurrectione Christi, usque ad Evangelii divulgationem, lex antiqua mortua fuerit, ita ut nec obligaret, nec vim obligandi haberet; non tamen penitus erat inutilis, sicut est modo; sed quandiu permanxit ejus bonitas, & non fuit mortifera, pueri Judæorum recipientes circumcisionem a peccato originali justificabantur, illique, qui bona fide legem illam observabant, salvabantur; divinam namque bonitatem decebat, ut quandiu sustinuit legem illam, non auferret ejus utilitatem, ut prodesset illis, qui bona fide illam observabant; unde pro illis valebat dispensatio, & permisso per legem data repudiandi uxorem legitimam, & ducendi aliam, vel habendi plures simul.

§. I V.

Utrum lex Mosaica statim atque cessavit obligare, fuerit mortifera?

PArtem affirmantem tenuit olim D. Hieronymus, ut constat ex Epistola ejus ad Augustinum, quæ inter Epistolas ipsius Augu-

gustini connumeratur undecima; distinxit enim solum duo tempora: unum ante passionem Christi, in quo legalia non erant mortua, quasi non habentia vim obligatoriam, aut expiativam, pro suo modo; nec etiam mortifera, quia non peccabant ea observantes: alterum post passionem Christi, in quo non solum mortua (id est non habentia virtutem, & obligationem) sed etiam mortifera fuerant, ita scilicet quod peccarent mortaliter, quicumque ea observarent. Opus situm docuit Augustinus Epist. 9. & 19. ad Hieronymum, ubi distinxit tria tempora. Unum ante Christi passionem, in quo legalia neque erant mortifera, neque mortua. Aliud post tempus Evangelii divulgati, in quo legalia sunt mortua, & mortifera. Tertium autem est tempus medium, scilicet a passione Christi usque ad divulgationem Evangelii, in quo legalia quidem fuerunt mortua, quia neque vim aliquam habebant, neque aliquis ea observare tenebatur; non tamen fuerunt mortifera, quia illi, qui ex Judæis conversi erant ad Christum, poterant illa licite observare, dummodo non sic ponerent spem in eis, quod ea reputarent necessaria ad salutem, quasi sine legalibus fides Christi iustificare non posset. August. secutus est D. Th. hic quest. 103. artic. 4. ad 3. aliique Theologi communiter, cum quibus

Dico, legem Mosaicam non fuisse mortiferam statim atque cessare cœpit illius obligatio, sed aliquo tempore post illius abrogationem fuisse licitum servare illius præcepta cærimonialia, quamvis non esset necessarium.

Probatur efficaciter, qua ipsimet Apostoli usurparunt cærimonialia iis in locis, ubi jam

lex Mosaica desierat obligare , facta jam sufficienti promulgatione legis Evangelicæ : ut patet ex Actorum 16. ubi Paulus Timotheum ex patre Gentili natum circumcidit ; & cap. 18. ubi more Nazaræorum totondit caput in Cenchris ; & cap. 21. ubi de consilio Jacobi Apostoli , & seniorum , usus est legali purificatione cum Judæis , ut illos sibi conciliaret , & purificatus cum illis templum ingressus est . Demum cap. 15. ejusdem libri , in Concilio Apostolorum statutum fuit , ut Christiani abstinerent a sanguine , & a suffocato , quæ una erat ex cæremoniis legalibus .

Respondet D. Hieronymus Epistola citata , nunquam Apostolos post resurrectionem Christi legalia observasse secundum veritatem , sed solum ex quadam pia simulazione , ne scandalizarent Judæos , & eorum conversionem impedirent .

Verum si cæremoniæ illæ tunc fuissent mortiferæ , ut sentit Hieronymus , non licitum fuisset Apostolis eas simulatorie usurpare ; quia contra fidei professionem est , uti cultu superstitionis , & profiteri exterius falsam religionem , cuiusmodi erat religio Judæorum quoad cultus illos , si jam erant superstitionis , & mortiferi . Item si licuisset Apostolis uti simulatorie cultu superstitionis Judæorum , ut eos lucrarentur , quemadmodum ait Hieronymus , licuisset similiter uti simulatorie cultu superstitionis Gentilium , ut facilius eos converterent ; & nunc etiam liceret uti cæremoniis Judaicis , simulareque eorum fidem , ut eos lucrifaceremus , sicut contra Hieronymum recte argumentatur S. Augustinus Epistolis citatis . Addit S. Thomas loco supra citato , indecens videri , quod Apostolice

occultarent propter scandalum, quæ pertinent ad veritatem vitæ, & doctrinæ, & simulatione uterentur in his, quæ pertinent ad salutem fidelium.

Potest insuper suaderi conclusio optima congruentia, qua utitur D. Augustinus ad probandum, post abrogationem legis Mosaicæ, per aliquod tempus fuisse licitum legalia servare, usque ad sufficientem divulgationem Euangelii, quamvis non esset necessarium. Sicut enim (inquit) solemus homines mortuos aliquandiu ante sepulturam servare, ut cum honore sepulturæ tradantur: ita decuit legalia, quæ ut viva post Christi mortem servari non poterant, ut mortua usque ad perfectam Euangelii divulgationem servari, ut cum honore mortua mater synagoga sepeliretur; & ne homines existimarent, si ea statim rejecta fuissent, veterem legem fuisse abominabilem, perinde ac Gentilium cultum, quem nulla unquam mora sustinere Apostoli voluerunt.

Dices. Si licitum erat post abrogationem legis Mosaicæ per aliquod tempus legalia servare, non potuit rationabiliter Paulus ad Galatas 2. reprehendere Petrum Apostolum, eo quod illa usurparet, seque a Gentilibus Antiochenis recens conversis segregaret, ut vivet Judaice cum Judæis, qui Jerosolymis a Iacobo advenerant: Atqui Paulus jure reprehendit Petrum, qui, ut dicitur ad Galat. 2. reprehensibilis erat: Ergo post abrogationem legis Mosaicæ non licitum fuit servare legalia.

Respondeo, negando sequelam Majoris: Petrus enim jure fuit reprehensus a Paulo, non quod simpliciter uteretur cæremoniis Judaicis, post abrogationem legis Mosaicæ, quod ipsemet Paulus sæpius fecerat, ut supra ostendam.

ostendimus, sed quod uteretur cum aliqua imprudentia, & scandalo infirmorum, adeo ut Christiani ex ejus facto inducerentur ad existimandum observationem legalium esse adhuc necessariam, & ita quodammodo cogerentur judaizare, ut significant verba illa Pauli ad Petrum ad Galat. c. 2.
Sicut Judaeus cum sis, gentiliter vivis, & non judaice, quomodo cogis gentes judaizare?
 Solutio est D. Thomae hic q. 103. art. 4. ad 2. ubi haec scribit: *Non peccavit Petrus in hoc, quod ad tempus legalia observabat, quia hoc sibi licebat tanquam ex Judaeis converso; sed peccabat in hoc, quod circa legalium observantium nimiam diligentiam adhibebat, ne scandalizaret Judaeos, ita quod ex hoc sequebatur Gentilium scandalum.*

Quæres, quo præcise tempore cœperit lex Mosaica esse mortifera?

Respondeo hoc esse dubium, & incertum, valde tamen probabile esse, quod plerique Theologi docent, illam solum cœpisse esse mortiferam quadragesimo circiter post Christi mortem anno, postquam Euangelium sufficienter jam toto orbe Judæis promulgatum fuit per Apostolos, templumque Ierosolymitanum, uni cum statu Reipublicæ Judaicæ, a Romanis Imperatoribus eversum; tunc enim non erat amplius necessarium deferre honorem Synagogæ jam extinctæ, aut uti condescensu erga Judæos, tandiu Dei vocationi rebelles.

C A P U T X.

De lege divina nova, sive Euangelica.

Certum de fide est, Christum non solum ab antiqua lege nos liberasse, sed etiam novam instituisse, ad Christianos pertinen-tem; hoc enim plura utriusque testamenti testimonia aperte declarant, & Tridentinum sess. 6. can. 12. confirmat, anathemate damnans eum, qui dixerit, *Christum Iesum a Deo hominibus datum fuisse ut redemptorem, cui fidant, non etiam ut legislatorem, cui obediant.* Ratio etiam suffragatur: Nullum enim regnum, nullave communitas perfecta, civilis, aut Ecclesiastica, potest sine legibus convenienter gubernari, stabiliter conservari, atque ad finem propositum efficaciter dirigi, ut lumine ipso naturali, & experientia notum est; cum igitur Christus Ecclesiam instituerit, ut novum regnum spiritale, debuit leges illi dare, per quas in sua institutione gubernari, conservari, & ad finem propositum, qui est salus æterna, promoveri possit. Unde Isaiae 3. de Messia dicitur: *Dominus judex noster, Dominus legifer noster, Dominus rex noster, ipse salvabit nos.*

Neque obest illud Joan. 1. *Lex per Moysen data est, gratia autem, & veritas per Jesum Christum facta est,* quo significari videtur, Moysen fuisse legislatorem, non vero Christum, ipsumque nullam tulisse legem, sed solum gratiam, & justificationem nobis promeruisse. Respondeatur enim, non ideo gratiam dici per Christum factam, legem vero per Moysen datam, quod Christus nullam

le-

legem tulerit, sed quia Moyses dedit Iudeis nudam legem sine gratia, id est legem præcipientem, sed non juvantem; Christus vero dedit nobis legem cum gratia, id est legem præcipientem, & adjuvantem. Quam ob causam vocatur ab Apostolo *lex Spiritus*, & a Christo *jugum suave, & onus leve*.

Lex nova a Christo data præcepta triplicis generis continet, nempe moralia, sacramentalia, & fidei; inter quæ hoc intercedit discrimen, quod moralia, cum sint juris naturalis, non fuerunt a Christo instituta, sed tantum explicata, & vindicata ab erroribus, quibus ex hominum malitia fuerant involuta. Sacramentalia vero instituta sunt a Christo, ut essent loco veterum, quæ ab ipso abrogata sunt. Præcepta vero fidei de novo instituta non sunt, sed tantum ex implicitis facta fuerunt magis clara, ita ut nunc explicite mysteria quædam credere teneamus, quæ in lege veteri implicite duntaxat credebantur: cùjusmodi sunt nativitas, passio, & mors Christi, quæ a Iudeis obscure credebantur, sed expresse creduntur a Christianis.

Lex vetus, & lex nova, seu Evangelica in multis conveniunt, & in multis discrepant. Conveniunt primo in eo, quod sicut lex Mosaica promulgata est die quinquagesimo post Pascha, id est in die Pentecostes, sic etiam lex Evangelica, ut constat Actorum 2. Secundo, sicut illa in monte Sina, ita ista in monte Sion promulgata est, juxta illud Isaiae 2. *De Sion exhibet lex, & verbum Domini de Jerusalem*. Tertio, sicut ibi auditæ sunt tonitrua, & fulgura, ita hic factus est repente de cœlo sonus, tanquam advenientis spiritus vehementis. Quarto, sicut ibi apparuit ignis, & sumus;

ita

ita hic apparuerunt dispertitæ linguae tanquam ignis. Quinto, sicut ibi timore percussi sunt Iudæi, ita hic Apostoli. Sexto sicut ibi Angelus clangore buccinæ verba Decalogi perstrepebat, ita hic tuba Euangelica Apostolorum ore insonuit, ejusque sonus in omnem terrarum orbem exivit. Demum quemadmodum in propitiatorium vertebant vultus duo Cherubini, ita duæ leges, Mosaica, & Euangelica, in Christum, veluti magnum quoddam mundi propitiatorium, oculos vertunt; cum eadem Christi gratia populus Judaicus, qui Christi adventum præcessit, & Christianus, qui sequitur, salvus factus sit, & eodem immaculati agni sanguine redemptus. Unde Augustinus epist. 157. ad Optatum: *Cum omnes justi, id est veraces Dei cultores, sive ante incarnationem, sive post incarnationem Christi, nec vivent, nec vivant, nisi ex fide incarnationis Christi, in quo est gratiae plenitudo, profecto, quod scriptum est Act. 4. Non est aliud nomen sub cælo, in quo oporteat nos salvos fieri, ex illo tempore valet ad salvandum genus humanum, ex quo in Adam vitiatum est.*

Discrepant vero duæ illæ leges, primo in eo, quod Mosaica scripta sit in tabulis lapideis, ministerio Angelorum, Euangelica vero per Spiritum Sanctum hominum cordibus insculpta, juxta illud Jeremiæ 31. *Dabo legem meam in visceribus eorum, & in cordibus eorum scribam eam.* Unde Theophylactus in c. 3. epist. 2. ad Corinth. *Quanto intervallo spiritus ab atramento distat, & cor a lapide, tanto & novum a lege discrepat testamentum.* Et Augustinus de spir. & lit. cap. 17. *Ibi in tabulis lapideis digitus Dei operatus est, hic in*

in cordibus humanis. Ibi lex extrinsecus posita est, qua iusti terrentur, hic intrinsecus data est, ut justificarentur. Et rursus cap. 21. *Dicitur a veteri testamentum novum, eo quod per novum scribitur lex Dei in corde fidelium, que per vetus in tabulis scripta est.* Nec istam inscriptionem, quae *justificatio est, poterat efficere in Judeis lex in tabulis scripta.* Succinit tanto magistro dignus discipulus Prosper lib. contra Collatorem cap. 22. his verbis: *In cordibus dighito suo Deus, id est Spiritu Sancto, scribit novum testamentum, ut legis plenitudinem, & opera charitatis naturaliter exequantur, reformata scilicet, renovataque natura.*

Secundo differunt lex vetus, & nova in eo, quod lex nova, cum habeat praesentem Christum, ejus authorem, & institutorem, qui potuit ex perfecta iustitia mereri, & Deo satisfacere pro hominibus, & contineat sacramenta, quae habent vim causandi gratiam, & sunt veluti vasa illam continentia, habet vim justificandi ex propriis; secus lex vetus, cum utroque caruerit. Unde D. Thomas hic q. 107. ar. 1. ad 2. & D. Augustinus pluribus in locis affirman, illos, qui in veteri testamento fuerunt Deo accepti per fidem, secundum hoc ad novum testamentum pertinuisse; non enim justificabantur, nisi per fidem Christi, qui est author novi testamenti, juxta illud 1. ad Corinth. 2. *Bibebant autem de spiritali consequenze eos petra, petra autem erat Christus.*

Hinc intelliges, legem veterem recte speculo comparari, quod maculas quidem ostendit, sed non aufert; legem vero novam aquae, quae non solum sordes valet ostendere, sed

sed & abstergere : unde Ezechiel. 25. Dominus fidelibus novæ legis pollicetur : *Efundam super vos aquam mundam, & mundabimini ab omnibus inquinamentis vestris.*

Tertium discrimen consistit in eo , quod vetus testamentum fuit timoris , novum est amoris ; fuit enim illud servorum , quorum est timor ; istud filiorum , quorum est amor erga patrem . Unde Augustinus lib. adversus Adamantium cap. 17. *Hec est brevissima, & apertissima differentia duorum testamento-rum, timor, & amor.* Sicut ergo timor prior est amore , sic testamentum vetus prius fuit novo ; & sicut timor locum præparat charitati , cum autem cœperit charitas habitare , pellitur timor , qui ei præparavit locum ; ita testamentum vetus præparavit locum testamento novo , quo adveniente , abrogatum fuit .

Ex hoc sequitur quartum discrimen : in veteri enim testamento mysteria fidei , præsertim Trinitatis , & Incarnationis , erant obscure , & imperfecte cognita ; in novo clare , & expresse sunt revelata : quia nimurum servi non tam perfecte sciunt consilia , & secreta patris familias , quam filii . Unde Christus Joan. 14. Discipulis dicebat : *Jam non dicam vos servos, quia servus nescit, quid faciat dominus ejus.* Hanc differentiam indicavit Augustinus , cum dixit , vetus testamentum esse occultationem novi , & novum esse revelationem veteris , & propter hoc Moysem , cum loqueretur ad populum , faciem velasse , Christum vero nobis revelata facie locutum esse , ut ait Apostolus 2. ad Corinth. 3.

Ex hoc intelliges , quod sicut hemisphærium eo magis clarescit , quo magis ei sol appropinquat ; ita status veteris legis , secunda

dum majorem ad Christum , & Euangelium propinquitatem , majorem cognitionis divinorum mysteriorum claritatem , & illustrationem accepit , & ut loquitur Gregorius Papa homil. 16. super Ezechielem : Secundum incrementa temporum crevit scientia Sanctorum Patrum , & quanto viciniores adventui Salvatoris fuerunt , tanto sacramenta salutis plenius perceperunt .

Quintum discrimen inter novum , & vetus testamentum consistit in eo , quod novum cœli fores aperuit , quas vetus aperire non potuit , ut declarat Apostolus ad Hebræos 9. his verbis : In secundo tabernaculo semel in anno solus Pontifex introibat , non sine sanguine , quem offerret pro sua , & populi ignorantia , hoc significante spiritu Sancto , nondum propalatam esse sanctorum viam , adhuc priore tabernaculo habente statum : Hoc est : in Sancta Sanctorum , quæ templi pars erat intima , & cæteris præstantior , solus Pontifex semel in anno intrabat , cæteri vero sacerdotes eo ingressu prohibebantur ; quia occlusione intimi adyti , & partis templi præcellentioris , adumbrabat Spiritus Sanctus , viam in cœlum fuisse occlusam , quandiu vetus testamentum ratum fuit . Novi autem testamenti author Christus , primus omnium cœlum penetravit , cœlestemque viam , ac fores aperuit . Quam ob causam duodecim portas cœli patentes vidit Joannes Apocal. 21. Portæ (inquit) ejus non claudentur . Ab oriente portæ tres , ab Aquiloni portæ tres , ab Austro portæ tres , & ab Occasu portæ tres . Versus omnes cœli plagas portæ patent , quia totius orbis habitatoribus patent , non veteris , sed novi beneficio testamenti .

De-

Demum, omissis pluribus aliis inter veterem, & novam legem differentiis, hæc præcipua, & veluti capitalis est, quod lex vetus fuit umbra, & figura novæ, nova autem veteris perfectio, & complementum. Unde Hieronymus lib. 1. advertit Pelagianos cap. 9. In lege promittitur, in Euangelio impletur: ibi initia, hic perfectio est: in illa operum fundamenta jaciuntur, hic fidei, & gratiæ culmen imponitur. Et Bernardus homil. 1. super Missus est, docet, quod sicut fructus tam seminis, quam florum finis, & complementum est; ita Christus finis fuit, perfectio, & complementum veteris legis. Alia similitudine utitur Chrysostomus (vel ut alii volunt, Victor Antiochenus) exponens illud, quod habetur Marci 4. Ulro terra fructificat prium herbam, deinde spicam, deinde plenum frumentum in spica. Subdit enim: Primo herbam fructificat in lege naturæ, postmodum spicas in lege Moysi, postea plenum frumentum in Euangelio.

TRACTATUS VII.

DE
GRATIA.

Um juxta Augustinum lex data fuerit, ut gratia quereretur; gratia vero, ut lex adimpleretur, non incongrue tractationi de legibus tractatum de gratia subjungimus, in quo prius de ejus necessitate agemus; deinde varias ejus divisiones breviter explicabimus; postea differemus de gratia habituali, quæ est præ-

præcipua , & nobilissima species gratiæ , ejusque essentiam , proprietates , causas , & effectus exponemus .

Sed priusquam de illis agamus , duo breviter hic præmittenda sunt . Primum est , nomine gratiæ significari dona gratis , & liberaliter a Deo collata ; unde cum hujusmodi dona triplicis generis sint , triplex etiam est gratiæ acceptio , & significatio : una larga , & impropria , quæ comprehendit quodcumque beneficium a Deo nobis gratis , & liberaliter concessum , sive ad naturam pertineat , sive supra naturam sit : unde Patres sextæ Synodi actione 11. in epistola ad Sophronium , Angelorum immortalitatem , licet ipsis connaturalem , nomine gratiæ afficiunt ; & Augustinus epist . 95. & 105. observat , rerum creationem , & conservationem gratiam vocari posse , quia gratis , & liberaliter a Deo conceditur . Hanc gratiam non negavit Pelagius , imo Patres Concilii Palæstini fecellit , concedens necessitatem gratiæ ad opera salutaria , sed gratiæ nomine dolose beneficium creationis , seu liberum arbitrium , gratis a Deo nobis concessum , intelligens , ut testatur Augustinus serm . 11. de verbis Apostoli cap . 7. ubi de Pelagianis ait : „ Disputantes contra gratiam pro „ libero arbitrio , fecerunt auribus piis , & „ catholicis offenditionem , cœperunt horri , „ cœperunt ut certa pernicies devitari , cepit „ de illis dici , quod contra gratiam disputa „ rent , & invenerunt ad relevandam istam in „ vidiam tale commentum : non , inquit , con „ tra gratiam Dei dispu , unde probes ? eo „ ipso , inquit , non contra gratiam Dei dispu „ to , quod liberum arbitrium defendo . Videte „ acumen , sed vitreum ; lucet quasi vanitate : „ sed

„ sed frangitur veritate „. Alia acceptio gratiæ est magis propria , & non se extendit ad quodcumque donum , in creatione gratis , & liberaliter a Deo concessum , sed duntaxat ad dona aliqua naturalia , omnino indebita , quale in statu naturæ integræ fuit donum integritatis , & cuiusmodi sunt in statu naturæ lapsæ auxilia quædam intra ordinem naturæ specialia , quæ dantur ad aliqua opera difficultaria , & heroica ordinis naturalis exercenda , ut infra patebit . Tertia demum est maxime propria , & significat solum dona , & beneficia supra totum naturæ debitum nobis per Christum exhibita , in ordine ad nostram salutem : & hæc est propria , & theologica gratiæ consideratio , de qua in hoc Tractatu præcipue acturi sumus , quamvis de gratia secundo modo accepta mentionem interdum facturi simus .

Secundo explicandum est , qua ratione D. Thomas hic qu. 109. in titulo , gratiam principium exterius humanorum actuum appellat : cum enim gratia tum habitualis , tum actualis intrinsece animæ , vel potentiis ejus inhæreat , videtur quod eam appellare non debuerit principium extrinsecum actuum humanorum . Unde aliqui dicunt titulum esse mendosum , & aliter esse legendum , scilicet de exteriori principio humanorum actuum , nempe de Deo , quatenus per gratiam nos movet . Sed melius respondeatur , S. Doctorē appellare gratiam principium exterius humanorum actuum , non inhæsive , sed egressive ; quia licet ponat aliquid in anima vel per modum habitus , ut gratia sanctificans , vel per modum motionis , ut gratia auxilians ; illud tamen ex intraneis naturæ non dimanat , sed ab exteriori principio , Deo scilicet , ut operante supra totam

natu-

naturæ exigentiam , procedit . Sicut lapis dicitur moveri a principio extrinseco , quia licet impulsus illi inhæreat ; tamen a principio exteriore causatur .

C A P U T I .

De necessitate gratiæ ad cognitionem veri.

Cum veritates aliæ sint naturales , aliæ supernaturales , ut necessitas gratiæ in ordine ad cognitionem veri clarius elucescat , de utrisque hic agendum est , & primo quidem de cognitione veritatum naturalium , id est quæ ex primis principiis per evidentem consequentiam possunt deduci , & ex sensibilibus cognosci ; postea vero de cognitione veritatum supernaturalium , quæ nullam habent cum principiis naturalibus connexionem , & omnia sensibilia , ac naturalia transcendunt ; quales sunt mysteria nostræ fidei , & veritates a Deo revelatæ .

§. I.

Homo sine auxilio Dei speciali , & cum solo generali concursu potest plures , imo & singulas divisive veritates naturales cognoscere , non tamen omnes collective .

Prima pars est contra Vasquem , quem ex nostris novissime secutus est P. Vincen-
tius Contensonus tomo 5. dissert. 2. cap. 1. Est tamen D. Thomæ hic qu. 109. art. 1. ubi sic ait : *Ad cognitionem cujuscumque veri homo indiget auxilio divino , ut intellectus a Deo mo-
veat-*

ventur ad suum actum , non autem indiget ad cognoscendam veritatem in omnibus nova illustratione superaddita naturali illustrationi , sed in quibusdam , que excedunt naturalem cognitionem .

Respondent Adversarii , D. Thomam his verbis solum excludere necessitatem novæ illustrationis superadditæ lumini naturali intellectus humani , non tamen necessitatem auxilii Dei specialis distincti a generali ejus concursu .

Sed contra ; Licet D. Thomas loco citato afferat , hominem indigere auxilio Dei ad cognitionem cujuscumque veritatis , nomine tamen auxilii divini non intelligit donum speciale gratiæ actualis , sed generalem duntaxat concursum primæ causæ cum omnibus causis secundis ; loquitur enim de auxilio Dei communi intellectui , & cæteris agentibus creatis , ut constat manifeste ex eo , quod immediate ante verba citata comparet intellectum humanum cum aliis agentibus creatis quantum ad indigentiam auxilii divini , quod appellat motionem ad agendum : auxilium autem Dei , commune intellectui , & aliis causis secundis , non est speciale , sed generale , ut constat : asserit ergo S. Doctor , intellectum hominis , cum solo concursu Dei generali , absque dono speciali gratiæ , etiam actualis , & naturalis ordinis , aliquas veritates naturales posse cognoscere .

Confirmatur : D. Thomas ait , quod ad cognitionem cujuscumque veri indiges homo auxilio divino : Sed homo non indiget auxilio speciali gratiæ , etiam actualis , & naturalis ordinis , ad cognitionem cujuscumque veri ordinis naturalis , v. g. ad cognitionem pri-

morum principiorum, quam habet a natura insitam, ut de se patet: Ergo D. Thomas non loquitur de speciali Dei auxilio; sed solum de concursu, & auxilio generali.

Confirmatur amplius ex alio ejusdem S. Doctoris testimonio, desumpto ex 2. sent. dist. 28. qu. 1. art. 5. in argumento *sed contra*, in quo sic concludit: *Ergo intellectus sine omni gratia superaddita veri cognitionem habere potest.* Ubi per verba illa, *sine omni gratia*, excludit necessitatem cuiuscumque gratiae, sive habitualis, sive actualis, sive ordinis naturalis, sive supernaturalis, ad cognoscendas veritates naturales. Unde 1. p. qu. 93. art. 3. sic ait: *Omnia illa, quae virtualiter existunt in primis principiis per se notis, naturaliter homines cognoscere possunt.*

Potest insuper eadem pars probari hac ratione, quam idem S. Doctor loco citato insinuat: Quaelibet creatura potest, cum solo generali Dei concursu, actus sibi connaturales, & proportionatos elicere, ut sol illuminare, ignis calefacere, visus colores, & auditus sonos percipere: Ergo similiter intellectus, cum eodem concursu, & sine auxilio Dei speciali, potest cognoscere veritates naturales, quæ ex primis principiis per evidentem consequiam possunt deduci, & ex sensibilibus cognosci; cum naturaliter habeat (inquit S. Doctor) intelligibile lumen, quod est de se sufficiens ad aliqua intelligibilia cognoscenda, ad ea scilicet, in quorum notitiam per sensibilia possumus devenire. Alioquin (ut ait idem Doctor Angelicus in 2. dist. 28. qu. 1. art. 5.) Natura humana aliis imperfectior esset, quæ non sibi sufficeret in naturalibus operationibus, & intellectus esset deterioris

CON-

conditionis, quam aliæ formæ, & potentiae naturales, cum tamen sit illis perfectior, & activior, utpote immaterialior.

Respondet Contensonus supra citatus, duplex inter intellectum, & cæteras formas, & potentias naturales discrimen repetiri. Primum est, quod cæteræ formæ, & potentiae naturales non sunt ullo vulnere sauciatae, sicut intellectus per peccatum originale manet vulnere ignorantiae læsus. Secundum, quod aliæ formæ, & potentiae non sunt indifferentes, sed determinatæ ad sua objecta; intellectus vero ad verum, & falsum indifferens est; unde quod determinetur ad verum potius, quam ad falsum, indiget auxilio Dei intra ordinem naturalem speciali.

Sed contra primo: Etsi per peccatum originale lumen naturale intellectus nostri fuerit læsum, sive attenuatum, non tamen fuit totaliter extinctum, ut de fide certum est: Ergo cum solo generali Dei concursu plures veritates naturales, sicut ex facilitioribus, & per se notis, vel quæ ex primis principiis per evidentem consequentiam possunt deduci, cognoscere potest. Pater consequentia: nam lumen attenuatum, et si non intense, potest tamen lucere, & homo ergotus potest aliquos passus elicere, et si non sicut homo sanus: item potentia visiva, quantumcumque læsa, & debilitata, dummodo non sit totaliter extinta, potest absque speciali Dei auxilio plura objecta videre, ea præsertim, quæ maxime visibilia sunt.

Confirmatur: Voluntas hominis magis est læsa per peccatum originale, quam ejus intellectus; magisque indifferens ad bonum, & malum, quam ille ad verum, &

falsum; & tamen non obstante hac plaga, & indifferentia, voluntas humana in statu naturæ lapsæ potest sine gratia, seu auxilio Dei speciali elicere plures actus honestos, & moraliter bonos, ut colere parentes, succurrere egenis, &c. ut capite sequenti contra prædictum Authorem ostendemus: Ergo a fortiori intellectus, non obstante vulnere ignorantiae, per peccatum originale inflicto, & indifferentia, quam habet ad verum, & falsum, cum solo generali Dei concursu, plures veritates naturales cognoscere potest.

Addo, quod sicut voluntas ex sua naturali inclinatione propensa est in bonum honestum, ita intellectus naturaliter inclinatur in verum sibi proportionatum; unde falsitas est contra ejus naturam, sicut peccatum dicitur esse contra naturalem inclinationem hominis: Ergo sicut voluntas ratione propensionis naturalis, quam habet ad bonum honestum, potest naturaliter, & secluso speciali Dei auxilio plures actus honestos, & moraliter bonos elicere; ita & intellectus plures veritates naturales cognoscere.

Quod vero singulas cognoscere possit, hac ratione suadetur: Maxima, & difficillima veritatum naturalium cognitio est illa, quæ habetur de Deo ex effectibus naturalibus, ut pote quæ sit de objecto maxime immateriali, & a sensibus remoto: Sed in statu naturæ lapsæ potest divinitas naturaliter ex creaturis ab homine cognosci, ut constat ex illo ad Roman. i. *Invisibilia Dei per ea, quæ facta sunt, intellecta conspicuntur:* & ex illo Sapient. 13. *A magnitudine speciei, & creature cognoscibiliter poterit horum creator*

ror videri: Ergo a fortiori quæcumque alia veritas naturalis inferior poterit naturaliter, seu absque auxilio Dei speciali cognosci.

Quod autem non valeat homo in statu naturæ lapsæ totam veritatum naturalium collectionem sine gratia, seu auxilio speciali attingere, ostenditur contra Cajetanum. Potentia infirma, & vulnerata non potest præstare totum id, quod facere potest potentia sana, & integra: Sed attingere omne verum speculabile, nedum divisive, sed etiam collective, est actus potentiarum intellectivarum sanarum, & integrarum: Ergo intellectus hominis lapsi, vulnere ignorantiarum affectus, non potest, nisi sanetur per gratiam, seu speciali auxilio confortetur, totam veritatum naturalium collectionem attingere.

Confirmatur: Voluntas propter vulnus malitiarum non potest omnia præcepta legis naturæ collective sumpta adimplere, ut infra patebit: Ergo pariter intellectus, propter vulnus ignorantiarum, non poterit omnem verum collective cognoscere.

Respondet Cajetanus, vulnus ignorantiarum ex peccato originali proveniens esse tantum in intellectu practico, non autem in speculativo; subindeque non impedire, quod homo in statu naturæ lapsæ omne verum speculativum collective attingat, sed solum omne verum practicum, seu ad operationem ordinatum.

Sed contra: D. Thomas 4. contra Gent. c. 52. dicit, quod *inter spirituales pœnas culpe originalis potissima est debilitas rationis, ex qua contingit, quod homo difficulter pervenit ad veri cognitionem, & de facto labitur in errorem, & appetitus bestiales omnino*

superare non potest, sed multoties obnubilatur ab eis. Quibus verbis primo constituitur vulnus ignorantiae in intellectu speculativo, & deinde in practico, quatenus non potest bestiales superare appetitus. Et in hac parte supra q. 85. art. 3. ad calcem corporis articuli ait: *Per peccatum ratio hebetatur præcipue in agendis.* Ubi ly *præcipue* denotat rationem hebetari etiam in speculabilibus, licet minus principaliter. Unde hic art. 2. ad 3. afferit, quod *magis natura humana corrupta est per peccatum, quantum ad appetitum boni, quam quantum ad cognitionem veri.* Ergo juxta D. Thomam, vulnus ignorantiae ex peccato originali proveniens, non est tantum in intellectu practico, sed etiam in speculativo.

Probatur secundo eadem tertia pars assertio-
nis hoc discursu: Ad agendum non solum re-
quiritur potentia physica, sed etiam moralis,
& expedita, seu ab omnibus impedimentis li-
bera: At in homine lapso, licet sit potentia
physica ad totam veritatem ordinis naturalis
collectionem, eo quod illæ contineantur in
linea entis sensibilis, quod est objectum pro-
portionatum nostri intellectus, pro statu con-
junctionis cum corpore; non tamen poten-
tia moralis, & expedita, cum in statu na-
turæ lapsæ plura sint impedimenta, quibus
quasi ligatur, & impeditur, ne possit totam
illam collectionem attingere, nimirum bre-
vitas vitæ, indispositio corporis, hebetudo
sensuum, rebellio, & perturbatio passionum,
solicitude frequens circa temporalia; & si-
milia, quæ insinuari videntur verbis illis
Sapient. 9. *Corpus, quod corrumpitur, ag-
gravat animam, & terrena inhabitatio de-
primit sensum multa cogitantem:* Ergo non
potest

potest homo in statu naturæ lapsæ , sine speciali Dei auxilio , totam veritatum naturalium collectionem attingere .

§. II.

Solvuntur objectiones .

Obijicies primo contra primam partem assertionis : SS. Patres interdum assertunt , omnem nostram cognitionem descendere a Patre lumen , & omne verum , a quocumque dicatur , esse a Spiritu Sancto : Ergo censem neminem , sine speciali Dei gratia , posse ullam veritatem cognoscere . Unde Deum orabant ad illam obtinendam , ut constat de S. Thoma , qui hanc precandi formam studiis suis præmittere solebat : *Creator ineffabilis , qui verus fons luminis , & sapientie diceris , infundis super intellectus mei tenebras radium tuæ claritatis , duplicum u me removens privationem , & tenebras , peccatum scilicet , & ignorantiam , &c.*

Respondeo , vel SS. Patres loqui de cognitione aliquo modo supernaturali , & ad salutem conducente , quam fatemur non haberi sine gratia ; vel solum indicare scientiam , & cognitionem veritatum naturalium manare a Deo ut authore naturæ , & per concursum generalem , intellectum moventem ad verum intelligendum , ut exponit S. Thomas q. 24. de verit. art. 14. in resp. ad argumentum sed contra , & hic art. 1. ad 1. his verbis : *Ad primum dicendum , quod omne verum , a quocumque dicatur , est a Spiritu Sancto , sicut infundente naturale lumen , & movente ad intelligendum , & loquendum veritatem , non sicut ab inhabitante per gratiæ.*

Ad illud, quod subditur de oratione, descendum est, quod D. Thomas, & alii sancti vel postulabant a Deo in oratione notitiam veritatum supernaturalium, vel remotionem impedimentorum, ad hoc ut plenius, clarius, ac facilius cognoscerent veritates naturales. Addo nos posse pro veri affectu orare, quando illa habet aliquid fallibilitatis, & contingentiae, sicut ob eandem rationem oramus pro pluvia, & serenitate obtinenda: De quo fusius capite sequenti.

Objicies secundo contra secundam partem: Voluntas ratione vulneris a peccato originali contracta, impotens moraliter mansit ad aliqua opera moraliter bona ordinis naturalis, v.g. ad diligendum Deum ut authorem naturae, vel ad superandam gravem temptationem contra præcepta naturalia; unde non potest talia opera sine gratia, seu speciali auxilio ordinis naturalis exercere, ut infra patebit: Ergo similiiter intellectus, ob vulnus ignorantiae, nisi simili auxilio roboretur, non poterit singulas veritates naturales cognoscere.

Respondeo, concesso Antecedente, negando consequentiam, & paritatem. Ratio discriminis est, quia etsi utraque potentia per peccatum vulnerata remanserit, diversimode tamen: intellectus enim non fuit vulneratus circa prima principia, ex quibus ad conclusiones cognoscendas procedit, sed solum in extrinsecis, quæ intellectio deferviunt, puta quia sensus externi fuerunt debilitati, vita abbreviata, & plures necessitates ad illam debite conservandam contraximus. Voluntas autem vulnerata fuit erga finem, qui est principium in operabilibus, quatenus per culpam originalem a fine

sine ultimo mansit aversa; unde non mirum, quod debilitata intrinsece in principio recte operandi, a quo omnis ejus motio incipit, non possit aliqua opera moraliter bona ordinis naturalis, ob illorum difficultatem, sine auxilio speciali exercere, bene tamen intellectus singulas veritates naturales cognoscere.

Objicies tertio cum Cajetano contra tertiam partem assertionis: *Vulnus ignorantiae ex peccato originali proveniens non afficit intellectum speculativum, sed duntaxat practicum:* Ergo homo in statu naturae lapsæ potest absque auxilio speciali omnes veritates speculativas collective sumptas cognoscere. Consequentia patet ex supra dictis. Antecedens vero probat Cajetanus ex D. Thoma supra q. 85. art. 3. ubi assignando potentias, que per peccatum vulneratae remanerunt, asserit unam ex illis esse rationem, in qua est prudentia: id est (ut interpretatur idem Author) rationem, prout subest prudentia: Sed ratio, prout subest prudentia, est practica, & non speculativa: Ergo ex D. Thoma solus intellectus practicus per peccatum originale vulneratus est.

Respondeo negando Antecedens, & ad illius probationem dico, glossam illam Cajetani non esse bonam, nec textui consonam. nam S. Doctor ibidem ait, vulneratam fuisse voluntatem, in qua est iustitia; & tamen ex hoc inferre non licet, voluntatem solum accepisse vulnus malitiæ, prout iustitia subest; nam verba illa non faciunt sensum replicativum, sed specificativum. Cum ergo dicit, vulneratam esse rationem, in qua est prudentia, solum vult ratione practicâ, in qua residet

prudentia, præcipue vulneratam fuisse, ut expresse intendit ad finem corporis ejusdem articuli, verbis istis, quæ supra retulimus: *Per peccatum ratio hebetatur præcipue in agendis.*

Objicies quarto: Quælibet creatura potest cum solo concursu generali exire in actum suæ formæ, sive virtuti naturali proportionatum, ut docet D. Thomas hic art. 1. Sed cognoscere omnes veritates naturales collective, est actus proportionatus lumini naturali intellectus nostri, etiam in statu naturæ lapsæ, cum ille habeat pro objecto proportionato ens sensibile, seu cognoscibile per species a sensibus ministratas, sub quo omnes veritates naturales continentur, cum per eas (ut supra declaravimus) illas tantum intelligamus, quæ ex sensibus cognosci possunt: Ergo potest homo in statu naturæ lapsæ omnes veritates naturales collective cognoscere.

Respondeo distinguendo Majorem: quælibet creatura potest cum solo concursu generali exire in actum suæ formæ, sive virtuti proportionatum, proportione tam morali, quam physica, concedo majorem: proportione tantum physica, nego majorem. In statu autem naturæ lapsæ, licet collectio omnium veritatum naturalium sit proportionata intellectui humano, proportione physica, non tamen morali, ob plura impedimenta extrinseca supra adducta, quibus in tali statu potentia cognoscitiva ligatur, & impeditur, ne exeat in actum suæ virtuti proportionatum.

Dices. Non obstantibus illis impedimentis, potest homo singulas veritates naturales cognoscere: Ergo & omnes collective, cum a singulis enumeratis ad omnia simul ascendendo valeat

valeat consequentia, ut si dicatur, hic homo est risibilis, & ille, & iste, & sic discurrendo per singulos: Ergo omnis homo est risibilis, vel omnes homines collective sumpti sunt risibiles.

Respondeo, concessso Antecedente, negando consequentiam, & ad ejus probationem dico, modum arguendi a singulis ad omnia simul ascendendo, esse bonum, quando consequens eodem modo sumitur, ac antecedens, secus vero si alio modo sumatur: v. g. si dicitem, hic equus separatus ab alio non potest trahere currum, nec ille, nec iste; ergo nec omnes equi simul, & collective sumpti, non valeret discursus, quia procederetur a sensu divisivo ad collectivum. Ita similiter, quamvis haec argumentatio sit bona, potest intellectus hanc, & illam, & istam veritatem, enumerando omnes divisive, cognoscere; ergo & omnes similiter divisive: ista tamen non valet, intellectus potest hanc, & illam, & istam veritatem cognoscere divisive, ergo & omnes collective, quia idem committitur defectus, & arguitur a sensu divisivo ad collectivum.

Dices rursus. Intellectus, cum sit potentia spiritualis, quo plures veritates cognoscit, eo fit potentior ad alias cognoscendas: Ergo tandem poterit ad totam veritatum naturalium collectionem pervenire.

Respondeo, quod licet intellectus quo plurimae cognoscit, eo fiat ad alia cognoscenda potentior in seipso, in sibi tamen adjunctis, & subservientibus, puta sensibus corporeis, debilitatur, & fatigatur, subindeque ob illud impedimentum, & alia similia supra recentita, non potest totam naturalium veritatum collectionem attingere.

Quætes, an homo in statu naturæ lapsæ possit sine auxilio speciali non solum singulas veritates naturales speculativas, sed etiam practicas cognoscere?

Respondeo, quod quamvis intellectus humanus sine speciali auxilio possit cognoscere singulas veritates practicas naturales, que pertinent ad Philosophiam moralem, & quæ sunt principia, vel conclusiones illius, quia eadem est ratio de illis, ac de speculativis, non tamen omne verum practicum ad prudentiam pertinens; cum enim homo in statu naturæ lapsæ, per peccatum originale a Deo ut sine naturali, & supernaturali aversus sit, non potest sine gratia, vel auxilio speciali formare hoc judicium practicum, & prudentiale: *Hic, & nunc Deus author naturæ est super omnia diligendus:* Tum quia tale judicium dependet a rectitudine appetitus: Tum etiam quia est semper conjunctū cum executione, & habet rationem imperii practici; in statu autem naturæ lapsæ homo non potest sine auxilio speciali Deum, etiam ut authorem naturæ, super omnia diligere, ut cap. 3. ostendemus.

§. III.

Ad cognoscendas veritates supernaturales, & assentiendum mysteriis nostræ fidei, non sufficit externa revelatio, sed necessario requiritur gratia interna, non solum in intellectu sed etiam in voluntate.

Prima pars est certa de fide contra Pelagianos, docentes, supposita externa revelatione, seu doctrina, posse hominem sine spe-

speciali gratia intrinseca credere mysteria fidei. In quo errore fatetur Augustinus lib. de prædestin. Sanct. cap. 3. se fuisse ante Pontificatum, illumque variis Scripturæ testimoniis ibidem refellit, præfertim verbis illis Apostoli 1. ad Corinth. 4. *Quid habes, quod non accepisti? Si autem accepisti, cur gloria-
ris, quasi non acceperis?* quibus dicit se fuisse convictum, ac permotum ad retractandum, quod ante Pontificatum docuerat. Item urget Pelagianos ex verbis ejusdem Apostoli immediate precedentibus, *Quis enim te discernit?* Si enim (inquit) fides esset in nobis ex nobis, quilibet fidelis dicere posset: fides mea, quam non ex gratia, sed ex meipso habeo, me discernit. Unde etiam ipse 2. ad Corinth. 3. *Non sumus sufficiētes cogitare a-
liquid ex nobis quasi ex nobis.* Minus enim est cogitare, quam credere, nam credere est cogitare cum assensu: Si ergo non possumus ex nobis cogitare veritates supernaturales, multo minus eas possumus credere.

Ratio etiam id suadet: assensus enim fidei, quo prædictis veritatibus assentimur, est supernaturalis, cum illas sub motivo, seu ratione formalis sub qua supernaturali, nempe lumine divinæ revelationis, attingat: Ergo est improportionatus viribus natura-
libus intellectus, subindeque indiget eleva-
tione, & gratia ipsi intrinseca ad illum eli-
ciendum.

Quod vero non solum in intellectu, sed etiam in voluntate requiratur auxilium super-
naturalē, etiam de fide certum est, contra Semipelagianos, qui licet cum Ecclesia Ca-
tholica faterentur, nos non posse credere my-
steria revelata sine gratia, contendebant ta-
men initium fidei esse a nobis, scilicet piam
affectionem.

affectionem ad credendum , seu quendam
credulitatis affectum . Qui error proscribi-
tur in Concilio Arausiano can. 5. his verbis :
*Si quis sicut augmentum , ita & initium fi-
dei , ipsumque credulitatis affectum , non per
gratiæ donum , sed naturaliter nobis inesse di-
cit , Apostolicis dogmatibus adversarius pro-
batur , &c.*

Ratio etiam suffragatur : nam ad creden-
dum ex motivo supernaturali requiritur pia
motio , seu affectio voluntatis , quæ efficaciter
moveat , & determinet intellectum ad assen-
tiendum veritatibus ipsi revelatis : Ergo et-
iam requiritur auxilium supernaturale ex par-
te voluntatis . Patet consequentia , quia vo-
luntas suis viribus solis non potest movere ef-
ficaciter ad actum supernaturalem , cuiusmo-
di est credere ex motivo supernaturali : An-
tecedens vero probari solet in tractatu de fi-
de , ex eo quod veritates supernaturales in hoc
differunt a naturalibus , quod istæ habent evi-
dentiæ vel ex seipsis , vel ex medio , per quod
illuminantur , ratione cujus evidentiæ convin-
cunt intellectum , & ab eo quasi extorquent
consensum , absque eo quod sit necessarium
eum a voluntate ad talem actum applicari ,
saltem applicatione libera : illæ vero nullam
habent evidentiæ , ratione cujus earum cer-
titudo penetrari possit ab intellectu ; subin-
deque quantumcumque proponantur , non
convincunt intellectum , nec ipsum trahunt
ad præbendum consensum , sed necessarium
est , ut a voluntate specialiter applicetur ad
hujusmodi assensum . Unde belle Augustinus
tract. 36. in Joan. *Intrare quisquis in Ecclesiam
potest nolens , accedere ad altare potest nolens ,
sed credere non potest nisi volens .* Hæc vero
applicatio , pia motio , seu affectio voluntatis
com-

communiter appellatur, & de illa intelligi potest id, quod dicitur Acto. 16. de quadam Lydia purpuraria, nempe quod *Deus aperuit ejus cor intendere his, quæ dicebantur a Paulo;* nam ibi per cor significatur voluntas, quæ prius a Deo tangi, & immutari debet per auxilium gratiæ, quam intellectus præbeat assensum veritatibus revelatis.

Confirmatur: Illa pia affectio voluntatis habet objectum supernaturale: Ergo est supernaturalis, subindeque auxilium supernaturale pro principio formaliter exposcit. Utraque consequentia patet: nam ex supernaturalitate objecti formalis recte colligitur supernaturalitas in actu, & ex supernaturalitate actus supernaturalitas auxilii, & principii. Antecedens vero probatur: Objectum volitum a pia affectione est ipse actus fidei formaliter: Sed ille est supernaturalis: Ergo pia illa affectio habet objectum supernaturale.

Objicies primo contra primam partem assertionis difficile Augustini testimonium, de sumptum ex libro de bono persever. cap. 14. ubi loquens de Tyriis, & Sidoniis, qui visis Christi miraculis credidissent, ut dicitur Matth. 11. subdit: *Ex quo apparet habere quosdam in ipso ingenio divinum naturaliter munus intelligentie, quo inducantur ad fidem, si congrua suis mentibus vel audiant verba, vel signa conspiciant.* Quibus verbis docere videtur, aliquos ex solo naturali munere intelligentiæ, absque ullo interiori dono gratiæ, quo præveniantur, posse moveri ad fidem, & credere mysteriis revelatis.

Respondeo duplicem esse, eamque verissimam hujus loci intelligētiā. Prima est, quod per naturale lumen intelligentiæ S. Augustinus non

non intelligat quid naturale, sed intelligat munus naturaliter divinum, id est natura sua divinum, & supernaturale, ad intelligendum; hoc enim modo explicat ipsem Augustinus, relatus a S. Thoma, illud Apostoli, *Gentes naturaliter, quæ legis sunt, faciunt, dicens: Non te moveat, quod naturaliter dixit eos, quæ legis sunt, facere; hoc enim agit Spiritus gratiæ, ut imaginem Dei, in qua naturaliter facti sumus, instauret in nobis.*

Secunda, quæ magis litteralis, & textui magis consona videtur, est, ibi loqui S. Augustinum de motione ad fidem tantum objectiva; ita quod solum velit, quosdam habere naturale munus intelligentiæ tale, quod eadem miracula, & eadem exterior prædicatio Euangelii sint magis congrua naturali illorum ingenio, quam ingenio aliorum ad movendos ipsos solum exterius, & objective, quia illos alliciunt, & exterius invitant objective magis, quam alios; non tamen quod illa sola signorum visio exterior de facto illos ad fidem trahat, ita ut de facto per illam solam credant. Hanc esse mentem Augustini constat ex verbis subjunctis, statim enim subdit: *Et tamen si Dei altiori judicio a perditio- nis massa non sunt gratiæ predestinatione dis- creti, nec ipsa eis adhibentur vel dicta divi- na, vel facta, per quæ possent credere, si audirent utique talia, vel viderent.*

Objicies secundo contra secundam partem assertionis: Si ad credendum requiratur auxilium supernaturale ex parte voluntatis, sicut requiritur ex parte intellectus, sequitur, quod sicut in intellectu præter auxilium actuale posse habitus supernaturalis fidei, quo incli- patur permanenter ad credendum; ita sit po- nen-

neridus aliquis habitus supernaturalis in voluntate, quo illa quoque permanenter inclinetur ad imperandum actum fidei: Sed hoc videtur absurdum: Ergo & illud. Major videtur vera , cum eadem sit ratio de habitu, ac de auxilio, & de voluntate, ac de intellectu. Minor vero suadetur: Talis habitus supernaturalis in voluntate receptus , nec erit virtus Theologica (cum virtutes Theologicae sint tantum tres , nimirum fides, spes , & charitas) nec moralis infusa ; quia virtutes morales infusae amittuntur per peccatum mortale cum ipsa gratia, a qua emanant ; si vero talis habitus daretur in voluntate , ille in peccatore remaneret , sicut fides, cum peccator actum fidei informis elicere possit : Ergo talis habitus in voluntate admittendus non est .

Respondeo primo negando sequelam majoris : sicut enim in naturalibus ad opera artis efficienda ponitur habitus in solo intellectu , non autem in voluntate , quamvis ipse , & instrumenta debeant a voluntate moveri : ita ad assentiendum mysteriis revelatis non est ponendus habitus in voluntate , sed in solo intellectu , licet intellectus assensum fidei non eliciat , nisi applicatus a voluntate ; sed sufficit , quod voluntas ad hanc applicationem per actuale auxilium elevetur . Ratio vero dispartitis inter intellectum , & voluntatem , quantum ad actum fidei , est , quia intellectus est elicivus immediate actus fidei , & ideo in eo est formalis , & immediata difficultas , quæ debet superari per habitum ; voluntas vero mediate solum , & applicative ad illum concurrit , & ideo habitu non eget .

Respondeo secundo , data sequela majoris , negando minorem . Ad cuius probationem di-

cendum est , talem habitum in voluntate
receptum nec esse proprie virtutem mora-
lem , nec Theologicam , sed reductive per-
tinere ad virtutem Theologicam , scilicet
ad fidem , ut viam , & dispositionem ad il-
lam . Utraque solutio probabilis est , licet
prima videatur probabilior , & facilior . Sed
de hoc fusius in tractatu de fide cap. 7.

C A P U T II.

*De necessitate gratiæ ad volitionem ,
& operationem boni .*

CERTUM de fide est contra Pelagianos , &
Semipelagianos , non posse hominem
lapsum absque gratiæ auxilio quidquam co-
gitare , velle , aut facere , quod conducat ad
vitam æternam . hoc enim evidenter docet
Scriptura Joan. 6. *Nemo potest venire ad me ,*
nisi Pater , qui misit me , traxerit eum . &
15. *Sine me nihil potestis facere .* 1. Corinth.
12. *Nemo potest dicere , Dominus Jesus , ni-*
si in Spiritu Sancto . Idem constat ex defi-
nitionibus Arausicanis can. 7. & Tridentini
sess. 6. can. 1. 2. & 3. Ratio etiam id suadet:
cum enim vita æterna sit quid supernatu-
rale , excedens omnem naturæ creatæ , &
creabilis exigentiam , media ei proportionata
debent esse supernaturalia , adeoque o-
mnes naturæ vires excedentia . Solum ergo
difficultas esse potest , an homo pariter gra-
tia indigeat ad volendum , & operandum
bonum morale ordinis naturalis , seu ad eli-
ciendos actus honestos , & moraliter bonos:
quales sunt colere parentes , subvenire ege-
njs , prudenter gubernare rem publicam ,
reddere unicuique , quod suum est : vel ad id
suffi-

sufficiat vis naturalis liberi arbitrii, seu inclinatio illi a natura insita ad bonum honestum, quæ per peccatum originale omnino extincta non est, sed duntaxat immutata?

In cujus celeberrimæ difficultatis resolutione varie opinantur Authores. Quidam enim ad quodvis honestatis opus, gratiæ habitualis influxum, & charitatis imperium desiderant, ut Michael Bajus. Alii cum Jansenio influxum saltem fidei Christianæ necessario exigunt. Alii gratiam quandam actualem auxiliarem necessariam esse estimant. Ita Gregorius Ariminensis, & Vasquez, quos ex nostris sequitur Vincen-
tius Contensonus in sua Theologia mentis, & cordis. Thomistæ demum, & alii communiter docent, ad id sufficere vires liberi arbitrii cum generali Dei concurso.

§. I.

*Confutantur tres prime sententiae, &
quarta statuitur.*

Dico primo. Ad opus morale ordinis naturalis non requiritur gratia habitualis, nec charitatis imperium.

Prima pars videtur esse de fide; colligitu enim manifeste ex Tridentino sess. 6. can. 7. ubi anathema dicitur ei, qui dixerit, omnia opera, que ante justificationem fiunt, vere esse peccata. Et can. 8. damnatur ille, qui dixerit metum gehennæ esse malum: Sed hic metus reperitur in peccatoribus ante adeptam gratiam justificationis. Ergo ex Tridentino quemque fiunt a peccatoribus ante adeptam justificationem, non sunt mala. Unde Scri-

ptura hortatur peccatores ad eleemosynam, & alia bona opera, quod non faceret, si illa non possent fieri a peccatore sine permixtione peccati; aitque Danielis 4. Nabuchodonosori, *Peccata tua eleemosynis redime*, constat autem operibus malis peccata redimi non posse. Demum Augustinus de Spir. & litt. cap. 24. hæc scribit: *Sicut non impediunt a vita æterna iustum quedam peccata venialia, sine quibus hæc vita non dicitur; sic ad salutem æternam nihil proficiunt aliqua bona opera, sine quibus difficillime vita cuiuslibet hominis pessimi inventur*: Quibus verbis aperte declarat, quod sicut fragilitas humana, vi prorsus ineluctabili, implicat sæpe peccatis nonnullis venialibus quantumlibet iustum; ita lumen vultus Domini, naturaliter inditum homini, atque inextinguibilis boni, & æqui ratio, assidue sollicitans animum, extorquet frequenter a quovis pessimo levia nonnulla, & facilita bona opera naturalia, nullius permixtione mali, aut intentionis nequam vitiata. Unde Chrysostomus homil. 67. ad populum: *Non potest malus omnino malus esse, sed evenit, ut aliquid habeat boni; neque bonus esse omnino bonus, sed nonnulla solet habere peccata*.

Ex his probata manet secunda pars; cum enim charitas sit inseparabilis a gratia habituali, si absque ejus influxu possit elici a peccatoribus non justificatis aliquod opus honestum, & moraliter bonum; illud pariter, absque motione, & imperio charitatis, ab illis effici posse manifestum erit.

Addo, quod in hoc distinguitur bonitas moralis nostrorum actuum a bonitate illorum supernaturali, & meritoria vitæ æternæ, quod prima, cum sit pure naturalis, constituit-

tuitur absque habitudine ad finem supernaturalem, per solam conformitatem, quam actus habet cum recta ratione, & prudenteria naturali; secunda vero procedit ex influxu gratiae, & charitatis, actus nostros in finem supernaturalem referentis; unde licet homo sine charitate non possit elicere actus moraliter bonos ordinis supernaturalis, & meritorios vitae aeternae, bene tamen actus honestos, & moraliter bonos ordinis naturalis, v. gr. colere parentes, obedire superioribus, subvenire egenis: isti enim actus ex fine proximo, seu objecto habent honestatem, seu bonitatem moralem; unde ut sint moraliter boni, non est necesse, quod illam a fine extrinseco, & imperio charitatis participant. Alioquin si quodlibet opus honestum, & moraliter bonum deberet fieri ex motivo charitatis, sequeretur nullam dari virtutem, praeter charitatem, cui soli competit operari propter tale motivum; quod Scripturæ, & SS. Patribus, qui plures alias virtutes agnoscunt, & commendant pluribus locis, manifeste repugnat. De quo fusius in Tractatu de Virtutibus in communi cap. 6.

Dico secundo. Ad eliciendum opus honestum, & moraliter bonum naturali honestate, & bonitate, non requiritur fides.

Probatur primo: In infidelibus dantur aliqua opera honesta, & moraliter bona: Ergo ad illa non requiritur fides in operante, sed sufficit lumen naturale rationis. Consequens patet, Antecedens probatur ex Scriptura, que variis in locis refert aliqua infideli opera fuisse a Deo remunerata. Nam Exodi 1. ait, Deum remunerasse obstetrices Ægyptias, ob beneficium ab eis prestitum Israëlitis,

Titis, & ædificasse illis domos. Et Ezechiel.
 29. Nabuchodonosor dicitur sui operis mercedem a Deo accepisse. *Ex quo (inquit Hieronymus) intelligimus, etiam Ethnicos, si quid operis boni fecerint, non absque mercede Dei judicio præteriri.* Unde Augustinus lib. 5. de civit. Dei cap. 15. afferit, Deum dedisse Romanis amplum imperium, ut eorum virtutes in hac vita remunerationem aliquam haberent: Atqui Deus non remuneratur opera mala, & perversa, sed tantum bona, & honesta: Ergo in infidelibus dantur aliqua opera honesta, & moraliter bona. Unde Augustin. de spiritu, & litt. cap. 27. ait, *esse quedam facta infidelium a gratia Christi alienorum, que secundum justitiae regulam non modo vituperare non possumus, verum etiam merito, recteque laudamus, &c.* Quare epist. 130. laudat continentiam Polemonis ethnici, & ait illam fuisse donum Dei.

Respondet Jansenius, his, & similibus testimonis solum probari, dari in infidelibus aliqua opera bona ex officio, seu ex objecto, non autem ex parte finis.

Sed contra primo: Scriptura, Hieronymus, & Augustinus locis citatis testantur, aliqua infidelium opera fuisse a Deo remunerata: At si illa fuissent bona solum ex objecto, & mala ex parte finis, seu mala ex intentione, & affectu operantis, non fuissent remunerata a Deo, cum talia opera non mercedem, sed poenam mereantur: Ergo Scriptura, & SS. Patres citati sentiunt illa fuisse bona non solum ex officio, seu ex objecto, sed etiam ex fine operantis.

Contra secundo: Augustinus citatus ait, opera aliqua infidelium esse adeo bona, *ut se-*

cun-

cundum justitiae regulam merito, recteque laudanda sint: Sed justitiae regula attendit præcipue ad finem, & intentionem operantis, & operantem actum bonum ex mala intentione non dignum laude, sed vituperio censet: Ergo Augustinus sentit dari in infidelibus aliqua bona opera, non solum ex objecto, quod respiciunt, sed etiam ex fine, & intentione, qua fiunt. Nec obest, quod idem S. Doctor ibidem de illis infidelium operibus subjungat: *Quamvis si discutiantur quo fine fiant, vix inveniuntur, quæ justitiae debitam laudem mereantur.* Nam particula *vix* non significat talia bona opera nunquam in infidelibus reperiri, sed tantum raro, & difficulter in ipsis inveniri; quia illi ut plurimum ex aliquo pravo motivo, præfertim ex vana gloria operantur, ut infra dicemus.

Contra tertio: Idem S. Doctor epist. 99. ad Evodium asserit, dari in infidelibus aliqua opera adeo bona, ut merito proponantur imitanda: Sed opera bona solum ex objecto, & mala ex fine operantis, cum sint vera peccata, non debent proponi ut imitanda, sed potius ut detestanda; alioquin posset proponi ut imitandus ille, qui daret eleemosynam fœminæ indigenti, ex intentione eam inducendi in peccatum, quod est absurdum; Ergo, &c.

Probatur secundo conclusio ex D. Thoma, qui aperte favet nostræ sententiæ. Nam super cap. 14. epistolæ ad Roman. lect. 1. sic ait: *Cum quis infidelis ex dictamine rationis aliquid bonum facit, non referendo ad malum finem, non peccat. Non tamen opus ejus est meritorium, quia non est gratia informatum.* Et super cap. 2. epistolæ ad Titum exponens hęc verba Apostoli; *Coinquinatis autem, & infide-*

fidelibus nihil est mundum , subdit : *Quando peccator facit aliquod bonum , secundum quod est peccator , & infidelis , totum est peccatum ex radice : sed si quis facit ex principio alicujus boni , quod habet , ut fidei informis , vel naturæ , non est mundum . Item 2. 2. qu. 10. art. 4. querit , utrum omnis actio infidelis sit peccatum ? & respondet negative : Quia (inquit in resp. ad 3.) per infidelitatem non corrumpitur totaliter in infidelibus ratio naturalis , quin remaneat in ipsis aliqua veri cognitio , per quam facere possunt aliquod opus de genere bonorum . Quam rationem insinuat S. Augustinus de spiritu , & litt. cap. 28. his verbis : *Veruntamen quia non usque adeo in anima humana imago Dei terrenorum affectuum labi detrita est , ut nulla in ea velut lineamenta extrema remanserint , unde merito dici possit etiam in impietate vite suæ facere aliqua legis , vel sapere . &c.**

Probatur tertio conclusio convellendo præcipuum fundamentum Jansenii ; idcirco enim ille existimat omnia infidelium opera esse peccata , quia opera sua , ex officio , seu objecto bona , vel ad pravum infidelitatis suæ finem referunt , vel saltem in verum finem Deum , quem ignorant , referre omittunt ; unde illa fiunt mala vel ex appositione pravi finis , vel ex omissione debiti : Sed utrumque falsum est : Ergo ruit præcipuum fundamentum Jansenii . Minor quantū ad primam partem patet : potest enim infidelis dare eleemosynam indigeniti , absque eo quod illud opus referat in suum idolum , seu in pravum suæ infidelitatis finem , ut constat ex testimoniosis D. Thomæ jam adductis , & ex doctrina , quam tradit 2. 2. q. 10. art. 4. in corp. ubi sic ait : *Sicut habens fidem*

dem potest aliquod peccatum committere in actu , quem non refert ad fidei finem , vel venialiter , vel etiam mortaliter peccando : ita etiam infidelis potest aliquem actum bonum facere in eo , quod non refert ad finem infidelitatis . Et sane (inquit Soto lib. 1. de natura , & gratia c. 10.) si potest unusquisque pro libito suo projicere denarium in flumen , cur non poterit donare pauperi sine ulla mala circumstantia , eo quod honestum est ?

Secunda vero ejusdem minoris pars sic ostenditur : Ad hoc ut aliquis actus humanus sit honestus , & moraliter bonus honestate , & bonitate naturali , non requiritur , quod in Deum tanquam in ultimum finem ordinetur . Tum quia , ut praecedenti conclusione dicebamus , in hoc distinguitur bonitas moralis actuum humanorum ab eorum bonitate supernaturali , & meritoria vitae æternæ , quod prima constituitur per ordinem , & relationem ad bonum honestum , & rationi consonum , quod ex se tendit in Deum , ut luminis rationis , & totius boni honesti authorem ; secunda vero ex ordine , & relatione in Deum ut authorem supernaturalem , & finem ultimum simpliciter . Tum etiam , quia repugnat , ordinem ad finem supernaturalem esse de essentia , & ratione bonitatis pure naturalis , qualis est bonitas moralis actuum humanorum , de qua agimus in praesenti , eorum scilicet honestas , & cum ratione conformitas . Tum denique , quia cum ordo actuum humanorum in Deum , ut authorem supernaturalem , & finem ultimum simpliciter , non nisi ex motione & imperio charitatis procedat , si illud ad eorum honestatem , & bonitatem moralem necessario exigatur , sequitur non solum

fidei lumen , sed etiam charitatis imperium ad bonitatem moralem actuum humanorum necessario requiri ; subindeque timorem gehennæ esse malum , & actus , qui fiunt a peccatoribus ante adeptam gratiam , & charitatem , esse peccata ; quod erroneum est , & a Tridentino damnatum , ut præcedenti conclusione ostensum est . Addo , quod si ordinatio in Deum , ut ultimum finem simpliciter , ad operum nostrorum honestatem , & bonitatem moralem necessaria esset , cum homo , quotiescumque cum deliberatione agit , teneatur honeste , & bene moraliter operari , nec ullus possit dari actus humanus , & deliberatus indifferens in individuo , ut frequentior Theologorum sententia docet cum Angelico Doctore , & fatetur ipse Jansenius , sequeretur , hominem , quotiescumque deliberate , & humano modo operatur , adstringi præcepto charitatis , & dilectionis Dei super omnia , quod a communione Theologorum sententia penitus alienum est ; cum enim tale præceptum sit affirmativum , non obligat pro semper , sed pro determinatis temporibus . Unde Raynerius in Pantheologia , verbo *Infidelitas c. 3. Licit infideliū actus non habeat bonitatem , quæ petitur ex fine ultimo , quia non sit directe propter Deum ut propter finem ; non tamen peccatum est ex hoc ipso , quod non sit ordinatus hoc modo in Deum , ut in finem ; non enim semper debet esse ordinatus actus noster in finem beatitudinis : Cujus ratio est , quia præcepta affirmativa non obligant ad semper , quamvis obligent semper : unde non oportet , quod actus infideliū , qui in finem illum non est ordinatus , semper sit peccatum , sed solum pro tempore illo , quo tenetur actum suum*

suum in ultimum finem referre. Quibus verbis præcipuum Jansenii fundamentum convellit.

Dico tertio. Homo in statu naturæ lapsæ per solas naturæ vires potest elicere aliqua opera moraliter bona, seu ad hujus vitæ honestatem pertinentia; subindeque ad illa nec requiritur gratia stricte sumpta, nec auxilium speciale ordinis naturalis, sed sufficit generalis Dei motio, & concursus.

Probatur primo ex Tridentino sess. 6. can. 1. ubi sic habetur: *Si quis dixerit, hominem suis operibus, quæ vel per humanæ naturæ vires, vel per legis doctrinam fiunt, absque divina per Jesum Christum gratia, posse justificari coram Deo, anathema sit.* Quibus verbis Concilium manifeste supponit, per vires naturæ, absque Jesu Christi gratia, aliqua opera moraliter bona effici posse: Sed hoc intelligi nequit de operibus bonis solum ex officio, vel ex objecto, & malis ex fine, & intentione operantis: Ergo Concilium supponit per vires naturæ posse fieri aliqua opera bona, non solum ex objecto, sed etiam ex fine operantis. Minor probatur, cum enim opera bona solum ex objecto, & mala ex fine, & intentione operantis, sint vere peccata (ut constat de eleemosyna data fœminæ indigenti, ex intentione eam inducendi in peccatum) hæretici, quorum errorem Concilium in illo canone proscribit, non erant adeo dementes, ac stolidi, ut dicarent per illa hominem justificari (alioquin affirmassent peccata aliis peccatis deleri) sed hoc asserebant de operibus moraliter bonis tam ex objecto, quam ex fine, & intentione operantis: Ergo Concilium supponit talia opera per vires naturæ fieri posse.

Probatur secundo ex Augustino, qui, ut precedentie conclusione ostendimus, c. 27 & 28.

libri de spiritu, & littera docet, infideles aliqua fecisse bona opera, quæ secundum justitiæ regulam merito, recteque laudamus, subindeque non solum ex officio, seu ex objecto, & fine operantis bona; cum regula justitiæ attendat præcipue ad finem, & intentionem operantis, & operantem auctum bonum ex intentione mala, non dignum laude, sed vituperio censeat, ut supra annotavimus: At qui Augustinus censet, infideles talia opera fecisse ex solis viribus liberi arbitrii, & sine gratia naturæ superaddita: Ergo juxta ejus doctrinam homo in statu naturæ lapsæ per folias naturæ vires potest efficere aliqua opera honesta, & bona non solum ex objecto, sed etiam ex fine operantis. Major patet ex dictis conclusione præcedenti, minor vero constat ex ratione, quam Augustinus ibidem c. 28. assignat; ait enim infideles opera illa bona, & secundum justitiæ regulam laudanda fecisse, quia non usque adeo in anima humana imago Dei terrenorum affectuum labe detrita est, ut nulla in ea velut linea menta extrema remanserint, unde merito dici possit, etiam in impietate vitæ suæ facere aliqua legis, vel sapere. Et paulo inferius de iisdem infidelibus loquens, subdit: *Ipsi homines erant, & vis illa naturæ inerat eis, qua legitimum aliquid anima rationalis & sentit, & sapit, et si non esset illa pietas, quæ transfert in vitam æternam.*

Probatur tertio ex D. Thoma, qui etiam aperte favet nostræ sententiaæ. nam qu. 24 de verit. art. 14. quærit, *Utrum liberum arbitrium possit in bonum sine gratia.* Et sic respondet: *Ad bonum, quod est supra naturam, constat liberum arbitrium non posse sine gratia, quia per hujusmodi bonum homo*

homo vitam æternam meretur ; constat autem, quod sine gratia homo mereri non potest. Illud autem bonum, quod est naturæ humanae proportionatum, potest homo per liberum arbitrium explere. Quod autem per bonum naturæ humanæ proportionatum intelligat bonum honestum, & morale ordinis naturalis, ut est largitio eleemosynæ, liquet ex verbis istis immediate præcedentibus : Aetius iste, qui est dare eleemosynam, est bonum proportionatum viribus humanis, secundum quod ex quadam naturali dilectione, vel benignitate homo ad hoc movetur : Ergo ex D. Thoma homo per liberum arbitrium, & per solas vires naturæ potest largiri eleemosynam, ex quadam naturali dilectione, & benignitate, subindeque alios similes actus honestos, & moraliter bonos elicere.

Neque dici potest S. Doctorem verbis istis, per liberum arbitrium, excludere quidem necessitatem gratiæ sanctificantis, vel doni habitualis supernaturalis, non tamen necessitatem auxilii supernaturalis, vel saltem auxilii specialis ordinis naturalis. Nam S. Thomas ibidem subjungit : *Quamvis autem hujusmodi bona homo possit facere sine gratia gratum faciente, non tamen potest ea facere sine Deo, cum nulla res possit in nullam operationem exire, nisi virtute divina; quia causa secunda non agit, nisi per virtutem causæ primæ, ut dicitur in libro de causis.* Quibus verbis ad hujusmodi actus solum requirit concursum Dei generalem, quo omnes causæ secundæ primæ in operando subordinantur, non vero auxilium Dei supernaturale, vel intra ordinem naturæ speciale. Unde in hac parte qu. 109. art. 2. docet expresse hominem in statu

naturæ corruptæ posse per virtutem naturæ suæ aliquod bonum particulare agere. Quibus verbis excludit quodcumque auxilium speciale distinctum a concursu generali; non enim dicimus hominem posse per virtutem suæ naturæ id, ad quod requiritur speciale auxilium, utpote mere gratuitum, & naturæ nullo modo debitum.

Nec valet, quod ait Vasquez, & post ipsum Contensonus, nimis in hac quæstione illi adhærens, S. Doctorem ibi non loqui de bono morali, sed naturali, quia (inquiunt) affert in exemplum opera, quæ sunt propter commoditatem naturæ, vel ad gubernationem externam, nempe ædificare domos, plantare vineas, &c. Unde concedit quidem posse dari sine gratia bonos architectos, & bonos vinitores, sed non bonos justos. Non valet, inquam: Tum quia quæst. 24. de veritate jam citata affert exemplum eleemosynæ, quam nemo dubitat esse opus honestum, & moraliter bonum. Tum etiam quia D. Thom. hic art. 2. afferens exemplum de operibus, quæ sunt propter commoditatem naturæ, vel ad gubernationem externam, loquitur de illis, prout sunt ex deliberatione: constat autem in doctrina D. Thomæ, nullum dari opus deliberate factum, quod in individuo neque sit moraliter bonum, neque moraliter malum, sed indifferens ad bonitatem, vel malitiam moralem: Ergo loquitur de illis operibus, ut sunt in genere moris, non vero prout solum pertinent ad ordinem naturæ, & sunt propter ejus commodum, vel utilitatem.

Probatur quarto conclusio hac ratione, quam idem S. Doctor ibidem insinuat: Homo in statu integritatis, & innocentiae poterat

terat per sua naturalia omne bonum morale suæ naturæ proportionatum operari : Ergo in statu naturæ lapsæ potest ex viribus suæ naturæ saltem aliquem actum honestum, & moraliter bonum elicere. Consequentia patet, liberum enim hominis arbitrium, seu propensio naturalis, quam homo habet ad bonum honestum, & rationi consonum, non est totaliter extincta per peccatum originale, sed duntaxat debilitata, & infirmata, ut asserit Tridentinum sess. 6. can. 5. Ergo quemadmodum homo infirmus, etsi non possit perfecte moveri motu hominis sani, nisi sanetur auxilio medicinæ, potest tamen per seipsum aliquem motum imperfectum habere; ita homo in statu naturæ lapsæ poterit propriis viribus aliquid opus morale ordinis naturalis efficere, etsi non omne, quod est proprium hominis sani.

Confirmatur, & magis illustratur hæc ratio ex Augustino epist. 107. ad Vitalem dicente: *Liberum arbitrium ad diligendum Deum primi peccati granditate perdidimus: nam ex verbis illis hoc argumentum deducitur: Supposita etiam originali culpa, homo potest Deum super omnia diligere;* & tamen quia id non potest per naturæ vigorem, Augustinus asserit nos perdidisse liberum arbitrium ad diligendum Deum: Ergo si homo lapsus nullum bonum opus morale ordinis naturalis viribus propriis possit efficere, etsi id possit per gratiam, verum erit dicere, quod liberum arbitrium ad operandum bonum primi peccati granditate perdidimus.

Nec valet, quod ait Vincentius Contensonius, nempe quod ut liberum arbitrium ad q-

perandum bonum dici possit primi peccati granditate non fuisse extinctum, sed attenuatum duntaxat, & infirmatum, sufficit, quod ex viribus propriis, & sine auxilio gratiae possit elicere opera bona ex officio, seu ex objecto, quamvis ex fine operantis sint mala. Non valet, inquam, cum enim talia opera sint peccati labore sordida, si homo in statu naturae lapsus ex viribus liberi arbitrii ea solum elicere possit, sequitur liberum arbitrium in illo statu non nisi ad peccandum valere, subindeque nos primi peccati granditate liberum arbitrium ad bene operandum amisisse, quod Tridentino repugnat.

§. II.

Solvuntur objectiones.

Obijicies primo contra primam conclusionem. Ad moralem bonitatem actuum humanorum necesse est, quod in Deum referantur: Sed ad illum referuntur per charitatem: Ergo ad bonitatem moralem actuum humanorum requiritur charitatis imperium.

Respondeo negando Majorem. licet enim ad bonitatem supernaturalem, & meritoriam actuum humanorum requiratur, quod ab operante referantur in Deum per charitatis imperium, ad illorum tamen honestatem, & bonitatem moralem non exigitur, quod ab operante intendatur talis relatio, sed sufficit, quod ipse actus ex natura sua, sive objecto ordinetur in Deum, ut luminis naturalis, & boni honesti authorem, & sicut bonum particulare in bonum universale; & quod ille, qui talem actum elicit, non impedit tam ordinationem, ipsum ad aliquem pravum finem

finem ordinando, vel alia mala circumstan-
tia vitiando; eo enim ipso quod non impe-
diatur relatio, quam actus ex natura sua im-
portat ad Deum, refertur ad illum, saltem
interpretative, & bonitatem ex tali relatio-
ne acquirit. Sicut lapis ex natura sua tendit,
& fertur in centrum ut in terminum, &
finem sui motus, nisi violenter sursum impel-
latur ab agente extrinseco, & per talen impulsum,
& detentionem violentam impedia-
tur unio ipsius cum centro, sive cum loco
deorsum.

Objicies secundo contra secundam conclu-
sionem: Nullum potest dari opus sine inten-
tione recta, juxta illud Ambrosii l. 1. offic. c. 3.
Affectus tuus nomen imponit operi tuo: Sed non
potest dari intentio recta sine fide, cum fi-
des sit veluti mentis oculus, qui intentio-
nem dirigit: Ergo nec opus bonum. Unde
Aug. sup. Psal. 31. *Nemo computet opera sua
bona ante fidem: ubi enim fides non erat, bo-
num opus non erat: bonum enim opus intentio
facit, intentionem fides dirigit.*

Respondeo, concessa Majori, negando
Minorem, & ad illius probationem dicendum
cum D. Thoma 2.2. qu. 10. ar. 4. ad 2. quod fi-
des dirigit intentionem respectu finis ultimi
supernaturalis, sed ratio naturalis potest di-
rigere intentionem respectu alicujus boni con-
naturalis. Unde Augustinus loco citato lo-
quitur de operibus bonis ordinis supernatu-
ralis, non vero de bonis bonitate solum
morali ordinis naturalis, de quibus solum
agimus in praesenti.

Objicies tertio: D. Augustinus lib. 4. con-
tra Julian. c. 3. docet, fidem ad omne opus
bonum desiderari, subindeque nullum opus
sine fide esse bonum, ex quo infert opera omnia

infidelium esse peccata , & virtutes Philosophorum non fuisse veras virtutes , sed via.

Respondeo hæc Augustini testimonia , quibus potissimum confidit Jansenius , necessario ab illo esse benigna aliqua interpretatione lenienda . Augustinus enim loco citato non qualemcumq; fidem ad bonum opus exigit , sed fidem , quæ per charitatem operatur , quæ non solum in infideli , sed nec etiam in peccatore Christiano minime invenitur . Verba Augustini sunt hæc : *Disce eum , qui non facit opera bona , intentione fidei bone , hoc est ejus , quæ per dilectionem operatur , totum quasi corpus , quod velut membris , operibus constat , tenebrosum esse , hoc est plenum nigredine peccatorum .* Idem docet pluribus aliis in locis , præsertim libro de gratia Christi c. 26. his verbis : *Ubi non est dilectio , nullum bonum opus imputatur , nec rebæ bonum opus vocatur ; quia omne , quod non est ex fide , peccatum est .* Ubi Augustinus verba illa Apostoli , *omne , quod non est ex fide , peccatum est ,* de fide per charitatem operante intelligit ; & tamen Jansenius non influxum charitatis , sed solius fidei ad bonum opus necessario exigit , ne in errorem Michaelis Baji a Tridentino damnatum impingat : Ergo aliquo tenetur Augustinum interpretamento explicare , sicut & nos .

Dicendum ergo est , Augustinum loco citato solum velle nullum opus sine fide esse simpliciter , & antonomastice bonum , quippe cum homini ad æternam gloriam ordinato nihil absolute bonum sit , nisi quod ad eam perducit , vel conductit ; nihilque absolute malum , nisi quod ab ea abducit . Quod autem hæc interpretatio legitima sit , patet ex eo-

codem S. Doctore ibidem , ubi sic ait : *Scito nos illud tantum dicere bonum hominis , illam bonam voluntatem , illud opus bonum , sine gratia Dei a nemine posse fieri , per quod solum potest homo ad æternum Dei donum , regnumque perduci .* Unde ibidem columna 10. permittit Juliano dicere , bona quædam opera fieri per vires naturæ , dummodo fateatur esse sterilia ad vitam æternam .

Quando vero Augustinus afferit omnia infidelium opera esse peccata , solum intendit omnia opera infidelium , quæ procedunt ab ipsis reduplicative , ut infideles sunt , seu ex errore contrario fidei , esse peccata , et si ex objecto , & specie sua bona sint . Si enim infidelis ad honorem deorum suorum servet virginitatem , vel det eleemosynam , haud dubie peccat ; quia in his actibus non operatur ut homo , & ex regula rectæ rationis , sed ut infidelis , & ex regula sui erroris , seu ex prava intentione occasione infidelitatis concepta . In eodem sensu intelligi debet illud Apostoli , quod Augustinus frequenter allegat : *Omne , quod non est ex fide , peccatum est , nam ly non ex fide debet sumi non solum negative , sed etiam contraria : ita ut sensus sit , illud , quod non est ex fide , sed ex infidelitate , peccatum est , ut interpretatur D. Thomas ibidem lect. 3. in fine , ubi ait : Omne , quod non est ex fide , peccatum est , sic est intelligendum : omne , quod est contra fidem , peccatum est , et si ex genere suo bonum esse videatur .*

Demum cum Augustinus negat in infidelibus , seu antiquis philosophis veras virtutes , nomine veræ virtutis intelligit virtutem perfectam , quæ hominem promoveat ad vitam æternam , sive , ut ipse loquitur loco citato ,

que liberandis, & beatificandis hominibus
deserviat. Unde ibidem ait: *Si ad conse-
quendam veram beatitudinem, quam nobis
fides per Christum promisit, nihil profunt ho-
mini virtutes, non sunt veræ virtutes.* Ad-
do, quod cum virtus non generetur nisi
per frequentationem actuum bonorum, &
veteres Philosophi rarissime elicerent actus
bonos, & honestos, nisi prava aliqua cir-
cunstantia, præsertim vanæ gloriæ vitia-
tos, rarissime acquirebant veras virtutes
morales, & quod ex eorum actibus fre-
quenter repetitis generabatur, non erat vir-
tus, sed vitium. Unde Hieronymus epist.
4. ad Rusticum: *Philosophi sæculi vitium
vitio medicantur, nos amore virtutum vitia
superamus.*

Objicies quarto cum Vasque contra tertiam
conclusionem varia Scripturæ, Conciliorum,
& Summorum Pontificum testimonia, qui-
bus insinuari videtur, hominem sine gratia
nullum opus bonum posse efficere. Nam Joan.
15. Christus ait: *Sine me nihil potestis facere.*
Quem locum ponderans Augustinus tract. 81.
in Joan. subdit: *Sive ergo parum, sive mul-
tum, sine illo fieri non potest, sine quo nihil fie-
ri potest.* Unde epist. 46. ad Valentimum sic
concludit: *Epistolam meam secundum hanc
fidem intelligite, ut neque negotis Dei gratiam,
neque liberum arbitrium sic defendatis, ut a
Dei gratia separatis, tanquam sine illa vel
cogitare aliquid, vel agere secundum Deum ul-
la ratione possimus, quod omnino non possumus;*
*propter hoc enim Dominus cum de fructu justi-
tiae loqueretur, ait Discipulis suis, Sine me nihil
potestis facere.* Item Apostolus 2. ad Corinth.
3. ipsam boni cognitionem, quæ omnis ho-
nestatis initium est, donum Dei esse pronun-
tiat,

tiat, dicens: *Non sumus sufficientes cogitare aliquid ex nobis quasi ex nobis, sed sufficientia nostra ex Deo est.* Similiter Cœlestinus I. in epist. ad Episcopos Galliarum, eandem gratiae adjuvantis ad singulos actus bonos necessitatem manifeste declarat. Nam capit. 7. ait. *Nemo nisi per Christum libero bene utitur arbitrio.* Et cap. 8. *Omnia studia, & omnia opera, ac merita Sanctorum ad Dei gloriam, laudemque referenda sunt, quia nemo ei placet, nisi ex eo quod ipse donaverit.* Item capit. 9. *Ita Deus in cordibus hominum, atque in ipso libero operatur arbitrio, ut sancta cogitatio, omnisque motus bonus voluntatis ex Deo sit, quia per illum aliquid boni possumus, sine quo nihil boni possumus.* Demum in Concilio Palæstino Diospoli celebrato definitum est, gratiam Dei ad singulos actus esse necessariam. Quod ipse Pelagius fateri coactus est, ut refert Augustinus epist. 106. & 107. Item in Concilio Arausicanu II. can. 2. sic habetur: *Multa in homine bona fiunt, quæ non facit homo; nulla vero facit homo bona, quæ non Deus præster, ut faciat homo.* Et can. 9. *Quoties bona agimus, Deus in nobis, atque nobiscum, ut operemur, operatur.* Et can. 22. consecrat verba illa Augustini tract. 3. in Joan. *Nemo habet de suo, nisi mendacium, & peccatum; si quid autem homo habet veritatis, atque justitiae, ab illo fonte est, quem debemus sitiare in hac eremo.*

Respondeo primo, prædicta Scripturæ, Conciliorum, & summorum Pontificum testimonia esse intelligenda non de opere bono morali universim, sed de opere bono ad salutem animæ, & vitam æternam conducente. Quod vero hæc interpretatio legitima

ma sit , constat primo ex Concilio Arauſi-
cano II. can. 7. ubi ſic habetur : *Si quis di-
xerit , hominem per naturæ vigorem bonum a-
liquod , QUOD AD SALUTEM PERTI-
NET VITÆ ÆTERNÆ , cogitare , ut expe-
dit , aut eligere posse , heretico fallitur spi-
ritu ; non intelligens vocem Dei in Evangelio ,
ſine meniſtil potestis facere , & illud Apostoli ,
non quod idonei ſumus cogitare aliquid a nobis ,
quasi ex nobis , &c. Quibus verbis Conci-
lium non ſolum maniſte declarat , ſe lo-
qui de bono ad ſalutem vitæ æternæ perti-
nente , ſed etiam de tali bono intelligenda
eſſe duo ſupra adducta teſtimonia , quæ Ad-
versarii nobis objiciunt , & quæ apud illos
præcipua , & veluti palmaria ſunt. Conſtat
ſecundo , quia Concilia , & ſummi Pontiſ-
fices locis adductis Pelagii errorem damna-
re intendunt : At Pelagius non erravit in
hoc , quod ad opus aliquod moraliter bo-
num ordinis naturalis gratiæ neceſſitatē
negaverit , ut fateri coguntur Adversarii ,
ne incurvant cenzuram Pii V. & Gregorii
XIII. has Michaelis Baji propositioſes da-
mnantium. *Pelagianus eſt error dicere , quod
liberum arbitrium valet ad ullum peccatum
vitandum . Cum Pelagio ſentit , qui boni
aliquid naturalis , hoc eſt , quod ex ſolis na-
ture viribus ortum ducit , agnoscit . Ergo quan-
do prædicta Concilia , & Summi Pontifices
dicunt , gratiam ad ſingulos actus eſſe neceſſa-
riam , non loquuntur de aetibus honestis ,
& moraliter bonis ordinis naturalis , ſed tan-
tum de aetibus meritoriis , & ad ſalutem ani-
mæ , ac vitam æternam conducentibus .*
Conſtat tertio , quia ſi prædicta loca ea
univerſalitate , quæ comprehendat opera ho-
nesta , & moraliter bona , intelligentur , no-
stra*

stra sententia erit in Scriptura, & Conciliis, ac Pontificum decretis damnata: At erroneum est dicere nostram sententiam aliquam censuram mereri, ut constat ex predictis Baji propositionibus, a Pio V. & Gregorio XIII. damnatis: Ergo erroneum etiam erit asserere, loca Scripturæ, Conclitorum definitiones, & Summorum Pontificum decreta ita ample, & universaliter esse intelligenda, ut opera honesta, & moraliter bona ordinis naturalis comprehendant; & consequenter limitanda sunt ad opera ad salutem proficia, & ad vitam æternam conducentia.

Respondeo secundo, si prædicta testimonia de quocumque bono etiam naturalis ordinis intelligantur, per gratiam significari auxilium, seu concursum Dei generalem, ad agendum necessarium, qui sub nomine gratiæ large, & impropre sumptuæ comprehenditur, ut initio hujus tractatus declaravimus. Utramque responsonem, & interpretationem tradit S. Thomas in 2. dist. 28. q. 1. art. 1. ad 1. & 2. q. 24. de verit. artic. 14. in resp. ad argument. sed contra, & super cap. 1. Joan. lect. 1. ubi exponens verba illa Christi: *Sine me nihil potestis facere*: subdit: *Opera nostra aut sunt virtute naturæ, aut ex gratia divina*: si virtute naturæ, cum omnes motus naturæ sint ab ipso Verbo Dei, nulla natura ad aliquid faciendum moveri potest sine ipso: si vero virtute gratiæ, cum ipse sit author gratiæ, manifestum est, quod nullum opus meritorium sine ipso fieri potest.

Dices: Concilia, & SS. Patres citati loquuntur in sensu contradicente Pelagio, cum illius errores proscribant: At ille non

negabat opera bona procedere a Deo ut auctore naturæ, per concursum generalem, sed solum a Deo, ut largitore gratiæ, per auxilium speciale: Ergo hæc secunda responsio, & interpretatio non est bona, nec ad mentem Conciliorum, & SS. Patrum.

Respondeo falsum esse, quod Pelagius satis referret ad Deum ut authorem naturæ omnia bona opera moralia ordinis naturalis, & quod satis agnosceret nostram dependentiam a Deo in operando; esto enim fateatur hominem non posse agere sine immediato, & simultaneo Dei concursu, quo nobiscum operatur; negabat tamen concursum, seu auxilium prævium, quo agit in nobis sine nobis, & quo operatur, ut operemur; quia existimabat destrui libertatem, si homo nihil possit operari, nisi præoperante Deo, & voluntatem ejus ad agendum præmovente, ut in Clypeo Theologiae Thomisticæ tract. de hæresi Pelagiana disp. 2. art. 2. ostensum est.

Ex dictis intelliges, quod quando Concilium Arausicanum ex Augustino dixit: *Nemo habet de suo nisi mendacium, & peccatum*, vel ly *de suo* intelligi debet per exclusionem auxilii generalis, veltantum vult, mendacium, & peccatum esse ira propria hominis, ut nullo modo sint Dei, ut auctoris. Vel mendacium, & peccatum improprie, & late usurpat pro quocumque actu defecundo, & insufficienti ad vitam æternam, juxta phrasim, & loquendi modum vetustis Patribus usitatum, *Qui* (ut ait Sextus Senensis lib. 6. Bibliot. annot. 40.) *universa opera, quæ seclusa divine gratiæ ope fiebant, ne dum non bona dicebant, sed frequentissime & mala, & vitia, & peccata appellav-*

pellabant; non quod ea vere, & simpliciter mala, & peccata esse crederent, sed quia scirent, ipsa nec ad acquirendam Christianam justitiam prodesse, nec ad comparandum æternæ felicitatis bonum proficere, & ob id ea in honorum numerum referre non dignarentur.

Ex his facile intelliges, & expones duo S. Thomæ testimonia, quæ nobis videntur adversa; nam quando S. Doctor 2. 2. qu. 136. art. 3. ad 2. ad opus bonum virtutis politicæ auxilium gratiæ requirit, hoc non est intelligendum de auxilio gratiæ specialis, sed de generali concursu, qui est gratia communiter dicta, ad donum creationis pertinens. Vel dici potest, illum loqui de opere morali eximio, quale est sustinere plura, & gravissima mala propter bonum patriæ; ad hoc enim opus heroicum requiritur speciale auxilium, ut infra patebit. Similiter cum idem Doctor Angelicus ait q. 24. de verit. art. 14. *Si gratiam Dei velimus dicere non aliquid habituale donum, sed ipsam misericordiam Dei, per quam interius motum mentis operatur, sic nec ullum bonum homo potest facere sine gratia Dei,* loquitur de concursu Dei generali, movente, & applicante singulas creaturas ad agendum, qui potest misericordia Dei appellari, in quantum removet aliquam miseriam ab homine, nempe defectum potentialitatis, & indeterminationis ad agendum.

Objicit insuper Vasquez argumentum de sumptum ex oratione, & gratiarum actione; Ecclesia enim non pro quibusdam tantum, sed etiam pro singulis bonis oportibus Deum orat, ejusque gratiam postulat, & illis peractis, gratias agit: nihil autem in Augustini doctrina fundatius, quam orationem, gratia.

tiarumque actionem divinæ gratiæ esse clariſſimam ſignificationem.

Sed ad hoc in primis reſpondeatur, Eccleſiam bona opera moralia, prout ad ſalutem conducunt, a Deo poſtulare; unde ſuas collectas concludit, per Dominum noſtrum Iesum Christum, ex cuius meritis gratiam ſibi dari poſtulat: omnis autem gratia Salvatoris ad vitam, & ſalutem æternam ut ad finem ultimum tendit. Idem cum proportione de gratiarum actione di- cendum.

Reſpondeo ſecundo, etiā daretur, Eccleſiam actus honestos, & moraliter bonos abſolute a Deo poſtulare, & pro illis gratias agere, ex hoc tamen non recte inferri, gratiam ſtricte, & proprie ſumptam ad illos eliciendos eſſe neceſſariam: ſaepè enim in oratione petimus, quæ cum ſolo concurſu generali haberi poſſunt, quando nimirum ex parte eventus habent aliiquid fallibilitatis, & contingentia; quapropter oramus Deum pro pluvia, ſerenitate, & frugibus terræ, illisque obtentis gratias ei agimus; quia licet pertineant ad providentiam generalem, tamen contingentiam, & fallibilitatem habent ex parte eventus.

Dices. D. Auguſtinus diſputans cum Pelagianis, ex oratione, & gratiarum actione infeſebat neceſſitatē gratiæ ſpecialiſ; illi enim non negabant gratiam generalem, ad donum creationis pertinenrem, ſed ſpecialiē, & a dono creationis diſtinctam: Ergo ex eo, quod fideles a Deo petant auxilium ad eliciendos actus honestos, & moraliter bonos, & pro illis elicitis ipsi gratias agant, recte col ligitur, non ſolum generale, ſed etiam ſpecialiē auxilium ad eos eliciendos requiri.

Re-

Respondeo, concessō Antecedente, negando consequentiam; licet enim ex oratione applicata ad res excedentes donum creationis, & efficaciam naturalium virium recte inferatur necessitas gratiæ specialis, & hoc modo S. Augustinus ex oratione recte probet contra Pelagianos, specialem gratiam esse necessariam ad resurgentum a peccato, & ad bene operandum in ordine ad vitam æternam, quia hæc vires naturales excedunt: tamen ex oratione ut sic non infertur gratia stricte, sed lato modo sumpta pro quolibet beneficio Dei; quia illa potest applicari ad res ordinis naturalis, seu ad generalem Dei providentiam pertinentes, quando aliquid contingentia, & fallibilitatis habent, ut patet in exemplis supra adductis.

Præter hæc argumenta, duo alia objicit Contensonus, in quibus præcipuum robur suæ sententiæ constituit. Primum sic potest breviter proponi. Voluntas hominis in statu naturæ lapsæ nedum est ad bonum, vel malum indifferens, sed etiam magis est ad malum, quam ad bonum propensa, magisque ad bonum utile, vel delectabile, quam ad honestum, & rationi consonum inclinata, ut egregie explicat D. Prosper in carmine de ingratis cap. 27. his versibus.

..... *Manet ergo voluntas
Semper amans aliquid, quo se ferat, &
labyrintho
Fallitur, ambages dubiarum ingressa via-
rum
Vana cupid, vanis tumet, & timet, omni-
modaque
Mobilitate ruens, in vulnera vulnere surgit.
Similiter S. Thomas 2. 2. q. 136. art. 3. ad
ii. sic ait: In natura humana, si esset integra,
præ-*

prævaleret inclinatio rationis, sed in natura corrupta prævalet inclinatio concupiscentiae, quæ in homine dominatur. Ergo ut homo in statu naturæ lapsæ eliciat actus honestos, & moraliter bonos, eget gratia Dei, vel auxilio ejus speciali, quo se determinet ad bonum honestum, & practice judicet illud esse delectabili præferendum.

Respondeo, concessò Antecedente, negando consequentiam; licet enim in statu naturæ lapsæ homo sit magis inclinatus ad malum, quam ad bonum, & concupiscentia in eo dominetur, illumque frequenter ad actus malos, & vitiosos inclinet, & pertrahat; quia tamen non tollit totaliter, sed dumtaxat minuit, & attenuat inclinationem, quam homo habet a natura insitam ad bonum honestum, & rationi consonum, potest ex viribus suæ naturæ aliqua opera honesta, & moraliter bona exercere; subindeque interdum habere judicium practicum, quo judicet bonum honestum esse delectabili præferendum, ut ex supra dictis constat.

Alterum ejusdem Auctoris argumentum est: Ex præcepto charitatis tenemur omnia nostra opera in Deum, ut in ultimum finem referre, saltem virtualiter: Ergo ad operis bonitatem moralem non sufficit, ut objec-tum, & finis proximus honestate gaudeant, nisi etiam operans finem ultimum intendat, quod sine gratia præstare non potest.

Respondeo primo, quod si hoc argumentum valeret, probaret ad honestatem, & bonitatem moralem nostrorum operum non solum gratiam auxiliantem, sed etiam fidem, & charitatem requiri, subindeque omnia infidelium, & fidelium in statu peccati mortalis existentium opera esse peccata; quod erro-neum

neum est, & a Tridentino damnatum, faltem quantum ad illa opera, quæ justificationem præcedunt. Sequela patet, cum enim ultimus finis hominis sit supernaturalis, opera ab illo elicita non possunt in illum ordinari, nisi per fidem dirigantur, & per charitatem imperentur: Ergo si ad illorum honestatem, & bonitatem moralem exigitur ordinatio in ultimum finem, requiretur pariter ad illam influxus fidei, & charitatis imperium. Unde ille Author volens nolens incidit in sententias Baji, vel Jansenii, quas supra confutavimus.

Respondeo secundo, negando Antecedens, cum enim præceptum charitatis sit affirmatum, licet semper obliget, non tamen pro semper, sed determinatis quibusdam temporibus, & occasionibus, ut supra ex Raynerio retulimus. Addo, hœc ipso quod voluntas non refert opus ex objecto bonum, puta eleemosynam, in finem pravum, sed in præcisa misericordiæ honestate sistit, actum illum ex se, & sponte sua tendere in Deum totius honestatis fontem, & finem saltem virtualiter, vel interpretative; non secus ac lapis in centrum, nisi violenter sursum impellatur ab agente extrinseco, ut in responione ad primam objectionem declaravimus.

C A P U T III.

De necessitate gratiæ in ordine ad dilectionem Dei.

Celebris, & communis apud Theologos est divini amoris partitio in naturalem, & supernaturalem. cum enim Deus sit author naturæ, seu bonorum naturalis o*di*

dinis, & etiam gratiæ, seu bonorum ordinis supernaturalis, & sub utraque ratione sit bonus atque amabilis, sicut & cognoscibilis ab intellectu humano, sub utraque voluntatis humanæ affectum terminare potest. Unde sicut duplex est religio, una ordinis naturalis, cui præfulget lumen rationis, & qua Deus colitur ut author naturæ, per actus ejusdem ordinis; altera supernaturalis, cui præfulget lumen fidei, & qua Deus colitur ut author gratiæ, per actus fidei, spei, charitatis, & virtutum moralium infusarum: ita etiam duplex est dilectio Dei; una naturalis, & ex genere suo acquisita, quæ per lumen rationis regulatur, & ad Deum ut authorem naturæ terminatur; altera supernaturalis, & per se infusa, cui præficitur lumen fidei, & qua Deus ut author gratiæ, & prout est objectum beatificans beatitudine supernaturali, a nobis diligitur. Hanc non posse ab homine elici ex propriis viribus, & sine auxilio gratiæ, de fide certum est, & in Tridentino definitum sess. 6. can. 3. sed de altera difficultas, & controversia est inter Theologos, an homo lapsus, vel in puris naturalibus conditus, ad diligendum Deum, ut authorem naturæ, dilectione efficaci (id est, quæ vi sua potens sit media ad placendum Deo necessaria inducere, & omnia, quæ ejus amicitiæ repugnant, excludere) indigat speciali auxilio, vel id ex viribus naturæ præstare possit?

§. I.

Resolvitur difficultas quoad utramque partem, seu de homine in utroque statu naturae lapsæ, & puræ considerato.

Dico primo. Homo in statu naturæ lapsæ non potest viribus liberi arbitrii, & cum concursu generali, Deum ut Authorem naturæ, dilectione efficaci, super omnia diligere. Ita magis communiter docent nostri Thomistæ, contra Scotum, Molinam, & alios Recentiores.

Probatur primo ex D. Thoma hic art. 3. ubi sic ait: *Homo in statu naturæ integræ non indigebat dono gratiæ superadditæ naturalibus bonis, ad diligendum Deum naturaliter super omnia, licet indigeret auxilio Dei ad hoc eum moventis.* Sed in statu naturæ corruptæ indiget homo etiam ad hoc auxilio gratiæ naturam sanantis. Rationem paulo ante assignaverat, petitam ex eo, quod voluntas hominis lapsi, & in peccato originali, vel personali existentis est veluti recurva, & ad bonum privatum, & proprium, quod est ultimus finis peccatoris, inclinata; unde nisi sanetur per gratiam, non potest sui, & omnium aliorum dilectionem in Deum referre, ipsumque tanquam bonum proprium, & privatum diligere, cum hoc sit contra tales inclinationem curvam, & deviam.

Confirmatur: Licet natura infirma possit aliquod opus efficere, non tamen præstantissimam operationem, quam natura sana, & integra potest elicere: At diligere Deum ut authorem naturæ dilectione efficaci est actus

præ-

præstantissimus, & perfectissimus, quem natura humana in statu sanitatis, & integritatis ex viribus liberi arbitrii elicere poterat, cum talis dilectio virtualiter contineat totius legis naturæ impletionem, juxta illud Basilii lib. de instit. Monach. cap. 2. *Mandatum istud (scilicet dilectionis Dei) unum quidem videtur, sed omnium mandatorum in se virtutem complectitur:* Ergo homo lapsus, & infirmus non potest ex viribus liberi arbitrii Deum ut authorem naturæ efficaci amore diligere, sed ad hoc indiget gratia. Si autem quæras, qualis requiratur gratia ad talem dilectionem elicendam? Respondeo, &

Dico secundo, quod ad dilectionem efficacem Dei, ut authoris naturæ, per se loquendo, & quantum est ex parte objecti, solum requiritur auxilium speciale ordinis naturalis, supposita tamen elevatione ad statum supernaturale, per accidens, & concomitanter auxilium supernaturale ad eam requiritur.

Prima pars patet, dilectio enim Dei ut authoris naturæ est actus entitative naturalis, cum objectum naturale respiciat: Ergo per se, & ex præcisa ratione objecti, nec gratiam sanctificantem, nec auxilium supernaturale exposcit. Consequentia legitima est, nam eo ipso, quo actus ad sui elicientiam exigit pro principio eliciente formam supernaturalem, excedit facultatem naturæ, subindeque supernaturalis est..

Secunda vero sic ostenditur. Supposita elevatione naturæ humanæ ad ordinem gratiæ, & cognitione Dei ut authoris supernaturalis, non potest homo ipsum amare, ut authorem naturæ, nisi simul ipsum ut finem, &

authorem supernaturalem diligat: sicut sup-
posita tali elevatione, & cognitione, non
potest dari aversio a Deo, ut conditore na-
turæ, absque aversione a Deo, ut authore
supernaturali; neque poni odium authoris
naturæ, quod non terminetur aliquo modo
ad ipsum, ut authorem gratiæ: Ergo cum
dilectio Dei supernaturalis auxilium superna-
turale per se exigat, dilectio naturalis, sup-
posita elevatione naturæ humanæ ad ordi-
nem gratiæ, illud per accidens, & concomi-
tantiter exposcet. Addo, ad talem dilectionem
non solum auxilium supernaturale, sed
etiam gratiam sanctificantem requiri, per
quam auferatur peccatum cum tali dilectione
incompossibile, & removeatur obex a-
versionis a Deo, ut ultimo fine tam natura-
li, quam supernaturali, quæ pariter cum eo-
dem amore componi nequit. Unde D. Tho-
mas hic art. 3. docet, ad dilectionem Dei,
ut Authoris naturæ, hominem lapsum gra-
tia sanante indigere: illum vero nomine
gratiæ sanitatis gratiam habitualem intelli-
gere, constat ex articulo sequenti, ubi ait:
*In statu nature corruptæ non potest homo
implere omnia mandata divina sine gratia
sanante.* Certum est autem, ad omnium
divinorum mandatorum impletionem gra-
tiam sanctificantem requiri, ut patebit ex
dicendis capite sequenti.

Quæres, an homo justus, & gratia san-
ctificante prædictus auxilio supernaturali in-
digeat ad diligendum Deum ut authorem
naturæ, dilectione efficaci.

Respondeo affirmative, cum enim gratia
habitualis in hoc statu viæ non sanet perfecte
hominem, neque illi restituat integratatem
naturalem, quam per peccatum primi paren-

ris amisit, sed relinquat rebellionem concupiscentiarum, & pugnam inter appetitum superiorem, & inferiorem; ad meritum, & profectum vitae spiritualis, adhuc indiget robore, & auxilio superaddito, ut in aetum dilectionis Dei ut authoris naturae exeat.

Addo, quod, etsi homo justus, & gratia habituali praeditus careat impedimento peccati, & aversionis a Deo ut ultimo fine, tamen (ut jam ostendimus) supposita elevatione naturae humanae ad ordinem gratiae, non potest Deum amare ut authorem naturae, nisi simul ipsum ut finem, & authorem supernaturalem diligat: Ergo cum in homine justo dilectio Dei supernaturalis auxilium supernaturale per se exigat, dilectio naturalis illud per accidens, & concomitanter exposcet.

Dico tertio. Homo in pura natura constitutus non posset cum solo concursu generali Deum ut authorem naturae efficaci amore diligere; non indigeret tamen ad tamem amorem eliciendum auxilio supernaturali, sed solum specialis ordinis naturalis.

Prima pars patet ex dictis in prima conclusione: ibi enim ostendimus, hominem lapsum non posse ex viribus naturae, & cum solo generali concursu, Deum ut authorem naturae efficaci amore diligere; quia voluntas hominis lapsi est veluti recurva, & ad bonum privatum, & proprium inclinata: Sed in statu naturae purae voluntas hominis eodem modo esset propensa in bonum privatum: Ergo eodem modo esset impotens ad diligendum Deum, ut authorem naturae, dilectione efficaci. Major constat ex supra dictis, minor vero sic ostenditur. Quod homo lapsus sequatur bonum privatum,

pro-

provenit ex eo, quod appetitus inclinatur in bonum sensibile, absque fræno rationis: At in puris naturalibus homo haberet eandem inclinationem effrænem ad bonum sensibile contrarium rationi, cum in statu naturæ puræ pars inferior non esset perfecte subjecta, & subordinata superiori; sed talis subordinatio, & subjectio homini solum in statu integratatis conveniret. Ergo in statu naturæ puræ voluntas hominis eodem modo esset propensa in bonum proprium, & privatum, ac in statu naturæ lapsæ.

Deinde, dilectio efficax Dei ut authoris naturæ est actus omnium perfectissimus, & præstantissimus, cum totius legis naturæ impletionem virtualiter contineat: Ergo solius naturæ integræ, & robustæ videtur proprius. Addo, quod prima parte in tractatu de homine, & variis statibus naturæ humanae ostendimus, quod non fuissent majores vires naturæ humanæ ad operandum bonum morale in statu naturæ puræ, quam sint in statu naturæ lapsæ: Ergo si homo in statu naturæ lapsæ non potest cum solo concursu generali Deum ut authorem naturæ efficaci amore diligere, id pariter non potuisset in statu naturæ puræ, si in eo fuisset conditus.

Secunda vero pars constat ex dictis in secunda conclusione: nam, ut ibi ostendimus, homo in statu naturæ lapsæ ad dilectionem efficacem Dei ut authoris naturæ per accidens indiget auxilio supernaturali, ob elevationem naturæ humanæ ad ordinem, & finem supernaturalem: Ergo cum in statu naturæ puræ non fuisset talis elevatio, neque pariter fuisset ad illum aetum eliciendum indigentia talis auxilii.

Demum tertia pars sequitur ex praecedentia.

tibus : nam homo in natura pura posset , & teneretur diligere Deum ut authorem naturæ super omnia : Sed ad hoc non haberet auxilium supernaturale , neque sufficeret generalis concursus , ut jam ostendimus : Ergo exigeret auxilium speciale ordinis naturalis . Et certe cum actus ille esset perfectissimus , & summus intra ordinem naturæ , auxilium speciale ejusdem ordinis non minus exposceret , quam observantia totius legis naturalis , quæ in eo virtualiter contineretur .

§. II.

Solvuntur objectiones.

Obijicies primo contra primam conclusionem : D. Thomas i. p. qu. 60. art. 6. ad 5. agnoscit in Dæmonibus dilectionem naturalem Dei super omnia : & in 2. dist. 33. qu. 2. art. 2. ad 5. illam pariter admittit in animabus puerorum in limbo existentium : Ergo talis dilectio cum peccato sive actuali , sive originali potest componi : subindeque propriis naturæ viribus elici .

Respondeo , duplarem posse dari amorem Dei naturalem : unum a voluntate , ut natura est , procedentem , quo Deus ut essendi principium , & bonum universale totius naturæ diligitur : alterum , qui est a voluntate , ut potentia libera , & electiva , quo Deus amore electivo , & libero ut amicus , & universalis legislator amat . Primus est amor concupiscentiæ : cum enim Dæmones necessitentur ad diligendos seipso , & nequeant proprium esse diligere , nisi diligant esse Dei , per quod proprium sustentatur , & conservatur , necessitantur ad diligen-

ligendum Deum amore concupiscentiae. Alter vero est amor benevolentiae, quo Deus propter seipsum, & inquantum ut author naturae est in se summe amabilis, super omnia diligitur. Quando ergo S. Thomas locis citatis in Daemonibus, & animabus puerorum in limbo existentium admittit naturalem Dei dilectionem super omnia, loquitur de prima dilectione, quam fatemur cum peccato posse componi, & solis naturae viribus elici, non vero de secunda, de qua solum agimus in praesenti.

Objicies secundo: Potest quis ex solis naturae viribus mori pro patria, vel pro parentibus: Ergo a fortiori pro Deo ut auctore naturae, subindeque illum ex solis naturae viribus super omnia efficaciter diligere; nam teste Scriptura Joan. 15. Majorum charitatem nemo habet, quam ut animum suam ponat pro amicis suis.

Respondeo primo, negando Antecedens. cum enim talis actus sit heroicus, arduus, ac difficilis, homo in statu naturae lapsus non potest solis naturae, & liberi arbitrii viribus illum elicere, sed ad illum eliciendum indiget gratia, vel faltem aliquo speciali auxilio ordinis naturalis, nisi forte talis actus fiat ex motivo vanae gloriae, usque contingit.

Respondeo secundo, dato Antecedenti, negando consequentiam, & paritatem, ob duplum rationem discriminis. Prima est, quia Deus est magis separatus a bonis sensibilibus, quae magis, & efficacius nos movent. Secunda, quia dilectio bonorum creatorum non postulat, quod relinquuntur omnia peccata mortalia, sicut dilectio efficax Dei, que nullum peccatum mortale, sive actuale, si-

ve habituale , sive originale compatitur .

Objicies tertio : Intellectus potest naturaliter cognoscere , Deum ut authorem naturæ esse super omnia diligendum . Ergo & voluntas , quæ est appetitus rationalis , ducitum , seu dictamen rationis sequens , potest solis naturæ viribus ipsum supra quodlibet aliud diligere .

Respondeo , concesso Antecedenti , negando consequentiam . nam licet intellectus possit speculando ad talem notitiam devenire ex principiis naturalibus , non potest tamen in statu corruptionis habere iudicium practicum , & prudentiale , quo judicet Deum esse hic & nunc super omnia diligendum , nisi speciali auxilio adjuvetur ; quia homo per peccatum originale magis est vulneratus in intellectu pratico , quam in speculativo , & magis impotens ad prosecutionem boni , quam ad cognitionem veri , juxta illud Poetæ : *Video meliora , proboque , deteriora sequor .*

Objicies quarto contra secundam conclusionem : Si homo in statu naturæ lapsæ indigeret auxilio supernaturali ad diligendum Deum ut authorem naturæ , talis dilectio non esset naturalis , sed supernaturalis : At hoc dici nequit ; cum enim illa objectum naturale respiciat , non potest non esse entitative naturalis : Ergo nec illud . Sequela majoris manifesta videtur ; ille enim actus , ad quem requiritur auxilium supernaturale , supernaturalis est .

Respondeo negando sequelam majoris , & ad illius probationem dico , actum , ad quem auxilium supernaturale requiritur , per se , & per modum principii eliciti illius esse supernaturalem ; secus vero si tale

tale auxilium exigatur tantum per accidens, & tanquam removens prohibens, ut contingit in proposito ; auxilium enim supernaturale per se non requiritur ad dilectionem efficacem Dei ut authoris naturae, sed tantum per accidens, ratione elevationis naturae humanae ad ordinem supernaturalem, & conjunctionis finis naturalis cum supernaturali, & ad tollendum obicem peccati, & aversionis a Deo ut ultimo fine, ut in secunda conclusione declaravimus.

Objicies quinto contra tertiam conclusionem : In statu naturae purae nulla esset infirmitas, subindeque homo in eo posset, quidquid poterat in statu integratis, & sanitatis : At homo in natura integra cum solo concursu generali Deum ut naturae authorem diligere poterat, ut docet D. Thomas hic art. 3. & constat ex illo Augustini epist. 107. *Liberum arbitrium ad diligendum Deum primi peccati granditate perdidimus*: Ergo & id posset in statu naturae purae.

Respondeo, quod homo in statu naturae purae non fuisset infirmus privative, vel positive, sed negative; quia licet tunc fuisset propensus ad bonum privatum, sicut in statu naturae lapsae, talis tamen inclinatio non traxisset originem a peccato, sed ab intrinseca hominis constitutione; homo enim constat ex partibus habentibus inclinationes oppositas, nimirum rationali, & sensitiva, quarum prima naturaliter inclinatur ad bonum honestum, & rationi consonum; secunda ad bonum delectabile, & sensitibile, rationi contrarium. De quo fuisus in tractatu de statibus naturae humanae capite ultimo, ubi de statu naturae purae.

Objicies ultimo: Homo in statu naturæ puræ teneretur præcepto naturali Deum ut naturæ authorem super omnia diligere , subindeque id posset , cum Deus non obliget ad impossibilia : At non per gratiam , cum status naturæ puræ omnem gratiam excludat : Ergo solis naturæ viribus .

Confirmatur : Homo in statu naturæ puræ haberet naturalem inclinationem ad diligendum Deum ut authorem naturæ super omnia : At si id non posset ex viribus suæ naturæ , talis inclinatio esset frustra ; siquidem nullo modo posset reduci in aetum , cum status naturæ puræ omnem gratiam , omniaque auxilia ordinis supernaturalis excludat : Ergo homo in statu naturæ puræ posset solis naturæ viribus Deum ut naturæ authorem super omnia diligere .

Ad objectionem respondeo , quod homo in statu naturæ puræ potest Deum ut authorem naturæ super omnia diligere , non quidem per auxilium ordinis supernaturalis , neque cum solo generali concursu , sed per auxilium speciale ordinis naturalis , quod Deus in tali statu offerret , quando urgeret obligatio præcepti dilectionis , hoc ita exigente providentiæ suæ suavitate , que homini in nullo statu impossibilia præcipere potest . Nec status nature pure omnem gratiam specialem excluderet , sed solum gratiam supernaturalem entitative , vel naturalem per modum habitus , & formæ permanentis , qualis foret gratia sanans naturam , eamque integrum integritate naturali constituens , ut in tractatu de statibus naturæ humanæ cap . 4. declaravimus .

Ex hoc patet responsio ad confirmationem:
data

data enim majore, neganda est sequela minoris: ut enim inclinatio indita ab authore naturæ non sit frustra, sufficit, quod possit reduci in actum per vires, & auxilia ordinis naturalis (sive illa sint generalia, sive specialia intra illum ordinem). absque recursu ad ordinem supernaturalem. Dixi, *data majori*, quia Curiel, & nonnulli alii non improbabiliter existimant, quod in statu naturæ puræ non fuisset in homine inclinatio, & appetitus naturalis ad diligendum Deum ut authorem naturæ, in seipso expresse, & in particulari, sed solum ad amandum bonum universale, & in communione, & Deum, ut confuse, & implicite sub tali bono universal contentum.

C A P U T I V .

*De necessitate gratiæ ad observantiam
totius legis naturæ.*

Constat ex dictis cap. 2. posse hominem in natura lapsa aliqua legis naturalis præcepta sine speciali gratia adimplere; cum enim ibi ostensum sit, hominem in tali statu cum solo generali concursu posse aliquando efficere bonum aliquod morale undeque honestum; hinc manifeste colligitur, ipsum quoque posse præceptum de tali opere, verb. grat. de eleemosyna danda pauperi extreme indigenti, ex solis naturæ viribus adimplere. Certum etiam, & exploratum est apud omnes, hominem in omni statu indigere gratia, ad implenda præcepta naturalia, quantum ad modum, ut scilicet ex charitate, & meritiorie, ac fructuose ad vitam æternam

H s ea

ea adimpleat : cum enim modus ille sit supernaturalis , & actus virtutum naturalium elevet ad ordinem , & finem supernaturalem , manifestum est , illum sine gratia , & charitate , quæ est forma aliarum virtutum , illisque confert vim præcipuam merendi æternam felicitatem , non posse ponit in actibus nostris . Solum ergo difficultas est , & controversia inter Theologos , an homo possit in statu naturæ lapsæ , ex solis viribus liberi arbitrii , totam legem naturæ , seu totam præceptorum naturalium collectionem quoad substantiam observare , vel ad id indigeat gratia , & qua?

§. I.

Triplici conclusione difficultas resolvitur .

Dico primo , homo in statu naturæ lapsæ non potest totam legem naturæ quoad substantiam observare sine speciali gratia .

Hæc conclusio manifeste colligitur ex dictis capite præcedenti: in primis enim tota lex naturæ includit omnia mandata naturalia , a primo usque ad ultimum : Sed homo lapsus non potest sine auxilio gratiæ observare primum omnium mandatorum , nimirum præceptum dilectionis Dei ut authoris naturæ , ut ibidem conclus. i. ostendimus : Ergo nec totam legem naturæ adimplere . Deinde , ut ibidem dicebamus , licet natura infirma possit aliquod opus efficere , non tamen præstantissimam operationem , quam natura sana , & integra potest elicere : At opus perfectissimum , quod homo in statu integritatis , & sanitatis ex viribus naturæ exercere poterat , erat totius legis naturalis observantia , quan-

quantum ad substantiam , nam quantum ad modum conducentiae ad salutem , etiam in eo statu indigebat gratia , cum modus ille , ut supra dicebamus , supernaturalis sit : Ergo homo lapsus non potest ex viribus propriis adimplere totam legem naturae , quantum ad substantiam .

Dico secundo : Ad totius legis naturae observantiam necessaria est in homine lapsus gratia justificans , seu habitualis .

Probatur primo : Impossibile est esse bene ordinatum circa media , qualia sunt pracepta , & non circa finem , scilicet Deum ; quia media propter finem eliguntur , & intuitus eius : At sine gratia sanctificante , & charitate nullus est bene ordinatus in Deum ultimum finem : Ergo sine illa nullus potest in statu naturae lapsus omnia mandata naturalia observare .

Probatur secundo : Sub lege naturae comprehenditur praceptum diligendi Deum naturae authorem super omnia : At hoc imprimi nequit sine gratia habituali , ut capite precedenti ostensum est : Ergo nec tota lex naturalis .

Dico tertio : In homine lapsus ad totius legis naturae observantiam , praeter gratiam habitualis , necessario requiritur specialis gratia auxilians ; quae quidem per se , & atenta rei natura , debet solum esse specialis intra ordinem naturae , sed supposita hominis ad ordinem supernaturalem elevatione , per accidens debet esse entitative supernaturalis .

Probatur prima pars : Impotentia moralis ad totius legis naturae observantiam , in homine lapsus , & in peccato mortali existente , non solum provenit ex defectu subjectionis

mentis ad Deum ut ultimum finem, sed etiam ex rebellione, & pugna appetitus inferioris contra rationem: At licet gratia habitualis mentem Deo ut ultimo fini subjiciat, rebellionem tamen appetitus inferioris contra superiorem non tollit, sed eam ad agonem, & meritum in nobis relinquit, ut docet Tridentinum sess. 5. decreto de peccato originali, & experientia satis ostendit: Ergo in homine lapso ad totius legis naturæ observantiam, praeter gratiam habitualem, seu justificantem, gratia actualis, seu auxilians necessario requiritur.

Quod vero talis gratia per se, & attenta rei natura non debeat esse supernaturalis entitative, sed sufficiat, quod sit specialis intra ordinem naturæ, constat; nam totius legis naturæ observantia ex aliquo motivo honesto naturali est entitative naturalis: Ergo per se exposcere nequit pro principio proxime eliciente gratiam auxiliantem entitative supernaturalem.

Demum quod supposita naturæ humanæ ad ordinem supernaturalem elevatione, per accidens illam exigat, patet ex dictis cap. præcedenti conclus. 2. agendo de dilectione Dei naturali; idem enim cum proportione dicendum est de observantia totius legis naturæ.

§. II.

Solvuntur objectiones.

Obijicies primo contra primam conclusionem illud Deuteronom. 30. *Mandatum hoc, quod ego præcipio tibi hodie, non est supra te, neque procul positum, nec in cœlo situm. Quibus*

bus verbis Moyses insinuare videtur, obseruantiam legis, quam nomine Dei intimabat populo Hebraeo, non esse supra naturales illius vires.

Sed facile respondetur, Moysem illis verbis solum significare voluisse, obseruantiam talis legis esse in potestate hominis, non ut operantis ex solis viribus naturae, sed ut moti, & adjuti divina gratia, quæ cor interius pulsat, cum lex exterius auribus insonat. Unde D. Thomas hic art. 6. ad 2. *Nihil homo potest facere, nisi a Deo moveatur;* & ideo cum dicitur homo facere, quod in se est, dicitur hoc esse in potestate hominis, secundum quod est motus a Deo.

Objicies secundo illud Apostoli ad Rom. 2. *Gentes, quæ legem non habent, naturaliter quæ legis sunt, faciunt, quo insinuari videntur,* Gentiles ex solis naturae viribus legem naturalem observasse. Unde Tertullianus de corona militis capit. 6. *Apostolus ad Romanos dicens, natura facere nationes ex, quæ legis sunt, & legem naturalem suggerit, & naturam legalem.*

Respondeo, verba illa Apostoli posse intelligi de gentibus ad fidem conversis, & per naturam gratia reformatam operantibus, ut interpretantur D. Augustinus lib. 4. contra Julian. cap. 3. & D. Thomas in commentariis ad hunc locum lect. 3. Quod si intelligantur de gentibus nondum ad fidem conversis, & per solas naturae vires operantibus, ut Origenes, Chrysostomus, Hieronymus, Ambrosius, ipseque Augustinus de Spiritu, & littera capit. 28. ea accipiunt, dicendum est, Apostolum verbis illis solum velle, gentes nondum ad fidem conversas naturaliter, id est solo lumine, viribusque naturae, in aliquibus be-

bene operari, & aliqua legis naturalis præcepta observare, licet totam præceptorum naturalium collectionem, totamque naturæ legem adimplere non possint sine auxilio gratiæ.

Objicies tertio: Præcepta legis naturæ collective sumpta, cum sint naturalia, non excedunt vires naturæ: Ergo ad illa implenda gratia necessaria non est.

Respondeo distinguendo Antecedens: non excedunt vires naturæ, sanæ, & integræ, concedo Antecedens: infirmæ, & corruptæ, nego Antecedens, & consequentiam. Solutio patet ex supra dictis: ut enim supra dicebamus, licet natura infirma, & vulnerata possit aliqua opera moraliter bona efficere, non tamen præstans operationes, quas natura sana, & integra potest elicere, quales sunt totius legis naturæ impletio, & dilectio Dei ut authoris naturæ, quæ de se infert omnium aliorum præceptorum obseruantiam, & eam habet adjunctam, quandiu illa durat.

Objicies quarto: Homo in statu naturæ lapsæ potest singula præcepta legis naturæ sine speciali gratia observare: At qui potest singula præcepta adimplere, potest etiam & totam collectionem: Ergo homo in statu naturæ lapsæ totam præceptorum naturalium collectionem sine speciali gratia observare potest.

Respondeo primo, negando majorem: nam homo lapsus non potest sine gratia observare primum, & maximum mandatorum legis naturæ, nimirum præceptum dilectionis Dei ut authoris naturæ.

Respondeo secundo, data majori, negando mi-

minorēm , cujus falsitas constat ex dictis supra cap. i. agendo de cognitione veritatum naturalium , & apertius patebit infra , cum de venialibus agemus .

Objicies quinto contra secundam conclusionem : Ad totius legis naturæ observantiam requiritur gratia sanans infirmitatem naturæ humanæ , per peccatum originale fauiciaræ , ut docet D. Thomas hic art. 4. Sed gratia habitualis , cum non ordinetur ad operandum , sed ad essendum , nec moveat potentias animæ ad suos actus eliciendos , sed duntaxat animam sanctificet , & amacula peccati mundet , non est gratia sanans , & ad operandum adjuvans , sed justificans , vel sanctificans : Ergo ad totius legis naturæ observantiam non requiritur , sed ad illam sufficit gratia actualis , sive auxilians .

Respondeo , concessa majori , negando minorēm : nam per peccatum originale duplēcēm infirmitatem contraximus ; alteram in parte superiori , per aversionem mentis a Deo ; alteram in parte inferiori , quæ a superiori mansitaversa , & ratione utriusque debiles ad bene operandum remansimus ; nam cum vires voluntatis ad bene operandum erga media ex fine , seu adhæsione ad illum sumantur , sit consequens , quod parte superiori a Deo per peccatumaversa , languescant voluntatis vires ad bene operandum , ac proinde quod ut fortis reddatur , debeat tolli aversio peccati , quæ cum auferri sine gratia habituali non possit , sine illa perfecte sanari nequit ; unde non solum gratia justificans , vel sanctificans , sed etiam sanans merito appellari potest ; licet enim non requiratur ut auxilians ad operandum directe , requiritur tamen

enon ut removens peccatum prohibens dilectionem, per quam voluntas firma redditur ad operandum.

Objicies sexto: Homo in statu naturæ putæ æque esset ad totius legis naturæ observantiam debilis, ac in statu peccati originalis, ut in tractatu de statibus naturæ humanæ ostendimus: At in statu naturæ puræ non indigeret gratia habituali ad implendam totam legem naturæ, sed ad hoc illi sufficeret auxilium intra ordinem naturæ speciale, ut infra dicemus: Ergo nec in statu peccati originalis, ad implendam totam legem naturæ, gratia habitualis necessaria erit.

Respondeo distinguendo majorem, æque esset ad totius legis naturæ observantiam debilis, intensive, concedo majorem: extensive ex parte causarum talis debilitatis, nego majorem, & concessa minori, nego consequentiam. Itaque in pura natura ad eadem opera æque esset impotens homo, ac in natura lapsa; sed impotentia in illo statu vel solum proveniret ex pugna, & rebellione appetitus contra rationem, quæ ab intraneis naturæ haberetur; vel si etiam ei competit ex aversione mentis a Deo, non tamen ex aversione mentis a Deo ut authore, & fine supernaturali, sed duntaxat naturali. At in isto provenit etiam ex aversione mentis a Deo, ut authore, & fine supernaturali; & quia talis aversio in hoc statu transferri non potest, nisi posita gratia habituali, per quam tollatur peccatum, hinc fit, quod requiratur in hoc statu habitualis gratia, secus vero in illo.

Objicies ultimo contra tertiam conclusiōnem: Totius legis naturalis observantia est corpus entitative naturale: Ergo auxilia entitative

tive supernaturalia exigere nequit.

Respondeo, concesso Antecedenti , distinguendo consequens , auxilia entitative supernaturalia exigere nequit, per se , & attenta rei natura, concedo : per accidens , & supposita hominis ad ordinem supernaturalem elevatione, nego . Ex hoc intelliges , quod in statu naturæ puræ , in quo natura humana non esset elevata ad ordinem supernaturalem, ad totius legis naturæ observantiam sufficeret auxilium intra ordinem naturæ speciale , ut capite præcedenti diximus de dilectione Dei ut autho- ris naturæ .

C A P U T V.

De necessitate gratiæ ad victoriam tentationum .

EX principiis supra statutis , contra Vas- quem , & Contensonum , manifeste colligitur , ad victoriam levis temptationis , ex motivo honesto naturali , specialem Dei gratiam in homine lapso non requiri. Nam talis victoria est opus facile , non excedens nec physice , nec moraliter vires hominis et- iam infirmi: Ergo ad illam homo in statu naturæ lapsæ speciali gratia non indiget . Consequentia patet ex supra dictis . Ante- cedens vero certum videtur : non enim fundamentum aliquod potest assignari , ut adeo vires hominis lapsi extenuemus , ut proportionem physicam , & moralem non habeat ad victoriam levis temptationis ; præ- fertim cum habeat potentiam sufficientem , & proportionatam ad aliqua opera hone- sta , & moraliter bona , ver. gr. ad dan- dam

dam eleemosynam pauperi extreme indigen-
ti , subindeque ad implendum præceptum
naturale ad illam obligans , & ad resisten-
dum temptationi , quæ ab illius impletione
retrahere posset , ut constat ex dictis cap.
2. contra eosdem Authores . Unde inter pro-
positiones Baji a Pio V. & Gregorio XIII.
damnatas , hæc numeratur : *Non solum fu-
res sunt , ac latrones , qui Christum viam
veritatis , & vitæ negant , sed etiam qui
dicunt temptationi ulli , sine gratiæ ejus ad-
jutorio , hominem posse resistere .*

Constat etiam fere apud omnes , ad vincen-
dam gravem temptationem ex pravo aliquo mo-
tivo , v. g. temptationem luxuriæ ex motivo
avaritiæ , vel inanis gloriæ , gratiam non re-
quiri : quia actus ille ex circumstantia finis est
malus , gratia autem non desideratur nisi ad
actum undeque honestum . Solum ergo
difficultas est , an ad victoriam gravis tenta-
tionis , ex motivo honesto , necessarium sit
speciale gratiæ auxilium . Dicitur autem ten-
tatio gravis , quæ vehementer inclinat ad ma-
lum , & retrahit a bono , per propositionem
alicujus magni boni apparentis , vel magni
mali imminentis . His præmissis ,

Dico breviter , non potest homo lapsus
gravem temptationem ex motivo aliquo hone-
sto superare , absque speciali Dei auxilio .

Probatur primo ex Scriptura . Apostolus
enim 1. ad Corinth. 10. ait : *Non patietur vos
tentari supra id , quod potestis : ex quo Chryso-
stomus , Theophylactus , Theodoreetus , &
alii recte inferunt , dari temptationes , quæ
arbitrii sibi relicti vires saltem morales supe-
rant . Item Christus Matth. 26. dicebat Disci-
pulis : *Vigilate , & orate , ut non intretis in
temptationem . Si autem Victoria cuiusvis tenta-
tio-**

tionis in nostra sita sit potestate, per vires liberi arbitrii, absque indigentia gratiæ, ut volebant Pelagiani, non debuisset Christus vigiliam, & orationem persuadere Discipulis, ut vincerent temptationem, sed solum illos exhortari ad victoriam, quam suis viribus obtinere valuissent. Unde Hieronymus lib. 2. adversus Pelagianos, verba illa Salvatoris explicans, sic ait: *Non debuisset dicere, juxta vos, surgite, & resistite, liberum enim habetis arbitrium, & simul concessa a Domino vobis potestate, nullius alterius indigetis auxilio.* Similia habet Arausicanum epist. Synodica, quæ est nona inter Augustinianas, ubi etiam loquens de Pelagianis: *Istorum (inquit) saevilegas disputationes incessario sequitur, ut nec orare debeamus, ne intremus in temptationem. Si enim possibilitate naturæ, & arbitrio voluntatis, in potestate sunt constituta, quis non ea videat a Domino inaniter peti, & fallaciter orari, cum orando poscuntur, que naturæ nostræ jam ita conditæ sufficientibus viribus obtainentur; nec dubuisse dicere Dominum Jesum, vigilare, & orare, sed tantummodo, vigilare, ne intretis in temptationem?* Idem fere repetit Concilium Milevitanum in epistola etiam synodica, inter Augustinianas 92.

Probatur secundo ex Innocentio I. in epistola ad Concilium Carthaginense, apud Augustinum 91. ubi sic ait: *Nisi magnis precibus gratia in nos implorata descendat, nequaquam terrenæ labis, & mundani corporis vincere connamur errores, cum pares nos ad resistendum non liberum arbitrium, sed Dei solum facere possit auxilium. Quotidiana præstat ille remedia, sine quibus nullatenus vincere humanos poterimus errores; necesse est enim, ut quo auxiliari-*

biantem vincimus, eo iterum non adjuvante vincamur. Ex quibus verbis hoc potest argumentum deduci: Id, quod possumus sine speciali gratia, non est necessarium, illa seclusa: Ergo si possumus tentati non vinci sine gratia speciali, non est necessarium, ut Deo non adjuvante vincamur, cuius contrarium docet Innocentius.

Probatur tertio ex SS. Patribus, qui serio monent, licet nostrum sit dare, vel negare temptationi consensum, tamen de nostra fortitudine nullatenus esse presumendum, sed ad Dei misericordiam tota humilitate currendum. Ita inter alios Augustinus lib. 22. de civit. cap. 23. ubi sic ait: *In hoc bello periculorum plenissimo, nec de viribus nostris sperretur facienda victoria, nec viribus nostris facta tribuatur, sed ejus gratiae, de quo Apostolus ait: Qui dat victoriam per Christum.* Bernardus quoque serm. in octavam Paschæ sic habet: *Quoties ergo temptationi resistis, quoties vincis malignum, noli propriis retrahere viribus, noli in te, sed magis in Domino gloriari.* Idem fuse prosequitur serm. i. in Psalm. *Qui habitat.* Item Gregorius Magnus lib. 23. moral. cap. 19. *Nemo (inquit) se alicujus virtutis aestimet, etiam cum quid fortiter potest, quia si divina proteccio deserat, ibi repente enerviter obruetur, ubi se valenter stare gloriatur.* Et lib. 18. c. 6. explicans illud Job. 38. *Quis posuit mensuras ejus, si nosti?* subdit: *Dum considerat ista, qui agit, sue virtuti nihil tribuat, nec dese audeat aliquid, sed perpendens desuper mensuras, & lineas incomprehensibiliter tensas, tanto magis in humilitate formidinis consistat, quanto magis pendere videt omnia in potestate mensoris.*

Pot-

Potest insuper suaderi conclusio hac ratione fundamentali , saepe a nobis insinuata : Homo per peccatum mansit infirmus , & liberum ejus arbitrium et si non extinctum , tamen debilitatum , & infirmatum fuit , in ordine ad bonum morale : Ergo licet ex propriis viribus efficere possit ea opera , quæ facilia sunt , subindeque leves superare tentationes , non potest tamen opera ardua , ac difficilia præstare , nec graves proinde vincere temptationes , nisi speciali Dei auxilio confortetur , & adjuvetur . Patet consequentia exemplo hominis naturali infirmitate laborantis ; et si enim ille possit propriis viribus , & sine alterius adminiculo motus aliquos leves , & faciles hominis sani efficere , ut curvare digitum , movere pedem , & similia ; non tamen potest elicere motus perfectos , ut saltare , currere , spatiari , nisi alterius ope adjuvetur . Idem cum proportione de homine in statu naturæ lapsæ dicendum est , ipsum nimirum posse ex propriis viribus aliquos actus faciles , & aliqua opera honesta , & moraliter bona efficere , nec non aliquas leves superare temptationes , non tamen opera ardua , & difficilia : ut diligere Deum ut authorem naturæ super omnia dilectione efficaci , totam legem naturalem observare , vincere graves tentationes , & similia , quæ homo in statu naturæ sanæ , & integræ ex solis liberi arbitrii viribus præstare poterat . Eodem enim modo , proportione servata , philosophandum est de infirmitate morali orta ex peccato , sicut de physica , & naturali .

Dices , magnum esse inter utramque discrimen : nam infirmitas physica causat in homine diminutionem membrorum , ideoque red-

redit hominem inhabilem ad motum perfectum hominis sani; moralis vero nihil entitatis potentiarum diminuit, cum naturalia integra post peccatum remaneant, subindeque non potest inducere in homine lapso inhabilitatem ad opera ordinis naturalis, quantumvis perfecta, & difficultia sint.

Sed contra primo. Si valeret hoc discrimen, sequeretur hominem lapsum nedum ex viribus naturae posse gravem superare tentationem, sed etiam totam legem naturalem implere, quod est contra communem Theologorum sententiam.

Contra secundo. Licet homo per culpam originalem nihil entitatis potentiarum amiserit, sicut tamen spoliatus gratuitis, per quæ mens subjiciebatur Deo, & pars inferior superiori, ex quo oritur infirmitas moralis, subindeque inhabilitas, & impotentia in homine lapso ad opera ardua, & difficultia ordinis naturalis: Ergo quamvis homo per peccatum originale nihil entitatis potentiarum amiserit, mansit tamen infirmus moraliter, & per consequens impotens ad gravis tentationis victoriam viribus propriis obtainendam.

Demum probari potest conclusio hoc cursu: Cuivis agenti connaturale est operari secundum prevalentem inclinationem: Ergo cum urgente gravi tentatione prevaleat in homine lapso inclinatio ad bonum delectabile contrarium rationi, connaturale erit, quod voluntas istud sequatur, & preternaturale, quod tunc prosequatur honestum, & rationi consonum; & consequenter illud, non obstante tali tentatione, prosequi, & bono delectabili preferre; atque ad id a Deo determinari, contra id, quod connaturaliter, juxta prævalen-

lentem tunc inclinationem petit, erit specialis gratia, & beneficium Dei.

Nec valet, si dicas, hoc argumentum probare etiam, quod homo lapsus non possit sine gratia leves superare tentationes, cum per illas pariter inclinetur ad bonum sensibile, & delectabile, contrarium rationi. Non valet, inquam, licet enim ex levitate tentatione oriatur aliqua inclinatio, & propensio ad bonum delectabile, quia tamen illa levis, ac debilis est, per rationem, & inclinationem naturalem, quam homo habet ad bonum honestum, facile, & absque speciali Dei auxilio superari potest.

Contra nostram conclusionem objici solet hoc argumentum, quod aliquibus difficile apparet: Tentatio, quantumvis vehementis, quandiu rationis judicium non absorbet, libertatem non adimit homini lapsu ad ei resistendum: Ergo potest homo lapsus, quantumvis gravi temptatione contra aliquid præceptum legis naturæ pulsatus, temptationem illam superare, absque speciali auxilio. Consequentia videtur legitima: impossibile enim videtur, quod aliquis omni speciali auxilio destitutus remaneat liber ad resistendum temptationi, si absque speciali auxilio non possit ei resistere. Antecedens vero probatur ex D. Thoma supra qu. 10. ar. 2. & 3. ubi expresse docet, a nullo omnino objecto, nullave passione, quantumvis vehementi, voluntatem hominis, quandiu est in via, necessitari quoad exercitium actus, sed semper manere liberam, ut eliciat, vel non eliciat actum, quod etiam assertit D. Anselmus de libero arbitr. cap. 6. 7. 9. & 10. Ratio etiam suffragatur: nam si gravis tentatio libertatem adimeret homini ten-

ratio speciali auxilio ad ei resistendum destituto, homo ille ei consentiendo non pecaret; quia nemo peccat in eo, quod libere vitare non potest.

Respondeo, concessso Antecedenti, negando ejus consequentiam: Sicut enim ut homo dicatur liber ad observanda præcepta supernaturalia, & resistendum temptationibus ad eorum transgressionem inducentibus, non est necesse, quod id præstare valeat sine gratia, & ex solis viribus liberi arbitrii, sed sufficit, quod id possit mediante gratia, quæ ipsi offertur a Deo, quando urget eorum obligatio, aut pulsat gravis tentatio, ut passim docent SS. Patres impugnantes errorem Pelagii, qui asserebat, hominem non esse liberum, si Dei indiget auxilio, sicut refert D. Hieronymus in epist. ad Ctesiphontem: Ita pariter ut tentatio gravis contra præcepta naturalia relinquat hominem lapsum liberum ad resistendum, non requiritur, quod ille, tali temptatione pulsatus, possit absque speciali auxilio ipsi resistere, sed sufficit, quod id possit cum auxilio speciali, ei a Deo oblato, instante obligatione præcepti naturalis, & gravi illa temptatione urgente: ut enim ait D. Thomas hic ar. 4. ad 2. Illud, *quod possumus cum auxilio divino, non est nobis omnino impossibile, secundum illud Philosophi in 3. Ethic. Quæ per amicos possumus, aliqualiter nos possumus.*

Ad complementum hujus quæstionis quæres primo, an ad resistendum gravi temptationi contra præcepta naturalia, requiratur gratia entitative supernaturalis, vel sufficiat auxilium speciale ordinis naturalis?

Respondeo, quod si homo ei resistat ex motivo aliquo supernaturali, requiritur gratia enti-

entitative supernaturalis : quia cum actus specificetur a motivo, ex quo elicetur , actus, quo quis ex motivo supernaturali alicui temptationi resistit, non potest non esse supernaturalis, subindeque pro sui principio gratiam entitative supernaturalem exigere . Si vero tali temptationi resistat ex motivo aliquo honesto ordinis naturalis , sufficit auxilium speciale ordinis naturalis; quia cum tunc actus ille , quo ei resistit , sit entitative naturalis, nequit exigere pro principio sui gratiam supernaturalem entitative . Unde supra cap. 3. dicebamus , quod dilectio naturalis Dei non requirit gratiam supernaturalem entitative pro principio eliciente , sed duntaxat expediente , ratione incompatibilitatis , quam habet cum peccato , quæ in victoria gravis temptationis non invenitur.

Quæres secundo , an ea , quæ diximus de homine lapso , seu in statu naturæ lapsæ existente , sint intelligenda de homine jam justificato per gratiam?

Respondeo affirmative , nam in homine justificato manet rebellio appetitus contrarationem , ex qua provenit virium debilitas in ordine ad bonum morale ; unde sicut ob hanc rationem indiget speciali auxilio ad dilectionem Dei naturalem , & ad totius legis naturæ observantiam , ita pariter eo eget ad gravis temptationis victoriā , ut magis constabit ex dicendis capite sequenti .

C A P U T VI.

*De necessitate gratiae ad diu vitanda omnia
peccata mortalia, quæ sunt contra
legem naturæ.*

CUM fide certum sit, hominem non posse sine gratia præcepta supernaturalia adimplere, eadem certitudine constat, ipsum quoque non posse sine ea vitare illa peccata, quæ in transgressione, vel omissione talium præceptorum consistunt; unde solum difficultas est de peccatis mortalibus, quæ sunt contra legem naturæ, an scilicet illa possint diu vitari sine gratia?

Pro resolutione

Dico breviter, hominem in statu naturæ lapsæ non posse viribus suæ naturæ diu vitare peccata mortalia, quæ sunt contra legem naturalem, sed ad hoc gratiam tum justificantem, tum auxiliantem requiri.

Prima pars constat ex dictis supra c. 4. ibi enim ostendimus, hominem lapsum non posse ex viribus suæ naturæ totam legem naturalem adimplere: Ergo nec diu potest ex propriis viribus vitare omnia peccata mortalia contra tales legem. Consequentia patet, ideo enim homo peccat, quia non adimplet præcepta: Ergo si non potest diu propriis viribus servare totam legem naturalem, neque ex iisdem poterit diu vitare omnia peccata mortalia contra legem naturæ.

Potest insper eadem veritas suaderi ratione D. Thomæ hic art. 8. Homo in statu naturæ lapsæ habet multa tam intrinseca, quam extrinseca, provocantia ipsum ad peccandum; nimirum rebellionem appetitus, temptationem Dæmonum, & societatem

pra-

pravorum hominum , qui suis exemplis , & consiliis inducunt nos ad peccandum ; & a liunde corruptio corporis terreni , & distractio circa res mundanas , & ad vitam necessarias , impedit continuam vigiliam , & attentionem mentis ad vitanda illa pericula , juxta illud Sapient. 9. *Corpus, quod corruptitur, aggravat animam, & terrena inhabitatio deprimit sensum multa cogitantem:* Ergo non potest viribus suæ naturæ resistere omnibus , atque adeo nec vitare omnia peccata mortalia contra legem naturæ .

Quod autem ad illa vitanda gratia habitualis , seu justificans requiratur , probat idem S. Doctor ibidem hac ratione . Ut homo possit diu vitare omnia peccata mortalia , necesse est , quod habeat cor suum ita firmatum in Deo , ut pro nullo bono consequendo , vel malo vitando ab eo separari velit : Sed qui est in peccato mortali , & gratia , ac charitate privatus , non habet cor suum ita firmatum in Deo , sed ab eo potius aversum , & conversum ad creaturam tanquam in ultimum finem : Ergo omnia peccata mortalia diu vitare non potest . Minor constat , Major vero probatur a D. Thoma duplice . Primo a simili , sicut enim inferiori appetitu non totaliter subjecto rationi , non potest fieri , quin contingent motus inordinati in ipso , & in hujusmodi motibus peccata venialia ; ita ratione non subdita Deo , & non firmata in illo tanquam in ultimo fine , non potest fieri , quin multæ contingent inordinaciones , & peccata in ipsis actibus rationis . Unde Prosper 5. de vocatione gentium capit. 2. *Voluntas mutabilis, quæ non ab incommutabili voluntate regitur, tanto citius appropinquat iniquitati,*

quanto acrius intenditur actio*nisi*. Hinc etiam Chrysostomus in capit. II. Matth. comparat peccatorem navi, malo, velis, & gubernaculo destitutae, quæ certissimo naufragio exposita est, & quæ fertur non quo natura eam dirigit, sed quo ventorum, & procellarum impetus eam impellit. Secundo eandem Majorem probat S. Doctor ex eo, quod cum in hac vita multa occurrant mala, quæ formidamus, & bona delectabilia, ad quæ alliciamur, nisi homo habeat cor suum firmatum in Deo, recedit ab eo propter consequenda bona, vel mala vitanda, contemnendo precepta ipsius, & sic mortaliter peccat.

Addit, quod „ in repentinis homo operatur secundum finem præceptum, & secundum habitum præexistentem, quamvis ex præmeditatione rationis homo possit aliquid agere præter ordinem finis præcepti, & præter inclinationem habitus. Sed quia homo non potest semper esse in tali præmeditatione, non potest contingere, ut diu permaneat, quin operetur secundum convenientiam voluntatis deordinatae a Deo, nisi cito per gratiam ad debitum ordinem reparetur. Unde Gregorius 22. moral. c. 12. Peccatum, quod per tentiam mox non deletur, suo pondere in aliud trahit. „ Id constat exemplo Davidis, qui commisso adulterio, statim addidit homicidium. Et sane, cum viæ peccatorum, ut ait Propheta regius Ps. 34. sint tenebrae, & lubricum, & Angelus Domini persequens illos, sine dubio non infrequentius peccando cadunt, quam offendere solent, qui per lubrica in tenebris ambulant, & ab hostibus eos persequentibus urgentur, & impelluntur.

Tertia demum pars conclusionis, quæ assicit

rit hominem in statu naturæ lapsæ , ut diu vitet omnia peccata mortalia contra legem naturæ , non solum gratia justificante , sed etiam auxiliante egere , passim docetur a SS. Patribus , præsertim ab Augustino de natura , & gratia c. 26. his verbis : „ Sicut oculus cor-
 „ poris plenissime sanus , nisi candore lucis ad-
 „ jutus , non potest cernere ; sic & homo per-
 „ fectissime etiam justificatus , nisi eterna luce
 „ justitiae divinitus adjuvetur , recte non po-
 „ test vivere . Et lib. de Eccles. dogmat. c.
 „ 24. ait , neminem , etiam baptismatis gra-
 „ tia renovatum , idoneum esse ad superan-
 „ das diaboli insidias , & ad vincendas car-
 „ nis concupiscentias , nisi per quotidianum
 „ adjutorium Dei perseverantiam bonæ con-
 „ versationis acceperit . „ Perseveratię autem
 nomine non solum eam , quę est usque ad fi-
 nem intelligit , sed etiam illam , qua quis per
 multum tempus sine peccato perseverat ; hanc
 enim etiam posse dici perseverantiam docet
 idem S. Doctor lib. de bono persever. c. 1.

Eandem nostræ conclusionis partem docet S. Thomas hic art. 9. ubi ait hominem in gratia constitutum , ad bene operandum , & vitandum peccatum , indigere auxilio Dei , „ non
 „ solum ea ratione generali , qua nulla res
 „ creata potest in actum prodire , nisi vir-
 „ tute divinæ motionis , sed etiam ratione
 „ speciali , propter conditionem status huma-
 „ næ naturæ , quæ quidem licet per gratiam
 „ sanetur quantum ad mentem ; remanet
 „ tamen in ea corruptio , & infectio quan-
 „ tum ad carnem , per quam servit legi pec-
 „ cati , ut dicitur ad Rom. 7. Remanet etiam
 „ quædam ignorantia obscuritas , secundum
 „ quam , ut etiam dicitur ad Rom. 8. quid
 „ oremus , sicut oportet , nescimus .

Aliam rationem insinuat idem S. Doctor supra qu. 68. art. 2. ubi sic ait: „ Id, quod imperf-
 „ ecte habet naturam aliquam, vel formam,
 „ aut virtutem, non potest per se operari, ni-
 „ si ab altero moveatur: Sicut sol, quia est
 „ perfecte lucidus, per seipsum potest illumi-
 „ nare: luna autem, in qua est imperfecte
 „ natura lucis, non illuminat nisi illuminata.
 „ Medicus etiā, qui perfecte novit artem me-
 „ dicinæ, potest per se operari; sed discipulus
 „ ejus, qui nondum est plene instructus, non
 „ potest per se operari, nisi ab eo instrua-
 „ tur. „ Sed gratia justificans, in hoc sta-
 tu viæ, imperfecte participatur ab homine
 justo: Ergo ille non potest per talem gratiam
 perfecte operari, & diu facere bonum, &
 vitare peccatum, nisi speciali Dei auxilio mo-
 veatur, & adjuvetur. Major constat, Mi-
 nor vero egregie probatur, ac illustratur a
 nostro Conrado in commentario ad art. 9. hu-
 jus quæstionis, ubi notat, quod gratia viæ tri-
 plicem habet imperfectionem, per compara-
 tionem ad gratiam patriæ. Prima est in modo
 operandi: nam gratia patriæ semper causat
 actualem amorem Dei, non gratia viæ; præ-
 pter quod dicitur Matth. 11. quod quilibet
 beatus, quantumvis minimus, major est Joa-
 nne Baptista, scilicet quantum ad modum o-
 perandi; quia Joannes non semper actu a-
 mabat Deum, sicut beati. Secunda est, quod
 gratia viatoris, quantumvis intensa, de le-
 ge ordinaria non sanat perfecte appetitum,
 sicut gratia beatorum. Tertia est, quod
 non perficit rationem, ut immobiliter in-
 hæreat divinæ regulæ, sicut gratia patriæ.

Aliam rationem insinuat S. Doctor 3. con-
 tra Gent. c. 155. ubi sic discurrit: „ Omne,
 „ quod est variabile, ad hoc quod figuratur in
 „ uno,

„ uno, indiget auxilio alicujus moventis im-
 „ mobilis: homo autem variabilis est, & de
 „ malo in bonum, & de bono in malum: ad
 „ hoc igitur ut immobiliter perseveret in bo-
 „ no, indiget auxilio divino. *Idem docet 2.2.*
 „ *qu. 137. art. 4. his verbis:* Cum liberum ar-
 „ bitrium de se sit vertibile, & hoc ei non tol-
 „ latur per habitualem gratiam præsentis vi-
 „ tæ, non subest potestati liberi arbitrii, et
 „ iam reparati, ut se immobiliter in bono
 „ statuat, licet sit in potestate ejus, quod
 „ hoc eligat; plerumque enim cadit sub no-
 „ stra potestate electio, sed non executio.

Ex his intelliges, justos debere quotidie orare ad obtainendum a Deo auxilium illud speciale ad vitanda peccata, & perseverandum in bono necessarium, ut monet Concilium Arauficanum can. 10. dicens: *Adjutorium Dei etiam a renatis, & sanctis semper est implorandum, ut ad finem bonum pervenire, vel in bono possint opere perdurare.* Debent etiam justi quotidie gratias agere Deo, quod a peccato servati sint, ut eleganter declarat Augustinus homil. 23. inter 50. his verbis: *Agnosce gratiam ejus, cui debes, & quod non amisisti. Mihi debet iste, quod factum est, & dimissum vidisti; mihi debes & tu, quod non amisisti. Nullum enim est peccatum, quod fecit homo, quod non possit facere alter homo, si desit rector, a quo factus est homo.* Et lib. 2. Confess. c. 7. *Diligam Te Domine (inquit) & gratias agam, & confitebor nomini tuo, quoniam tanta dimisisti mibi mala, & nefaria opera mea. Gratiae tue deputo, & misericordia tue, quod peccata mea tanquam glaciem solvisti. Gratiae tue deputo & quecumque non feci mala, & omnia mihi dimissa esse fateor, & que mea sponte feci mala, & que te duce non feci.*

Objicies primo: Ideo homo in statu naturæ lapsæ non potest servare totam legem, & vitare diu omnia peccata mortalia, quia observare totam legem, & omnia peccata vitare, est opus hominis sani, atque adeo nequit ab infirmo præstari, ut in prima probatione nostræ conclusionis declaravimus: Sed homo sanatur per gratiam habitualē, quæ idcirco a D. Thoma hic artic. 4. sanans appellatur: Ergo per illam fit potens ad observandam totam legem, & diu vitanda omnia peccata mortalia, subindeque ad hoc non indiget ulterius auxilio Dei speciali.

Respondeo, quod licet homo per gratiam habitualē sanetur, non tamen totaliter, & adæquate: nam ut ait S. Doctor supra relatus, *Licet per gratiam sanetur quantum ad mentem, remanet tamen in eo corruptio quantum ad carnem, per quam servit legi peccati:* id est concupiscentia inclinans ad malum, & ad bonum delectabile contrarium rationi, ex qua oriuntur variæ, & graves tentationes, quæ voluntatem ad peccatum pertrahunt; unde ut homo justificatus illas supereret, & omnia vitet peccata mortalia, ultra gratiam habitualē, indiget speciali Dei auxilio, quo in bonum inclinetur, & mutetur mentis affectio, quam ex cupiditate alliciente contrahit.

Dices: D. Thomas 3. p. quæst. 62. artic. 6. ad 3. loquens de gratia habituali ait, quod *minima gratia potest resistere cuilibet concupiscentiæ:* Ergo per gratiam habitualē homo totaliter, & perfecte sanatur, & fit potens ad resistendum omnibus concupiscentiæ illecebris, & temptationibus, subindeque ad vitanda omnia peccata mortalia.

R.c.

Respondeo, vel D. Thomam ibi loqui de gratia habituali, non excludendo, sed supponendo auxilium Dei speciale, sine quo neque minima, neque maxima gratia potest diu resistere omni tentationi; Vel solum velle (ut interpretatur Cajetanus hic art. 9.) quod minima gratia sufficiat, quantum est de se, & ex natura sua ad resistendum cuilibet concupiscentiae, non vero quatenus est in tali subiecto, cum pugna appetitus, & cum debilitate rationis, propter ignorantiam. Sicut enim licet calor aquæ bullientis superet ejus frigiditatem, quia tamen non est in subiecto sibi connaturali, statim a frigore expellitur: Sic etiam, quia gratia in nobis viatoribus non est in subiecto sibi proportionato, sed multum infirmo, & indisposito, licet ipsa fortior sit concupiscentia, ab ea tamen, ratione subiecti, si auxilio Dei speciali destituatur, superatur, & corrumperit.

Objicies secundo: Ideo juxta D. Thomam hic art. 8. homo existens in peccato mortali non potest diu omnia mortalia collective vitare, quia non habet cor firmatum in Deo, ut pro nullo bono obtinendo, vel malo vitando ab eo separetur: At homo justus per gratiam habitualem habet cor suum firmatum in Deo ultimo fine: Ergo per illam habet sufficienes vires ad diu vitanda omnia peccata mortalia collective. Unde idem S. Doctor ibidem ait, quod homo in statu gratiae potest abstineri ab omni peccato mortali, quod in ratione consistit.

Respondeo, negationem firmitatis cordis in Deo esse quidem causam, cur homo lapsus non possit diu omnia mortalia collective vitare, non tamen totalem, & adæquatam; nam prater illam alia hujus impotentiæ causa reperi-

tur, nempe negatio subordinationis, & subjectionis partis inferioris ad superiorem, ut docet D. Thomas hic art. 9. unde cum in statu naturæ lapsæ hæc secunda causa in homine justificato perseveret, etsi prima non subsistat, non potest vitare omnia mortalia collective, sed ea duntaxat, quæ ex prima causa, nimirum deordinatione rationis, per aversionem a Deo, & conversionem ad creaturam, trahunt originem. Et hoc solum intendit S. Doctor, dum ait, quod homo in statu gratiæ potest abstinere ab omni peccato mortali, quod in ratione consistit.

CAPUT VII.

De necessitate gratiæ ad vitanda peccata venialia.

CERTUM est, hominem in statu naturæ lapsæ cum auxiliis huic statui ordinariis posse singula peccata venialia devitare; alioquin non peccaret ea committendo, cum nullus peccet in eo, quod vitare non potest. Constat etiam, illum cum iisdem auxiliis posse brevi aliquo temporis spatio esse sine peccato veniali. Nam ut S. Thomas 3. p. quæst. 79. artic. 4. ad 2. exponens illud 1. Joan. 1. *Si dixerimus, quia peccatum non habemus*, ait: *Hoc non est intelligendum, quin aliqua hora possit homo esse absque omni reatu peccati venialis, sed quia vitam istam sancti non decunt sine peccatis venialibus.* Unde solum difficultas est, an homo per totam vitam, vel per longum tempus omnia venialia collective vitare possit, seu nunquam, vel raro peccare venialiter? Pro resolutione

Dico

Dico breviter, neminem per totam vitam, vel per aliquod longum tempus, posse cum auxiliis de lege ordinaria gratiæ habituali annexis, omnia peccata venialia collecti- ve vitare, sed ad id requiri speciale privilegium, quod soli Deiparæ Virgini fuit concessum.

Prima pars est certa de fide, ac definita in Concilio Milevitano can. 7. & 8. & in Tridentino sess. 6. can. 23. constatque variis Scripturæ testimoniis, quibus assertur, nullum esse quantalibet gratia ornatum, qui aliquando non peccet: Secundi Paralip 6. Nec enim est homo, qui non peccet. Jacobi 3. In multis offendimus omnes. Psal. 31. Remisisti iniquitatem peccati mei, pro hac (scilicet peccati remissione) orabit ad te omnis (non solum peccator, sed) Sanctus. Demum 1. Joan. 1. Si dixerimus, quia peccatum non habemus, ipsi nos seducimus. Ex quibus, & similibus testimoniis hoc argumentum formatur: Id, quod est contra legem communem, speciale privilegium est: Sed justum omnia peccata venialia collective sumpta vitare, est contra legem communem, qua Deus statuit omnibus iustis aliqua venialia permittere, ut constat ex praedictis Scripturæ testimoniis: Ergo nullus potest ab omni veniali collective abstinere, absque privilegio speciali.

Idem constat ex SS. Patribus, qui passim docent, hominem, quandiu vivit, a levibus peccatis non posse esse immunem, & pedes, qui sunt animæ affectiones, dum in hoc pulvere gradiuntur, ex toto mundos esse non posse. Augustinus enim tract. 1. in 1. Joan. Non potest (inquit) homo, quandiu carnem portat, non habere levia peccata. Leo Papa fermi. 4. quadrages. Dum per varias actiones

vitæ hujus sollicitudo distenditur, necesse est mundano pulvere etiam religiosa corda sorde scere. Bernardus in sermone de cœna Domini, verba illa Christi, *Qui lotus est, non indiget, nisi ut pedes laveret*, expendens, subdit: *Lotus est, qui gravia peccata non habet, cuius caput, id est intentio, & manus, id est operatio, & conversatio, munda est; sed pedes, qui sunt anime affectiones, dum in hoc pulvere graduntur, ex toto mundi esse non possunt, quin aliquando vanitati, aliquando voluptati, aut curiositati, plusquam oportet, cedat animus vel ad horam, in multis enim offendimus omnes.* Hujusque rationem supra assignaverat, dicens: *In casu primi hominis cecidimus omnes, cecidimus autem super acervum lapidum, & in luto; unde non solum inquinati, sed etiam vulnerati, & graviter quassati sumus: lavari quidem cito possumus, ad sanandum vero opus est curatione multa.*

Eadem ratione utitur S. Thomas hic art. 8. ubi ait, quod homo in statu naturæ lapsæ non potest abstinere ab omni peccato veniali, propter corruptionem carnis, id est vulnus concupiscentiæ, ex quo sæpe fluit sanies, & pus, ieu alicujus peccati putredo, & fætor, donec illud fuerit perfecte sanatum in gloria per charitatem, & gratiam consummatam patriæ. Unde Augustinus lib. de perfect. iustitiæ cap. 4. „Peccantem secuta est peccatum „habendi dura necessitas, donec tota sane tur infirmitas, & accipiatur tanta libertas, „in qua sicut necesse est, permaneat beate vivendi voluntas, ita ut sit etiam bene vi vendi, & nunquam peccandi voluntaria, „felixque necessitas.

Hæc ratio confirmari, & illustrari potest in hunc modum: Ut homo justus possit omnia

mnia venialia collective usque ad mortem, vel per aliquod longum tempus vitare, necessario requiritur, quod vel ligetur, vel extinguitur fomes peccati: At ex vi auxiliorum, quæ communi lege gratiæ annexuntur, nec ligatur, nec extinguitur fomes: Ergo ex vi illorum non potest homo justus omnia venialia collective usque ad mortem, vel per aliquod longum tempus vitare. Minor est certa: tum quia in sola Beata Virgine, ob dignitatem matris, somnis ligatio, aut extinctio agnoscitur a Theologis: tum etiam quia in omnibus justis manet rebellio appetitus ad agonem, ut docet Tridentinum. Major vero suadetur: Nisi extinguitur, vel saltem ligetur fomes peccati, ex corrupto appetitu, & ulcere concupiscentiæ insurgunt frequentes motus rationi non conformes circa sensibilia: At inter tot conflictus non potest homo se immunem a peccato servare; nam quando uni resistere nititur, alter insurgit, nec potest ratio esse in continua vigilia: Ergo non nisi extincto, aut ligato somite, potest homo justus diu a peccato veniali abstineri.

Ex hoc probata manet secunda pars conclusionis. cum enim in B. Virgine vel non fuerit fomes, vel fuerit ligatus, aut totaliter extinctus, secundum diversas sententias, in ea quoque non fuit impotentia illa moralis vivandi omnia venialia collective, quæ oritur ex somite, sed habuit speciale privilegium nunquam peccandi venialiter, ut docet Tridentinum loco supra citato, afferens semper ita sensisse Ecclesiam.

Quod vero talis prærogativa non sit in alios sanctos quantumlibet insignes dilatanda, constat ex eo quod exceptio firmat re-

gulam in contrarium : At Tridentinum ab hac regula generali, *Nullus est justus, qui non venialiter peccet*, solum excipit Beatisimam Virginem : Ergo ceteros, quantumvis justos, & sanctos, sub tali regula comprehendit. Unde Augustinus de natura, & gratia cap. 36. Hac ergo Virgine excepta, si omnes illos sanctos, & sanctas, cum hic viverent, congregare possemus, & interrogare, utrum essent sine peccato, quid fuisse responsuros putamus ? Nonne una vox clamassent ; Si dixerimus, quia peccatum non habemus, ipsi nos seducimus, & veritas in nobis non est ?

Probabiliter tamen, ac pie a multis creditur, aliquos sanctos habuisse privilegium vitandi omnia venialia, in aliqua certa, & determinata materia, ut S. Joannem Baptistam peccata venialia, quæ locutione committuntur, quia illa specialiter repugnant officio Prædicatoris, & Præcursoris ; unde Ecclesia canit, ipsum antra deserti teneris sub annis patuisse, ne levi crimine vitam macularet : B. Josephum peccata venialia, quæ sunt contra virtutem castitatis, quia hoc decebat sponsum purissimæ Virginis . Refert etiam D. Gregorius 2. Dialog. cap. 2. S. Benedictum nunquam sensisse rebellionem carnis, postquam se inter spinas volutavit. Quod pariter de Angelico nostro Doctore asseritur, ab eo tempore, quo ab Angelis castitatis cingulo fuit præcinctus . Illicum etiam nunquam peccasse venialiter in materia superbiz, Ecclesia aperte declarat, dum in ejus officio encomia ejus celebrans canit.

*O munus Dei gratiæ,
Vincens quodvis miraculum,
Pestiferæ superbiæ
Nunquam persensit stimulum!*

Contra primam partem conclusionis ob*jici* solet difficile argumentum , quod pot*est* sic breviter proponi . Nullus peccat in eo , quod vitare non potest , ut ait Augustinus lib. 3. de libero arbit. cap. 18. At si homo in statu naturæ lapsæ indigeret speciali auxilio , seu privilegio ad vitanda omnia venalia , ea non posset vitare ; cum Deus non sit paratus tale auxilium , seu privilegium omnibus dare : Ergo non posset ei ad culpam imputari , quod omnia peccata venalia non vitaret . Nec valet , quod aliqui dicunt , hoc ei posse ad culpam imputari ex eo quod impotentia ea vitandi est ipsi voluntaria , saltem in capite , ratione cul*pæ* originalis , ex qua fuit relictæ . Non valet , inquam , quia licet voluntarium in capite ad culpam originalem sufficiat , non tamen ad actualem , ut constat in motibus primo primis concupiscentiæ , in infidelitate negativa , & ignorantia invincibili , quæ non sunt peccata , nec imputantur ad culpam , etsi a peccato originali proveniant , subindeque in capite voluntaria sint . Hac ergo solutione prætermissa ,

Huic difficulti objectioni respondeo , ut peccata venalia homini in statu naturæ lapsæ imputentur , non requiri , quod Deus det , aut dare paratus sit speciale illud auxilium , seu privilegium , quod necessarium est ad vitanda omnia venalia collective , sed satis esse , ut det auxilium ad vitanda omnia divisive , & seorsim , ac in particulari . Ita D. Thomas hic art. 8. in corp. ubi sic ait : *Hujus (scilicet appetitus*

tus sensitivi) motus singulos ratio reprime-re potest (& ex hoc habent rationem pecca-ti, & voluntarii) sed non omnes. Et supra q. 74. art. 3. ad 2. Non potest homo vitare o-mnes hujusmodi (nempe concupiscentiæ) mo-tus, propter corruptionem prædictam (fomi-tis) Sed hac sufficit ad rationem peccati vo-luntarii, quod possit vitare singulos. Item 3. contra Gent. cap. 160. Licet (inquit) ille, qui est in peccato , non habeat hoc in pro-pria potestate, quod omnino vitet peccatum, habet tamen potestatem nunc vitare hoc, vel illud peccatum ; unde quodcumque com-mittit, voluntarie committit , & ita non imme-rito ei imputatur ad culpam .

Dices : Homo justus non solum tenetur vitare singula venialia , sed etiam omnia collective : ergo cum nullus teneatur ad im-possible, oportet, ut omnia venialia collec-tive vitare possit, saltem cum auxilio gra-tiæ , quod Deus sit paratus conferre .

Respondeo non dari præceptum respiciens omnia venialia collective : etsi enim in Scri-ptura præcipiatur in communi, ut non pecce-mus, hoc tamen præcipitur ratione singulo-rum peccatorum, quæ tenemur vitare ; quia peccata semper se offerunt vitanda divisive, & seorsim, non vero simil , & collective .

Instabis : Homo habet naturalem nec-es-sitatem existendi in aliquo loco indetermi-nate, cum libertate existendi in hoc , vel in illo determinate , & tamen non potest ob-ligari ad non existendum in aliquo loco, & si de facto prohiberetur illi alicubi existere, non peccaret alicubi existendo , propter il-lam necessitatem : Ergo pariter si homo in statu naturæ lapsæ habeat necessitatem in-cidendi in aliquod peccatum veniale inde-termi.

terminate, et si quodlibet in particulari vitare possit, obligari non poterit ad non peccandum venialiter.

Respondeo, concesso Antecedenti, negando consequentiam, & paritatem: duplex enim inter illud exemplum, & id, de quo agimus, reperitur discriminem. Primum est, quod ex natura rei necessarium est hominem existere in aliquo loco; hoc enim provenit ex natura corporis, quod nequit esse extra omnem locum: at vero necessitas incidenti in aliquod veniale non oritur ex natura rei, nec ex parte ipsorum peccatorum; illa enim sunt secundum se nata vitiari, sed ex infirmitate naturae per peccatum originale corruptae: esset autem durum hominem obligare ad aliquid secundum se, & ex natura rei impossibile, sive illi prohibere, quod necessario, & ex natura ei debet evenire, secus vero id, quod secundum se non est impossibile. Secundum discriminem est, quod in exemplo adducto illud commune, quod necessitat, semper est conjunctum cum exercitio circa aliquod singulare determinatum: quilibet enim in actu exercito in aliquo determinato loco existit, sive duplex est ibi necessitas, una circa commune, & altera circa continuum exercitium alicujus particularis. At vero in nostro casu est una tantum necessitas ad peccandum ut sic, sed non ad existendum continuo in exercitio alicujus peccati; & ita datur perfecta libertas circa singula peccata venalia, cum tamen in exemplo adducto non sit omnino perfecta libertas circa singularia.

C A P U T VIII.

*De necessitate gratiae ad se præparandum
ad illam.*

Relicto Pelagianorum, & Semipelagianorum errore, quo afferebant primam gratiam auxiliantem, primamque Dei vocacionem dari intuitu boni operis facti sine gratia, & ex solis naturæ viribus, tanquam propter meritum de condigno, vel saltem de congruo, sunt aliqui Doctores Catholici, existimantes dari ex viribus naturæ causam dispositivam, non tamen meritoriam primi auxilii supernaturalis. Ita Scotus, Durandus, Gabriel, Richardus, & Javellus. Alii vero docent, licet opera bona ordinis naturalis non sint ratione sui dispositiones ad primam gratiam auxiliantem, ex lege tamen Dei, & pacto inito cum Christo de non neganda gratia facienti, quod in se est, ex viribus naturæ, habere connexionem infallibilem cum illa. Ita Molina in concordia disp. 10. quem sequuntur plures ex Recentioribus.

§. I.

Utraque sententia rejicitur.

Dico primo, hominem ex viribus naturæ non posse se disponere, etiam remote, ad primum auxilium gratiæ. Ita D. Thomas hic art. 6. ad 2. ubi explicat hoc axioma, *facienti, quod in se est, Deus non denegat gratiam, de faciente, quod in se est, ut est motus au-*

auxilio divino. Et infra q. 112. ar. 3. in corp. docet, quod præparatio hominis ad gratiam consequendam, si consideretur secundum quod est a libero arbitrio, nullam necessitatem habet ad gratiæ consecutionem, sed secundum quod est a Deo movente. Item 3. contra Gent. cap. 149. loquens de auxilio divino movente nostrum liberum arbitrium, sic concludit: *Homo igitur non movet seipsum ad hoc, quod adipiscatur divinum auxilium, quod supra ipsum est, sed potius ad hoc adipisciendum a Deo movetur.* Motio autem moventis præcedit motum mobilis, ratione, & causa. Non igitur propter hoc datur nobis auxilium, quia nos ad illud per bona opera promovemur, sed potius nos ideo per bona opera proficimus, quia divino auxilio prevenimur. Demum quodlib. 1. art. 7. hanc de opposita sententia fert censuram: *Ad Pelagianorum errorem pertinet dicere, quod homo possit se ad gratiam præparare absque auxilio divinae gratiæ.*

Eadem veritas triplici ratione demonstrari potest. Prima, quam habet S. Doctor hic ar. 6. potest sic breviter proponi: Finis, & principium alicujus effectus debent quoad ordinem proportionari: At finis omnis dispositionis ad gratiam est Deus, non ut author naturæ, sed ut author gratiæ: Ergo principium illius debet esse Deus ut author gratiæ, & non ut author naturæ, & consequenter a libero arbitrio procedere, ut divina gratia adjuto. Major constat, nam ut communiter dicitur, idem est ordo finium, & agentium. Minor vero sic ostenditur: Omnis effectus, cuius finis proximus est supernaturalis, habet pro fine ultimo Deum ut authorem supernaturalis: Sed omnis dispositio ad gratiam haber

bet pro fine proximo aliquid supernaturale, scilicet gratiam ipsam, ad quam disponit: Ergo respicit pro fine ultimo Deum ut authorem supernaturalem.

Secunda sumitur ex loco citato summæ contra Gentes, ubi sic discurrit: *Nullum agens particulare potest universaliter prævenire actionem primi, & universalis agentis, eo quod omnis actio particularis agentis originem habet ab universalis agente; sicut in ipsis inferioribus omnis motus prævenitur a motu cœlesti: Sed anima humana ordinatur sub Deo, sicut particulare agens sub universalis: Impossibile est ergo esse aliquem motum in ipsa, quem non præveniat actio divina.*

Tertia ratio sic potest formari: Dispositio ad aliquam formam eam petit, & cum ea connectitur: At nihil naturale potest exigere formam supernaturalem, qualis est gratia, nec cum ea connecti, cum de ratione entis supernaturalis sit excedere totius naturæ exigentiam, ut de se patet: Ergo actus ordinis naturalis ad gratiam disponere nequeunt.

Addi possunt plura absurdia, & inconvenientia, quæ sequuntur ex adversa sententia. In primis enim si homo ex operibus naturæ viribus habitis ad primam gratiam auxiliantem se disposeret, ab alio non sic operante in ordine ad spiritualem salutem se discerneret, discretione non habita ex gratia, sed ex natura, contra illud Apostoli 1. ad Corinth. 4. *Quis enim te discernit?*

Secundo justificationis exordium non a præveniente Christi gratia, sed a libero sumetur arbitrio, quod est contra Tridentinum fess. 6. cap. 5. Sequela patet, nam illi actus ex viribus naturæ eliciti, ad primam gratiam

auxiliantem disponentes, ad justificationem dispositive concurrerent, eamque aliquo modo inchoarent, sicut inchoat generationem ignis, qui primam dispositionem ad illam inducere incipit.

Tertio, si homo ex viribus naturæ possit ad primam gratiam, & vocationem se disponere, poterit etiam illam, saltem de congruo, promereri, quod est in Semipelagianorum errorem incidere. Sequela probatur, cum omnis dispositio ex se, & ex sua natura dicat ordinem, & habitudinem ad formam, ad quam disponit, & sit magna ratio eam inducendi in subiectum, quandam rationem debiti secum affert; unde si aliunde talis dispositio sit moralis, & consistens in actibus liberi arbitrii, vix potest ab illa aliqua ratio meriti separari. Quare S. Prosper contra Collatorem cap. 6. illum redarguit, eo quod assereret dari in natura quædam initia fidei, & bonæ voluntatis, & tamen negaret gratiam secundum merita nostra dari. *Velis nolis (inquit) convinceris gratiam Dei secundum merita nostra dari, cum aliquid in ipsis hominibus præcedere affiras, propter quod gratiam consequantur.* Nec enim ullius meriti haberi potest potentis fides, quærentis pietas, pulsantis instantia. Simili ratione utitur S. Augustinus lib. 2. contra duas epist. Pelagian. cap. 8. ubi sic discurrit: *Si sine gratia Dei per nos incipit cupiditas boni, ipsum cœptum erit meritum, cui tanquam ex debito gratiæ veniat adjutorium; ac sic gratia Dei non gratis donabitur, sed secundum meritum nostrum dabitur.*

Demum si homo per opera naturalia ad primam vocationem, primumque gratiæ auxilium se disposeret, gratia non esset præveniens,

niens, sed præventa a natura, & a libero arbitrio, nec ductrix illius, sed pedissequa; omnis enim dispositio prævenit formam, ad quam disponit, eamque prioritate temporis, vel saltem naturæ antecedit. Quia etiam ratione usus est S. Prosper libro citato cap. 39. *Uis verbis: Quoniam si secundum ipsos (scilicet Semipelagianos) auferatur liberum arbitrium , cum a gratia prævenitur , auferetur etiam gratia , cum a liberi prævenitur arbitrio.*

Dico secundo, nullam esse legem statutam, ut homini facienti, quod in se est ex facultate naturæ, Deus infallibiliter conferat auxilia gratiæ.

Probatur primo ex Concilio Arausicanus II. can. 6. ubi damnatur, qui dixerit, *sine gratia Dei credentibus, volentibus, desiderantibus, & pulsantibus nobis misericordiam conferri:* conferretur autem, si esset talis lex statuta: Ergo illa admittenda non est.

Dices, Concilium in illo canone solum proscribere errorem Semipelagianorum, qui ponebant aliquale meritum, & moralem causalitatem in operibus naturæ, respectu primæ gratiæ, & vocationis supernaturalis; non autem damnare illos, qui licet adjungant gratiam facienti, quod in se est, ex facultate naturæ, & viribus liberi arbitrii, omne tamen meritum, & causalitatem moralē a naturæ operibus excludunt, respectu divinæ gratiæ.

Sed contra primo: Concilium damnat eos, qui asserunt, *credentibus, volentibus, desiderantibus, & pulsantibus misericordiam conferri:* Ergo damnat etiam eos, qui asserunt auxilia gratiæ dari ex misericordia, & non ex iustitia, vel debito, facientibus, quod in se

se est, ex facultate naturæ, & consequenter eos, qui operibus naturalibus gratiam infallibiliter annectunt, etiam absque merito, & causalitate morali.

Contra secundo: Sicut S. Prosper supra relatus, ex doctrina Semipelagianorum, afferentium homini desideranti; pulsanti, & facienti, quod in se est, ex facultate naturæ, infallibiliter conferri gratiam, inferebat sequi, illam secundum merita nostra dari; nec enim (inquit ille) nullius meriti esse potest patientis fides, querentis pietas, pulsantis instantia: Ita pariter nobis contra Molinam argumentari licet, & afferere ex ejus doctrina sequi, gratiam ex meritis, & non gratuito, nec ex misericordia, sed ex justitia a Deo conferri. Etenim quidquid datur ex lege, & pacto homini operanti, datur ex justitia saltem imperfecta: nam lex, & conventio fundant rationem justitiae, ut patet ex illa Parabola Christi Matth. 20. in qua operarii convenerunt cum domino de denario; ibi enim Dominus dixit uni ex illis: Nonne ex denario convenisti mecum? tolle, quod tuum est, & vade. Idem constat ex illo Apostoli ad Roman. 4. Et autem, qui operatur, merces non imputatur secundum gratiam, sed secundum debitum: Ergo si auxilia gratiæ prævenientis dantur a Deo ex lege, vel pacto, aut conventione facientibus totum, quod possunt ex facultate naturæ, dantur illis ex justitia, & secundum debitum, non vero secundum gratiam, & misericordiam.

Dices, tale debitum, & obligationem esse solum in ordine ad Christum, qui tale pactum cum Patre æterno iniit, non autem in ordine ad hominem bene utentem naturali facultate liberæ

liberi arbitri , subindeque illi gratiæ prævenientis auxilia , ex misericordia , non ex iustitia , & secundum gratiam , non secundum debitum dari .

Sed contra : Si aliquis Rex , ad instantiam Principis , vel filii , conderet legem , per quam promitteret se daturum aliquam civitatem cuicunque ex militibus sui exercitus illam primo ingredienti , certe qui prius ingrederetur talem civitatem , eam facheret sibi debitam ex iustitia , fundata in lege illa statuta ad instantiam Principis , vel filii Regis , & supposita tali lege , opus illud haberet aliquam proportionem cum valore illius civitatis ; quia lex illa dedit ei talem proportionem , quamvis secundum se , & illa seclusa , eam non haberet . Ita similiter , si Pater æternus , ad instantiam , & petitio nem Christi , condidit legem , qua statuit facientibus , quod in se est ex facultate naturæ , & viribus liberi arbitrii , dare gratiæ prævenientis auxilia , illa erunt aliquo modo debita ex iustitia homini facienti , quod in se est ex viribus naturæ ; quia supposita tali lege , opera naturalia , quamvis aliunde im proportionata , & inferioris ordinis , habebunt aliquod jus in auxilia gratiæ .

Probatur secundo conclusio ex Augustino de spiritu , & litt. capit. 28. ubi sic habet : *Sicut non impediunt a vita eterna justum quilibet peccata venialia , sine quibus haec vita non dicitur : sic ad salutem eternam nihil profundit impio aliqua bona opera , sine quibus difficultissima vita cuiuslibet hominis pessimi invenitur : At si daretur lex infallibilis dandi auxilia gratiæ ad salutem conducentia cuilibet bene operanti ex facultate naturæ , & elicienti opera honesta honestate naturali , talia opera pro dessent*

deſſent impio ad ſalutem æternam, ut deſe patet: Ergo falſo, & contra Auguſti-
num aſtruitur talis lex.

Probatur tertio: Repugnat Christum au-
thorem gratiæ meruiſſe fieri aliquam le-
gem a Patre æterno, qua totus ordo gra-
tiæ deſtruatur, ſeu qua efficiatur, quod
gratia non ſit gratia, & quod non præve-
niat liberum arbitrium, ſed eo prævenia-
tur: At utrumque ſequitur, ſi ex lege, &
pacto Dei bene operanti ex viribus, & fa-
culty naturæ infallibiliter confeſſantur au-
xilia gratiæ: gratia enim dabitur ex me-
ritis, ut ſupra oſtenſum eſt, ſubindeque
non erit gratia, ſed merces; illaque non
præveniet liberum arbitrium, ſed potius
ab eo prævenietur; nec erit duætrix illius,
ſed pediſſequa, ut præcedenti concluſione
dicebamus: Ergo lex illa fictitia eſt, & a
Molina excogitata.

Demum ſuaderi potest concluſio hoc diſ-
curſu: Lex illa, cum pendeat ex libera volun-
tate Dei, non potest nobis innotescere, niſi
vel ex Scriptura, vel ex Conciliis, vel ex SS.
Patribus: Sed illa nullum habet fundamentum
in Conciliis, aut SS. Patribus, imo potius op-
poſitum ex illis colligitur, ut ſupra oſten-
dimus de Concilio Arauſicano, & dñe S. Augu-
ſtino; teſtimonia vero Scripturæ, quibus Mo-
lina legem illam firmare, aut probare conatur,
illam non iñſinuant: Ergo talis lex abſq; omni
prorsus fundamento aſtruitur. Minor pro ultima
parte probatur: Duo ſunt præcipua Scri-
pture teſtimonia, quæ Molina profert ad pro-
bandum dari talem legem, nempe illud Joan.
1. Dedit illis potestatem filios Dei fieri. Et i-
ſtud 1. ad Timoth. 2. Deus vult, omnes homines
ſalvos fieri: Sed ex hiſ teſtimoniis non recte
Tom. IV.

colligitur dari in Deo legem illam : Ergo illa nullum habet in Scriptura fundamen-
tum. Probo minorem, & in primis quod ex
primo talis lex non colligatur, constat ex
Augustino lib. 1. contra duas epist. Pelagian.
c. 3. ubi sic ait: *Datur ergo potestas, ut filii
Dei fiant, qui credunt in eum, cum hoc ipsum
datur, ut credant in eum, quæ potestas nisi
detur a Deo, nulla esse potest ex libero arbitrio.* Id ipsum docet lib. de bono persever.
c. 8. his verbis: *Non itaque in homine, sed in
Dei est potestate, ut habeant homines potesta-
tem filios Dei fieri; ab ipso quippe accipiunt
eam, qui dat cordi humano cogitationes pias,
per quas habeat fidem, quæ operetur per di-
lectionem.* Unde recte observat Cajetanus in
c. 1. Joannis, quod Evangelista non dixit,
dedit eis potestatem, ut se facerent filios
Dei, sed dedit eis potestatem filios Dei fie-
ri. *Sicut enim (inquit) in naturalibus ele-
mentis est potestas, non ut se moveant sur-
sum, aut deorsum, sed ut moveatur terra deor-
sum, & ignis sursum: ita Christifidelibus da-
ta est potestas non efficiendi seipso filios Dei*
(*actio enim hæc omnem creatam facultatum
excedit*) *sed ut fierent filii Dei: potestas au-
tem hæc donum gratiæ est, &c.* Addo, quod
D. Joannes explicans, quibus hæc potestas con-
feratur, addit: *His, qui credunt in nomine
eius: Ergo ante fidei illustrationem hujus-
modi potestas non datur; & consequenter ex
illo testimonio non recte infertur, facien-
tem quod in se est per vires liberi arbitrii,
habere in sua potestate filium Dei fieri, per
infallibilem divinæ gratiæ assistentiam.*

Quod etiam ex secundo testimonio id mi-
nime colligatur, in hunc modum ostendi-
tur: Lex ista in sententia Molinae fundatur
in

in meritis Christi: At voluntas antecedens salvandi omnes homines, in prædicto testimonio contenta, merita Christi antecedit, & Christum prævisum, cum juxta communiorum sententiam, ex voluntate salvandi homines decretum de Christo Redemptore mittendo præcesserit, ut in tractatu de Incarnatione ostendemus: Ergo talis lex non deducitur ex illis verbis Apostoli, *Deus vult omnes homines salvos fieri*, sed illa tantum indicat sincerum affectum, quo Deus sua bonitate auxilia suæ gratiæ omnibus hominibus offert; cum quo tamen stat, ut ea interdum deneget in pœnam alicuius præcedentis peccati, ut in tract. de prædestinatione, & reprobatione cap. ultimo ostensum fuit.

§. II.

Solvuntur objectiones.

Obijices primo contra primam conclusionem: Prima gratia auxilians supernaturalis indiget ex parte subjecti aliqua dispositione: Sed talis dispositio non potest esse supernaturalis; alioquin alia dispositio ne supernaturali indigeret, & sic daretur processus in infinitum: Ergo debet esse naturalis; & per consequens homo potest ex facultate naturæ ad primum gratiæ auxilium se disponere. Minor patet, major vero ostenditur ex D. Thoma I. p. quæst. 12. artic. 3. ubi sic ait. *Omne, quod elevatur ad aliquid excedens naturam, aportet, ut disponatur aliqua dispositione*: At prima gratia auxilians excedit naturam hominis: Ergo ut elevetur ad illam, dispositio aliqua debet præcedere.

Respondeo negando majorem, & ad illius probationem dico, veram esse D. Thomæ doctrinam, quando id, ad quod elevatur subiectum, se habet ut terminus generationis, & forma in suo ordine completa; secus autem quando id, ad quod elevatur, est via ad terminum: unde quia gratia auxilians non se habet ut terminus, sed ut via ad terminum, hinc est, quod ad illam dispositio prævia non requiritur; bene tamen ad gratiam habitualem, quia habet rationem naturæ terminantis generationem in ordine supernaturali. Sicut in naturalibus indispensabiliter requiruntur dispositiones ad formas substantiales, eo quod per se primo intendantur, & sint terminus ultimus generationis naturalis, non vero ad formas偶然ales, quæ ordinantur ad substantiales. Solutio est D. Thomæ hic quæst. 109. artic. 6. ad 3. & infra quæst. 112. artic. 2. in corp.

Objicies secundo. Actus pure naturales impenetratorie ad gratiam conducere possunt; Ergo & dispositive. Consequentia patet ex paritate rationis. Antecedens vero probatur ex D. Thoma 2. 2. quæst. 83. artic. 16. in corp. ubi docet Deum exaudire orationem peccatoris, ex bono naturæ desiderio procedentem; non quidem ex justitia, quia peccator hoc non meretur, sed ex pura misericordia: Ergo ex D. Thoma oratio naturalis habet vim impenetrandi apud Deum. Unde ibidem in resp. ad 2. sic ait: *Quamvis ejus oratio (scilicet peccatoris) non sit meritoria, potest tamen esse impenetrativa; quia meritum innititur justicie, sed impenetratio innititur gratiae.*

Respondeo negando Antecedens: nam ut docet idem S. Doctor ibidem quæst. 82. artic.

artic. 15. ad 1. *Oratio, quæ impetrat gratiam gratum facientem, procedit ex aliqua gratia.* Et in resp. ad 3. ait: *Oratio innititur principaliter fidei, non quantum ad efficaciam merendi, sed quantum ad efficaciam impetrandi:* Ergo ex mente D. Thomæ, ut oratio sit impetratoria, debet ex gratia procedere. Unde quando dicit Deum exaudire orationem peccatoris, ex bono naturæ desiderio procedentem, loquitur de desiderio naturæ, non nudæ, sed elevatæ per gratiam auxiliantem, & in fide fundato.

Objicies tertio cum Molina contra secundam conclusionem: D. Thomasquæst. 14. de verit. artic. 11. ad 1. sic ait: *Si quis in sylvis enutritus ductum rationis naturalis sequatur in appetitu boni, & fuga mali, certissime tenendum est, quod ei Deus vel per inspirationem revelaret ea, quæ ad credendum sunt necessaria, vel aliquem fidei prædicatorem ad eum dirigeret, sicut misit Petrum ad Cornelium:* Ergo ex mente D. Thomæ divinæ gratiæ assistentia infallibilis est homini facienti, quod potest ex viribus propriis.

Respondeo, D. Thomam ibi loqui de homine faciente, quod in se est, non ex viribus naturæ nudæ, sed in vi auxilii gratiæ. Quod constat, tum quia loquitur de homine non ponente obicem gratiæ, per totius legis naturæ observantiam, ad quam in statu naturæ lapsæ non sufficere vires naturæ, sed requiri auxilium gratiæ, docet expresse idem S. Doctor hic ar. 4. Tum etiam, quia assert exemplum Cornelii: hunc autem non ex sola facultate naturæ fecisse, quod in se erat, sed speciali auxilio prævenientis gratiæ, ipsem docet 2. 2. quæst. 10. ar. 4. ad 3, cuius verba infra referemus. Addo, quod idem Doctor Ange-

licus, quotiescumque explicat hoc axioma, facienti, quod in se est, Deus non denegat gratiam, ait illud esse intelligendum de faciente quod in se est, non ex viribus naturæ, sed ex auxilio gratiæ, ut constatum ex testimonio initio hujus capituli ad ductis, tum ex 2. ad Annibaldum distinct.

28. art. 4. ad 3. ubi sic habet: *Ad tertium dicendum, quod potestas nostra nihil operari potest sine Deo, qui operatur in omni natura, & voluntate; unde cum dicimus aliquid esse in nobis, non excludimus Dei auxilium.* Et ad Rom. 10. lect. 3. *Hoc ipsum (inquit) quod aliqui faciunt, quod in se est, convertendo se ad Deum, ex Deo est movente corda ipsorum in bonum.*

Dices: Homo ille in sylvis nutritus, de quo loquitur S. Thomas, supponitur destitutus omni auxilio gratiæ, cum supponatur destitutus illustratione fidei, quæ est primum auxilium supernaturale sufficiens: Ergo loquitur de homine faciente, quod in se est, ex viribus naturæ nudæ, non vero in vi auxilii gratiæ.

Respondeo negando Antecedens, nam et si talis homo non haberet fidem explicitam de Deo ut authore supernaturali, haberet tamen de illo fidem implicitam, ac proinde non esset omni auxilio supernaturali destitutus. Ratio est, quia in statu elevationis naturæ humanæ ad ordinem supernaturalem, impossibile est, quod de facto ponatur conversio in Deum ut authorem naturalem, sine conversione ad Deum ut authorem supernaturalem; unde cum ille homo ductum rationis naturalis sequens in appetitu boni, & fuga mali, esset in Deum ut authorem naturæ conversus, esset

set etiam , implicite saltem , conversus in illum ut authorem supernaturalem , ac proinde haberet fidem de illo , saltem implicitam ; & Deus in tali casu aliquem fidei prædicatorem ad eum dirigeret , ut ei explicite proponeret mysterium Trinitatis , & Incarnationis , aliaque ad salutem necessaria , sicut misit Petrum ad Cornelium , & Paulum ad Macedones . Solutio est D. Thomæ 2. 2. q. 10. ar. 4. ad 3. ubi loquens de Cornelio ait : „ Ille infidelis non erat , „ alioquin ejus operatio accepta non fuisset „ Deo , cui sine fide nullus placere potest ; „ habebat autem fidem implicitam in „ Deum , manifestata Evangelii veritate ; „ unde ut eum in fide plenius instrueret , „ missus est ad eum Petrus .

Objicit insuper Molina aliud D. Thomæ testimonium , desumptum ex libro 3. contra Gent. c. 159. ubi sic ait : „ Cum hoc sit in potestate liberi arbitrii impedire „ divinæ gratiæ receptionem , vel non im- „ pedire , non immerito in culpam impu- „ tatur ei , qui impedimentum præstat „ gratiæ receptioni : Deus enim , quantum „ in se est , paratus est omnibus gratiam „ dare ; sed illi soli gratia privantur , qui „ in seipsis gratiæ impedimentum præ- „ stant , sicut sole mundum illuminante , „ in culpam imputatur ei , qui oculos „ claudit , si ex hoc aliquod malum sequa- „ tur : licet videre non possit , nisi lumi- „ ne solis præveniatur . „ Ex quibus ver- bis infert Molina , quod si soli illi divina gratia privantur , qui impedimentum culpe gratiæ receptioni apponunt , illi , qui facit quantum potest per vires naturæ , divinæ gra- tiæ assistentia infallibilis est , cum sic faciens

vitet impedimentum, nempe peccatum.

Verum hoc testimonium non favet Molinæ, quia D. Thomas ibi loquitur de libero arbitrio, prout erat in homine integro, non vero prout est in homine lapso, ut ibidem notat Ferrariensis, & constat ex capite immediate sequenti, ubi sic habet: *Quod dictum est in potestate liberi arbitrii esse, ne impedimentum gratiae praestet, competit his, quibus naturalis potestas integra fuerit.* Porro hoc non est intelligendum de homine integro integritate pure naturali (in hac enim non fuit de facto creatus, nec si in illa conderetur, ei offerretur gratia supernaturalis, cum hæc oblatione elevationem hominis ad ordinem supernaturalis supponat) sed de homine integro integritate justitiae originalis, quæ partem inferiorem superiori subjiciebat, & hanc Deo, nedum ut authori naturæ, sed etiam ut authori gratiæ. Ita Ferrariensis ibidem, ubi sic habet: *Per naturalem potentiam intelligit S. Thomas liberi arbitrii potentiam, quæ etiam voluntas dicitur, nullo peccato, nullaque inordinatione vitiatam, sicut erat in primo parente, antequam peccaret.*

Ex his intelliges, nec etiam dispositione negativa posse quempiam ex propriis virtibus se ad gratiam disponere. Nam tunc potest aliquis se negative disponere, quando potest ex propriis omne impedimentum formæ excludere: At homo ex propriis virtibus non potest vitare omne peccatum mortale, per quod ponitur sufficiens impedimentum ad gratiam: Ergo nec potest se negative ad primam gratiam auxiliantem disponere. Unde D. Thomas ad Hebræos 12. lect. 3. ait: *Hoc ipsum, quod aliquis non ponit obstatulum gratiae, est ex gratia Dei.*

C A.

C A P U T I X.

*De necessitate gratiae ad perseverantiam
finalem.*

PErseverantia potest sumi dupliciter: Primo pro continuatione in gratia longo tempore, abstrahendo ab hoc, quod continuetur usque ad mortem. Secundo pro perseverantia in gratia usque ad finem vitæ inclusive, seu pro coniunctione gratiæ cum morte, quæ *perseverantia finalis* appellatur. De perseverantia primo modo sumpta egimus supra cap. 6. ubi ostendimus, hominem justum, ut diu abstineat a peccatis mortaliis, & in bonis operibus perseveret, præter gratiam habitualem, indigere auxilio speciali. Unde superest nobis hic agendum de perseverantia finali, quæ sola (ut ait Augustinus) informat meritum, remunerat currentem, coronat pugnantem, & ad portum conducit navigantem. Hæc sola (addit Bernardus) æternitatis quandam speciem præ se ferre: sola est, cui æternitas redditur, vel quæ æternitati hominem reddit. In hujus rei symbolum olim Deo offerebantur non tantum primitiæ, sed etiam decimæ; quia ab ipso non tantum est inchoatio bonorum operum per primitias significata, sed etiam perseverantia in eis, designata per decimas. In ejusdem rei typum (inquit Gregorius Magnus lib. 1. moral. cap. 21.) Joseph, qui inter fratres justus perseverasse dicitur usq; in finem, solus talarem tunicam habuisse perhibetur; nam quid est talaris tunica, nisi actio consummata? Quasi protensa tunica talum corporis operit, cum bona actio ante Dei ocu-

Ios nos usque ad vitæ terminum regit. Hinc est, quod per Moysem caput, & caudam hostiæ offerre præcipimus, ut videlicet omne bonum, quod incipimus, etiam perseveranti animo compleamus. Hinc concludit Bernardus, & prudenter nos admonet, ut constanter in bono perseveremus: *Tene (inquit) quod tenes, hostiæque caudam junge capiti, & tunicam Dei gratia jam polylitam cura facere & talarèm; quoniam cœpisse nihil prodiderit, si, quod absit, perseverare non contigerit.*

§. I.

Perseverantia finalis est donum Dei speciale a gratia habituali, & communibus auxiliis distinctum, & consistens in coniunctione gratiæ cum morte, ex efficaci glorificationis intentione imperata.

Prima pars hujus assertionis colligitur ex Tridentino sess. 6. can. 6. ubi perseverantiam finalem magnum Dei donum appellat, post Augustinum de bono persever. cap. 2. ubi pariter ait, *ipsam perseverantiam magnum Dei esse donum, quo cætera ejus dona conservantur.* Quibus verbis hujus doni magnitudinem declarant, illudque proinde a gratia habituali, & communibus auxiliis esse distinctum aperte significant.

Eadem veritas dupli ratione fundamentali probari potest. Prima est: Gratia habitualis datur pluribus, cum auxiliis communibus ei annexis, ad bene operandum, & persistendum in bono, etiam per longum tempus; qui tamen finaliter non perseverant, ut experientia satis constat: Ergo perseverantia finalis est do-

donum speciale, a gratia habituali, & auxiliis ordinariis eam concomitantibus distinctum.

Nec valet, si dicas cum Molina, & aliis Recentioribus, dari omnibus gratiam, & auxilia sufficientia, quibus possint usque ad mortem perseverare, sed quosdam bene iis uti, & quosdam male, & ideo illos perseverare non vero istos, ac proinde actu perseverare non esse donum a gratia, & auxiliis ex parte Dei distinctum. Non valet, inquam: Primo, quia hæc responsio aperte repugnat doctrinæ Augustini lib. de corrept., & gratia cap. 12. ubi sic ait: „ Tantum quippe Spiritu „ Sancto accenditur voluntas eorum, (scilicet „ Sanctorum) ut ideo possint, quia sic volunt, „ ideo sic volunt, quia Deus operatur, ut ve- „ lint. Nam si in tanta infirmitate vitæ hujus „ ipsis relinqueretur voluntas, ut in adjutorio „ Dei, sine quo perseverare non possent, ma- „ nerent, si vellent, nec Deus in eis operare- „ tar, ut vellent; inter tot, & tantas tentatio- „ nes infirmitate sua voluntas ipsa succumbe- „ ret, & ideo perseverare non possent, quia de- „ ficientes infirmitate nec vellent, aut non ita „ vellent infirmitate voluntatis, ut possent. „ Subventum est igitur infirmitati voluntatis „ humanæ, ut divina gratia indeclinabiliter, & „ insuperabiliter ageretur; & ideo quamvis in- „ firma, non tamen deficeret, neque adver- „ sitate aliqua vinceretur, „ . Quibus verbis S. Pater aperte docet, ad actu perseverandum in bono, supposito etiam auxilio sufficienti, sine quo non potest aliquis perseverare, adhuc requiri aliud auxilium efficax, quo infallibiliter flectatur voluntas, & perseverantia ipsa de facto donetur, & quo Sancti, & ele- „ li non nisi perseverantes sint. Quam do-

Etrinam ita ægre ferebant Massilienses, ut dicerent ex ea homines in quandam desperationem adduci, ut testatur Hilarius Arelatensis in epistola ad Augustinum, his verbis:

„ Moleste ferunt ita dividi gratiam, quæ vel
 „ tunc primo homini data est, vel nunc omni-
 „ bus datur, ut ille acceperit perseverantiam,
 „ non qua fieret ut perseveraret, sed sine qua
 „ per liberum arbitrium perseverare non pos-
 „ set; nunc vero Sanctis in regnum per gra-
 „ tiam prædestinatis non tale adjutorium
 „ perseverantiæ datur, sed tale, ut eis per-
 „ severantia ipsa donetur; non solum ut sine
 „ isto dono perseverantes esse non possint, ve-
 „ rum etiam ut per hoc donum non nisi per-
 „ severantes sint. His verbis Sanctitatis tuæ
 „ ita moventur, ut dicant quandam despera-
 „ tionem hominibus exhiberi.

Secundo, ex prædicta responsione, & doctriina Molinæ plura sequuntur absurdia, & inconvenientia: nam si donum perseverantiæ subjiceretur libero arbitrio, & ab eo quantum ad efficaciam, & usum deponderet, sequeretur primo, quod illi, qui perseverant, se ab aliis non perseverantibus discernerent per aliquid sibi proprium, nimicum per bonum usum liberi arbitrii determinantis, & applicantis gratiam, contra illud 1. ad Corinth. 4. *Quis enim te discernit?* Unde de sua perseverantia possent adversus alios inflari, quasi eam non accepissent a Deo, sed sibi donarent, contra id, quod ibidem subditur: *Quid habes, quod non accepisti? si autem accepisti, quid gloriaris, quasi non acceperis?* Sequeretur etiam, Deum per gratiam dare nobis solum posse perseverare, ipsum autem perseverare esse a libero arbitrio; subindeque illud, quod est minus bonum, & perfectum, tribui Deo,

& gratiæ; illud vero, quod est majus, & perfectius, nobis, & libero nostro arbitrio, quod in Pelagianis Augustinus s̄aþe reprehendit. Item sequeretur, justos non debere a Deo petere actualem perseverantiam, nec pro ea ipsi gratias agere, quia, ut ait idem August. epist. 107. *Prorsus non oramus Deum, sed orare fingimus, si nos ipsos, non illum credimus facere, quod oramus. Prorsus non agimus gratias Deo, sed agere fingimus, si unde illi gratias agimus, ipsum facere non putamus.* Hoc autem absurdissimum esse constat ex eodem S. Doctore, qui libro de bono perseverantiæ, a capite secundo usque ad sextum, ex D. Cypriano ostendit, in omni petitione orationis Dominicæ (præterquam in illa, *Dimitte nobis debita nostra*) perseverantiæ donum a Deo postulari. Demum ex eadem responsione sequeretur, prædestinationem esse incertam, & fallibilem, ut pote innixam medio fallibili, nimirum perseverantiæ dono, quod non potest esse firmum, & stabile, si ejus efficacia baculo arundineo, hoc est causæ mobili, & defectibili, nimirum voluntati humanæ, innitatur. Unde Tridentinum sess. 6. cap. 13. hujus doni infallibilitatem, & efficaciam refert, non in Dei præscientiam, explorantem futurum nostræ voluntatis consensum, sed in divinam omnipotentiam facientem, quod homo libere, & infallibiliter consentiat. Ait enim initio illius capitilis, quod est de perseverantiæ munere, tale donum *aliunde haberi non posse, nisi ab eo, qui potens est, eum, qui stat, statuere, ut perseveranter stet, & eum, qui cadit, restituere.* Similiter Augustinus de corrept., & gratia c. 8. manifeste docet, perseverantiæ donū a libero arbitrio indepen-

dens

dens esse , & tamen liberam voluntatem do-
 nare . ait enim : „ Si ad liberum arbitrium
 hominis pertinere dicis , ut perseveret in
 bono quisquam , vel non perseveret , non
 Deo donante , si perseveret , sed humana
 voluntate faciente , quid molitus es con-
 tra verba dicentis : Rogavi pro te , Petre ,
 ut non deficiat fides tua ? An audebis di-
 cere , etiam rogante Christo , ne deficeret fi-
 des Petri , defectorum fuisse , si Petrus eam
 deficere voluisset , quasi aliud Petrus ulla-
 modo vellet , quam pro illo Christus roga-
 set , ut vellet ? Nam quis ignorat , tunc fui-
 se perituram fidem Petri , si ea , quæ fide-
 lis erat , voluntas ipsa deficeret , & perma-
 nenter futuram , si eadem maneret ? Sed
 quia præparatur voluntas a Domino , ideo
 pro illo non posset esse inanis oratio . En-
 quomodo S. Doctor recurrit ad præparatio-
 nem Dei , non vero ad ejus præscientiam ,
 ut ostendat infallibilem Petri in fide perseve-
 rantiam .

Secunda ratio fundamentalis , qua prima
 pars nostræ assertionis probatur , potest sic
 formari : Effectus providentiæ specialis habens
 infallibilem connexionem cum gloria , est spe-
 cialissimum Dei donum , a gratia habituali ,
 & communibus auxiliis ipsi adjunctis distin-
 quum ; cum ea ut sic non sint effectus providen-
 tiæ specialis , sed generalis , pertinentis ad or-
 dinem supernaturalem , utpote communia
 reprobis , & prædestinatis : Sed perseverantia
 finalis est effectus specialissimus , & præcipuus
 prædestinationis , quæ est providentia specia-
 lis ordinis supernaturalis , & habet infallibile
 connexionem cum gloria ; ut enim egregie ait
 August. lib. de cognitione veræ vitæ : Ad sum-
 mum bonum justi quadam catena trahuntur ,
que

quæ de virtutibus hoc modo connectitur : in primis fides animam quasi quidam circulus complectitur , fides spe nutritur , spes dilectione tenetur , dilectio operatione expletur , operatio ad summum bonum intentione trahitur , intentio boni perseverantia clauditur , perseverantia Deus fons omnium bonorum datur : Ergo perseverantia finalis est speciale Dei donum , a gratia habituali , & communibus auxiliis distinctum .

Quod vero tale donum consistat formaliter in conjunctione gratiæ cum morte , ex efficacij glorificationis intentione imperata , ut dicitur in secunda parte nostræ assertionis , sic ostenditur . In eo formaliter situm est donum perseverantiae , quo perseverantes a non perseverantibus distinguuntur . Atqui non distinguuntur in alio , antecedenter ad afflictionem gloriæ , quam in eo , quod talis est divinæ providentiae dispositio circa ipsos , ut debeant mori in gratia , cum alii interdum plus habent gratiæ , & donorum Dei in hac vita : Ergo donum perseverantiae finalis consistit formaliter in speciali Dei dispositione , qua gratia cum morte conjungitur , ex efficacij glorificationis intentione imperata .

Ex hoc intelliges primo , donum perseverantiae finalis esse distinctum ab eo , quod requiritur ad diu perseverandum in bono ; illud enim est effectus proprius prædestinationis , & solis prædestinatis conceditur ; istud vero non est effectus prædestinationis , sed providentiae generalis ordinis supernaturalis , & datur etiam reprobis . Unde Arausicanum can . 10 . videtur ea distinguere , cum ait : Sanctis implorandum esse auxilium Dei , ut ad finem bonum pervenire , vel in bono possint opere perdurare .

Intelliges secundo , donum perseverantiae fina-

finalis differre a dono confirmationis in gratia: illud enim est commune omnibus prædestinatis, istud specialissimum, quod Deus non nisi B. Virgini, Apostolis, & aliis paucissimis concessit; illud non tollit, nec ligat potentiam peccandi, sed solum facit, quod homo non peccet mortaliter usque ad finem vitæ, & infallibiliter moriatur in gratia, quamvis absolute peccare possit: Istud vero dat non posse peccare mortaliter, aut venialiter juxta modum, quo datur; quidam enim ita confirmantur in gratia, ut nec mortaliter, nec venialiter peccare possint, sicut B. Virtus; alii vero licet possint peccare venialiter, non tamen mortaliter, ut Apostoli.

Intelliges tertio, admittendum esse donum perseverantiæ, non solum pro his, qui longo tempore ante mortem in gratia perseverant, sed etiam pro illis, qui post acceptam gratiam cito moriuntur, imo & pro parvulis baptizatis, ante usum rationis decedentibus. Nam quod adultus post acceptam gratiam statim occidatur, vel puer fonte baptismatis regeneratus, antequam ad usum rationis perveniat, moriatur, specialis Dei gratia est, quia est effectus specialis providentiæ Dei, disponentis eorum mortem pro tempore, quo sunt in gratia, & non sinentis eos diutius vivere, ne expositi gravibus temptationibus, & subditi veritabilitati arbitrii, eam amittant, antequam moriantur, juxta illud Sapient. 4. *Raptus est, ne malitia mutaret intellectum ejus:* Ergo ad perseverandum in gratia usque ad mortem, etiam per breve tempus, requiritur speciale Dei donum, & beneficium, saltem extrinsecum, seu specialis Divinæ providentiæ dispositio, qua gratia cum morte conjungatur. Unde Augustinus de bono persev. cap.

17. Videte quam a veritate sit alienum, negare donum Dei esse perseverantiam usque in finem hujus vitæ, cum vitæ huic, quando voluerit, ipse det finem; quem si dat ante imminentem lapsum, facit hominem perseverare usque in finem. Sed mirabilior, & fidelibus evidentior largitas bonitatis Dei est, quod etiam parvulis, quibus obedientia non est illius ætatis, ut detur, datur hæc gratia. Quibus verbis aperte docet, dari parvulis baptizatis ante usum rationis decedentibus donum, perseverantiae finalis.

§. II.

Solvuntur objectiones.

Obijicies primo contra primam partem conclusionis; Ad finiendam vitam in gratia sufficiunt gratia ipsa, cum auxiliis eam de lege ordinaria consequentibus, & causæ naturales mortem inferentes: Ergo frustra fingitur aliud speciale donum. Consequentia patet, Antecedens probatur. Gratia cum hujusmodi auxiliis est sufficiens ad omnia peccata vitanda per aliquod tempus, intra quod causæ naturales, v. g. morbus, intemperies aeris, & similia, possunt inferre mortem: Ergo ad finiendam vitam in gratia sufficiunt ista.

Respondeo, illa oīnia assignata sufficere quidem ad conjungendam mortem cum gratia, tanquam causas per accidens, non vero ut causas per se; quia causa per se est, quæ ex vi propriæ causalitatis respicit effectum, cuius dicitur causa per se; illa autem, quæ in objectione assignantur, non ordinantur, ex vi propriæ causalitatis, ad conjungendam

mor-

mortem cum gratia; unde cum non sit dicendum, hunc effectum esse casualem, & fortuitum, necesse est ponere aliud donum distinctum, quo ita disponantur, & præparentur omnes causæ, ut tunc mors a causis naturalibus, aut violentis inferatur, quando homo existit in gratia.

Objicies secundo: Homo habens gratiam habet jus ad gloriam, quæ in gratia, ut fructus in semine, virtualiter continetur, juxta illud Apostoli: *Gratia Dei vita æterna:* Ergo continuatio gratiæ cum gloria ex debito, & non ex speciali gratia contingit; subindeque perseverantia faciens conjunctionem gratiæ cum gloria non est speciale donum, seu specialis providentia, homini habenti gratiam indebita.

Sed nego consequentiam. licet enim justus habeat jus ad gloriam, quandiu est in gratia, non tamen habet jus, ut usque ad mortem in gratia conservetur, seu ut mors cum gratia conjugatur; cum pro hoc statu ratione liberi arbitrii ad bonum, & ad malum vertibilis sit: Unde quod quis a Deo protegatur, ut non amittat gratiam, cum adeat mors, est maximum, & specialissimum donum, & præcipuus prædestinationis effectus; sicut e contra quod aliquis permittatur mori in peccato, seu peccatum cum morte conjungi, est ultimus reprobationis effectus, de quo Christus dicebat Joan. 8 *Ego vado, & queretis me, & in peccato vestro moriemini.*

Objicies tertio contra secundam partem assertionis: Perseverantia finalis est donum, ac beneficium speciale, & indebitum: Sed conjunctione gratiæ cum morte non est donum, seu beneficium Dei speciale: Ergo in tali coniunctione

ſione donum perseverantiae finalis non conſtit formaliter. Major patet, Minor probatur. Ad conjunctionem gratiæ cum morte ſolum requiritur, quod infundatur, aut conſervetur gratia, & quod mors tunc eveniat: At mortis eventus naturalis eſt; & gratiæ infuſio, aut conſervatio eſt beneficium generale ordinis ſupernaturalis, ad universalem illius ordinis providentiam ſpectans: Ergo utriusque coniunctio non eſt donum, ſeu beneficium Dei ſpeciale ordinis ſupernaturalis.

Respondeo, confeſſa Majori, negando minorem, & ad illius probationem dico, quod licet gratiæ infuſio, aut conſervatio, ſecundum ſe conſiderata, fit beneficium generale ordinis ſupernaturalis; ejus tamen infuſio, vel conſervatio, ex intentione quod cum morte coniungatur, ſpeciale donum, ac beneficium eſt; quia huic coniunctioni gloria infallibiliter annexa eſt, & ex illius intentione efficaci procedit. Similiter, licet mors, conſiderata ſecundum ſe, & ſecundum rationem omnibus hominibus communem, non fit donum Dei, ſed potius pœna peccati; prout tamen eſt conditio quædam requiſita ad habendum ſtatutum immobilem in gratia, & ad gloriam obtinendam, datur ex ſpeciali Dei providentia, & eſt ſpeciale ejus beneficium, ſicut & ipſa beatitudo, ad quam perducit. Unde Au-gustinus 13. de civit. *Tantum Deus gratiæ fidei p̄fertit, ut mors, quam conſtat vitæ eſſe contrariam, instrumentum fieret, per quod transiretur ad vitam.*

Ad complementum hujus celebris queſtio-nis, queſres, an in Angelis, & primis parentibus in ſtatu innocentie, neceſſarium fuerit ſpeciale Dei donum, ſeu auxiliū ad perseverandum?

Reſpon-

Respondeo affirmative. Augustinus enim 12. de civit. cap. 9. expresse docet, Angelos bonos, qui in dilectione Dei perseverarunt, accepisse a Deo majus aliquod auxilium, quam mali, qui ceciderunt. ait enim: *Istis mala voluntate cadentibus, illi amplius adjuti ad eam beatitudinis plenitudinem, unde se nunquam casuros certissimi fierent, pervenerunt.* Neque potest majus illud adjutorium, bonis Angelis concessum, de certa scientia, quæ Angeli beati norunt se nunquam lapsuros, interpretari, ut contendit Jansenius. Nam ut recte ait Estius in 2. dist. 41. §. 13. *Si hoc adjutorium, quo beati Angeli dicuntur amplius adjuti, esset ipsa beatitudo, sensus redderetur ineptus, scilicet Angelis collatam fuisse beatitudinem, qua ad beatitudinem pervenirent.*

Possent etiam in ejusdem veritatis confirmationem plures adduci rationes, sed quia de hoc egimus in tractatu de voluntate Dei cap. 4. §. 7. ista, quam insinuat D. Thomas 3. contra Gent. cap. 155. in praesenti sufficiet: Omne, quod est de se variabile, ad hoc utfigatur in uno, indiget auxilio alicujus agentis immobilis: Sed liberum arbitrium in Angelis, & in primis parentibus erat mobile, avertibile de bono in malum, ut infelix eventus satis ostendit: Ergo ut firmarentur in bono, & in eo infallibiliter perseverarent, speciali Dei auxilio indigebant. Unde Augustinus concione 2. in Psalmum 32. loquens de bonis Angelis, sub nomine, & figura celorum, sic ait: *Nec ipsi firmitatem sibi propriam praefliterunt, verbo Domini cœli firmati sunt, spiritu oris ejus omnis virtus eorum.* Idem docet Gregorius Magnus lib. 25. moral. cap. 8. ubi de Angelis ait, *Aliis cadentibus, alios a Deo*

*Deo fuisse solidatos, utique similiter casueros,
nisi solidati fuissent.*

Dices primo: Augustinus de corrept. & gratia cap. 11. & 12. expresse docet, quod Adam per liberum arbitrium perseverare poterat, & quod ut vellet perseverare, Deus in ejus reliquerat arbitrio: Sed illud non dicitur relictum arbitrio, vel fieri per liberum arbitrium, quod sit tantum ex gratia speciali, sive ad quod requiritur speciale auxilium: Ergo in doctrina Augustini Adam in statu innocentiae non indigebat auxilio speciali ad perseverandum; quod, servata proportione, etiam de Angelis dicendum est.

Respondeo, quod quando D. Augustinus affirmat, Adamum per liberum arbitrium potuisse in bono perseverare, solum intendit declarare facilitatem, quam habebat perseverandi in bono, ratione doni integritatis, perfecte subjicientis partem inferiorem superiori, & superiorem Deo, ac prohibentis omnem rebellionem, seu motum inordinatum concupiscentiae. Unde ibidem cap. 11. sic ait: *Ille non opus habebat adjutorio, quod implorant sancti, cum dicunt, Video aliam legem in membris meis, repugnantem legi mentis meae, &c. quoniam in eis caro concupiscit adversus spiritum, & spiritus adversus carnem, atque in tali certamine laborantes, ac periclitantes, dari sibi pugnandi, vincendique virtutem per Christi gratiam poscunt. Ille vero nulla rixa a seipso adversus seipsum tentatus, in illo beatitudinis loco sua secum pace fruebatur.* Unde D. Thomas prædictum Augustini testimonium, quod est præcipuum Jansenianæ doctrinæ fundamentum, sibi objiciens 2. 2. q. 13 z. a. 4. sic respondet: *Ad secundum dicendum, quod*

Augustinus dicit in libro de corrept. & gratia:
Primo homini datum est, non ut perseveraret,
sed ut perseverare posset per liberum arbitrium;
quia nulla corruptio tunc erat, quæ perseveran-
di difficultatem præberet. Ex quibus patet,
 quod Augustinus prædicto loco solum inten-
 dit excludere a statu innocentiae necessitatem
 specialis auxilii sanantis infirmitatem naturæ
 (quale in nobis requiritur ad perseveran-
 dum) non tamen specialis auxilii fagentis , ac
 firmantis liberi arbitrii vertibilitatem .

Dices secundo : Donum perseverantiae e-
 rat debitum connaturaliter homini in statu
 integritatis , & innocentiae : Ergo non erat
 speciale Dei donum , seu beneficium . Con-
 sequentia liquet , Antecedens probatur . O-
 mni formæ in suo subjecto non impeditæ
 debetur concursus ad id , quod ex natura
 sua exigit : Sed gratia habitualis in homi-
 ne integro est forma ex natura sua exigens
 perseverantiam , & firmitatem , nullum
 que quantum ad hoc patiens impedimen-
 tum , sicut patitur in homine lapso , ob
 rebellionem concupiscentiae : Ergo ei debi-
 tum erat , titulo connaturalitatis , auxilium
 ad perseverandum .

Respondeo negando Antecedens , & ad il-
 lius probationem , data Majori , nego Minor-
 rem ; licet enim gratia habitualis in homine
 integro non pateretur , sicut in homine lapso ,
 impedimentum quoad sui conservationem ,
 ex parte rebellionis concupiscentiae prove-
 niens ; erat tamen obnoxia impedimentoo
 consistenti in liberi arbitrii mobilitate , &
 vertibilitate , ut constat ex supra dictis .

Ex dictis hactenus de necessitate gratia
 ad bene operandum , & perseverandum in
 bono , intelliges , neminem , quantumvis ju-
 stum ,

stum, & sanctum, debere in propriis liberī arbitrii viribus confidere, sed in sola spe gratiæ cælestis inniti. Unde sacrilega est hæc Gentilis Philosophi vox: *Det vires Deus, det opes, animum æquum mibi ipse parabo*; sicut est ista Pelagii in epistola ad Demetriadem: *Spirituales divitias nullus tibi preter te conferre poterit. In his ergo iure laudanda es, in his merito cæteris præferrenda es, quæ nisi ex te, & in te esse non possunt*. Unde Pelagiani non immerito aratoribus Ægypti comparantur; nam ut ait Seneca, *Nemo aratorum in terra Ægypti cœlum respicit*: quia non a cœlo, syderumque influxu, nec ab imbris, sed a sola Nili inundatione agrorum fæcunditatem expectant; totaque illorum spes e suo flumine, veluti numine pendula, solo, non cœlo, cœno, non Deo, innititur, juxta illud Poetæ:

*Terra suis contenta bonis, non indiga mercis,
Aut Jovis, in solo tota est fiducia Nilo.*

Non dissimiliter etiam Pelagiani, Semipelagiani, & quicumque vel naturæ, vel Philosophie, vel propriæ industrie, aut liberi arbitrii viribus, non divinæ munificentia, aut gratiæ efficacitati bonum virtutis, & opus salutis tribuunt, dici possunt in cœlum nunquam oculos attollere, unde nobis venit auxilium; sed cœnosæ naturæ adhærentes, in ea, veluti aratores Ægypti, totam fiduciam ponere. Quare de illis dicitur Isaiae 30. *Væ filii desertores, habentes fiduciam in umbra Ægypti, sperantes auxilium in fortitudine Pharaonis. Ægyptus homo, & non Deus, caro, & non spiritus, & Dominus inclinabit manum suam, & corruet auxilium, & cadet, cui præstatur auxilium, simulque omnes consumentur.*

C A-

C A P U T X.

De divisione gratiæ.

Gratia primo dividi potest in increatam, & æternam, & creatam, ac temporalem. Prima est æterna Dei dilectio, qua gratis dilexit nos in ordine ad gratiam, & gloriam, ut docet D. Thomas hic q. 110. ar. 1. his verbis: *Quandoque gratia Dei dicitur ipsa æterna Dei dilectio, secundum quod etiam dicitur gratia prædestinationis, in quantum Deus gratuitè, & non ex meritis aliquos prædestinavit. Dicitur enim ad Ephes. 1. Prædestinavit nos in adoptionem filiorum, in laudem glorie gratiæ suæ.* Altera comprehendit ea dona, quæ nobis a Deo ad obtinendum hujusmodi finem in tempore conferuntur. De prima egimus in tractatu de prædestinatione, in quo ostendimus, electionem prædestinatorum esse mere gratuitam, & a prævisione meritorum independentem, ideoque nomine fortis in Scriptura designari; unde superest nobis hic tractandum de altera, quæ in internam, & externam dividi solet. Interna ea est, quæ interius nobis unitur, & quæ in anima hominis, vel in ejus potentiis recipitur. Externa vero illa dicitur, quæ ipsum intrinsece non afficit, sed extrinsece tantum: unde ad primum genus pertinent gratia sanctificans, virtutes morales per se infusæ, dona Spiritus Sancti, & motiones gratiæ auxiliantis, in intellectu, aut voluntate receptæ; ad secundum vero reducuntur omnes causæ, media, & obiecta externa, per quæ mens nostra excita-
tur ad res divinas cognoscendas, vel aman-
das;

das; qualia sunt prædicatio verbi Dei, exempla Christi, & Sanctorum, lectio sacrarum scripturarum, miracula, & alia hujusmodi, quæ describit S. Prosper 2. de vocat. Gentium c. 26. his verbis: *Gratia quidem Dei in omnibus justificationibus principaliter præeminet, suadendo exhortationibus, movendo exemplis, terrendo periculis, incitando miraculis, &c.*

Gratia interna dividitur in gratis datam, & gratum facientem. Prior per se non conduct ad sanctificationem, & salutem ejus, cui datur; per eam tamen unus saluti alterius cooperatur. Posterior ad salutem recipientis per se refertur; nec solummodo gratis datur, quod unicuique gratiæ commune est, sed etiam personam Deo acceptam efficit, & amicam.

Rursus gratia gratis data subdividitur in novem species, quas recenset Apostolus 1. Corinth. 12. his verbis: *Divisiones gratiarum sunt; alii per spiritum datur sermo sapientiæ, alii sermo scientiæ secundum eundem spiritum, alteri fides in eodem spiritu, alii prophetia, alii gratia sanitatum, alii operatio virtutum, alii discretio spirituum, alii genera linguarum, alii interpretatio sermonum.*

Hujus divisionis sufficientiam demonstrat D. Thomas hic qu. 111. art. 4. & 1. ad Corinth. 12. lect. 2. hoc egregio, & mirabili cursu: *Gratiæ gratis datæ dantur ad hoc, ut homo ad alterius salutem, & conversionem cooperetur, non quidem interiori movendo (hoc enim solius Dei est) sed solum exteriorius docendo, vel persuadendo. Ad hoc autem tria sunt necessaria: primum, ut homo, qui alium docere debet, habeat plenitudinem*

cognitionis divinorum; secundum, ut possit probare, & confirmare ea, quæ docet; tertium, ut quæ docere debet, possit convenienter proferre his, quos instruit. Ad hoc ut quis habeat plenitudinem cognitionis divinorum, tria requiruntur; primum est cognitio eorum, quæ in divina scientia tanquam principia supponuntur; secundum est cognitio principalium conclusionum; tertium est cognitio effectuum divinorum, ex quibus oportet interdum manifestari causas; & ideo tres gratiæ gratis datæ sunt necessariae ad plenitudinem notitiæ de divinis: scilicet fides, per quam prima principia creduntur; sapientia, per quam cognoscuntur principales conclusiones; & scientia, per quam divini effectus sciuntur. Ad hoc vero ut homo confirmare possit quæ docet de divinis, requiruntur duo: Unum est, ut faciat, quæ solus Deus facere potest; & hæc sunt opera miraculosa, quæ duplia sunt; aut enim sunt ad salutem corporum ordinata, aut ad solam divinæ potentiae manifestationem, sicut quod sol stet, aut tenebrescat, & his similia; & ideo ad hoc ut qui divina docet, ea confirmare possit, ponuntur duæ aliæ gratiæ gratis datæ, quæ sunt gratia sanitatum, & operatio virtutum: Alterum est, ut possit manifestare ea, quæ solius Dei est scire; & hæc sunt duo, scilicet futura contingentia, & occulta cordium, & propterea ponuntur duæ aliæ gratiæ gratis datæ; ad cognoscenda enim futura contingentia, ponitur prophetia; ad cognoscenda vero occulta cordium, ponitur discretio spirituum. Denique ad hoc, ut ille, qui divina docere debet, possit convenienter illa auditoribus proponere, necessaria est facultas pronun-

nuntiandi; quæ attenditur vel quantum ad idioma, vel quantum ad sensum eorum, quæ sunt proferenda: unde propter hoc ponuntur duæ aliæ gratiæ gratis datæ; nam propter primum ponitur gratia linguarum, & propter secundum ponitur interpretatio sermonum. Constat ergo novem tantum gratias gratis datas admittendas esse: nam ad plenitudinem scientiæ dantur tantum tres; nimirum fides propter principia; sapientia, propter principales conclusiones; scientia, propter effectus; ad hoc vero ut possit confirmare, quatuor tantum necesse sunt, scilicet gratia sanitatum, propter corporalem salutem; operatio virtutum, propter divinæ potentiae ostensionem; prophetia, propter futura contingentia; discretio spirituum, propter cognitionem secretorum cordis; denique ut possit docenda proponere, requiruntur tantum duæ, nempe genera linguarum, propter idiomas; & interpretatio sermonum, propter sensum sententiarum.

Ex illis vero gratiis gratis datis aliquæ sunt in sanctis permanenter, & per modum habitus, unde iis utuntur ad arbitrium, & quando volunt; ut fides, sapientia, & scientia; aliæ vero se habent in illis per modum motionis, seu impressionis actualis, quibus ad arbitrium uti non possunt, sed solum quando a Deo moventur, ut prophetia, & donum miraculorum. Unde Gregorius homil. super Ezechiel. belle observat, quod Spiritus Sanctus Sapient. i. stabilis simul, ac mobilis appellatur: „Quia (*inquit*) in Sanctorum „cordibus juxta quasdam virtutes semper „permanet, juxta quasdam vero recessu- „rus venit, & venturus recedit: in fide

„ enim , & spe , atque charitate , & in bo-
 „ nis aliis , sine quibus ad cœlestem patriam
 „ non potest veniri , sicut est humilitas ,
 „ justitia , atque misericordia , perfectorum
 „ corda non deserit : in prophetiae vero
 „ virtute , doctrinæ facundia , miraculo-
 „ rum exhibitione , electis suis aliquando
 „ adest , aliquando se subtrahit.

Ab hac tamen regula excipiendus est Chri-
 stus , in quo omnes gratiæ gratis datæ fuerunt
 permanenter , & per modum habitus , ut do-
 cet D. Thomas 3. p. qu. 7. idque duplii de
 causa : Primo , quia ejus humanitas erat in-
 strumentum realiter , & hypostaticè conjun-
 ctum divinitati ; unde consentaneum fuit , ut
 quemadmodum illa conjunctio erat perma-
 nens , & nunquam dissolvenda , sic etiam
 gratiæ gratis datæ , quæ hanc unionem con-
 sequebantur , essent in eo permanenter , &
 per modum habitus . Secundo , quia Chri-
 stus erat prædictus potestate , quam vocant
 excellentiæ , ratione cuius habebat impe-
 riūm in omnes creaturas , & de illis ad
 suum arbitrium disponebat ; ideoque ad li-
 bitum suæ voluntatis poterat miracula pa-
 trare , & dæmonibus , morbis , mari , ac
 ventis imperare , ut in Evangelio legitur .

Gratia interna rursus dividitur in habitua-
 lem , & actiualem . Gratia habitualis est do-
 num Dei permanens , quo homo justificatur ,
 & sanctificatur , fitque Deo acceptus , & ami-
 cus , de qua fuse capite sequenti . Gratia actua-
 lis est auxilium transiens , hominem interius
 excitans , aut elevans ad bene operandum ,
 ut oportet , ad salutem . Porro tale auxilium
 non consistit formaliter in actibus indelib-
 eratis intellectus , aut voluntatis , ut volunt
 plures ex Recentioribus , sed in aliqua me-
 tione ,

tione, vel qualitate transeunte, a Deo potentiis animæ impressa, ut eas elevet, compleat, & constituat in actu primo sufficienti ad tales actus eliciendos; cum enim intellectus, & voluntas ex se non habeant vim sufficientem ad actus supernaturales producendos, non possunt actus indeliberatos ordinis supernaturalis elicere, nisi prius saltem natura, per aliquam motionem, vel qualitatem fluentem, & transeuntem, ad illos eliciendos eleventur, & applicentur, ut docent nostri Thomistæ in tractatu de auxiliis, & ex hoc inferunt necessitatem gratiæ physice præmoventis, & prædeterminantis. De quo videri possunt ea, quæ scripsimus in Clypeo Theologiae Thomisticæ, in Traët. de actibus humanis, disp. 6. art. 2. §. 10.

Gratia actualis subdividitur in operantem, & cooperantem, quæ divisio colligitur ex illo i. ad Corinth. 15. *Non ego, sed gratia Dei mecum.* Ubi Anselmus ait, *idem esse, ac si diceret, in bono opere laboravi, non ego, sed & ego: in eo enim, quod solo Dei dono præventus sum, non ego; in eo autem, quod donum voluntate subsecutus sum, & ego.* Utramque gratiam insinuat Arausicanum can. 9. his verbis: *Quoties bona agimus, Deus in nobis, atque nobiscum, ut operemur, operatur:* Et Augustinus de gratia, & lib. arbit. c. 17. dicens: *Cooperando Deus in nobis perficit, quod operando incipit; quia ipse, ut velimus, operatur inciens, qui volentibus cooperatur perficiens.*

Porro gratia dicitur operans, quatenus applicat voluntatem ad sanctam affectionem, vel operationem; cooperans vero, quatenus cum voluntate applicata talem affectionem, vel operationem producit. Nam ut docet S.

Thomas hic quæst. IIII. artic. 2. gratia dicitur operans respectu illius effectus, in quo mens nostra est mota, & non movens, solus autem Deus movens; cooperans vero in ordine ad illum, in quo mens nostra & movet, & movetur: Atqui respectu illius effectus, qui est applicare voluntatem ad agendum, voluntas est mota, & non movens, cum ad illum mere passive se habeat, recipiendo divinam motionem, per quam ad agendum applicatur; respectu vero alterius se habet simul ut movens, & mota, cum operationem, & consensum voluntatis solus Deus non efficiat, sed etiam ipsa voluntas: Ergo gratia actualis recte dicitur operans, quatenus applicat voluntatem ad agendum; cooperans vero, in quantum cum voluntate sic applicata eandem producit actionem, & effectum.

Gratia autem operans, & cooperans variis solent nominibus insigniri. In primis enim gratia operans dicitur præveniens, & cooperans appellatur subsequens. Operans dicitur præveniens, quia prævenit omnem nostram deliberationem, & bonum liberi arbitrii usum, seu consensum, prioritate temporis, vel naturæ, juxta illud Psalmi 58. *Misericordia ejus præveniet me.* Unde Augustinus lib. 4. contra duas epist. Pelagian. c. 6. *In omnibus, que quisque agit secundum Deum, misericordia ejus prævenit eum.* Et Bernardus de gratia, & libero arbitrio: *Sane ipsi nos prævenire nequaquam possumus; qui enim bonum neminem invenit, neminem salvat, quem non prævenit.* Gratia autem cooperans dicitur subsequens, quia applicationem ad opus sequitur productio illius. Unde Augustinus in Enchiridio c. 32. *Utrumque legitur*

zur in sacris eloquiis, & misericordia ejus præveniet me, & misericordia ejus subsequetur me. Nolentem prævenit, ut velit, volentem subsequitur, ne frustra velit. Et Fulgentius lib. I. ad Monimum c. II. Prævenit Deus donans homini bonam voluntatem, subsequitur bene volentem operando in illo boni operis facultatem. Et rursus: Prævenit impium, ut fiat justus; subsequitur justum, ne fiat impius; prævenit elatum, ut surgat; subsequitur elevatum, ne cadat.

Iterum gratia operans dicitur excitans, cooperans vero adjuvans nominatur. Excitans illa dicitur, quia peccatorem, vel justum a bono opere cessantem, tanquam sopore quodam depresso, a somno peccati, vel negligentia bonorum operum excitat, juxta illud Apocal. 3. Ecce sto ad ostium, & pulso: & istud ad Ephes. 5. Surge, qui dormis, & exurge a mortuis, & illuminabit te Christus. Hanc gratiam, seu potius hunc gratiae operantis effectum eleganter describit Augustinus in libro Confessionum, ubi Deum alloquens sic ait: *Vocasti, clamasti, rupisti surditatem meam: coruscasti, splenduisti, fugasti cæcitatem: flagrasti, & eduxi spiritum, atque jam anhelo tibi; gustavi, & esurio, ac sitio: tetigisti me, & exarsi in pacem.* Quibus verbis declarat, tria attributa tribus personis divinis appropriata maxime relucere in justificatione peccatoris: potentia enim Patris apparet in virtute, & efficacia vocationis ejus, his verbis expressa: *Vocasti, clamasti, rupisti surditatem meam: Sapientia vero Filii in splendoribus, quibus mentem ejus illustrat: unde subdit: Coruscasti, splenduisti, fugasti cæcitatem meam: Bonitas autem Spiritus Sancti in mira suavitate, qua ipsum ad se*

allicit, & pertrahit, quam verbis sequentibus declarat: *Flagasti, & eduxi spiritum, &c.* Cooperans vero, adjuvans appellatur, quia nos adjuvat ad faciendum id, ad quod excitati sumus a Deo. Hanc frequenter a Deo postulat Ecclesia, verbis illis Psalmi 69. *Deus in adjutorium meum intende, &c.* Unde „ Cassianus collat. 10. c. 5. „ Hunc versiculum in opere quolibet, seu ministerio, „ vel itinere constitutus decantare non desinas: hunc meditanti tibi somnus irrepas, „ donec incessibili ejus exercitio formatus, „ etiam per soporem eum decantare consuecas. Hic tibi ex parte facta primus occurrit, iste evigilantis cogitationes anticipet universas, iste de tuo consurgentem cubili, curvationi genuum tradat, atque deinceps ad omne opus, actusque deducat.

Circa has gratiæ operantis divisiones breviter observandum est, illas quidem propriæ convenire gratiæ actuali, posse tamen aliquo modo accommodari gratiæ habituali, ut docet D. Thomas hic qu. 111. art. 2. Gratia enim, ut supra dicebamus, dicitur operans, quando mens nostra est mota, & non movens; dicitur vero cooperans, quando mens nostra & movet, & movetur: Atqui gratia habitualis & animam sanctificat in genere causæ formalis, quem effectum sola efficit, & simul est principium operis meritorii, quod a gratia simul, & libero arbitrio producitur: Ergo gratia habitualis operans, & cooperans vera quadam ratione appellari potest. Dici etiā potest præveniens, & subsequens, ratione diversorum effectuum, quorum unus alium consequitur: v. g. quatenus dat esse supernaturale, dicitur prævenire seipsum, ut moventem ad bonam voluntatem, operationem, & perseverantiam.

De-

Denum celebris est divisio gratiae actualis in sufficientem, & efficacem. Sufficiens est illa, quæ dat posse operari, efficax vero est, quæ cum operatione, quam infallibiliter interfert, semper conjungitur. Sumitur hæc divisio ex Augustino de corrept. & gratia cap. 11. & 12. ubi distinguit duplarem gratiam: unam, quæ dat posse perseverare, quam asserit Adamo, & malis Angelis fuisse concessam: *Si enim (inquit) hoc adjutorium vel Angelo, vel homini, cum primum facti sunt, defuisset, quoniam non talis natura facta erat, ut sine divino adjutorio posset manere, non utique sua culpa cecidissent; adjutorium quippe defuisset, sine quo manere non possent:* Aliam, quæ dat actu perseverare, quæ fuit Adamo, & malis Angelis denegata, daturque sanctis in regnum Dei per gratiam ejus prædestinatis. Primum appellat *adjutorium sine quo*, alteram dicit esse *adjutorium quo*. Utriusque meminit Cyrilus in libro de adoratione, ubi sic ait:

„ Tantam benignitatem nobis exhibet universorum Salvator Deus, ut efficaci subsidio adjuvet, secundum quod scriptum est: „ Apprehendisti manum dexteram meam, & in consilio tuo deduxisti me; nam quoniam hominis natura non valde generosa est, „ neque satis idonea, ut malum effugere queat, simul quodammodo nobiscum certat Deus, & duplex concedere beneficium videtur, persuadens admonitionibus, ut subsidiū inveniamus, & fortius aliud præstans, „ quam ut malum præsens, & violentum prævalere possit. Utrumque etiam insinuare videtur S. Thomas hic qu. 112. art. 2. ad 2. his verbis: *Contingit quandoque, quod Deus movet hominem ad aliquid bonum, non tamen perfectum; & talis preparatio præcedit gratiam;*

sed quandoque statim perfecte movet ipsum ad bonum, & subito gratiam homo suscipit. Quibus verbis S. Doctor manifeste agnoscit in statu naturæ lapsæ gratiam quandam moventem, & applicantem ad actus imperfectos, & præparantem ad perfectiores, quam Thomistæ sufficientem vocant; aliam moventem, & applicantem ad actus perfectos, ac efficientem perfectam conversionem, & justificationem peccatoris, quam efficacem appellant. Ergo divisio gratiæ in sufficientem, & efficacem legitima est, & ad mentem Doctoris Angelici, nec non Augustini, & Cyrilli.

Ratio etiam suffragatur. cum enim in omni natura præsertim intellectuali tria distinguuntur, nimirum esse, posse, & operari, convenienter in ordine supernaturali triplex gratia admittenda est. Una, quæ det esse supernaturale, & divinum, & quæ sit veluti substantia illius ordinis; & hæc est gratia sanctificans, quæ nos elevat ad confortium, & participationem divinæ naturæ, ut capite sequenti ostendemus. Alia, quæ det posse, seu compleat potentiam in actu primo; & hæc est gratia sufficiens, quæ gratia possibilitatis appellatur. Alia demum, quæ det actu operari, seu quæ potentiam moveat, & applicet ad agendum, eamque cum operatione infallibiliter connectat; & hæc gratia efficax nuncupatur.

Verum aliqui Recentiores contendunt, auxilium illud, quod Thomistæ admittunt, & sufficiens vocant, nec esse, nec debere applicari sufficiens: nomine enim (inquiunt) medii, seu auxilii sufficientis apud omnes communiter intelligitur id, quod se solo sufficit, & præter quod nihil ultra requiritur ad agendum: At in sententia Thomistarum, præter au-

xilium illud, quod vocant sufficiens, aliud requiritur, per quod potentia applicetur ad agendum, & de actu primo ad secundum reducatur: Ergo tale auxilium nec est, nec potest, nisi abusive, appellari sufficiens. Sic ut (inquit quidam Recentior) quia ensis, & clypeus sunt necessaria ad pugnandum, navis ad navigandum, alimenta ad vitam conservandam, colores, & penicillus ad pingendum, nemo prudens, & sapiens dicet, hominem posse sine clypeo, & ense pugnare, navigare sine navi, conservare vitam sine alimentis, & pingere sine coloribus, & penicillo.

Respondeo primo, hac difficultate non solum premi Thomistas, sed etiam Patres Societatis, gratiae congruae defensores, ut ostendit P. Marinonus, novus, ac celebris ejusdem Societatis scriptor in Antijansenio disp. 26. sect. 3. num. 25. ubi variis argumentis gratiam congruam Suaris, Vasquis, aliorumque Theologorum Societatis convellens, istud tertio loco subjicit. Tertio, si tanta motio, & excitatio necessaria est moraliter ad conversionem, ergo qui minorem recipiunt, non habent auxilium moraliter sufficiens; atque ita quotquot non convertuntur, carent auxilio sufficienti moraliter ad conversionem, estque illis moraliter impossibile, ut convertantur. Unde hujusmodi querimonia metaphysica esset, & non moralis, & rationabilis, quod absit, Quid est quod debui ultra facere vineæ meæ, & non feci? Isaïe 5. Possent enim Judæi merito respondere: debebas nobis dare auxilium moraliter sufficiens, non autem tale, cum quo fuit moraliter impossibile converti, & quo prævenitus nemo converteretur: quomodo expectasti uvas ab iis, quibus impossibile moraliter L 6 fuit,

„ fuit, non ferre labruscas? Et infra num. 28.
 ait, sententiam, quæ docet necessitatem gratiæ congruæ ad operandum, incidere in duplex inconveniens, quod Patres Societatis objiciunt Thomistis: eamque inducere gratiam necessitantem, ac excludere sufficien-
 tem. *Quod de morali sufficientia (inquit) man-*
nifestissimum est; quia cum tali gratia sola (nempe incongrua) *est moraliter impossibile*
bene operari. Dicitur enim moraliter impossibili-
le, quod adeo difficile est, ut nemo illud faciat.
 Sicut ergo Suarez, Vasquez, & alii gratiæ congruæ defensores docent, eum, qui caret gratia congrua, habere auxilium sufficiens ad operandum, quamvis talis gratia ita ad agendum necessaria sit, ut aliquem sine illa converti, vel operari nunquam contigerit, subindeque id moraliter impossibile sit: ita Thomistæ possunt prædictum auxilium, quod admittunt, sufficiens appellare, quamvis applicatio potentiarum, quæ est a gratia efficaci, ad operandum ulterius requiratur; totumque discrimen inter illas duas sententias in eo est, quod gratia congrua est moraliter duntaxat necessaria ad conversionem, & operationem; gratia vero prædeterminans est de prærequisitis physice ad agendum; cum quo tamen stat, illum, qui caret gratia congrua, carere auxilio moraliter sufficienti, si verum est, quod prædicti Authores dicunt, eum, qui caret gratia physice præde-
 terminante, auxilio physice sufficienti carere.

Respondeo secundo directe difficultati propositæ, convenienter gratiam, quæ dat posse, tametsi non inferat actum, sufficien-
 tem appellari, idque duplicti titulo: primo,
 quia sufficienter excitat voluntatem ad agen-
 dum:

dum: secundo, quia dat illi totum complementum, & totam virtutem, seu sufficientiam, quæ requiritur ex parte actus primi, quamvis nō det applicationem, actualitatem, seu complementum se tēnens ex parte actus secundi. Quod vero hoc sufficiat ad rationem, & denominationem auxilii sufficientis, ex utroque Sancto Doctore, Augustino, & Thoma, aperte colligitur: licet enim Augustinus libro de gratia Christi, & libro de correptione, & gratia admittat auxilium actionis, seu adjutorium quo, quod docet ita necessarium esse ad operandum, & perseverandum, ut sine illo nemo unquam bene agat, nec perseveret; tamen præter illud agnoscit auxilium possibilitatis, seu adjutorium sine quo, quod sufficiens esse ibidem docet, quamvis præter illud aliud requiratur: Ergo ex Augustino de ratione auxilii sufficientis non est, quod illud se solo sufficiat, & præter illud non requiratur aliud ad agendum. Item S. Thomas 1. 2. qu. 106. ar. 2. ad 2. dicit, quod *lex nova, quantum est de se, sufficiens auxilium dat ad non peccandum*. Ubi per auxilium sufficiens intellegit gratiam habitualem, ut docent Conradus, Sylvius, & alii ejus interpres: & constat tum ex titulo articuli, ubi quærit, *utrum lex nova justificet?* tum ex scopo, in quem collimat; intendit enim probare, legem novam justificare, quia ad eam principaliter pertinet gratia habitualis, seu justificans: Atqui in doctrina D. Thomæ, ad non peccandum, seu ad observanda præcepta divina, & actus supernaturales eliciendos, præter gratiam habitualem, requiritur in justis aliqua gratia actualis, & movens, per quam gratia habitualis, & habitus supernaturales, & in-

fūsi, ab ea promanantes, applicentur ad agendum, & de actu primo ad secundum reducantur, ut constat ex quæst. 109. art. 9. ubi idem S. Doctor sic ait: *Homo in gratia existens non indiget auxilio gratiæ, quasi aliquo ulio habitu infuso; indiget tamen auxilio secundum alium modum, ut scilicet a Deo moveatur ad recte agendum:* Ergo juxta D. Thomam non requiritur ad denominationem auxilii sufficientis, quod se solo ita sufficiat ad operandum, ut homo non indigeat alio auxilio movente, & applicante; sed ad hoc satis est, quod auxilium sufficiens tribuat omnia necessaria, & requisita ex parte actus primi. Ex quo patet disparitas ad exempla adducta. cum enim ensis, & clypeus sint necessaria ex parte ipsius potentiarum, & actus primi completi ad pugnandum, cibus ad vitam conservandam, navis ad navigandum, penicillus, & colores ad pingendum; non mirum, quod is, qui illis caret, non censeatur habere auxilia, & media sufficientia ad illos actus. E contra vero, cum gratia efficax, & physice prædeterminans supponat potentiam per auxilium sufficiens completam in actu primo ad agendum, & illam duntaxat reducat ad actum secundum; qui ea caret, potest dici potens in actu primo ad agendum, subindeque habere auxilium sufficiens.

Ex his intelliges, Ludovicum Montaltium, dum infamosis illis ad Provincialem Epistolis deridet Thomistas, eo quod auxilium, quod admittunt, appellant sufficiens, et si præter illud, aliud ad agendum requiratur, non solum in doctrina D. Augustini, & S. Thomæ sese peregrinum ostendere, sed etiam seipsum vicissim a Thomistis exponere de-

deridendum, juxta illud vulgare adagium : *Irrisores irridebuntur.* Et certe, cum ille in prædictis Epistolis passim profiteatur, se esse D. Augustini discipulum, & gratiæ per se efficacis acerrimum defensorem, vel debet omne auxilium sufficiens, ab efficaci distinctum, rejicere, subindeque asserere præcepta impossibilia esse justo, qui caret auxilio efficaci, quod Innocentius X. in sua nova constitutione damnavit ut hæreticum; vel ipsum fateri necesse est, justum, qui caret auxilio efficaci, & solo sufficienti instructus est, habere potentiam ad agendum sufficienter completam, subindequedici posse habere auxilium re vera sufficiens ad implenda præcepta.

Nec obest, quod apud plebejos, & grammaticos illud duntaxat appelletur sufficiens, quod se solo sufficit, & præter quod nihil ultra requiritur ad agendum; nam modus loquendi Theologorum sæpiissime diversus est a more loquendi Grammaticorum, quia, ut ait Augustinus lib. I. contra Cresconium Grammaticum: *Cum res intelligitur, minus laborandum est, quid eam hominibus vocare placuerit.* Demus ergo Montaltio Grammatico, auxilium, quod Thomistæ admittunt, & sufficiens appellant, non esse sufficiens Grammaticaliter, nobis Theologis satis est, illud esse sufficiens Theologicæ, & in sensu Augustiniano, & Thomistico, supra explicato.

Circa aliud membrum hujus divisionis, nempe gratiam efficacem, plures, & graves hic resolvendæ essent difficultates; præsertim celebris illa controversia, unde petatur efficacia gratiæ, an ex omnipotentia Dei, & supremo dominio, quod habet in nostras volūta-

tes, ut docent Thomistæ? An ex ejus præscientia futurum nostræ voluntatis consensum explorante, ut volunt Suarez, Valsquez, & alii defensores gratiæ congruæ? An solum ab eventu ex consensu, & determinatione liberi arbitrii, gratiam determinantis, & applicantis, ut Molina, & Lessius existimant? Verum ob reverentiam Sedis Apostolicæ, quæ huius controversiæ, in congregatione de auxiliis coram Clemente VIII. & Paulo V. persæpe agitatæ, resolutionem typis mandare non semel prohibuit, silentio eam prætermitto; melior enim est obedientia, quam victima; & utilius nobis est gratiæ unctionem, & efficaciam in se experiri, quam, unde illa proveniat, explorare. Facile tamen quæ hic desunt circa hanc celebrem controversiam, suppleri, aut colligi poterunt ex dictis supra de bono perseverantiæ, & ex his, quæ de efficacia divinorum decretorum scripsimus in Tractatu de voluntate Dei.

C A P U T XI.

De essentia gratiæ habitualis, seu gratum facientis.

VARIIS gratiæ divisionibus explicatis, superest, ut agamus de gratia habituali, seu gratum faciente, quæ est nobilissima species gratiæ, & gratiarum omnium fulgentissimum jubar, cuius radiis cætera fulgent charismata, qua fides nitet, spes erigitur, ipsaque caritas ignescit, ac fervet. Illa est, cuius lumine illustramur, cuius munditie a peccatorum scènibus purgamur, cuius candore dealbamur, cuius pigmentis venustamur, cuius sanctitate

Sa-

Sacerdotes Dei consecramur, cuius maiestate Reges aequamus, cuius semine filii Dei generamur, cuius virtute prorsus divina deificamur. Illa filii Dei, fratres Christi, membra corporis ejus, organa Spiritus Sancti, templa Sanctissimae Trinitatis, cives Sanctorum, domestici Dei, amici, & familiares ejus, ac novae creaturæ efficimus. Illa demum (inquit Catechismus Romanus) *divina qualitas est in anima inhærens, ac veluti splendor quidam, & lux, que animalium nostrarum maculas omnes delet, ipsasque animas pulchriores, & splendidiores reddit.* De illa porro quatuor hic investiganda, & explicanda sunt, nempe ejus essentia, perfectio, causa, & effectus.

§. I.

Gratia habitualis, seu gratum faciens, est donum aliquod homini intrinsecum, nempe aliqua qualitas supernaturalis, in anima permanens, subindeque habens rationem habitus, & non dispositionis.

Prima pars est certa de fide, ac definita in Tridentino sess. 6. can. 11. contra Lutheranos, & Calvinistas, existimantes gratiam non esse aliquid nobis infusum, sive in nobis existens, sed solum extrinsecum favorem, & benevolentiam Dei, per quam anima est ipsi grata, & ab eo dilecta. Qui error variis Scripturæ testimoniis potest refelli. Dicitur enim 2. ad Corinth. 1. *Signavit nos, & dedit nobis pignus spiritus in cordibus nostris.* 1. Joan. 3. *Omnis, qui natus est ex Deo, peccatum non facit, quoniam semen ipsius in eo*

manet. Joann. 4. *Qui biberit ex hac aqua, fiet in eo fons aquæ salientis in vitam æternam: Sed pignus commissum, sigillum impressum, semen insitum, aquæ fons e corde scaturiens, quid reale, & intrinsece inhærens aperte sonant: Ergo Scriptura his figuris, seu metaphoris manifeste declarat, gratiam gratum facientem esse donum aliquod homini intrinsecum, eique inhærens.*

Ratio etiam, quam insinuat D. Thomas hic q. 110. art. 1. id suadet: Per gratiam enim gratum facientem homo fit objectum dilectionis Dei supernaturalis, cum, ut nomen ipsum sonat, per ipsam fiat Deo gratus, & acceptus: At dum homo fit objectum dilectionis Dei supernaturalis, necessario alicujus doni supernaturalis receptione mutatur: Ergo gratia gratum faciens est aliquod donum supernaturale a Deo homini infusum, & in eo receptum. Major constat, minor vero probatur ex discrimine, quod reperitur inter amorem divinum, & humanum: amor enim humanus, cum sit impotens, & sterilis, nec sit effectivus, sed tantum affectivus, non ponit, sed supponit bonitatem in rebus; e contra amor divinus, cum sit potens, & fœcundus, nec affectivus, sed effectivus sit, causat bonitatem in objecto, quod diligit, & ut loquitur S. Thomas 1. p. q. 20. art. 2. *est infundens, & creans bonitatem in rebus.* Sicut ergo Deus diligendo creaturem in ordine naturali, communicae perfectiones naturales, quibus sunt objectum congruum hujusmodi dilectionis; ita diligendo creaturam intellectualem in ordine ad finem supernaturalem, per talem dilectionem in ea causat aliquam perfectionem, seu donum supernaturale, quo fit ob-

je-

jectum congruum talis dilectionis supernalis, & Deo grata, & accepta in ordine ad æternam beatitudinem; ideoque illud gratiam gratum facientem appellamus.

Dices primo. Prædestinatio est specialis Dei dilectio erga electos, in ordine ad finem supernaturalem; & tamen non ponit semper in eis aliquod donum supernaturale, cum interdum contingat electos esse in statu peccati, & infidelitatis, subindeque carere omnibus donis supernaturalibus: Ergo falsum est, ex amore supernaturali Dei erga homines debere in eis causari aliquod donum supernaturale.

Respondeo, prædestinationem non includere dilectionem Dei efficacem pro omni tempore (sæpe enim Deus prædestinatum existentem in peccato mortali odit secundum præsentem justitiam) sed solum pro aliquo tempore, quo statuit prædestinato gratiam conferre; unde prædestinatio gratiam confert pro tempore a Deo statuto, non vero eo tempore, quo ex decreto divino non est efficax, sed suspendit effectum.

Dices secundo. Odiun Dei nihil ponit intrinsecum in homine, quem odit: Ergo nec ejus amor in eo, quem diligit. Sed nego consequentiam, & paritatem: tum quia homo potest ex propriis habere, unde sit objectum odii Dei, scilicet peccatum, non vero unde sit objectum amoris, ejus nempe bonum. Tum etiam, quia amor est actus prosecutiois, quare si non supponat bonum in objecto, in quod tendit, debet illud ponere; odium vero est per modum fugæ, & recessus, unde non pertinet ad illud aliquid in objecto ponere, sed potius ab eo tollere.

Dices tertio. Objectum præintelligitur, &
præ-

præsupponitur ad actum : Ergo bonum , quod relucet in creaturis , & est objectum divini amoris , ad ipsum præsupponitur , non vero ab illo causatur .

Respondeo primo , objectum præsupponi ad actum , quando ille est mere speculatorius , secus vero si sit practicus , ut constat in scientia visionis , quæ , quia est eminenter speculativa , & practica , non supponit suum objectum , sed illud facit , juxta illud Gregorii Magni lib. 32. moral. cap. 6. *Non existentia videndo cerat , & existentia vidento continet :* de quo in tractatu de scientia Dei . Amor autem Dei erga creaturas est practicus , & effectivus , & infundens , ac creans bonitatem in rebus , ut ait D. Thomas supra relatus .

Respondeo secundo , quod sicut intellectio potest duobus modis considerari , scilicet ut productio verbi (sub quo conceptu appellatur dictio) & prout est pura objecti contemplatio in ipso verbo : ita amor Dei potest considerari , ut est volitio efficax , & practica sui objecti , & ut habet rationem dilectionis simplicis , sive complacentiæ . Unde sicut intellectio , ut dictio , est prior verbo , posterior vero , ut est pura contemplatio objecti in verbo : ita amor Dei , ut efficax , & practicus , est prior bonitate , quam communicat creaturis ; si vero consideretur præcise sub conceptu puræ dilectionis , sive complacentiæ , non est prior ; imo sub hac ratione potest esse posterior , non quidem quoad entitatem , sed quoad suam terminationem .

Secunda pars , quæ asserit gratiam gratum facientem esse aliquam qualitatem in anima permanentem , subindeque habere rationem habitus , & non dispositionis , probatur hoc dis-

discursu D. Thomæ hic q. 110. ar. 2. Deus non minus providet hominibus , quos diligit in ordine ad finem supernaturalem , quam creaturis , quas diligit in ordine ad bonum naturale : sic autem istis providet , ut non solum moveat eas ad actus naturales , sed etiam ipsis largiatur formas , & virtutes quasdam , seu qualitates fixas , & permanentes , quæ sunt principia actuū , ut secundum seipſas inclinentur ad hujusmodi motus ; ut patet in lapi de , cui dedit gravitatem , ut connaturaliter inclinetur ad centrum : & in igne , cui levitatem indidit , ut connaturaliter feratur ad locum sursum : Ergo multo magis debet infundere aliquas formas , sive virtutes , & qualitates supernaturales , permanentes , ac fixas , illis , quos movet ad finem supernaturalem , per quas prompte , & suaviter ab ipso moveantur ad bonum æternum consequendum ; subindeque gratia gratum faciens erit aliqua forma , seu qualitas , habens esse fixum , & permanens . Licet enim hic in statu viæ per accidens sit variabilis , & facile mobilis a subiecto , ob imperfectam ejus participationem , & quia non est in suo statu connaturali ; per se tamen , & ex natura sua petit diu in subiecto manere , & difficile ab illo avelli , quia per se habet causas firmas , & stabiles ; unde in patria , ubi erit in suo statu connaturali , erit omnino incorruptibilis , & inamissibilis , nec mensurabitur tempore , aut ęvo , sed æternitate participata , sicut & ipsa visio beatifica . Per quod occurritur instantiæ , quæ contra hanc partem nostræ assertionis fieri posset .

§. II.

Gratia sanctificans est participatio formalis naturae divinae, non solum qua natura, sed etiam qua infinita est.

Prima pars hujus assertionis colligitur ex variis Scripturæ testimoniis. nam 1. Petri 2. homines per gratiam dicuntur confortes effici divinæ naturæ. Item Scriptura sæpiissime asserit, illos generari, nasci, & renasci ex Deo per gratiam, & in ejus filios adoptari: Cum autem generatio sit naturæ communicatio, cum nativitas sit naturæ receptio, cum filius ille solus dicendus sit, qui naturam patris exprimit, & participat, procul dubio justos per gratiam divinæ naturæ participatione gaudere credendum est.

Ratio etiam id suadet. nam per naturam divinam intelligimus perfectionem illam primitivam, & fontalem, quæ in Deo, juxta nostrum modum concipiendi, est eminenti quodam modo fons, radix, & origo divinorum attributorum, & principium divinarum operationum: Atqui gratia sanctificans talem perfectionem participat, cum sit radix charitatis, & aliarum virtutum infusarum, quæ sunt participationes divinorum attributorum, & principium operationum attingentium Deum, ut est in se, tanquam objectum connaturale, & proportionatum, nimirum visionis Dei intuitivæ, & amoris beatifici: Ergo gratia sanctificans est participatio divinæ naturæ, qua natura est.

Confirmatur, & magis illustratur hæc ratio: Participare formaliter aliquid, est habere con-

convenientiam formalem cum illo, saltem analogam: ut patet in accidente, quod participat rationem entis formaliter, quia in illa habet convenientiam formalem, saltem analogam, cum substantia: Sed gratia sanctificans habet talem convenientiam cum natura divina, ut natura est; sicut enim natura Dei est eminenti quodam modo radix cognitionis, & amoris, quibus Deus seipsum, ut est in se, infinito modo cognoscit, & amat; ita gratia sanctificans est radix intelligendi, & amandi Deum, ut est in se, & prout transcendit totum ordinem creatum, & creabilem: Ergo illa est participatio formalis divinæ naturæ, ut natura est. Unde Cyrillus lib. 2. thesauri cap. 2. *Eandem operationem connaturaliter habentes cum Deo, necesse est ejusdem esse naturæ.*

Confirmatur amplius: Cum omnis inclinatio tendat in bonum proprium naturæ, in qua radicatur, nihil dat inclinationem in aliquam naturam, nisi saltem participative habeat illam: Sed a gratia sanctificante oritur charitas, quæ est inclinatio in Deum, ut est in seipso: Ergo gratia sanctificans habet in se participative naturam divinam, ut natura est.

Quod vero etiam illam participet, quantum infinita est, probatur contra Alphonsum Curielem, & Vincentium Contensonum, id negantes, & simul præcipuum illorum fundamentum convellitur. Ut gratia sanctificans dici possit participare naturam divinam, ut infinita est, non requiritur, quod totam Dei infinitatem in se capiat, sed sufficit, quod ei conveniat aliqua pars, seu aliquis modus divinæ infinitatis: At gratia sanctificans aliquam partem, seu aliquem modum infinitatis Dei in se capit: Ergo participat naturam dī-

vinam, ut infinita est. Major patet, participare enim aliquam perfectionem, non est habere illam totaliter, & complete, sed partialiter, & inadæquate; cum participare nihil aliud sit, quam partem capere, & partem relinquere, ut ex ipsis terminis constat. Minor vero suadetur: Deo, ut est ens infinitum, tria convenient: primum est habere suam essentiam pro objecto connaturali, & pro forma intelligibili, ad cuius modum alia intelligat; hoc enim ipsi competit, prout excedit totum ordinem naturæ creatæ, & creabilis, subindeque ut infinitus est, habetque totam essendi plenitudinem: secundum, ut identificet sibi tale objectum, & speciem, ac operationem, qua in illud tendit: tertium, ut illud comprehendat, & cognoscat quantum cognoscibile est: At quamvis gratia sanctificans non possit duo posteriora in se habere, & in illis cum Deo communicare, primum tamen, nempe habere essentiam divinam pro objecto connaturali, & forma intelligibili, illi convenit, & cum Deo communicat, ut patet ex dictis in tractatu de visione beatifica: Ergo gratia sanctificans aliquid de infinitate Dei, seu aliquam partem illius in se capit; subindeque naturam Dei, ut infinita est, participat.

Confirmatur: Charitas nostra est participatio formalis charitatis Dei, ut est infinita: Ergo & gratia sanctificans est participatio formalis naturæ divinæ, quatenus infinita est. Consequentia patet: non enim magis repugnat participari essentiam infinitam, quam proprietatem infinitam. Antecedens vero est D. Thomæ 2. 2. qu. 24. ar. 7. ubi probat, charitatem viæ posse augeri in infinitum, quia est participatio quadam infinitæ charitatis Dei.

Hæc

Hæc autem ratio id non probaret, si S. Doctor non intenderet, charitatem esse participationem infinitæ charitatis Dei, quatenus infinita est, sed duntaxat secundum aliquem gradum determinatum; quia aliquam qualitatem participare formam infinitam, secundum gradum determinatum, non arguit illam posse in infinitum intendi, sed potius e contra illam non posse augeri ultra illum gradum, quem participat. Sicut intellectus Angeli, & esse substantiale hominis non possunt augeri in infinitum; quia licet participant formaliter intellectum, & esse Dei, quæ infinita sunt, etiamen non participant ut infinita, sed secundum aliquem gradum determinatum.

Objicies primo contra primam partem assertionis: *Gratia sanctificans in Scriptura semen Dei appellatur, ut constat ex illo I. Joan. 3. Qui natus est ex Deo, peccatum non facit, quia semen ejus manet in eo:* At semen virtualiter tantum, & non formaliter participat naturam generantis; est enim tantum ejus instrumentum, seu virtus ab illo decisa, ad communicandam suam naturam alteri: Ergo gratia sanctificans non est formalis, sed tantum virtualis participatio divinæ naturæ.

Respondeo, gratiam sanctificantem non vocari semen Dei per ordinem ad naturam divinam, cuius est participatio, sed per respectum ad visionem beatificam, cuius est radix, & quæ in virtute gratiæ, ut arbor in virtute seminis, continetur, juxta illud Apostoli: *Gratia Dei vita æterna.* Unde D. Thom. I. p. q. 62. art. 3. *Gratia gratum faciens hoc modo comparatur ad beatitudinem, sicut ratio seminalis in natura ad effectum naturalem,* unde I. Joan. 3. *gratia semen Dei nominatur.*

Objicies secundo: Non est de ratione adoptionis, quod communicetur natura personæ, quæ adoptatur in filium: Ergo licet per gratiam sanctificantem homo filius Dei adoptivus constituatur, non sequitur, quod per illam participet formaliter naturam divinam. Consequentia manifesta est; Antecedens vero constat in adoptione, quæ fit inter homines; nam per illam adoptatus non recipit naturam ab adoptante, sed duntaxat ad ejus hæreditatem acceptatur.

Respondeo, quod licet communicatio naturæ non sit de ratione adoptionis, quæ fit inter homines, requiritur tamen ad adoptionem, per quam homo adoptatur in filium Dei. Ratio autem discriminis est, quia adoptio in humanis supponit, quod adoptatus sit ejusdem naturæ cum adoptante, habeatque in se sufficiens principium, quo sit aptus ad percipiendam ejus hæreditatem; & ideo non mirum, si per illam non communicetur natura. Adoptio autem divina, cum non supponat in homine similitudinem in natura divina, nec sufficientem capacitatem ad percipiendam hæreditatem Dei, debet illam efficere, subindeque divinæ nature participationem tribuere. De quo plura infra, cum de primo effectu gratiæ sanctificantis, nimirum adoptione hominis in filium Dei.

Objicies tertio contra secundam partem assertionis cum Patre Vincentio Contenso: Infinitas, cum sit ipsius divinitatis character, & propria veluti differentia, Deoque conveniat, prout a creaturis etiam supernaturalibus distinguitur, procul dubio imparicipabilis est a creatura: Ergo gratia sanctificans nequit esse participatio formalis naturæ divinæ, quatenus infinita est.

Con-

Confirmatur primo: Ad formalem participationem, seu imitationem, & expressionem, formalis convenientia, & veluti exscriptio saltem analoga, qua participans participati dotes delineet, desideratur: Sed gratia sanctificans non gaudet similitudine, & formalis convenientia cum natura Dei, quatenus infinita est, cum sit ens creatum, & finitum: Ergo nec participatione formalis naturæ divinæ, prout infinitæ formaliter.

Confirmatur secundo: Quod participatur ab aliquo formaliter, praedicatur de illo: v. g. quia accidens participat rationem entis analogice, potest ens praedicari de illo: Sed ratio entis infiniti, & actus puri non potest praedicari de gratia sanctificante, cum illa sit essentialiter ens creatum, finitum, & potentiale: Ergo gratia sanctificans non est formalis participatio naturæ divinæ, quatenus est infinita, & actus purus.

Antequam hæc argumenta solvantur, advertendum est, hunc Authorem pugnantia scribere, & docere: nam tomo 1. pagina 83. docet, naturam divinam, ut natura est, constitui per rationem entis a se, & per essentiam. Et tomo 5. in Tractatu de gratia pagina 466. ait, quod Deus est quidem supernaturalis, qua ens per essentiam, actus purus, infinitus, & illimitatus est; Sed hæc supernaturalitas, cum sit distinctivus Divinitatis character, quo a creaturis etiam supernaturalibus discernitur, nulla potest in creaturas ratione transfundi, & ab eis exprimi, vel exscribi. Item ibidem pagina 460. afferit cum Thomistis, gratiam sanctificantem esse formalem naturæ divinæ participationem. Quomodo hæc inter se cohærente, & conciliari possint, pla-

ne non video. Si enim natura Dei constitutatur per rationem entis per essentiam, & actus puri, & illa ratio imparicipabilis sit a creaturis, manifestum est, gratiam sanctificantem non esse, nec esse posse formallem naturae divinæ participationem: cum id, quod in Deo imparicipabile est, nullatenus participari possit a creaturis. E contra vero, si gratia sit participatio formalis naturae divinæ, & illa constituatur per rationem entis a se, & per essentiam, seu actus puri, evidens est, talem rationem non esse omnino imparicipabilem, illamque posse aliqua ratione in creaturas transfundi, & ab eis exprimi, vel exscribi. Unde

Ad objectionem propositam respondeo negando Antecedens: constat enim ex dictis in probatione secundæ partis nostræ assertionis, quod licet infinitas Dei non possit participari a creatura adæquate, & secundum omnes conceptus, & rationes, quas continet, bene tamen inadæquate, & secundum aliquam rationem, vel conceptum, nempe prout tribuit Deo habere suam essentiam pro objecto connaturali, & forma intelligibili, quod a gratia sanctificante participatur; cum illa sit radix visionis beatificæ, & unionis essentiæ divinæ in ratione speciei intelligibilis cum intellectu beatorum, lumine gloriæ perfuso.

Addo, in aliis relucere aliquam gratiæ infinitatem. Primo, quia non habet terminum sui augmenti. Secundo, quia est principium merendi de condigno & ad æqualitatem præmium infinitum objective, & satisfaciendi aliquo modo pro culpa mortali, quæ in ratione offendæ est intrinsece infinita, ut in tractatu de peccatis ostendimus.

Ter-

Tertio, quia est principium charitatis, que, ut ait D. Thomas supra relatus, est *participatio quædam infinitæ charitatis Dei*. Demum aliqualis ejus infinitas relucet in hoc, quod sicut Deus, quia ex se infinitus est, sufficit ad implendum omne cordis humani desiderium, propter quod ab Hebræis *Sadai*, id est *qui sufficit*, appellatur: ita & gratia, cum sit divinæ naturæ participatio, & veluti quoddam vinculum, quo Deus animæ intime conjungitur, potest omnia hominis desideria satiare, præsertim quando fuerit consummata in patria, per lumen gloriæ, & claram Dei visionem, quæ cuncta hominis desideria implet, & satiat, ut in tractatu de beatitudine ostensum est.

Ad primam confirmationem, concessa maiore, nego minorem; gratia enim sanctificans habet hanc similitudinem, & convenientiam analogam cum natura Dei, quatenus est infinita; quod sicut Deus, quatenus est infinitus, & excedit totum ordinem creatum, & creabilem, habet suam essentiam pro objecto connaturali, & forma intelligibili; ita & gratia sanctificans utrumque participat, ut supra ostensum est.

Ad secundam respondeo ex D. Thoma quodlib. 2. ar. 3. aliquid dupliciter ab alio participari posse: primo sicut ratio communis, & superior, quomodo animal participatur ab homine, vel ratio entis ab accidente: secundo ut existens extra ejus essentiam, sicut ignis a ferro candenti participatur, & lux solis ab aere. Quod primo modo ab alio participatur, potest de illo prædicari, sicut animal prædicatur de homine, & ens de accidente; secus vero illud, quod secundo tantum modo participatur: ignis

enim non prædicatur de ferro candenti ,
nec lux corporis illuminati potest dici esse
ipsum corpus illuminans . Unde cum gra-
tia sanctificans sit participatio tantum ac-
cidentalis naturæ divinæ , & ista non com-
paretur ad illam , sicut ratio communis ,
& superior ad inferiorem , ratio formalis.
entis infiniti , vel actus puri non debet de-
illa prædicari , sed sufficit , quod aliqua ra-
tio analogice communis naturæ divinæ , &
gratiæ sanctificanti , nempe esse radicem
intelligendi , & amandi connaturaliter
Deum , ut est in se , de gratia prædicetur.

C A P U T XII.

*Quibusdam Corollariorum magis explicatur
natura , & perfectio gratiæ san-
ctificantis .*

EX fundamentis cap. præcedenti statutis
deduci possunt quædam corollariorum
quibus natura , & perfectio gratiæ sancti-
ficipantis magis elucidabitur , & perfectius
intelligetur .

C O R O L L A R I U M I.

*Repugnat dari plures species gratiæ san-
ctificantis , physice , & essentialiter
inter se diversas .*

HOCTO corollarium manifeste sequitur ex
dictis capite præcedenti : nam gratia
sanctificans (ut ibi ostensum est) est partici-
pacio formalis naturæ divinæ , ut natura est .
Sed natura Dei , sub conceptu naturæ , cum
sit simplicissima , non potest nisi uno modo
par-

participari, nimirum per modum constituti-
vi, & radicis divinorum attributorum: Er-
go gratia sanctificans in plures species essen-
tialiter inter se diversas multiplicari nequit.

Confirmatur, & magis illustratur hæc ra-
tio: Licet infinita Dei perfectio sit parti-
cipabilis infinitis modis specie diversis,
quando non determinatur modus partici-
pationis, secus tamen quando talis modus
determinatur: v. g. licet intellectus divi-
nus absolute sit participabilis multis modis
specie diversis, & de facto participetur per
lumen gloriæ, per visionem beatam, per
fidem, per prophetiam, & per scientiam
per se infusam; ille tamen sub ea ratione,
qua essentiam divinam clare, & ut est in
se, ac intuitive respicit, non potest parti-
cipari nisi uno modo, scilicet a lumine
gloriæ, ut exerceat rationem principii co-
gnoscitivi, & a visione intuitiva, ut e-
xerceat rationem operationis, seu actualis
cognitionis, quia tunc determinatur modus
participationis. Ita pariter, licet id, quod
in Deo habet rationem essentiæ, sit mul-
tipliciter participabile a creaturis, si ta-
men illud sub conceptu, & munere natu-
ræ præcise consideretur, seu ut est eminen-
ti quodam modo radix divinorum attribu-
torum, non potest nisi uno modo partici-
pari; quia tunc modus participationis de-
terminatur, & limitatur.

Dixi, repugnare dari plures species gra-
tiæ sanctificantis, *physice*, & *essentialiter*
inter se diversas, quia possunt dari diver-
ses gratiæ, distinctæ specie morali, & ac-
cidentali: verbi gratia, gratia Christi mor-
ali specie differt a nostra, quia est prin-
cipium meriti, & satisfactionis infinitæ.

Similiter gratiæ sacramentales differunt inter se specie accidentalí , quia habent diversas virtutes, & connotant diversa auxilia , contra diversa vulnera peccatorum . De quo in tractatu de sacramentis .

Dices : Illæ formæ distinguuntur specie physica , & essentiali , a quibus dimanant proprietates specie diversæ : Sed a gratia Christi , & Adami dimanant proprietates specie diversæ ab illis, quæ a gratia nostra profluunt : nam in Christo gratia est radix iustitiæ commutativæ , & in Adamo iustitiae originalis , & doni integratatis , non vero in nobis ; item gratia in nobis viatoribus producit fidem , & spem , in comprehensoribus vero lumen gloriæ , & claram Dei visionem : Ergo illæ gratiæ specie physica , & essentiali inter se differunt .

Respondeo , quod licet formæ substantiales , a quibus dimanant proprietates specie diversæ , sint diversæ speciei , non tamen formæ accidentales , qualis est gratia sanctificans . Cum enim proprium sit formæ accidentalis perficere subjectum , in quo recipitur , juxta modum , & exigentiam illius , pro diversitate subjectorum diversos producit effectus , interdum specie diversos : verbi gratia calor , ut est in igne , producit ignem ; ut est in animali , & quatenus est instrumentum potentiae nutritivæ , producit sanguinem , & carnem ; ut est in fœmina , producit lac , &c. item influentiæ corporum cœlestium , pro diversitate subjectorum , in quibus recipiuntur , varios operantur effectus ; nam in hortis producunt flores , in vineis uvas , in olivetis olivas ; & aqua , cum unius sit speciei , vario modo operatur , dealbans in lilio , rubricans in rosa ,

rosa, purpurissans in viola, ut belle ait Chrysostomus. Ita similiter gratia, licet una, & simplex qualitas, pro diversa tamen subjectorum, in quibus recipitur, capacitate, & exigentia, multiplices, & interdum specie diversos operatur effectus. Nam in nobis causat filiationem adoptivam, sed non in Christo; quia cum Christus sit filius Dei naturalis, est incapax adoptionis: in nobis causat penitentiam, in Christo vero iustitiam commutativam: in Adamo ante lapsum fuit radix iustitiae originalis, & doni integritatis, post lapsum vero in eo causavit virtutem penitentiae: in nobis producit virtutes moderatrices passionum, sed non in Angelis, quia cum careant passionibus, non sunt capaces illarum: demum in statu viæ producit fidem, & spem, in patria vero lumen gloriae, & claram Dei visionem, nec non beatificam fruitionem,

COROLLARIUM II.

Gratia sanctificans est simpliciter perfectior charitate, lumine gloriae, visione beatifica, & quocumque alio ente supernaturali; licet visio beatifica in modo essendi illam excedat, & sit perfectior secundum quid.

Prima pars hujus corollarii patet ex supra dictis: cum enim entia supernaturaalia sint participationes Dei, prout excedit totum ordinem creatum, & creabilem, tanto aliquid debet aestimari perfectius, quanto majorem Dei perfectionem exprimit, & participat: Sed gratia sanctificans

participat id, quod majorem exprimit perfectionem Dei: Ergo est simpliciter perfectior aliis entibus ordinis supernaturalis. Major patet, Minor probatur. Gratia sanctificans, ut ostendimus, participat naturam divinam, sub conceptu, & munere naturæ; lumen vero gloriæ participat de eminentia Dei, quatenus exercet præcise munus virtutis intellectivæ: visio beata, quatenus exercet munus actualis intellectionis: charitas vero, & alii habitus infusi sunt participationes proprietatum, & attributorum divinorum. Quamvis autem omnia, quæ sunt in Deo, sint absolute æqualia in perfectione, quia unumquodque est tota essendi plenitudo; non omnia tamen, ex vi propriæ lineæ, aut ex proprio munere, æqualem exprimunt perfectionem: Sed id, quod ex vi propriæ lineæ, & sub proprio munere, majorem exprimit perfectionem in Deo, est natura, sive constitutivum, inquantum hujusmodi; utpote a quo cetera, veluti a radice eminentissima, virtualiter derivantur: Ergo gratia sanctificans participat id, quod majorem in Deo perfectionem exprimit.

Secunda pars, quæ afferit visionem beatam in modo essendi esse perfectiorem secundum quid gratia sanctificante, etiam est manifesta: nam actus secundus, seu operatio in modo essendi est nobilior habitu; quia non continet potentialitatem, quam includit habitus: Sed visio beata est actus secundus, gratia vero sanctificans est habitus, ut §. i. ostendimus: Ergo visio beatifica in modo essendi est perfectior gratia sanctificante. Similiter lumen gloriæ secundum quid, & accidentaliter est illa perfectius, quatenus nec-

sario conjungitur actuali operationi, a qua gratia habitualis separari potest.

Dices: Cum status patriæ sit simpliciter nobilior statu viæ, dona, quæ pertinent ad statum patriæ, sunt simpliciter nobiliora donis pertinentibus ad statum viæ: At lumen gloriæ, & visio beatifica pertinent ad statum patriæ, gratia vero sanctificans ad statum viæ; Ergo lumen gloriæ, & visio beatifica sunt simpliciter perfectiora gratia sanctificante.

Respondeo, quædam esse dona supernaturalia, quæ pertinent ad statum patriæ tantum, ut lumen gloriæ, visio beatifica; quædam quæ pertinent ad statum viæ tantum, ut fides, & spes; & alia, quæ pertinent ad statum viæ, & patriæ simul, sicut gratia, & charitas. Quamvis autem dona, quæ sunt patriæ tantum, sint potiora donis viæ tantum, secus tamen est de donis viæ, & patriæ simul; imo hæc præstant omnibus aliis, saltem quantum ad illud, quod est omnium aliorum prima radix, & fundamentum, scilicet gratiam sanctificantem. Unde D. Thomas infra qu. 113. art. 9. ait: *Donum gratiæ impium justificantis est majus, quam donum gloriæ beatificantis.*

Ex his intelliges, unicum gradum gratiæ majoris esse pretii, & valoris, magisque estimandum, quam bona omnia naturalia totius universi. Unde Augustinus lib. 2. ad Bonifacium cap. 6. *Gratia non solum omnia sydera, omnes cœlos, sed etiam omnes Angelos supergreditur.* Et D. Thomas infra quæst. 113. art. 9. ad 2. *Bonum gratiæ unius majus est, quam bonum naturæ totius universi.* Quæ verba aurea ponderans Cajetanus, in commentario illius articuli, hæc scribit: *Ante oculos tuos semper die, nocteque tene, quod bonum gratiæ unius*

unitus est melius, quam bonum naturę totius universi, ut continue videoas damnationem imminentem non estimanti tantum bonum oblatum.

COROLLARIUM III.

Gratia sanctificans per se ita peccatum expellit, ut repugnet utrumque in eodem subiecto sociari.

PRIMA pars manifeste colligitur ex variis Scripturæ, & Sanctorum Patrum testimentiis, quæ incompossibilitatem gratiæ cum peccato, saltem de lege ordinaria, aperte declarant. Dicitur enim 1. Joan. 3. *Omnis, qui natus est ex Deo, peccatum non facit, quia semen ipsius in eomanet, & non potest peccare, quoniam ex Deo natus est.* Quibus verbis significat, tandem hominem ne peccare actu, nec peccato ullo infici posse, quandiu semen illud divinum, quod est gratia, qua spiritualiter renascitur, manet in eo. Item gratia in Scriptura vocatur lumen, peccatum vero tenebræ, ut patet ex illo 1. Petri 2. *Detenebris nos vocavit in admirabile lumen suum,* id est de peccatis ad gratiam: Ergo sicut lux, & tenebræ simul in eodem subiecto, & eodem tempore esse nequeunt, ita nec gratia, & peccatum. Unde Apostolus 2. Corinth. 6. *Quæ participatio justitiae sum iniquitate, aut quæ societas lucis ad tenebras?* Item SS. Patres docent, peccatum esse mortem animæ, vitæque spiritualis interitum, ut videre est apud Nazianzenum orat. 19. & apud Augustinum in Psal. 9. & serm. 5. de verbis Domini, ubi sic ait:

ait: *Sicut anima est vita corporis, ita animæ vita est Deus* (unitus ipsi per gratiam, & charitatem) *Sicut expirat corpus, cum animam emittit, ita expirat anima, cum Deum amittit. Deus amissus, mors animæ; anima emissæ, mors corporis.* Sicut ergo mors, & vita simul esse nequeunt in eodem subiecto, & eodem tempore; ita nec gratia, & peccatum, saltem de lege, & potentia Dei ordinaria.

Quod vero id repugnet etiam de potentia Dei absoluta, probatur primo ex principiis in tractatu de peccatis statutis: ibi enim ostendimus ex D. Thoma, peccatum habituale consistere in privatione gratiæ habitualis, cum respectu ad actum peccati præcedentem, a quo causatur: Unde cum ea, quæ privative opponuntur, non possint simul esse in eodem subiecto, etiam de absoluta Dei potentia, (alias forma, & parentia ejus possent simul stare in eodem subiecto; subindeque idem simul esse, & non esse) repugnat peccatum habituale, & gratiam sanctificantem simul in eodem subiecto sociari. Idem cum proportione dicendum de peccato actuali, cum istud causet peccatum habituale.

Probatur secundo hac ratione: Implicat contradictionem, quod aliquis simul habeat plures ultimos fines totales, inter se non subordinatos; alias quilibet esset ultimus, & non ultimus, ut in tractatu de beatitudine cap. I. §. 3. ostensum est: Sed ille, qui gratia, & charitate præditus est, habet Deum pro ultimo fine totali; ille vero, qui peccat mortali-
ter, ultimum finem in creatura constituit, ut in tractatu de peccatis cap. 10. §. 2. probatum est: Ergo implicat contradictionem, quod aliquis in gratia, & peccato simul existat.

Pro-

Probatur tertio hoc discursu: Cum secundum Adversarios gratia natura sua peccati maculam detergat, si Deus utendo sua absolute potentia impediret, ne gratia sanctificans illam detergeret, talis effectus Deo ut authori, vel conservatori speciali tribueretur, subindeque Deus esset author specialis, vel conservator peccati, quod infinitæ ejus sanctitati repugnat: Sicut quia ignis ex natura sua expellit frigus ab aqua, si Deus miraculose, & utendo sua potentia absolute, talem expulsionem impediret, conservatio frigoris in ipsum ut authorem, vel conservatorem specialem reduceretur.

Demum eadem veritas hac ratione fundamentali suaderi potest: Effectus formales gratiæ sanctificantis, & peccati mortalis sunt incompossibles, etiam de potentia Dei absolute: Ergo & ipsæ formæ, a quibus proveniunt. Consequentia patet: cum enim effectus formales nihil aliud sint, quam ipsæ met formæ communicatæ subjecto, & significatæ in concreto, qua ratione inter se pugnant effectus formales, eadem quoque inter se pugnant formæ, a quibus proveniunt. Antecedens vero sic ostenditur: Effectus formales gratiæ sanctificantis sunt, reddere hominem divinæ naturæ consortem, subindeque illum filium Dei adoptivum constituere, facere illum objectum congruum divinæ dilectionis, & amicitiæ, illique jus tribuere ad æternam felicitatem: e contra vero effectus formales peccati mortalis, tam actualis, quam habitualis, sunt destruere in homine participationem divinæ naturæ, reddere illum Deo exosum, & inimicum, privare illum divina filiatione, & per consequens jure ad æternam beatitudinem: Sed hujusmodi effe-

effectus nequeunt ulla potentia eidem subiecto convenire simul, ut constat: Ergo nec effectus gratiæ sanctificantis, & peccati mortalis, sive actualis, sive habitualis.

Nec valet, si dicas cum Suare, effectus illos gratiæ habitualis non esse primarios, sed secundarios, subindeque ab illa per absolutam Dei potentiam separari posse; sicut risibilitas separabilis est a rationalitate, extensio localis a quantitate, & gaudium beatificum a clara Dei visione. Non valet, inquam, tum quia aliqui ex illis effectibus sunt primarii, ut reddere hominem consonrem divinæ naturæ, & filium Dei adoptivum; tum etiam, quia licet aliqui secundarii sint, omnes tamen in natura gratiæ sanctificantis sunt intime radicati, sicut proprietates radicantur in essentia, a qua diminant: Unde sicut habenti rationalitatem potest quidem de absoluta potentia deesse risibilitas actualis, non tamen inesse hinnibilitas; ita homini habenti gratiam habitualen possunt forte, de potentia extraordinaria, deesse aliqui ex effectibus recensitis, repugnat tamen, quod in eo sint effectus peccati, privative, vel contrarie illis oppositi.

Objicies primo: Peccatum mortale actuale non expellit gratiam physice, sed tantum moraliter, & demeritorie; quia scilicet facit, ut peccator mereatur a Deo puniri amissione gratiæ, ipsaque privari, ac spoliari in pœnam illius: At Deus non tenetur pœnam infligere merenti, sed pro sua indulgentia potest eam condonare: Ergo etsi peccatum subtractionem gratiæ promereatur, divinitus poterit cum gratia sanctificanti in eodem subiecto sociari.

Respondeo negando Majorem; peccatum enim

enim mortale actuale effective simul, & demeritorie, subindeque physice simul, & moraliter gratiam sanctificantem expellit ab anima. In eo etenim tria considerari possunt: nimis ratio offendæ, seu injuriæ Deo illatæ, & sub hac ratione demeritorie tantum, & moraliter gratiam expellit: aversio a Deo, & conversio ad creaturam, & hæc gratiam physice expellunt, non quidem proxime, & immediate, sed mediante conversione habituali ad creaturam ut ultimum finem, quam peccatum actuale relinquit: hæc enim expellit charitatem, subindeque gratiam, in qua radicatur. Tertio potest considerari in peccato actuali id, quod causat, & relinquit in anima, scilicet macula; & hæc proxime, & immediate expellit gratiam, sicut privatio formam. Nec est inconveniens, quod unum & idem, sub diversa ratione, physice, & moraliter, & effective, ac demeritorie aliquam formam expellat.

Dices: Esto peccatum actuale efficienter destruat gratiam, Deus tamen potest ejus causalitatem, subindeque expulsionem gratiæ ab anima impedire: Ergo efficere potest, ut in eodem subiecto gratia, & peccatum simul existant.

Respondeo negando Antecedens: Deus enim illam solam causalitatem impedire potest, quæ ab ipso dependet, & procedit: causalitas vero, per quam peccatum actuale dicitur causa peccati habitualis, nec a Deo dependet, nec procedit; quia Deus neque peccati actualis, neque habitualis, subindeque nec eorum causalitatis causa esse potest.

Objicies secundo: Unus aëtus non expellit necel-

necessario habitum oppositum , sed potest cum ipso simul existere in eodem subiecto, ut patet in actu intemperantiae , qui potest simul esse cum virtute temperantiae , vel e contra unus actus temperantiae cum vitio intemperantiae : Ergo unus actus peccati non debet necessario expellere gratiam , sed potest simul cum illa in eodem subiecto existere , & sociari .

Respondeo primo , quod si hoc argumentum valeret, probaret non solum de potentia absoluta , sed etiam de ordinaria gratiam esse posse cum uno, vel altero peccato mortali ; quandoquidem absque miraculo habitus cum actu contrario esse potest .

Respondeo secundo , habitum cum actu contrario esse posse , quando ex illorum simultate non sequuntur praedicata contradictoria ; secus vero si ex eorum coexistentia praedicata contradictoria consequantur , ut ex simultanea peccati , & gratiae existentia contingere supra demonstratum est .

Tertio dici potest , habitus quidem naturales , & acquisitos non expelli necessario per unicum actum , bene tamen habitus supernaturales , & infusos , qualis est gratia sanctificans . Habitus enim acquisiti a virtute sui subjecti pendent in fieri , & conservari ; habitus vero infusi , quoad sui productionem , & conservationem , pendent ex actione Dei illos infundentis , & conservantis ; sicut lux in suo fieri , & conservari pendet ex illuminatione solis . Unde quemadmodum lumen statim cessaret in aere , si aliquod obstaculum poneretur illuminationi solis ; ita posito uno solum peccato mortali in anima , statim deficit habitus gratiae , & charitatis ; quia per quodlibet

bet peccatum mortale ponitur obstaculum
eius infusioni, & conservationi.

COROLLARIUM IV.

*Gratia habitualis realiter distinguitur
a charitate.*

Probatur primo: Gratia sanctificans ha-
bet se in ordine supernaturali, sicut for-
ma substantialis in ordine naturali: Ergo sic-
ut hæc, ex communiori Philosophorum sen-
su, distinguitur realiter a proprietatibus, &
virtutibus activis, quarum est radix; ita &
illa a virtutibus supernaturalibus, quæ ab
ipsa effluunt, sicut proprietates ab essentia,
ut docet D. Thomas hic q. 110. art. 4. ad 1.
his verbis: *Sicut ab essentia animæ effluunt
eius potentie, quæ sunt operum principia, ita
eriam ab ipsa gratia effluunt virtutes in poten-
tias animæ.* Consequentia patet: nam de rebus
supernaturalibus, servata proportione, ac
dempta earum supernaturalitate, philoso-
phandum est sicut de naturalibus; quia gra-
tia, quantum fieri potest, attemperatur, &
accommodatur naturæ, ut passim docent
Theologi: unde sicut in ordine naturali
substantia non est immediate operativa, sed
agit mediantibus suis potentiis, quæ sunt
principium immediatum operandi, subinde-
que ab illis distinguitur; ita & gratia ha-
bitualis, quæ in ordine supernaturali gerit
vices substantiarum, seu naturæ.

Probatur secundo ratione D. Thomæ hic
q. 110. art. 3. quæ potest sic proponi: Chari-
tas presupponit in anima gratiam habitualem:

Er-

Ergo realiter ab illa distinguitur. Consequentia patet, Antecedens probatur. Charitas, cum sit virtus, disponit hominem convenienter secundum naturam præexistenter; hoc enim est de ratione virtutis, ut docet Aristoteles 7. physic. cap. 17. Sed non disponit illum convenienter ad naturam humanam, qua humana, & rationalis est præcise, hoc enim proprium est virtutum moralium, & acquisitarum: Ergo convenienter ad naturam humanam, ut elevatam ad esse divinum, & supernaturale, per gratiam habitualem, subindeque illam in anima supponit.

Aliam rationem insinuat idem S. Doctor q. 27. de verit. art. 2. his verbis: *Sicut in rebus naturalibus aliud est natura ipsa, quam inclinatio naturæ, & ejus motus, vel operatio; ita & in gratiis est aliud gratia a charitate, & a ceteris virtutibus.* Quam rationem ibidem illustrat, observando quod in quolibet ordine rerum quatuor reperiuntur, nempe substantia, seu natura rei, finis ipsius, inclinatio ad talem finem, & motus, seu tendentia in illum: v. g. in lapide est propria natura, consistens in hoc, quod sit corpus mixtum talis speciei; finis, qui non est aliis, quam quies in centro; gravitas, quæ est propensio, seu inclinatio in ipsum; & descensus, qui est motus, seu tendentia in illud. Similiter in ordine supernaturali hæc quatuor debent reperiri: unde in tali ordine gratia tenet locum substantiæ, seu naturæ, visio beatifica habet rationem finis, charitas est inclinatio in illum, & motus ejus sunt operationes elicite a charitate, vel ab illa imperata, quibus talis finis acquiritur.

Objiciens primo: In Scriptura iidem effetus

etus tribuuntur gratiæ , & charitati ; per utramque enim dicimur justificari , vivere vita divina , & supernaturali , filii Dei adoptivi fieri , &c. Ergo non distinguuntur realiter , sed sunt unus & idem habitus , qui secundum quod obit diversa munia , diversis nominibus insignitur .

Respondeo , eosdem effectus gratiæ , & charitati tribui , non quod sint unus & idem habitus , sed quia sunt inseparabiliter inter se connexæ . Sicut Apostolus 1. ad Corinth. 3. effectus benignitatis , & patientiæ , & plurium aliarum virtutum tribuit charitati , non quod sint unus , & idem habitus , sed quia inseparabiliter charitatem ipsam comitantur .

Objicies secundo : Si gratia , & charitas realiter distinguerentur , possent ab invicem separari , saltem de potentia Dei absoluta : Sed hoc dici nequit : Ergo nec illud . Minor probatur : Si aliquis homo haberet gratiam sine charitate , esset Deo gratus , & acceptus , imo & filius ejus adoptivus , & tamen non esset ejus amicus , quod videatur absurdum . Item si alicui infunderetur charitas sine gratia sanctificante , ille nec damnaretur ; cum nullum haberet peccatum , quod cum charitate incompossibile est , nec salvaretur , quia cum non esset filius Dei adoptivus , esset incapax hæreditatis ejus .

Respondeo , data Majori , negando Minorē , & ad primam illius probationem dico , quod ille , cui infunderetur gratia sine charitate , esset amicus Dei radicaliter , & remote , quia haberet gratiam , cui tanquam radici principium diligendi Deum deberetur . Ad secundam dico , casum illum esse impossibilem :

quia

quia licet Deus de absoluta potentia essentiam a suis proprietatibus separare possit , earum resultantiam impediendo , non potest tamen facere , quod aliqua proprietas existat in aliquo subjecto sine essentia , a qua dimanat , præsertim si talis proprietas sit vitalis : v. g. licet Deus possit creare animam rationalem sine intellectu , & voluntate , non potest tamen intellectum , & voluntatem sine anima rationali producere , aut conservare ; quia cum illæ potentiae sint vitales , sine principio vitali , in quo radicantur , subsistere nequeunt : Unde cum caritas sit potentia vitalis ordinis supernaturalis , non potest existere sine gratia sanctificante , quæ est prima radix vitae supernaturalis , & quæ in ordine supernaturali gerit vires naturæ , seu substantiæ .

C O R O L L A R I U M V.

Gratia habitualis subjectatur immediate in anima , non autem in potentiis ejus .

Sequitur manifeste ex supra dictis . In primis enim quod perficit potentiam per se primo ad operationem ordinatam , est immediate operativum : Sed gratia sanctificans non est immediate operativa , ut corollario præcedenti ostendimus : Ergo non residet in potentiis animæ , sed in ejus essentia .

Secundo : Dona supernaturalia , quæ sunt participationes intellectus , & voluntatis Dei , recipiuntur immediate in intellectu , & voluntate creata : Ergo illud , quod est participatio naturæ divinae , ut natura est , debet in ipsa animæ essentia immediate recipi .

Tertio, cum effectus formalis formæ nihil aliud sit, quam ipsa forma, ut communicata subiecto, in eo subiecto residet immediate forma, cui tribuit suum effectum formalem: Sed effectus formalis gratiæ sanctificantis, ut dare esse, & vitam supernaturalem, seu esse principium radicale vitæ supernaturalis, per se primo convenit animæ, & non potentiis ejus. Item esse gratum per se primo respicit non operationes, vel potentias, sed subiectum: quia enim illud est gratum, operationes sunt gratiæ, & acceptiæ, juxta illud Genes. 4. *Respexit Dominus ad Abel, & ad munera ejus: Ergo & ipsa gratia immediate inest ipsi animæ, non vero ejus potentiis.*

Demum, ut discurrit D. Thomas hic q. 110. ar. 4. *Per gratiam regeneramur in filios Dei: Sed generatio per prius terminatur ad essentiam, quam ad potentias: Ergo gratia per prius est in essentia animæ, quam in potentiis.*

Dices. Contraria debent habere idem subiectum, a quo se expellant: Sed subiectum peccati, quod contrariatur gratiæ, non est essentia animæ, sed ejus potentiae: Ergo gratia non residet in essentia animæ, sed in ejus potentiis.

Respondeo negando minorem: licet enim subiectum peccati actualis sit potentia, subiectum tamen peccati habitualis, & maculae, cui gratia opponitur, est essentia animæ, ut in tractatu de peccatis ostendimus.

C A P U T XIII.

De causa gratiae habitualis, & actione, per quam producitur.

DIco primo, nullam creaturam, quantumcumque perfectam, ne quidem Christum, inquantum hominem, esse posse causam principalem gratiae sanctificantis.

Probatur primo: Per infusionem gratiae sanctificantis datur Spiritus Sanctus, juxta illud Apostoli ad Roman. 5. *Charitas Dei diffusa est in cordibus nostris per Spiritum Sanctum, qui datus est nobis:* Sed nulla creatura, neque ipse Christus, inquantum homo, habet potestatem physicam, & principalem dandi Spiritum Sanctum: Ergo neque infundendi gratiam sanctificantem. Major patet, minor probatur. Oportet donum esse quodammodo ipsius dantis vel per identitatem, vel per originem, vel per possessionem, ut docet D. Thomas 1. p. q. 37. ar. 1. ad 1. Sed nullo istorum modorum potest Spiritus Sanctus esse Christi, inquantum hominis, multo minus alicujus puræ creaturæ: Ergo nec Christus ut homo, nec aliqua creatura potest dare principaliter Spiritum Sanctum. Unde Augustinus 15. de Trinit. cap. 20. *Quomodo Deus non est, qui dat Spiritum Sanctum?* Et D. Thomas 3. p. q. 8. art. 1. ad 1. *Dare gratiam, aut Spiritum Sanctum, convenit Christo, secundum quod est Deus authoritative, sed instrumentaliter convenit etiam ei, secundum quod est homo, inquantum scilicet ejus humanitas instrumentum fuit divinitatis ejus.*

Pre-

Probatur secundo: Per gratiam habitualem adoptamur in filios Dei, ut capite sequenti ostendemus: Atqui nulla creatura, nec etiam Christus, in quantum homo, potest principaliter nos adoptare in filios Dei: Ergo neque nobis dare gratiam sanctificantem. Minor probatur: Ille solus potest adoptare in filium, qui connaturaliter habet jus ad hæreditatem: Sed nec Christus ut homo, neque ulla pura creatura habet connaturaliter jus ad visionem beatam, quæ est hæreditas; cum visio beata nulli rei creatæ, vel creabili possit esse connaturalis, ut in tractatu de visione beata probatum est: Ergo nulla creatura, nec etiam Christus, in quantum homo, potest nos principaliter adoptare in filios Dei. Unde S. Thomas 4. contra Gent. cap. 17. *Adoptare in filios Dei non potest esse opus alterius, nisi Dei.*

Probatur tertio: Producere gratiam habitualem in anima, est illam deificare, communicando illi physicum divinæ naturæ consortium: Sed deificare est solius Dei, per modum causæ principalis; sicuti ignire per modum causæ principalis est solius ignis, vel alterius continentis eminenter naturam ignis, puta solis: Ergo solius Dei est gratiam sanctificantem per modum causæ principalis producere.

Demum eadem veritas suaderi potest hac ratione D. Thomæ hic q. 112. art. 1. Causa principalis debet esse majoris, vel saltem æqualis perfectionis cum suo effectu: Sed nulla creatura potest superare, vel adæquare in perfectione gratiam sanctificantem: cum enim illa sit participatio formalis naturæ divinæ, quatenus infinita est, ut cap. II. §. 2. o-

ffen-

stensum est , superat in perfectione essentiiali omnem naturam creatam , & creabilem : Ergo nulla potest dari creatura , que sit causa principalis gratiae sanctificantis .

Dico secundo , gratiam sanctificantem neque creari , neque concreari , sed de potentia obedientiali animæ educi .

Prima pars hujus conclusionis probatur primo ex D. Thoma hic qu. 113. art. 9. ubi querit , an sit majus opus Dei creatio mundi , quam justificatio impii ? & sub distinctione respondet , quod ex parte modi operandi est majus opus creatio , quam justificatio , cum illa sit ex nihilo , non vero ista ; sed ex magnitudine rei , quæ fit , majus opus est impii justificatio , quam cœli , & terræ creatio : Sed hæc differentia nulla esset , si gratia per creationem produceretur : Ergo juxta D. Thomam gratia sanctificans non creatur .

Probatur secundo eadem pars ratione Cajetani . Gratia , quando desinit esse , non annihilatur : Ergo neque quando producitur , creatur . Antecedens est certum : tum quia annihilationio non intervenit de facto in operibus gratiae , ut docet S. Thomas 1. p. q. 104. a. 4. tum etiam , quia gratia destruitur præcise ex vi separationis ejus a subjecto : separatio autem a subjecto non est annihilationio , cum maneat subjectum . Consequentia vero probatur : Ex communi Philosophorum sententia , incœptio , & desitio rei alicuius sibi correspondent ; ita ut quod incipit per generationem , desinat per corruptionem ; & quod desinit per corruptionem , incipiatur per generationem ; & similiter quod incipit per creationem , desinat per annihilationem , & e contra : Ergo si gratia non desinat per an-

Tom. IV.

N

ni-

nihilationem, signum manifestum est, eam non produci per creationem.

Quod vero etiam non concreetur, facile potest ostendi: Illud dicitur concreari, quod fit per eandem actionem, qua subiectum creatur; unde intellectus, & voluntas dicuntur fieri per concreationem, quia cum sint proprietates animæ rationalis, fiunt per eandem actionem, per quam ipsa producitur: Sed gratia sanctificans, cum non sit proprietas animæ, sed accidentis ipsi indebitum, non fit per eandem actionem, per quam anima producitur, sed per diversam: Ergo non potest dici concreari a Deo ad creationem subjecti.

Ex his probata manet tertia pars conclusio-
nis. si enim gratia sanctificans nec creetur,
nec concreetur, debet educi ex aliqua poten-
tia subjecti, in quo recipitur, cum inter crea-
tionem, & educationem non detur medium;
creari enim est fieri ex nihilo, sive ex non
præsupposito subjecto; educi vero e con-
tra est non fieri ex nihilo, sed ex subjecto
præsupposito: Atqui gratia sanctificans non
potest educi de potentia naturali, aut vio-
lenta sui subjecti, scilicet animæ, cum non
sit ei connaturalis, vel repugnans: Ergo
de potentia obedientiali animæ educitur.

Objicies primo contra primam conclu-
sionem: Qui causat principaliter ultimam
dispositionem ad aliquam formam, ipsam
quoque formam principaliter producit: v.
g. qui producit principaliter calorem ut o-
sto, inducit etiam principaliter formam i-
gnis: Sed homo causat principaliter actus
contritionis, vel charitatis, qui sunt ulti-
mæ dispositiones ad gratiam sanctifican-
tem: Ergo est causa principalis illius.

Re-

Respondeo, agens, quod ultimam dispositionem ad aliquam formam principaliter producit, ipsam quoque formam principali-
ter causare, quando illa educitur de po-
tentia naturali subjecti: secus vero, si de
potentia obedientiali ejus educatur; quia
potentia obedientialis soli Deo ita subdi-
tur, ut nullius creaturæ dominio subjici
possit: gratia vero sanctificans de poten-
tia obedientiali animæ educitur, ut in se-
cunda conclusione ostensum est. Potest hoc
explicari exemplo generationis hominis:
homo enim producens physicas ad introdu-
cendam animam rationalem dispositiones,
non propterea animæ rationalis est causa
præcipua, quia illa e finu materiæ non e-
ducitur, sed a Deo creatur.

Objicies secundo: Intellectus beatorum
concurrit principaliter, & non solum in-
strumentaliter ad visionem beatificam,
quamvis illa sit entitative supernaturalis,
& participatio formalis intellectionis divi-
næ, ut docuimus in tractatu de visione
Dei: Ergo pariter homo potest esse causa
principalis gratiæ sanctificantis, quamvis
illa sit entitative supernaturalis, & parti-
cipatio formalis divinæ naturæ.

Sed nego consequentiam, & paritatem.
Ratio vero discriminis est, quia licet visio
beatifica sit operatio supernaturalis, omnes
que vires naturæ creatæ, & creabilis tran-
scendat, supponit tamen in intellectu bea-
torum eam elicente lumen gloriæ, quod
est ejusdem speciei, & perfectionis cum il-
la: gratia vero sanctificans non potest
supponere in suo subjecto aliquod princi-
pium supernaturale, sibi æquale in perfe-
ctione, a quo producatur, cum sit perfe-

Etissima forma ordinis supernaturalis, quæ se habet ut radix aliarum.

Objicies tertio contra secundam conclusio-
nem: Scriptura variis in locis viderur doce-
re, quod gratia habitualis creetur. David enim
Psalm. 50. petens gratiam sibi a Deo donari,
ait: *Cor mundum crea in me Deus*. Et ad Ga-
latas 6. Justus dicitur *nova creatura*. Item ad
Ephes. 1. fideles dicuntur *creati in Christo
Iesu*. Quæ loca non videntur posse explica-
ri, nisi dicamus gratiam habitualem creari.

Respondeo cum D. Thoma hic quæst.
110. art. 2. ad 3. quod gratia in Scriptu-
ris sacris dicitur creari, non quod secun-
dum suum esse naturale, & physicum pro-
ducatur ex nihilo, quod importat vera
creatio: sed quia infunditur a Deo nullis
nostris meritis præcedentibus, quod habet
quandam similitudinem creationis, & crea-
tio moralis appellari potest.

Objicies quarto: Actio, per quam pro-
ducitur gratia sanctificans, debet esse o-
mnium præstantissima; cum talis qualitas in
nobilitate, & perfectione quamcumque rem
creatam, & creabilem excedat, ut constat
ex dictis capite præcedenti: Sed creatio
multo nobilior est eductione: Ergo gratia
sanctificans non educitur, sed creatur.

Respondeo, actionem, per quam Deus
producit gratiam sanctificantem, debere qui-
dem esse præstantissimam, sed accommoda-
tam conditioni ejus: creationem vero non
esse productionem, quæ sit accommodata
conditioni, & naturæ gratiæ sanctificantis,
sed solum eductionem; nam cum illa sit ac-
cidens, atque adeo non sit naturaliter per se
subsistens, dependet in esse, & fieri a suo
subjecto; & consequenter ex potentia ejus,
non

non quidem naturali , sed obedientiali e-
ducitur si connaturaliter producatur . Un-
de præstantia productionis ejus supra pro-
ductiones aliarum formarum ipsi inferio-
rum , per hoc sufficienter salvatur , quod
nulla sit creatura , in cuius virtute activa
principaliter concurrente , vel in cuius po-
tentia passiva naturali præcontineatur .

Objicies ultimo : Gratia sanctificans , que
fuit collata Angelis , & primis parentibus ,
in ipso creationis momento , non potuit fie-
ri per educationem : Ergo illa saltem fuit
creata , vel concreata . Consequentia patet :
nam , ut supra dicebamus , inter creatio-
nem , & educationem non datur medium .
Antecedens vero sic ostenditur : Ut aliqua
forma educatur de subiecto , requiritur , ut
fiat per actionem transmutativam illius :
Sed gratia sanctificans , quæ Angelis , &
primis parentibus in momento creationis
collata fuit , non potuit fieri per actionem
transmutativam subiecti : Ergo nec ab illo
eduici . Major docetur communiter a no-
stris Thomistis in Philosophia , minor au-
tem videtur manifesta : Ad transmutatio-
nem enim subiecti requiritur , quod illud
præcedat formam prioritate temporis , vel
saltem instantis , & in tali priori sub ejus
privatione existat : Atqui subiectum gra-
tiæ Angelorum , & primorum parentum
non præcessit in aliquo instanti privatum
hujusmodi forma , cum illam in primo
creationis momento receperint , juxta illud
Augustini : *Erat Deus in Angelis condens*
naturam , & largiens gratiam : Ergo talis
gratia per actionem subiecti transmutati-
vam facta non est .

Respondeo negando Antecedens , & ad

N 3 illius

illius probationem , concedo majorem , & nego minorem , ad cuius probationem dico , quod licet ad actualem subjecti transmutationem requiratur , quod illud præcesserit in aliquo instanti , seu priori in quo , privatum forma , quam recipit ; ut tamen actio productiva formæ sit quantum est ex se transmutativa subjecti , sufficit , quod sit distincta ab ea , qua subjectum producitur , & non habeat inviolabilem nexus cum illa , ut docent nostri Thomistæ in Physica , cum agunt de eductione formarum : actio autem , qua gratia Angelis , & primis parentibus collata fuit , habuit duas illas conditiones ; fuit enim distincta ab ea , qua Angeli , & primi parentes a Deo producti sunt , & cum ea non habuit inviolabilem nexus ; cum gratia sanctificans a substantia Angelorum , & primorum parentum per modum proprietatis non dimanaverit ; unde fuit producta per actionem transmutativam subjecti , quamvis per accidens illud actu , & de facto non transmutaverit , quia per accidens in eodem momento , quo illud conditum est , gratia producta fuit , & sic non præcessit in aliquo instanti sub privatione illius .

C A P U T X I V .

De primo effectu gratiæ habitualis , nimirum adoptione hominis in filium Dei .

TRes sunt præcipui gratiæ habitualis effectus , de quibus in hoc capite , & duobus sequentibus agendum est , nempe adoptio hominis in filium Dei , justificatio peccatoris , & meritum justi .

Circa primum supponendum est ut certum ,

tum , & indubitata fide tenendum , Deum homines in filios adoptare : dicitur enim 1. Joan. 3. *Videte qualem charitatem dedit nobis Pater , ut filii Dei nominemur , & simus .* Ad Rom. 8. *Ipse spiritus testimonium reddit spiritui nostro , quod filii Dei sumus . Unde Chrysologus serm. 10. Audivimus , fratres , quo nos tulit divina dignatio , quo paternitas extulit nos superna : credamus nos Dei filios , respondeamus generi , vivamus celo , patrem similitudine referamus , ne perdamus vitiis , quod sumus per gratiam consecuti . Et serm. 70. Quid mirum , si Christus homines Dei consecravit in filios , quando se hominis dedit , & aptavit in filium ? Carnis tunc naturam transtulit in divinam deitatem , quando humanam detulit ad naturam ; tunc hominem sibi in cœlestibus prestitit coheredem , quando se participem reddidit terrenorum . Similia habet Chrysostomus homil. 2. in Matthæum , ubi sic ait : *Cum audieris , quia filius Dei filius sit David , & Abrahæ , dubitare jam desine , quod & tu , qui filius es Adæ , futurus sis filius Dei . Non enim ita se humiliasset , nisi nos esset exaltaturus . Natus est enim secundum carnem , ut tu nascerere spiritu ; natus est ex muliere , ut tu desineres filius esse mulieris .**

Ratio etiam suffragatur : Adoptio enim est gratuita assumptio personæ extraneæ ad alterius hæreditatem : Sed Deus gratuito , & liberaliter creaturam rationalem assument , seu elevat ad beatitudinem , in qua Dei hæreditas consistit , & ad quam ex sua natura nullum habet jus , subindeque ad eam ut persona extranea comparatur : Ergo Deus homines adoptat in filios .

Solum ergo difficultas est , & controver-

sia inter Theologos , quænam sit forma , quæ hominem filium Dei adoptivum constituit , seu quæ filiationem Dei adoptivam fundat ? Aliqui enim existimant , divinitatem Spiritus Sancti extrinsece nobis unitam , seu assistentem , esse formam , quæ dat formaliter esse filium Dei adoptivum , concurrente gratia sanctificante solum ut vinculo . Ita Lessius lib. de summo bono c. 1. Alii cum Aureolo docent , charitatem habitualem esse formam , quæ talē effectum præstat . Alii demum cum Scoto , & Durando dicunt , gratiam habitualem constituere quidem hominem filium Dei adoptivum ; id tamen non habere ratione suę entitatis , & perfectionis , sed ex lege , & pacto Dei , quo qualitatem illam supernaturalem , de se ad talem effectum insufficientem , & improportionatam , deputavit , ac destinavit ad illum præstandum , & per talem deputationem , valorem ei sufficientem contulit ; sicut moneta , regio sigillo signata , certum valorem , & aestimationem habet , quam ex se non obtinebat .

§. I.

Forma constituens hominem filium Dei adoptivum , neque est divinitas Spiritus Sancti , nobis extrinsece unita , seu assistens , neque habitus charitatis , sed gratia habitualis , adæquate , nulloque favore extrinseco expectato .

Prima pars hujus assertionis dupli ratione suadetur . Prima est : Illa forma constituit hominem filium Dei adoptivum , quæ terminat spiritualem hominis generationem : Sed divinitas Spiritus Sancti , nobis extrinsece unita , & assistens , non est forma ter-

minans spiritualem hominis generationem, seu qua homo regeneratur in filium Dei: Ergo illa non est forma, per quam homo filius Dei adoptivus constituitur. Major patet, quia de filiatione adoptiva philosophandum est sicut de naturali, proportione servata: in naturalibus autem illud, quod terminat formaliter generationem, causat, seu fundat filiationem naturalem. Minor vero sic ostenditur: Forma terminans spiritualem generationem est, qua terminus genitus spiritualiter vivit; sicut forma dans vitam formaliter termino naturalis generationis, illam formaliter terminat. Sed divinitas Spiritus Sancti nobis extrinsece unita, seu assistens non est principium quo vivendi spiritualiter: Ergo nec formalis terminus spiritualis generationis. Major est evidens; minor vero ostenditur ex D. Thoma 2. 2. quæst. 23. art. 2. ad 2. ubi sic ait: *Deus est vita effectiva & anime per charitatem, & corporis per animam; sed formaliter charitas est vita anime, sicut & anima corporis.* Ergo ex D. Thomâ divinitas Spiritus Sancti nobis extrinsece unita, seu assistens non est principium quo formale vivendi spiritualiter. Ratio etiam id suadet: nam forma, quæ est principium formale quo vivendi, debet per identitatem, vel per physicam informationem accipienti vitam uniri: At divinitas Spiritus Sancti nullo ex his modis nobis uniri potest, cum uterque modus unionis imperfectionem importet: Ergo nequit esse principium quo formale vivendi spiritualiter.

Secunda ratio sic potest proponi: Eadem est forma, qua homo justificatur, & qua filius Dei adoptivus constituitur, cum juxta Tridentinum sess. 6. cap. 4. nostra justificatio sit

translatio ab eo statu, in quo homo nascitur filius primi Adg, in statum gratię, & adoptionis filiorum Dei: At forma, qua homo justificatur, non est pure extrinseca, seu assistens, sed intrinseca, & inhärens, ut capite sequenti ostendemus, & expresse definit idem Concilium, eadem sessione, can. 11. his verbis: Si quis dixerit, homines justificari sola imputatione justitiae Christi, exclusa gratia, & charitate, quæ in cordibus eorum per Spiritum Sanctum diffundatur, atque illis inhæreat, anathema sit: Ergo forma, qua homo filius Dei adoptivus constituitur, non est pure extrinseca, nec per consequens divinitas Spiritus Sancti nobis extrinsece unita, seu assistens, sed forma intrinsece inhärens, nimirum ipsa gratia habitualis, quæ in anima residet, & per Spiritum Sanctum in cordibus nostris diffunditur. Unde sententia Lessii minus videtur consona menti, ac doctrinæ Tridentini.

Secunda pars assertionis, quæ dicit, habitum charitatis non esse formam, quæ filium Dei adoptivum constituit, sed gratiam habitualē, probatur eadem ratione, qua præcedens: Illa forma tribuit formaliter esse filium Dei adoptivum, quæ formaliter terminat spiritualem hominis generationem: At forma terminans formaliter spiritualem hominis generationem, non est habitus charitatis, sed ipsa gratia habitualis: Ergo nec illa filium Dei adoptivum constituit. Major patet ex similitudine, seu analogia, quæ reperitur inter generationem spiritualem, & naturalem. Minor vero sic ostenditur: Licet homo genitus naturali generatione recipiat simul cum natura proprietates, tamen non terminat formaliter

ter naturalem generationem per proprietates, sed per naturam humanam, quæ est radix illarum: Ergo similiter licet justus, genitus a Deo spirituali generatione, naturam supernaturalem, & illius proprietates recipiat, non terminat tamen spiritualem generationem formaliter ratione proprietatum, sed ratione naturæ ordinis supernaturalis: At gratia habitualis est in ordine supernaturali natura, charitas vero est illius proprietas, ut supra ostensum est: Ergo homo non terminat spiritualem generationem ratione habitus charitatis, sed ratione gratiæ habitualis, quæ est radix illius.

Confirmatur primo: Terminus formalis generationis spiritualis est ille, quo genitus vivit spiritualiter radicaliter, seu qui est radix vitæ spiritualis: Sicut terminus formalis generationis naturalis est ille, quo genitus vivit naturaliter radicaliter, seu qui est radix vitæ naturalis: Sed gratia habitualis dat vitam radicaliter in ordine spirituali, seu supernaturali, non vero habitus charitatis, ut patet: Ergo gratia sanctificans, non vero charitatis habitus, est terminus formalis generationis spiritualis.

Confirmatur secundo: Terminus formalis spiritualis generationis est ille, ratione cuius homo fit particeps divinæ naturæ, Deoque assimilatur, non in aliquo attributo, sed in natura divina: At homo non fit particeps formaliter naturæ divinæ, nec Deo assimilatur in natura per habitum charitatis, sed per gratiam habitualem; cum sola gratia habitualis fit participatio divinæ naturæ, sub conceptu naturæ, habitus vero charitatis fit participatio divinæ voluntatis, quæ est illius

attributum : Ergo idem quod prius.

Ex dictis probata manet tertia pars assertio-
nis. sicut enim homo accipiens naturam
generantis secundum convenientiam univo-
cam, ex vi hujus acceptio-
nis, absque alio
superaddito, constituitur filius naturalis ;
ita ex vi acceptio-
nis naturæ divinæ secun-
dum convenientiam analogam, absque in-
digentia alicujus superadditi, constituitur
filius Dei adoptivus : Sed gratia habitualis,
ratione intrinsecæ entitatis, est participatio
naturæ divinæ, secundum convenientiam
analogam ; subindeque illam accipiens est
similis Deo analogice in natura sub conce-
ptu naturæ : Ergo ex vi acceptio-
nis illius,
absque ullo favore extrinseco, homo con-
stituitur spiritualiter genitus, & filius Dei a-
doptive.

§. II.

Solvuntur objectiones.

Obijecies primo contra primam partem af-
fertio-
nis : Forma, qua justus vivit in or-
dine supernaturali, & divino, est, quæ præ-
stat formaliter esse filium Dei adoptivum :
Sed divinitas Spiritus Sancti, ut justo unita
per gratiam, est forma, qua vivit in ordine
supernaturali, & divino : Ergo & quæ præ-
stat formaliter esse filium Dei adoptivum.
Major constat ex supradictis, minor vero sua-
detur, tum variis Scripturæ testimoniis, qui-
bus Spiritus Sanctus justos vivificare dicitur :
Joan. 6. *Spiritus est, qui vivificat.* Ad Galat. 5.
Si spiritu vivimus, spiritu & ambulemus : tum
quia divinitas Spiritus Sancti est vita quædam
per essentiam, subindeque de se sufficiens ad
omnia

omnia vivificanda. Unde D. Thomas 4. contra Gent. cap. 20. observat, quod Spiritus Domini initio mundi dicitur ferri super aquas, non quasi ipse moveatur, sed quia primum est motionis, & vitæ principium. Et Ecclesia in symbolo Concilii Nicæni profiteretur se credere *in Spiritum Sanctum, dominum, & vivificantem*. Hinc etiam egregie observat Cornelius Muslus lib. 3. de divina historia, omnia spiritu vivificari: *Habent* (inquit) *Physici in animalibus suos spiritus: anhelitum in primis, tum corpuscula illa, in corde, in hepate, in cerebro formata; spiritus videlicet naturales, vitales, & animales. Sunt & ipsis Grammaticis spiritus, quos quidem accentus dicimus, ob id quod syllabis accinunt, veluti earum tenores, & toni. Sane ut litteræ vocales dictiōnum, sic litterarum vocalium ipsi accentus videntur esse animq; quedam, quod eorum sono acuto, vel gravi voce ipsæ fermentur, quasi vivant, vigeant, spirent, & loquantur. Hinc porro ad musicam derivatio sit spirituum, intensiones, & inflexiones, inclinationes, & elevationes in tonis, & cantibus, spiritus sunt, quibus animata musica tantam vim habet, ut possit amorem excitare, infundere gaudium, & timorem pellere.*

Respondeo, concessa majori, negando minorēm. justus enim vivit quidem spiritu Dei, & ejus divinitate, ut causa efficiente, & moveante ad actus vitales ordinis supernaturalis, non vero ut forma, & principio radicali vi-
tē supernaturalis; quia, ut supra dicebamus, forma, quæ est principium quo radicale vivendi, debet per identitatem, aut per physicam informationem accipienti vitam uniri, quorum neutrum Spiritui Sancto competere potest,

cum

cum uterque modus unionis imperfectionem importet. Et in hoc sensu intelligenda sunt prædicta Scripturæ testimonia , quibus asseritur , Spiritum Sanctum justos vivificare , vel justos vivere Spiritu Sancto ; hæc enim in sensu causalí , non formalí accipienda sunt , ut docet D. Thomas 2. 2. qu. 23. art. 2. ad 2. explicans verba illa Deut. 39. *Ipse est vita tua* , ait enim , quod *Deus est vita effectiva* , sed formaliter *charitas est vita animæ* , sicut *anima corporis* .

Objicies secundo : Filius constituitur per communicationem ejusdem naturæ , quæ est in patre : Sed justi non possunt constitui filii Dei adoptivi per communicationem ejusdem specie naturæ , quæ est in Deo , cum natura divina sit immultiplicabilis numero . Ergo constituuntur filii Dei adoptivi per communicationem ejusdem numero naturæ , subindeque per ipsam divinitatem eis unitam per gratiam .

Respondeo , ad filiationem naturalem requiri communicationem naturæ secundum convenientiam specificam , sed ad filiationem adoptivam sufficere communicationem naturæ secundum convenientiam analogam : & hanc convenire gratiæ sanctificanti ; cum enim illa sit naturæ divinæ formalis participatio , debet cum illa saltē analogice convenire , ut constat ex supra dictis .

Objicies tertio contra secundam partem assertionis illud 1. Joan. 3. *Videte qualem charitatem dedit nobis Pater , ut filii Dei nominemur , & simus* , quo significari videtur , charitatem esse formam , qua filii Dei constituimur . Sed facile respondetur , aliqua , quæ sunt effectus gratiæ sanctificantis , attribui etiam charitati , ratione mutuæ connexionis , quam habent inter

ter se , sicque filiationem Dei adoptivam attribui charitati concomitanter , & secundario , quia illa est proprietas , quæ a gratia dimanat , & inseparabiliter ipsi conjungitur .

Objicies quarto contra tertiam partem assertionis : Ut gratia habitualis habeat jus ad vitam æternam , ut mercedem , seu coronam , exigitur pactum , vel promissio Dei , sive ordinatio ejus extrinseca , ut docent Theologi in tractatu de merito : Ergo pariter ut illa habeat jus ad vitam æternam , ut hæreditatem , requiritur pactum , & ordinatio gratiæ habituali superaddita ; subindeque illa , seclusa omni favore extrinseco , non potest filiationem Dei adoptivam causare , cum ad illam requiratur jus ad hæreditatem Dei , quæ est vita æterna .

Respondeo primo , antecedens negari a pluribus Theologis , existimantibus ordinationem Dei extrinsecam , in pacto , vel promissione consistentem , non esse necessariam ad completam rationem meriti , sed sufficere ordinationem Dei intrinsecam , quæ includitur in voluntate dandi gratiam , ut principium merendi .

Respondeo secundo , dato Antecedenti , negando consequentiam , & paritatem . Ratio autem discriminis est , quia jus meritorium , quod in operibus justorum gratia , & charitate informatis invenitur , vel est fidelitatis , vel justitiae , vel gratitudinis : primum absque promissione stare non potest ; secundum vero , & tertium nequeunt in pura creatura , absque pacto Dei operum dignitati superaddito , subsistere ; quia cum opera justorum sint Deo variis titulis debita , ex vi propria , & intrinseco valore , non

non possunt Deum ex stricta iustitia obligare ad illa remuneranda : jus autem fundatum in gratia sanctificante respectu gloriæ ut hereditatis , cum non sit meritorium , sed solius connaturalitatis , ipsi competit absque interventu promissionis , vel ordinationis divinæ ; sicut Deus jure connaturalitatis tenetur Angelo infundere species , illius creatione supposita , concurrere ad motum cœli , supposita illius existentia , & effluxum , seu resultantiam passionum non impedire , supposito quod naturas producat .

§. III.

Tria corollaria notatu digna.

EX dictis colligitur primo , adoptare creaturam rationalem in filium , non esse proprium alicui ex personis divinis , sed communem toti Trinitati , ut docet D. Thomas 3. p. q. 23. ar. 2. Nam Deus adoptat creaturam rationalem in filium , quatenus infundit gratiam spiritualiter generativam : Sed actio infusiva gratiæ , cum sit operatio libera , & ad extra , est communis toti Trinitati : Ergo & adoptio creaturæ rationalis .

Observat tamen idem S. Doctor ibidem in resp. ad 3. quod quia filiatio adoptiva est quædam similitudo filiationis naturalis , per appropriationem Filio ut exemplari tribuitur ; & quia in humanis solius patris est adoptare , divina adoptio Patri æterno ut authori appropriatur ; item quia eadem adoptio fit per gratiam , quæ est opus amoris divini , appropriate tribuitur Spiritui Sancto , ut infundi gratiam , per quam adoptamur , & assimili-

similamur Deo. Unde ad Roman. 8. dicitur: *Accepistis spiritum adoptionis, in quo clamamus, Abba pater.*

Colligitur secundo, Patres veteris testamenti, in gratia, & charitate existentes, vere fuisse filios Dei adoptivos, quamvis non fuerint in statu filiorum.

Prima pars patet: nam veteres Patres in charitate existentes vere fuerunt justificati, justificatione ejusdem rationis cum nostra: At justificatio, ex Tridentino supra citato, est translatio ab eo statu, in quo homo nascitur filius primi Adæ, in statum gratiæ, & adoptionis filiorum: Ergo Patres antiqui, per gratiam justificati, vere fuerunt filii Dei adoptivi.

Secunda vero ex eo constat, quod Patres veteris testamenti ducebantur spiritu timoris; unde in sacris litteris appellantur servi, & spiritum servitutis habere dicuntur, ut patet ad Galat. 4. & ad Roman. 8. & alibi saepe: item illis non patebat aditus ad hæreditatem cœlestem, sicut justis novæ legis. Quare tres gradus filiationis adoptive distingui possunt: primus, & imperfectissimus est iustorum ad veterem legem pertinentium; secundus est iustorum ad legem novam spectantium; tertius, & omnium perfectissimus est beatorum videntium Deum, qui non solum habent jus ad Dei hæreditatem, sed etiam illam actu possident, Deoque per visionem beatificam perfecte assimilantur. De hac adoptione loquitur Apostolus ad Roman. 8. cum ait: *Nos ipsi primitias spiritus habentes intra nos gemimus, adoptionem filiorum Dei expectantes*, id est filiationem gloriæ, quæ excedit statum adoptionis viæ, sicut status adoptionis iustorum novæ legis præstan-

stantior est statu adoptionis Patrum veteris testamenti. Unde sicut ob hunc excessum Apostolus ad Galat. 4. statum antiquæ legis comparat parvulo, sub auctoribus, & tutoribus constituto; ita i. ad Corinth. 13, loquens de statu præsentis vitæ, comparative ad statum gloriæ, eadem similitudine utitur, dicens: *Cum essem parvulus, loquebar ut parvulus, &c.* Sicut enim status veteris legis propter imperfectionem cognitionem, est sicut parvulus, in comparatione ad statum gratiæ, & veritatis, quæ per Christum facta est: sic status præsentis vitæ, in qua videmus per speculum, & in ænigmate, est sicut parvulus, comparative ad statum vitæ futuræ, in qua est perfecta cognitione Dei.

Colligitur tertio ex principiis supra statutis, implicare contradictionem, quod aliquis sit filius Dei adoptivus sine gratia habituali. Nam ad filiationem adoptivam Dei essentialiter exigitur convenientia saltem analogia cum Deo in natura, sub conceptu naturæ, ut constat ex supra dictis: At implicat contradictionem creaturam convenire analogice cum Deo in natura, sub conceptu naturæ, sine gratia habituali; cum essentia gratiæ habitualis consistat in hoc, quod est esse participationem formalem naturæ Dei, sub conceptu naturæ, ut cap. 11. §. 2. ostensum est: Ergo implicat contradictionem, quod aliquis sit filius adoptivus sine gratia habituali.

Confirmatur: Implicat hominem esse filium Dei adoptivum, nisi sit spiritualiter a Deo genitus; cum filiatio adoptiva in spirituali generatione fundetur, sicut naturalis in naturali: Sed repugnat illum esse spiritualiter

ge-

genitum a Deo sine gratia habituali: Ergo implicat sine illa esse filium Dei adoptivum. Major patet: minor probatur: Esse genitum spiritualiter est procedere vivens vita spirituali a Deo vivente, in similitudinem naturae, ad quod necessarium est vivere radicaliter vita spirituali, & divina; sed implicat vivere vita spirituali, & divina radicaliter sine gratia habituali; cum illa sit radix operationum vitalium ordinis supernaturalis, nempe actus charitatis, & visionis intuitivae Dei, aliorumque actuum supernaturalium: Ergo implicat hominem esse spiritualiter genitum a Deo sine gratia habituali.

Dices: Potest Deus, de sua potentia absoluta, velle homini efficaciter gloriam, absque voluntate efficaci conferendi gratiam habitualem, cum gloria non habeat essentialiem dependentiam ab illa: Sed homo in tali casu esset filius adoptivus Dei: Ergo possibilis est de potentia absoluta filiatio adoptiva Dei sine gratia habituali. Major constat, Minor probatur. Adoptio a Theologis, & Jurisperitis definitur, *gratuita, & liberalis assumptio personae extraneae ad hereditatem*: Sed in casu posito, voluntas illa Dei esset gratuita, & liberalis, ut constat, & homo ordinatus ad gloriam esset persona extranea respectu hereditatis Dei, ad quam ordinaretur: Ergo haberet quidquid requiritur ad rationem filii adoptivi.

Confirmatur: Deus posset talem hominem, cui gratiam habitualem denegaret, non solum ordinare ad gloriam, sed etiam illum de facto beatificare, cum visio beatifica non dependeat essentialiter a gratia habituali: Ergo posset illum adoptare in filium sine

gra-

gratia habituali. Consequentia videtur manifesta: nam si forma præbens jus ad divinam hæreditatem, filium Dei constituit, a fortiori ipsius hæreditatis divinæ possessio, quæ est ipsa visio beatifica, constituere poterit filium Dei adoptivum.

Ad objectionem respondeo, data Majori, negando Minorem, & ad illius probationem dico, quod quando adoptio definitur, *gratuita, & liberalis assumptio personæ extraneæ ad hæreditatem*, hoc debet intelligi de assumptione communicante affective naturam, non vero de simplici assumptione ordinante ad hæreditatem, ut constat in humanis, & civilibus; nam potest unus homo promittere alteri hæreditatem, absque eo quod ipsum adoptet in filium: cum ergo in casu posito voluntas Dei ordinans hominem ad gloriam, non communicaret effective, nec affective naturam divinam participative, hoc est gratiam habitualem, sed e contra haberet voluntatem efficacem eam non communicandi, tali volitioni non conveniret definitio adoptionis, nec homini sic ordinato vera ratio filii adoptivi. Unde ad confirmationem, concessio Antecedente, nego consequentiam; sicut enim in civilibus filiationem adoptivam non præstat ipsius hæreditatis possessio, alias omnes hæredes essent filii adoptivi, sed forma, quæ præbet jus ad hæreditatem, nimirum communicatio affectiva naturæ: ita & in supernaturalibus divinæ hæreditatis possessio, quæ habetur per visionem beatificam, non constituit filiationem Dei adoptivam, sed ipsa gratia sanctificans, quæ sola, cum sit participatio naturæ divinæ, potest esse terminus formalis spiritualis generationis, quæ est

est fundamentum filiationis adoptivæ , ut supra declaravimus .

Instabis : Ad adoptionem humanam , & civilem sufficit voluntas inefficax , & conditionata communicandi naturam adoptato : Ergo & ad adoptionem divinam , & supernaturalem . Unde licet Deus in casu posito non haberet voluntatem absolutam , & efficacem conferendi tali homini gratiam sanctificantem , ille tamen filius ejus adoptivus esse posset .

Respondeo , concesso Antecedente , negando consequentiam , & paritatem . Ratio autem discriminis est , quia in adoptione humana supponitur in persona adoptanda natura ejusdem speciei , & proportionata cum hæreditate adoptantis , subindeque facultas ad talem hæreditatem percipiendam ; secus autem in adoptione divina . Unde D. Thomas 3. p. qu. 23. art. 1. sic ait : *Hoc autem plus habet adoptatio divina , quam humana , quia Deus hominem , quem adoptat , idoneum facit per gratiæ munus ad hæreditatem cœlestem percipiendam ; homo autem non facit idoneum eum , quem adoptat , sed potius eum jam idoneum eligit adoptando .*

Celebrem hanc quæstionem , & caput istud concludam hac pia Catechismi Romani tractatu de oratione consideratione , seu reflexione : „ Cogita (*inquit*) quem in lo-
„ cum te summa Dei benignitas extulerit ,
„ qui non ut servum ad dominum adire in-
„ vitum , ac timidum , sed ut ad patrem fi-
„ lium voluntarium , securumque confuge-
„ re jusserit . Qua in memoria , & cogi-
„ tatione , quo vicissim studio , & pietate ti-
„ bi orandum sit , considera . Danda enim
„ est tibi opera , te ut talem præbeas , qua-
„ lem

„ Iem esse decet Dei filium , id est ut oratio , & actiones tuæ non indignæ sint
 „ divino genere , quo te dignari voluit
 „ beneficentissimus Deus . „

C A P U T X V .

*De justificatione peccatoris , quæ est secundus
 gratiæ habitualis effectus .*

Priusquam difficultates scholasticas proponamus , & resolvamus , breviter confutandi sunt duo præcipui Lutheranorum , & Calvinistarum errores circa justificationem peccatoris . Primus asserit , in justificatione vere , & proprie peccata non remitti , aut deleri , sed duntaxat radi , vel tegi per justitiam Christi , nobis imputatam ; eo fere modo , quo vulnera , & ulceræ alicujus possunt tegi , vel occultari sub veste alterius . Hic error proscribitur a Tridentino sess . 5 . can . 5 . ejusque falsitas constat ex variis Scripturæ testimoniis , quibus peccata tolli , deleri , remitti , ipsique peccatores mundari , ablui , lavari , ac dealbari dicuntur . Joan . 1 . Ecce qui tollit peccatum mundi . Psal . 50 . Dele iniquitatem meam . Psal . 31 . Beati , quorum remissæ sunt iniquitates . 1 . Cor . 6 . Abluti estis , sanctificati estis , justificati estis . Isaiæ 1 . Si fuerint peccata tua sicut coccinum , quasi nix dealbabuntur , &c . At illi termini , seu modi loquendi Scripturæ non solum occultationem peccatorum , sed veram ipsorum ablationem important , ut de se patet : inepte enim ille diceretur ablutus , & mundatus , qui sordibus esset inquinatus , quas pallio , aut veste tegeret ; incongrue etiam Æthiopem , ut nivem , aut lanam dealbari dicceremus , si tantum nigredinem sub veste

can-

candida occultaret. Inepte quoque peccata dicerentur tolli omnino, ac deleri, si dunt taxat raderentur, sicut capilli capitis, & rursus repullularent, ac redirent. Unde Augustinus lib. 1. contra duas epist. Pelagian. cap. 13. *Dicimus baptisma omnium dare indulgentiam peccatorum, & auferre crimina, non radere, neque radices peccatorum in mala carne teneri, quasi rasorum in capite capillorum, unde crescant iterum resecanda peccata.* Quibus verbis prædictum hæreticorum errorem prævidisse, ac confutasse videtur. Item concione 2. in Psal. 31. solvit præcipuum illorum fundamentum, de sumptum ex aliquibus Scripturæ locis, in quibus peccata a Deo tegi dicuntur. Ibi enim explicans verba illa Psalmistæ: *Beati, quorum remissæ sunt iniquitates, & quorum recta sunt peccata,* sic ait: *Non sic intelligatis peccata cooperta esse, quasi ibi sint, & vivant, & Deus tegat, non tu; nam si tu tegere volueris erubescens, medicus non curabit.* Medicus tegit, & curat; sub tegmine medici sanatur *vulnus: sub tegmine vulnerati celatur vulnus.* Quibus verbis docet, Deum ita tegere peccata hominum, ut revera ea tollat, & deleat, eorumque vulnera gratiæ suæ medicamine sanet. Ratio etiam id suadet; justificatio enim peccatoris, ut infra ostendemus, fit per gratiæ habitualis infusionem. At illa cum peccato incompossibilis est, saltem de lege ordinaria, ut omnes fatentur: Ergo impossibile est, quod post justificationem peccata in homine remaneant, & solum tegantur, vel occultentur per justitiam Christi nobis imputatam.

Secundus error hæreticorum nostri temporis affirmat, justificationem non fieri per intro-

roductionem alicuius formæ animæ inhærentis, sed per solam justitiam Christi nobis extrinsece imputatam. Hic error pariter excluditur a Tridentino sess. 6. can. II. & triplici ratione confutari potest.

Prima est: Apostolus ad Roman. 5. comparat justitiam, & obedientiam Christi cum peccato, & inobedientia Adami: Sed peccatum Adami realiter a nobis contrahitur; nec enim dicimur peccatores per hoc solum, quod peccatum primi Parentis, commissum in Paradiſo terrestri, nobis imputetur, sed quia in anima cujusque, quando concipitur, realis macula, & iniquitas reperitur, ut in tractatu de peccatis ostendimus, agendo de peccato originali: Ergo justitia, quæ tali peccato opponitur, illudque ab homine expellit, non debet esse quid externum, & imputativum, sed internum, & reale in anima; cum ex Philosopho contrariorum eadem sit ratio.

Confirmatur: Christus restituit nobis, quod perdidimus in Adamo: Sed in Adamo perdidimus justitiam intrinsecam, nimirum justitiam originalem, quæ erat forma aliqua, seu perfectio inhærens animæ Adami, quam transfudisset in omnes suos posteros, si non peccasset: Ergo Christus per justificationem nobis communicat formam aliquam, seu qualitatem intrinsecam, a qua justi denominamur.

Secunda ratio: Justificatio peccatoris provenit, tanquam a causa, a dilectione Dei supernaturali, qua diligit hominem in ordine ad vitam æternam: Sed a tali dilectione forma aliqua intrinseca, & supernaturalis in homine derivatur, ut cap. II. §. I. ostendimus: Ergo justificatio peccatoris fit per aliquam formam,

seu

seu qualitatem inhærentem , non per solam justitiam Christi , nobis imputatam .

Tertia ratio : In justificatione homo adoptatur in filium Dei : Sed filiatio adoptiva Dei fit per aliquam formam intrinsecam , ut capite præcedenti demonstravimus : Ergo & justificatio . Unde Augustinus epist. 85. *Quid est aliud justitia , cum in nobis est , quam interioris animi pulchritudo ?* Et lib. 15. de Trinit. c. 8. *Natura cum a Deo suo conditore justificatur , a deformi forma formosam transfertur in formam .*

Argumenta Calvinistarum , e detortis quibusdam Scripturæ locis deprompta , nullius momenti sunt . Non obest enim veritati Catholicæ in Tridentino sanctitæ , quod Christus 1. ad Corinth. 1. dicatur nobis fæsus *justitia* , & *sanctificatio* ; hoc enim in sensu causalی , non formalі intelligendum est ; sicut cum ibidem dicitur , Christum esse nobis sapientiam , & cum Joan. 11. Christus ait , *Ego sum resurrectio , & vita .*

Quod vero dicunt , fieri injuriam justitiae Christi , si dicamus nos justificari per aliquam justitiam nobis intrinsecam , prorsus absurdum est ; nam tantum abest , quod per hoc derogetur justitiae Christi , quin potius magis reluceat dignitas , & excellentia meritorum ejus , si virtute illorum nobis communicetur justitia inhærens , per quam simus formaliter justi .

Demum quod asserunt remissionem peccatorum nihil aliud esse , quam eorum condonationem ; illam vero non dicere aliud , quam actum divinæ voluntatis , quo vult peccata remittere , & Christi sanctificationem pro nostris peccatis applicari , a veritate penitus alienum est . Condonatio enim of-

sensæ in Deo non importat actum voluntatis sterilem, & infœcundum, sed fœcundum, & efficacem, ac producentem formam intrinsecam expellentem peccatum. Unde hoc interest discriminis inter Deum, & homines condonantes offensam, quod homo condonat offensam actu sterili, & ineffaci, Deus vero actu efficaci, & fœcundo. Primo, quia Deus condonando offensam, debet reddere eum, cui offensam remittit, objectum congruum suæ dilectionis, seu condonationis, quod non potest facere homo, cum amor humanus non ponat, sed supponat in suo objecto bonitatem; bene autem divinus, cum sit creans, & infundens bonitatem in rebus. Secundo, quia offensa non remittitur alicui, nisi eam retractet: Homo autem habet ex se sufficienter vires ad retractandam offensam in alium hominem commissam, secus vero ad retractandam offensam Deo irrogatam: & sic actus Dei condonantis offensam homini, debet illi conferre unde possit eam retractare, & pro ea aliqualiter satisfacere; quod non debet facere actus hominis, alteri homini offensam condonantis.

Ex his infertur contra Calvinum, justificationem impii non solum importare remissionem peccatorum, sed etiam sanctificationem, & renovationem interiorem hominis, ut docet Tridentinum sess. 6. c. 7. nam per acquisitionem gratiæ sanctificantis, quæ est causa formalis justificationis, ut ostendemus §. sequenti, homo transit a vetustate peccati ad novitatem vitæ, juxta illud ad Ephes. 4. *Renovamini spiritu mentis vestre:* & similiter sanctificatur, & mundatur, ut constat ex illo 1. ad Corinth. 6. *Abluti estis, sanctificati estis,*

estis, justificati estis: Ergo justificatio non solum importat remissionem peccatorum, sed etiam sanctificationem, & renovacionem interiorem hominis.

§. I.

Gratia sanctificans est causa formalis justificationis, non vero actus contritionis, vel charitatis.

ITA communiter docent Theologi contra Vasquem, & Meratium, probaturque primo ex Tridentino, cuius menti, & doctrinæ illorum Authorum sententia minus videtur consona. Concilium enī sess. 6. c. 7. unicam dicit esse causam formalem nostræ justificationis, nempe *justitiam Dei, non qua ipse justus est, sed qua nos justos facit*. Quod vero hæc justitia ex ejus mente sit solum gratia habitualis, non vero aliquis actus, patet ex initio ejusdem capitulū, ubi dicit hanc justificationem fieri per voluntariam susceptionem gratiæ, & donorum. Item sess. 14. c. 4. ait, *Contritionis motum preparare ad remissionem peccatorum, si conjunctus sit cum fiducia divinae misericordiæ*: Sed quod disponit ad remissionem peccatorum, non est ipsa forma justificans, cum inter dispositionem, & formam aliqua causalitas, & dependentia, subindeque realis distinctio reperiatur: Ergo ex Tridentino actus contritionis non est causa formalis justificationis.

Confirmatur: Causa formalis justificationis non impetrat veniam, & remissionem peccatorum, sed illam formaliter causat: At contritionis actus non causat formaliter veniam, & remissionem peccatorum,

sed eam duntaxat impetrat, ut constat ex eodem Tridentino ibidem dicente: *Fuit autem quovis tempore, ad impetrandam veniam peccatorum, hic contritionis motus necessarius:* Ergo idem quod prius.

Potest insuper eadem veritas dupli ratione suaderi. Prima est: In justificatione homo adoptatur in filium Dei, ut patet ex Tridentino sess. 6. cap. 4. unde illud idem, quod est terminus formalis generationis spiritualis, per quam filii Dei adoptivi constituimur, est causa formalis justificationis peccatoris: At sola gratia sanctificans, non vero actus charitatis, vel contritionis est terminus formalis illius generationis spiritualis; cum illa sola sit participatio formalis naturæ divinæ, ut talis est, & gerat vices substantiæ, seu naturæ in ordine supernaturali, ut cap. II. §. 2. ostensum est: Ergo sola gratia habitualis est causa formalis justificationis.

Secunda ratio sic potest proponi: Forma justificans expellit peccatum in genere causæ formalis, sicut universaliter omnis forma tribuens suum effectum formalem subiecto expellit formam, aut privationem oppositam, in genere causæ formalis: v. g. calor, qui est causa formalis calefactionis, expellit formaliter frigus ab aqua; lux, quæ est causa formalis illuminationis, expellit tenebras formaliter ab aere: Sed actus contritionis, vel charitatis non expellit ab anima peccatum habituale in genere causæ formalis; quia cum tale peccatum in privatione gratiæ habitualis consistat, ut ostendimus in tractatu de peccatis, talis actus ipsi non opponitur formaliter, sed solum in genere causæ dispositi-

væ , quæ ad genus causæ materialis reducitur : Ergo talis actus non est causa formalis justificationis , sed sola gratia sanctificans , quæ talem maculam , seu peccatum habituale formaliter tollit .

Objicit Vasquez contra hanc assertionem aliqua Scripturæ , SS. Patrum , & Conciliorum testimonia , quibus insinuari videtur , dilectionem Dei , seu contritionem perfectam , fundatam in dilectione , esse causam formalem nostræ justificationis . Christus enim Læc 7. dixit de Magdalena : *Remittuntur ei peccata multa , quoniam dilexit multum .* Et Augustinus lib. 2. contra Cresconium cap. 12. ait , quod *a peccatis mundamur sacrificio cordis contriti .* Similiter Tridentinum sess. 6. cap. 7. tribuit justificationem charitati , quæ difunditur in cordibus nostris , &c. Et sess. 14. cap. 4. illam attribuit actui contritionis .

Verum ad hæc facile respondeatur , testimonia illa solum probare , dilectione , & contritione , ut dispositione ultima , nos justificari , & sanctificari , non vero ut causa formalis justificationis , & sanctificationis ; effectus enim , qui complete procedit a forma , attribuitur etiam dispositioni , quia ab ipsa inchoative procedit .

Ex dictis colligitur , gratiam habitualem ab intrinseco , & ex sua natura habere , quod sit causa formalis justificationis , non vero ex favore Dei intrinseco ; tum quia ex se , & ex natura sua habet , quod expellat peccatum habituale , sicut qualibet forma positiva ex natura sua expellit privationem sibi oppositam ; tum etiam , quia ex natura sua habet , quod sit participatio formalis divinæ naturæ , & sanctitatis , unde sanctificans appellatur : Ergo sicut natura , & sanctitas

Dei ipsum ab intrinseco constituunt justum, & sanctum per essentiam; ita gratia habet ex natura sua constituere justum, & sanctum per participationem, subindeque expellere peccatum ab anima: sicut capite praecedenti dicebamus, illam ex sua natura, & ex vi sibi intrinseca, non vero ab extrinseco Dei favore habere, quod hominem filium Dei adoptivum constituat.

§. II.

In statu naturæ elevate ad ordinem, & finem supernaturalem non potest dari alia justificationis forma, quam gratia sanctificans, bene tamen in statu naturæ puræ.

Prima pars hujus assertionis probatur primo ex D. Thoma hic quæst. 113. art. 2. ubi sic ait: *Non posset intelligi remissio culpæ, si non adesset infusio gratiæ.* Quibus verbis S. Doctor uti solet, quando sentit aliquid implicare contradictionem, eo quod quidquid non implicat contradictionem, intelligibile sit. Nomine autem gratiæ non intelligit quodcumque donum gratuitum, sed solam gratiam habitualem, ut patet ex verbis istis immediate præcedentibus: *Effectus divinæ dilectionis, qui per peccatum tollitur, est gratia, qua homo fit dignus vita æterna.*

Confirmatur. Idem S. Doctor ibidem in resp. ad 1. sic ait: *Licet homo, antequam peccet, potuerit esse sine gratia, & sine culpa; tamen post peccatum non potest esse sine culpa, nisi gratiam habeat.* Quibus verbis aperte docet, quod licet homo in puris naturalibus constitutus possit manere absque peccato, & absque gratia; postquam

ta-

tamen semel lapsus est in peccatum , impossibile est in statu elevationis ad ordinem supernaturalem , ipsum reparari , & a peccato resurgere , absque infusione gratiæ .

Ratio etiam id suadet . ut enim in statu de peccatis ex eodem Doctore Angelico ostendimus , peccatum habituale dicit maculam quandam , quæ in privatione gratiæ habitualis consistit : Sed privatio alicuius formæ non potest tolli , etiam de potentia absoluta , nisi per formam qua privat , ut constat in morte , cœcitate , tenebris , quæ non nisi per vitam , visum , & lucem possunt auferri : Ergo peccatum habituale tolli nequit nisi per infusionem gratiæ habitualis , nec per consequens peccatori justificari . Hanc rationem insinuat S. Thomas hic qu. 109. artic. 7. his verbis : *Cum decor gratiæ proveniat ex illustratione divini luminis , non potest talis decor in anima reparari , nisi Deo denuo illustrante ; unde requiritur habituale donum , quod est gratiæ lumen .*

Confirmatur : Dum homo justificatur , fit objectum congruum dilectionis Dei supernaturalis , subindeque Deo gratus , & acceptus , ejusque amicus , imo & filius ejus adoptivus : Sed repugnat illos effectus prestatari nisi a gratia sanctificante ; cum illa sit terminus dilectionis Dei supernaturalis , & forma , per quam homo filius Dei adoptivus constituitur , ut constat ex supra dictis , & effectus formalis sine forma haberi nequeat , cum sit ipsamēt forma communicata . Ergo implicat , hominem sine gratia habituali justificari .

Dices , quod licet , juxta viam ordinariam , sola gratia habitualis sit una justificationis

forma ; tamen per absolutam Dei potentiam actus contritionis , & charitatis possunt esse causa formalis justificationis .

Sed contra primo : In causis formalibus non habet locum distinctio potentiae ordinariæ , & extraordinariæ , ut communiter docent nostri Thomistæ ; quia cum effectus suos per solam sui communicationem præsent , non possunt supernaturaliter efficere , quod nequeunt naturaliter operari : si enim per aliquid adventitium entitas formæ mutetur , non erit eadem forma ; si vero non mutetur , immutatus etiam erit effectus formalis ; cum ille nihil aliud sit , quam ipsa forma ut communicata subjecto , & preterea nihil : Ergo si actus contritionis , vel charitatis non sit naturaliter idonea justificationis forma , neque id vi ulla supernaturali consequitur .

Confirmatur : Id quod essentialiter est dispositio ad effectum formalem alicujus formæ , non potest , etiam de potentia absoluta , esse forma , ad cuius effectum disponit : sicut quia calor essentialiter est dispositio ad introductionem formæ ignis , & ad ejus effectum formalem , non potest , etiam de potentia , & lege extraordinaria , esse forma ignis , aut præstare effectum formæ ignis : Sed actus contritionis , vel charitatis est essentialiter dispositio ad justificationem , ut §. præcedenti contra Vasquem , & Meratium ostensum est : Ergo non potest , etiam de potentia absoluta , esse causa formalis justificationis , in statu naturæ ad ordinem , & finem supernaturalem elevatæ , sed hoc soli gratiæ habituali competere potest .

Quod vero in statu naturæ puræ justificatio fieret sine infusione gratiæ habitualis ,

lis , manifestum videtur , supposito quod status ille de lege Dei ordinaria possibilis sit , ut ostendimus in tractatu de variis statibus naturæ humanæ cap. ultimo , contra Jansenium , & Vincentium Contensonum , aliosque Recentiores , oppositum sentientes . Patet , inquam , hæc secunda pars nostræ assertionis : Tum quia peccatum habituale hominis in statu naturæ puræ constituti , & ad finem supernaturalem non elevati non esset privatio gratiæ , aut beatitudinis supernaturalis , sed tantum conversionis in Deum ut finem naturalem : Ergo per hujusmodi conversionem posset tolli , cum privatio tollatur per formam ipsi oppositam . Tum etiam , quia si ad remissionem , & expulsione talis peccati necessaria esset gratiæ habitualis , vel alterius doni supernaturalis infusio , sequeretur , impossibilem esse remissionem peccatorum , manente homine in illo statu ; cum per infusionem gratiæ habitualis , vel alterius doni supernaturalis educeretur homo e statu naturæ puræ , & constitueretur in statu gratiæ . Consequens non est admittendum : Ergo nec antecedens . Minor constat , quia alioquin homo manens in illo statu necessario esset miser , quippe qui semel lapsus in peccatum , nullum haberet remedium , quo posset reparari , & ab illo infelici statu resurgere ; subindeque non posset beatitudinem naturalem , ad quam esset ordinatus , consequi . Unde vel dicendum est , statum naturæ puræ esse impossibilem , & divinæ providentiae repugnantem ; cum suavitati divinæ providentiae repugnet , hominem in aliquo statu condere , vel ponere , in quo necessario sit miser , & suum ultimum finem , & beatitudinem natura-

lem consequi non valeat: Vel si hujus statutus possilitas admittatur, ut de facto admittendam esse loco citato ostendimus, assereendum est, quod justificatio in illo statu fieret sine gratiæ habitualis infusione, nimirum per actum contritionis naturalis de peccatis, includentem dilectionem Dei super omnia, ut est author naturæ. Cum enim peccatum habituale in illo statu solum importaret privationem conformitatis ad legem naturalem, & aversionem a Deo, ut sine naturali, ad ipsum destruendum sufficeret actus contritionis efficacis Dei, ut authoris naturæ, adjuncto favore Dei extirpoco, condonantis rationem offendæ.

§. III.

Solvuntur objectiones.

Obijicies primo contra primam partem assertionis: Gratia, & peccatum non opponuntur immediate: Ergo potest tolli peccatum sine infusione gratiæ. Consequen-tia patet: nam quando aliqua duo ita se invicem habent, ut non opponantur immediate, potest unum expelli a suo subjecto, absque eo quod introducatur aliud, ut patet in calore, & frigore, in albedine, & nigredine; potest enim idem subjectum de calido fieri non calidum, nempe frigidum, & de albo non album, nempe nigrum. Antecedens probatur. Si gratia, & peccatum opponerentur immediate, sequeretur, quod sicut juxta nos non potest tolli peccatum sine infusione gratiæ, ita nec posset auferri gratia ab homine, nisi supposito aliquo ejus peccato: Sed hoc dici nequit: Ergo nec illud.

Se-

Sequela majoris patet, minor etiam videatur certa; cum enim gratia habitualis dependeat a Deo in fieri, & in conservari, potest Deus illam auferre homini dormienti, absque ulla ejus culpa praecedente, & per suspensionem concursus conservativi eam destruere.

Respondeo ex D. Thoma qu. 28. de verit. artic. 2. ad 4. quod licet gratia, & peccatum, absolute loquendo, non sint opposita immediate, respectu tamen hominis lapsi, in statu elevationis naturæ humanæ ad finem supernaturalem, immediate opponuntur. Unde D. Thomas supra relatus ait, quod licet homo antequam peccet, potuerit esse sine gratia, & sine culpa (nempe in statu naturæ puræ) tamen post peccatum (in statu elevationis naturæ humanæ ad ordinem supernaturalem) non potest esse sine culpa, nisi gratiam habeat. Unde ad argumentum propositum, nego Antecedens, ad cuius probationem, nego minorem, & ad probationem illius dico, quod licet Deus absolute, & nulla facta suppositione, possit auferre gratiam homini dormienti, etiam nulla ejus culpa praecedente; hoc tamen impossibile est, supposito decreto Dei ordinante, & elevante naturam humanam ad ordinem, & finem supernaturalem. Nam Deum per extrinsecam ordinationem elevare hominem ad ordinem supernaturalem, est Deum velle, quantum est de se, & nisi per ipsum hominem sterterit, dare illi gratiam habitualem, sine qua mereri nequit de condigno vitam æternam: unde si Deus auferret alicui gratiam habitualem, absque ulla ejus culpa, ille non maneret amplius ordinatus in vitam æternam, & finem supernaturalem.

Objicies secundo contra secundam partem assertionis. D. Thomas qu. 28. de verit. art. 2. ad 5. sic habet: *Si a solo statu naturae decidisset homo, nihilominus tamen ad expiationem infinitę offensae donum divinę gratię requireretur. Ergo sentit, quod si homo conditus in puris naturalibus peccaret mortaliiter, non posset peccatum mortale ipsi remitti sine infusione gratię.*

Respondeo, D. Thomam per donum divinæ gratię non intelligere gratiam habitualem, aut aliud donum entitative supernaturale. cum enim status naturæ puræ talia dona excludat, implicat, quod homo peccans in statu naturæ puræ, manendo in eodem statu, ad expiandam offensam contra Deum commissam, indigeat gratia, aut dono entitative supernaturali; indigentia enim horum donorum statum naturæ puræ extingueret, cum natura pura exigentiam omnium donorum supernaturalium excludat. Unde necessario hæc verba D. Thomæ intelligenda, & explicanda sunt de auxilio intra ordinem naturæ speciali, sine quo homo in puris naturalibus conditus non potuisset diligere Deum ut authorem naturæ, ut cap. 3. ostensum est, nec per consequens actus dilectionis Dei authoris naturæ, vel contritionis naturalis elicere, ad expiandam offensam contra Deum ut authorem naturæ commissam. Cum enim tale auxilium non esset statui puræ naturæ debitum, sed ex divinæ providentiæ suavitate concessum, donum gratuitum, vel donum divinæ gratię merito appellari potest, ut constat ex dictis initio hujus tractatus, ubi triplicem gratię acceptiōem, & significatiōem exposuimus.

Con-

Contra eandem partem nostræ assertionis multipliciter arguit P. Contensonus tomo 5. pag. 490. Primo, non est efficacior (inquit) actus dilectionis, & contritionis mere naturalis in statu naturæ puræ, quam actus dilectionis, & contritionis supernaturalis in statu naturæ lapsæ: Ergo si iste in statu naturæ lapsæ nequeat esse iustificationis forma, nec ille in statu naturæ puræ. Secundo: Quod est essentialiter dispositio ad effectum formam alicujus formæ, non potest esse forma, ad cuius effectum disponit; sicut calor disponens ad ignem nunquam potest esse forma ignis: Sed actus contritionis, vel charitatis, ex sua essentiali ratione, habet duntaxat esse dispositionem ad formam iustificationis: Ergo impossibile est, talem actum esse in aliquo statu iustificationis formam. Tertio: Justificatio peccatoris procedit ex speciali dilectione Dei, peccatum condonare, & injuriam remittere volentis: Atqui singularis illa Dei dilectio aliquid peccatori imprimere debet, ad quod terminetur; cum amor divinus non supponat, sed ponat bonitatem in rebus, ut frequenter Angelicus Doctor inculcat: illud autem nihil aliud esse potest, quam gratia habitualis: Ergo illa in omni statu una est iustificationis forma, nec alia esse potest. Demum forma iustificationis debet esse aliquid ratum, & permanens in subiecto: Sed actus contritionis, vel charitatis est essentialiter fluens, & transiens: Ergo impossibile est, illum in aliquo statu esse iustificationis formam; alioquin simili modo Vasquez, & Meratius dicere poterunt, tales actus, in statu elevationis naturæ humanæ ad ordinem supernaturalem, esse ipsam iustificationis formam, corruent-

que

que omnia argumenta , quibus Authores illos impugnavimus .

Verum hæc levia sunt , & probant solum , actum contritionis , vel charitatis supernalis non esse , nec esse posse formam justificantem in statu naturæ ad ordinem supernaturalem elevatæ . Unde ad primum respondeo , quod licet actus contritionis , vel dilectionis naturalis , per se , & ex natura sua , non possit esse efficacior , & potentior ad justificandum , quam actus contritionis , & dilectionis supernaturalis ; bene tamen per accidens , & ratione status , in quo elicetur : si enim in eo natura non sit elevata ad ordinem supernaturalem , subindeque peccatum non inducat privationem gratiæ sanctificantis , sed duntaxat conversionis in Deum , ut authorem naturæ (ut contigisset in statu naturæ puræ) actus contritionis , & dilectionis naturalis sufficiens est ad justificandum , eo quod talem privationem conversionis in Deum ut authorem naturæ possit expellere , cum omnis privatio tollatur per formam ipsi oppositam . Unde falsum est , quod talis actus in statu naturæ puræ esset essentialiter dispositio ad formam justificationis . Ex quo patet responsio ad secundum . Ad tertium dico , quod dilectio illa singularis , qua Deus peccatorem in statu naturæ puræ justificare velleret , aliquid ei imprimiceret , quod esset terminus ipsius , sed non gratiam habitualem , vel aliud donum gratuitum ordinis supernaturalis ; (status enim naturæ puræ talia dona excluderet , & cum illis esset incompossibilis) sed auxilium intra ordinem naturæ speciale , quo peccator actum conversionis , & dilectionis Dei naturalis eliceret ; tale enim auxilium (ut supra ostendimus)

mus) statui naturæ puræ non repugnaret, sed cum eo stare posset. Nec obest, quod illud esset transiens, sicut & actus contritionis, & dilectionis Dei ut authoris naturæ; cum enim in statu naturæ puræ macula peccati non confisteret in privatione gratiæ habituallis, vel alterius qualitatis, aut formæ permanentis, sed duntaxat in privatione conversionis in Deum ut authorem naturæ, per auxilium fluens, & actum dilectionis, vel contritionis transeuntem, illo mediante elicatum, tolleretur. Ex quo patet solutio ultimi argumenti, & discrimen notabile, quod inter sententiam Vasquezii, ac Meratii, & nostram intercedit. Illi enim Authores loquuntur de justificatione hominis in statu naturæ ad ordinem supernaturalem elevatæ, quæ nec per auxilium fluens, nec per actum transeuntem fieri potest, sed duntaxat per gratiam habitualem, & permanentem; cum in illo statu peccatum habituale in privatione gratiæ sanctificantis consistat.

§. IV.

Corollarium notatu dignum..

EX dictis intelliges, quod licet inter homines possit fieri condonatio, & remissio offendæ, absque intrinseca offendentis mutatione; Deus tamen non potest peccatori remittere, & condonare offendam, absque intrinseca illius mutatione. Probatur assignando triplicem rationem discriminis. Prima est, quia unus homo potest remittere, & condonare offendam homini, per sui mutationem, & eliciendo actum de novo, quo vult illi non esse amplius offensus. Deus autem, cum sit ab in-

intrinseco immutabilis, non potest remittere offendam per sui mutationem, sed solum per mutationem ipsius peccatoris. Altera est, quia offensa hominis contra hominem nihil offendenti aufert, cuius privatione manente non remittatur offensa; sicque ut remittatur, necesse non est aliquid inhærens offendenti producere, sed sufficit extrinseca condonatio offendæ: Offensa vero contra Deum aufert offendenti gratiam habitualem, conversionem ad Deum, & conformitatem ad rationem, & legem, quorum privatio dum manet, non remittitur Dei offensa; sicque necessarium est, ut aliquid reale, & inhærens producatur in homine, quo talis privatio auferatur, & offensa remittatur. Tertia assignatur a D. Thoma 3. p. q. 86. art. 2. in corp. ubi sic discurrit. „Offensa directe op-
 „ponitur gratiæ, ex hoc enim dicitur a-
 „liquis alteri esse offensus, quod repellit
 „eum a gratia sua..... Hoc autem
 „interest inter gratiam Dei, & hominis,
 „quod gratia hominis non causat, sed præ-
 „supponit bonitatem veram, vel apparen-
 „tem in homine grato; sed gratia Dei cau-
 „sat bonitatem in homine grato, eo quod
 „bona voluntas Dei, quæ in nomine gra-
 „tiæ intelligitur, est causa omnis boni crea-
 „ti. Unde potest contingere, quod homo
 „remittat offendam, qua offensus est, ali-
 „cui, absque aliqua immutatione volun-
 „tatis ejus; non autem contingere potest,
 „quod Deus remittat offendam alicui, ab-
 „que immutatione voluntatis ejus.

Dices primo: Dilectio Dei specialis, qua vult remittere culpam, & condonare offendam, non necessitate aliqua, sed omnino libere concurrit ad productionem gratiæ habituialis,

tualis , & aliorum donorum supernaturalium : Ergo Deus potest illam habere sine infusione gratiæ , vel alterius doni supernaturalis , per quod intrinsece mutetur peccator .

Sed nego consequentiam ; libertas enim divinæ dilectionis non potest ab ea tollere , quod est de ejus natura , seu essentia : de ratione autem dilectionis Dei specialis est reddere hominem objectum sibi congruum , per infusionem donorum supernaturalium , ut docet S. Thomas hic q. 110. art. 1.

Dices secundo . In dispensatione voti Deus relaxat ejus vinculum , absque ulla intrinseca mutatione voventis : Pariter ergo poterit absque intrinseca mutatione peccatoris eum liberare a reatu culpæ , & offensam ipsi remittere .

Sed nego pariter consequentiam , & paritatem . Deus enim relaxare potest voti vinculum per solam mutationem moralem voventis ; quia voti obligatio dependet a duobus , nempe a promissione voventis , & acceptatione Dei , quæ acceptatio in votis , quæ dispensatione tolluntur , non est facta a Deo , nisi usque ad illud tempus , quo peteretur dispensatio , & concederetur ministerio Vicarii Christi , aut aliorum habentium in Ecclesia facultatem dispensandi ; unde adveniente illo tempore , positis aliis , cessat illa obligatio per solam immutationem moralem voventis . At vero esse aversum a Deo , non est effectus dependens ex aliqua Dei dispositione , sed ex sola natura peccati mortalis ; unde sicut esse cœcum , aut mortuum , non potest tolli , nisi per receptionem formarum hujusmodi privationibus oppositarum ; ita & esse aversum a Deo (in quo consistit ratio offensæ , seu injuriæ ipsi per peccatum mortale illatae) tol-

li nequit per solam temporis , aut divinæ voluntatis mutationem moralem , sed duntaxat per receptionem alicujus formæ supernaturalis , convertentis in Deum ut ultimum finem .

§. V.

De dispositionibus ad justificationem requisitis .

Requiri in adultis dispositiones ad justificationis gratiam obtainendam , de fide certum est , ut constat ex Tridentino sess. 6. cap. 5. & 6. & probat D. Thomas hic q. 112. art. 3. hac ratione : Deus movet unumquodque secundum modum suum , & naturam ; ac proinde cum movet adultum de peccato ad justitiam , simul etiam movet liberum arbitrium ad eandem justitiam , & justitiæ fontem , quia homo adultus ex natura sua , & modo operandi est liber ; liberum autem ita postulat moveri , ut se moveat , exceptis motibus primo primis , in quibus naturum est moveri solum . Deinde , ut idem S. Doctor i. p. q. 12. art. 5. discurrit : Omne , quod elevatur ad aliquid excedens suam naturam , debet disponi aliqua dispositione , maxime quando forma , ad quam elevatur , est perfecta , & per se primo intenta , ac terminus ultimus generationis : Sed homo per gratiam justificantem elevatur ad participationem divinæ naturæ , quæ participatio est supra naturam hominis , & terminus ultimus generationis spiritualis : Ergo oportet , quod homo ad illam recipiendam disponatur . Sicut in naturalibus indispensabiliter requiruntur dispositio-

sitiones ad formas substantiales, quia per se primo intenduntur, & sunt terminus ultimus generationis naturalis. Superest ergo hic explicandum, quænam sint dispositiones ad justificationem requisitæ, seu qui actus ad justificationem adulti, tam ex parte intellegentius, quam ex parte voluntatis, sint necessarii? Agimus autem hic de justificatione in communi, nam de illa, quæ fit in susceptione baptismi, vel per Sacramentum pœnitentiæ, in tractatu de Sacramentis differemus. His præmissis,

Dico primo, fidem requiri ad justificationem adulti, illam tamen solam ad eam non sufficere.

Prima pars patet ex Scriptura: ad Hebræos 10. *Sine fide impossibile est placere Deo.* Marci ultimo: *Qui crediderit, salvus erit,* &c. Constat etiam ex Tridentino sess. 6. c. 6. ubi inter dispositiones ad justificationem requisitas, primo numeratur actus fidei, his verbis: *Disponuntur (adulti) ad ipsam justitiam, dum excitati divina gratia, & adjuti, fidem ex auditu concipientes, libere mouentur in Deum, credentes vera esse, quæ diuinus revelata, & promissa sunt.* Et c. 8. *Fides est humanæ salutis initium, fundatum, & radix omnis justificationis.* Unde August. serm. 22. *Domus Dei fide fundatur, spe erigitur, charitate perficitur.*

Ratio etiam suffragatur. nam ut discurrit D. Thomas hic art. 4. ad justificationem adulti requiritur motus aliquis liberi arbitrii, quo mens hominis avertatur a peccato, & convertatur ad Deum: Sed primus accessus ad Deum fit per cognitionem fidei, juxta illud ad Hebræos 11. *Accedenter ad Deum oportet credere:* Ergo actus fidei

dei requiritur ad justificationem adulti.

Confirmatur: Cum voluntas sit potentia cœca, & indigeat luce, & directione intellectus, impossibile est eam converti in Deum ut finem supernaturalem, sine præcedenti actu intellectus, quo Deum ut finem supernaturalem cognoscat: Sed hic actus est actus fidei: Ergo ad conversionem, & justificationem peccatoris requiritur actus fidei.

Secunda vero pars, quæ asserit solam fidem non sufficerè ad justificationem, definitur in Tridentino sess. 6. can. 9. contra hæreticos nostri temporis, & colligitur ex Scriptura 1. Corinth. 15. *Si habuero omnem fidem, ita ut montes transferam, charitatem autem non habuero, nihil mihi prodest.* Jacobi 2. *Fides sine operibus mortua est.* Unde August. serm. 237. Attende ad ipsum fidei nomen: *fides enim appellata est, quia fit, quod dicitur.* Due syllabæ sonant, cum dicitur fides: *prima syllaba a facto, secunda est a dicto.* Interrogo te, utrum credas? Dicis, credo: fac quod dicas, & fides est. Illi succinit Bernardus super Cantica, exponens hæc verba, *Recti diligunt te.* sic enim ait: *Quid fidem tuam ab actu dividis? fidem per rimis tuam;* fides enim sine operibus mortua est. *Munus mortuum offers.* Quæ hostia pacifica, ubi tanta discordia? Non Deum placas, sed offendis, discors tibi. Nec mirum, si Cain in fratrem suum insurrexerit, qui fidem prius occiderat suam, fideicida, priusquam fraticida. Fidem ergo tuam animet dilectio, probet actio.

Eadem veritas hac ratione congrua suaderi potest: Homo per voluntatem suam aversus est a Deo, cum peccavit: Ergo ut remittatur ei peccatum, debet ad ipsum converti

verti per actum voluntatis ; & per consequens non sufficit actus fidei.

Confirmatur : Voluntas per peccatum fuit præcipue fauciata : Ergo congruum est , ut illa per aliquos actus sibi proprios moveatur ad justificationem , quæ est illius sanitas .

Neque his obstant aliqua Scripturæ testimonia , quibus justificatio tribuitur fidei , nulla facta mentione operum . Nam illi tribuitur , non ut formæ justificanti , aut dispositioni ultimæ , se sola sufficienti , sed ut primo fundamento , & radici totius justificationis , ut docet Tridentinum supra citatum . Cum vero Apostolus ad Roman . 3 . dicit : *Arbitramur enim justificari hominem per fidem , sine operibus ,* solum excludit opera legis , vel naturæ facta sine spiritu fidei . Unde Hieronymus hunc locum expōnens , & errorem Calvinistarum , soli fidei justificationem tribuentium , veluti prævidens , ac præfocans , sic ait : *Abutuntur quidam hoc loco , ad destructionem operum justitiae , solam fidem posse sufficere affirmantes ; cum tamen alibi dicat Apostolus : Si habuero omnem fidem , ita ut montes transferam , charitatem autem non habuero , nihil mihi prodest .*

Dico secundo , actum spei ad justificationem requiri .

Constat ex Tridentino sess . 14 . c . 4 . ubi ait , contritionem , quæ omni tempore fuit necessaria ad impetrandam veniam peccatorum post baptismum commissorum , præparare ad justificationem , si conjuncta sit cum fiducia diuinæ misericordiæ . Et postea , cum loquitur de attritione , dicit , quod si excludat voluntatem peccandi , cum spe veniæ , disponit ad gratiam in sacramento impetrandam . Favet etiam

Scri-

Scriptura, dicitur enim Marc. 10. *Confide, filia, remittuntur tibi peccata tua.* Et ad Roman. 8. *Spe salvi facti sumus.* Ratio quoque suffragatur: cum enim remissio peccatorum non sit bonum humanum, sed divinum, & a solo Deo sperandum, non potest homo conari ad illud obtainendum, nisi speret se illud obtenturum, juxta illud Ambrosii l. 1. de pœnit. c. 1. *Nemo potest agere pœnitentiam, nisi speraverit indulgentiam.*

Dico tertio, ad justificationem adultorum, quæ fit extra sacramentum, præter actum fidei, & spei, requiri etiam actum contritionis, & charitatis. Nam ut discurrit D. Thomas hic ar. 5. ad justificationem requiritur, quod homo recedat a peccato, & accedat, seu convertatur ad Deum; sicut ad motum localem necesse est, quod mobile recedat a termino a quo, & accedat ad terminum ad quem: Sed recessus a peccato fit per contritionem, qua illud detestamur, & odio habemus; accessus vero, seu conversio ad Deum fit per actum charitatis, quo ad illum accedimus, illique conjungimur, juxta illud Augustini: *Ad Deum accedimus, non passibus corporis, sed mentis affectibus:* Ergo ad justificationem adulti extra sacramentum requiritur actus contritionis, & charitatis. Dixi extra sacramentum, quia quando adultus justificatur ex vi sacramenti, sufficit attritio supernaturalis, ut in Tractatu de pœnitentia ostendemus.

§. VI.

*Actus contritionis, & charitatis effectivæ
procedunt a gratia habituali, ad
quam disponunt.*

ITa communiter docent nostri Thomistæ, paucis recentioribus exceptis. Probaturque primo ex D. Thoma, qui hic art. 7. & 8. aperte favet nostræ sententiæ. Nam art. 7. in corp. sic ait: *Justificatio impii originaliter consistit in gratiæ infusione; per eam enim & liberum arbitrium movetur, & culpa remittitur.* Quibus verbis manifeste declarat, ad justificationem impii non requiri auxilium movens, a gratia habituali distinctum, sed ipsam movere simul liberum arbitrium, & culpam remittere; subindeque simul præstare munus auxilii moventis ad actus contritionis, & charitatis, & formæ animam sanctificantis, & mundantis a sordibus peccatorum. Unde articulo sequenti ait, quod *ipsa Dei moventis motio est gratiæ infusio.* Quod vero nomine gratiæ habitualis intelligat, non vero auxilium actuale ab ea distinctum, manifestum est. Primo, quia loquitur de gratia, per quam fit remissio culpæ, sive quæ est causa formalis justificationis: illa autem non est gratia actualis, sed habitualis: Ergo de ista loquitur, non de illa. Secundo, quia loquitur de gratia, quæ requirit dispositiones in subiecto, ut patet ex verbis istis immediate sequentibus: *Quod aliqua forma non subito imprimatur subiecto, contingit ex hoc, quod subiectum non est dispositum, & agens indiget tempore ad hoc, quod subiectum disponat, &c.* Sed gratia, quæ in-

indiget dispositionibus, ut in anima recipiatur, non est actualis, sed habitualis, ut constat ex eodem S. Doctore hic quæst. 112. art. 2. ubi docet nullam ex parte hominis requiri dispositionem ad gratiam actualem, sed duntaxat ad habitualem: Ergo de gratia habituali loquitur, cum ait, quod *per eam & liberum arbitrium movetur, & culpa remittitur*. Nec obest, quod ibidem dicat, quod *tota justificatio impii originaliter constituit in gratiae infusione*. Nam ly originaliter non excludit a gratia, de qua loquitur, rationem causæ formalis justificationis, sed solum significat, quod talis gratia ita est causa remissionis peccatorum, ut sit radix, fons, & origo totius sanctitatis, & omnium donorum, & charismatum, quæ in peccatore justificato reperiuntur.

Potest insuper probari assertio triplici ratione. Prima potest sic proponi: De actus vitalis est, quod procedat a principio proximo vitæ, ut conjuncto principio radicali, ut patet in omnibus actibus vitalibus, tam corporeis, quam spiritualibus, qui procedunt a potentia conjuncta animæ: Sed actus contritionis, & charitatis sunt vitales vita supernaturali; nam justus ex fide per dilectionem operante vivit: Ergo procedunt ab habitibus charitatis, & penitentiarum, ut conjunctis gratiæ sanctificanti, quæ est principium radicale vitæ supernaturalis.

Nec valet responsio P. Contensoni, dicentis, habituum supernaturalium influxum auxilii actualis supernaturalis influxu posse suppleri; sicut Paulus Dei visionem elicuit, non per habitum luminis gloriæ, sed impressione luminis transeunter communicati. Non valet, inquam, hæc solutio: Etsi enim

præ-

præternaturaliter , & de potentia absoluta homo possit elicere actus vitales ordinis supernaturalis sine habitibus supernaturalibus , ratione auxilii supernaturalis , supplentis vicem illorum , ut contigit in visione D. Pauli ; certum tamen est (ut fatetur prædictus Author) habitus supernaturales requiri ad melius , & connaturalius operandum , & de lege , ac potentia Dei ordinaria : Sed actus charitatis , & contritionis , qui ad gratiam sanctificantem disponunt , non solum sunt vitales vita supernaturali , sed etiam connaturaliter eliciuntur ab anima , & non præternaturaliter , ac de potentia Dei absoluta ; alioquin justificatio peccatoris esset miraculosa , sicut visio D. Pauli : Ergo tales actus non eliciuntur ab homine , mediante auxilio transeunte , sed mediantibus habitibus charitatis , & pœnitentiæ , ut conjunctis gratiæ sanctificanti , tanquam principio radicali vitæ supernaturalis .

Secunda ratio sic breviter proponitur : Inclinatio actualis perfecta in aliquem finem supponere debet (saltem connaturaliter , & de via Dei ordinaria) naturam tali fini proportionatam : Sed actus charitatis est inclinatio actualis perfecta in Deum ut ultimum finem : Ergo ut eliciatur connaturaliter , ut contingit in justificatione peccatoris , supponere debet gratiam sanctificantem , quæ se habet ut natura tali fini proportionata .

Tertia ratio philosophica est , & potest sic formari : Non repugnat , imo connaturale est , aliquid disponere subjectum ad perceptiōnem alicujus formæ , & nihilominus ab ea procedere : Ergo licet actus contritionis , & charitatis ad gratiam sanctificantem ultimo disponant , possunt tamen ab illa effective pro-

cedere. Consequentia patet, Antecedens vero declaratur, ac suadetur variis exemplis e Philosophia petitis. In primis enim nostri Thomistæ communiter docent in libris de generatione, & corruptione, dispositiones concomitantes formam geniti disponere ad ejus receptionem, & nihilominus ab ea procedere: v. g. calorem ut octo, qui est ultima dispositio ad formam ignis, ab ea profluere; idque manifeste afferit S. Thomas 3. p. quæst. 7. ar. 13. ad 2. his verbis: *Calor, qui fuit dispositio ad formam ignis, est effectus profluens a forma ignis jam præexistentis.* Et quæst. 9. ar. 3. ad 2. ait: *Per calorem disponitur materia ad suscipiendam formam ignis, qua tamen adveniente, calor non cessat, sed remanet quasi quidam effectus talis formæ:* Ergo non repugnat aliquid disponere ad receptionem alicujus formæ, & nihilominus ab illa causari: subindeque actus contritionis, & charitatis a gratia justificante, ad quam disponunt, effective procedere. Et certe si hoc accidit in generatione naturali, cur non poterit similiter contingere in generatione spirituali, quæ fit in justificatione peccatoris? Præsertim cum de rebus supernaturalibus, servata proportione, & dempta earum supernaturalitate, philosophandum sit, sicut de naturalibus; gratia enim, quantum fieri potest, naturæ attemperatur, & accommodatur, ut pasim docent Theologi.

Secundum exemplum ex Philosophia de sumptum est: Organizatio corporis est dispositio ad receptionem animæ, & tamen corpus non habet esse organicum, nisi ab anima, ut docet S. Thomas 1. par. quæst. 76. artic. 4. ad 1. & communiter Philo phi,

phi , cum explicant hanc definitionem animæ ab Aristotele traditam , *Anima est actus corporis organici* , &c.

Tertium exemplum : Diaphaneitas , seu perspicuitas est ultima dispositio in corpore diaphano ad receptionem lucis , quæ propterea definitur ab Aristotele *actus perspicui* ; & tamen talis diaphaneitas a luce procedit , cum impossibile sit aliquid corpus esse diaphanum , nisi ex participacione lucis .

Demum ventus intrans per fenestram in aulam est causa efficiens apertio fenestræ ; & tamen apertio fenestræ , utpote impedimenti remotio , concurrit in genere causæ dispositivæ ad prædictum venti ingressum : Ergo non repugnat , sed potius connaturaliter fieri potest , ut aliquid pendeat ab alio in genere causæ efficientis , & nihilominus sit prius illo in genere causæ disponentis ; subindeque nec quod actus contritionis , & charitatis ad gratiam habitualem ultimo disponant , & nihilominus ab illa effective procedant : Quia nimirum causæ sunt sibi invicem causæ , ut ait Philosop. 5. metaph. & 2. physic. unde quod in uno genere est causa alterius , potest in alio genere ab illo dependere , & causari , subindeque in diverso genere causæ simul esse prius , & posterius . Sic materia est prior forma in genere causæ sustentantis , & illa posterior in genere causæ actuantis , & informantis . Sic ambulatio est causa efficiens sanationis , & sanatio causa finalis ambulacionis . Sic ex parte solis prius est illuminare , quam tenebras removere : ex parte autem aeris prius est purgari a tenebris , quam consequi lumen , ordine naturæ , licet utrumque sit

simul, ut ait D. Thomas hic art. 8. ad 1. Sic demum corruptio secundum ordinem causæ materialis dispositivæ est prior generatio-ne, seu introductione formæ; & tamen introductio formæ est prior alterius corrup-tione, & expulsione in genere causæ effi-cientis, formalis, & finalis, ut afferit idem S. Doctor in 4. distin. 22. quæst. 1. ar. 4.

Ut hæc melius percipiантur, & præci-pua Adversariorum argumenta solvantur, cum Cajetano, Conrado, Ferrariensi, Al-vare, aliisque celebrioribus Thomistis bre-viter observandum est, gratiam habitua-lem, quæ in justificatione infunditur, pos-se considerari duobus modis, secundum quos duo munia diversa exerceat: Primo ut est in fieri, seu infundi, & prout se tenet ex parte Dei illam communicantis: Secun-do ut est infusa, & in facto esse, & quatenus se tenet ex parte hominis illam recipi-entis. Primo modo gerit vices auxilii mo-ventis, secundo habet rationem habitus, & formæ permanentis, atque animam san-ctificantis, ac dantis esse divinum participa-tive, esse gratum Deo, & objectum con-gruum dilectionis ejus; & quia primum munus est propter secundum, exerceat prius primum, quam secundum, ordine execu-tionis. Quare prius prioritate a quo com-municatur animæ, in ratione auxilii mo-ventis, quam in ratione habitus, & formæ sanctificantis; ut communicata prius in ra-tione auxilii, disponat per actus contritio-nis, & charitatis ad sui connaturalem re-cepcionem in ratione habitus. Unde D. Tho-mas supra relatus ait, quod per eam & libe-rum arbitrium movetur, & culpa remittitur. Quibus verbis gratiam habitualem utrum-que

que munus auxilii moventis, & formæ sanctificantis præstare, manifeste declarat.

Ex his præcipua Adversariorum argumenta sponte liquecunt, & in sumum, & auram resolvuntur. Objicit enim primo Suarez: Si actus charitatis, & contritionis in instanti justificationis sint a gratia, præsupponunt eam existentem (cum causa efficiens causet ut existens) ac proinde ut unitam animæ; cum gratia sit accidens, & existentia accidentis sit inexistentia, seu inhærentia: Ergo non possunt animam disponere ad receptionem ejus in subjecto.

Sed facile respondetur ex dictis, distinguendo Antecedens: præsupponunt eam ut existentem, & unitam animæ, in ratione auxilii moventis, concedo Antecedens: in ratione habitus, & formæ sanctificantis, nego Antecedens, & consequentiam. Potest enim gratia habitualis prius natura uniri animæ per modum auxilii moventis, ut illam ultimo præparet, ac disponat per actus contritionis, & charitatis ad recipiendos effectus formales, quos tribuit, ut habet rationem habitus, & formæ sanctificantis.

Objicit secundo: Gratia habitualis infunditur homini, quia est contritus: At si contritio eliceretur ab habitu gratiæ, hæc causalis non esset vera, sed potius ista: ideo homo conteritur, quia ipsi infunditur habitus gratiæ: Ergo contritio, per quam homo ad justificationem ultimo disponitur, non procedit ab habitu gratiæ, sed ab auxilio actuali, per modum transeuntis collato.

Respondeo, concessa Majori, negando Minorem; cum enim gratia habitualis exerceat munus auxilii moventis, & formæ

sanctificantis, utraque causalis est vera: prima quidem intellecta de gratia, ut habet rationem habitus, & formæ sanctificantis; secunda vero intellecta de eadem gratia, ut gerit vices auxilii. Sicut in ordine naturali istæ causales sunt veræ in diverso genere causæ: fenestra aperitur, quia ventus aulam ingreditur, quia fenestra aperitur. Anima unitur corpori, quia est organicum: corpus organicum est, quia anima ei unitur, & ipsum informat. Corpus recipit lucem, quia est diaphanum, & est diaphanum, quia recipit lucem. Aer illuminatur, quia purgatur a tenebris, & purgatur a tenebris, quia illuminatur. Causæ enim, ut supra dicebamus, sunt sibi invicem causæ; unde quod causat aliquid in uno genere causæ, ab illo causari, & dependere potest in alio genere.

Objicit tertio quidam Recentior: Homo per visionem, & ambulationem non potest seipsum disponere ad habendos oculos, vel pedes, quia tales actiones effectivæ procedunt a potentia visiva, & progressiva. Calor etiam, quamvis possit esse ultima dispositio ad formam ignis, non tamen calefactio, quia a tali forma effectivæ producitur: Ergo similiiter, si actus contritionis, & charitatis a gratia habituali effectivæ procedant, non poterunt ad ipsam disponere, vel si ad eam disponant, ab ipsa procedere non poterunt.

Respondeo, concessso Antecedente, negando consequentiam, & paritatem. Ratio autem disparitatis est, quia visio, & ambulatio, cum sint actiones successivæ, non possunt fieri in instanti, unde presupponunt in homine potentiam progressivam, & visivam, non solum prioritate naturæ, & instanti.

stantis a quo, sed etiam prioritate temporis, & existentiæ, seu instantis in quo: quare cum ultima dispositio ad aliquam formam eam comitetur, & sit in subjecto in eodem instanti, quo forma in ipso recipitur, implicat quod homo per visionem, & deambulationem seipsum disponat ad habendos oculos, & pedes; & idem est de calefactione respectu ignis, cum illa pariter sit actio successiva, & non instantanea. E contra vero, cum actus contritionis, & charitatis sint actiones instantaneæ, & non successivæ, eliciuntur ab homine in eodem instanti justificationis, in quo gratia infunditur, eamque prioritate solum naturæ præcedunt; ideoque licet ab ipsa effective procedant, possunt tamen ad illam disponere, non ad modum dispositionis anteecedentis, sed concomitantis; sicut calor ut octo disponit ad formam ignis, a qua profuit, ut ait D. Thomas supra relatus.

Objiciunt insuper Adversarii aliqua D. Thomæ testimonia, quæ videntur adversari nostræ sententiae. Nam S. Doctor i. p. qu. 62. ar. 2. ad 3. dicit, quod ad conversionem, per quam aliquis se præparat ad gratiam habendam, *non exigitur aliqua habitualis gratia, sed operatio Dei ad se animam convertentis.* Et in hac parte qu. 109. ar. 6. ait, quod *ad hoc quod præparet se homo ad susceptionem doni gratiæ habitualis, non oportet presupponere aliquod donum habituale in anima, quia sic procederetur in infinitum: sed oportet presupponi aliquod auxilium gratuitum Dei interius animam moventis.*

Verum ad hæc facile respondetur, D. Thomam his, & similibus locis solum intendere, ad conversionem, qua aliquis se

præparat ad gratiam habendam , non requiri aliam habitualem gratiam , seu donum habituale distinctum a gratia sanctificante, quæ in instanti justificationis infunditur , alias daretur processus in infinitum ; sed sufficere talem gratiam , quæ prout infunditur, gerit vices auxilii moventis , subindeque Dei motio , vel Dei moventis auxilium appellari potest . Unde locis supra relatis ait , quod per eam liberum arbitrium movetur , & culpa remittitur : Et quod ipsa Dei moventis motio est gratiæ infusio . Quo nihil clarius , & expressius in favorem nostræ sententæ dici potest . Et hæc sufficient de justificatione peccatoris , quæ a D. Chrysologo ser. 72. *Sacramentum pavoris Sanctorum* appellatur . Unde serm. 68. mirabundus exclamat : *Stupent Angeli , miratur cœlum , pavet terra , caro non fert , auditus non capit , non attingit mens , tota sustinere non potest creatura , estimare non sufficit , credere pertimescit .*

CAPUT XVI.

De merito justi , quod est tertius gratiæ habitualis effectus .

Hominem ex gratia , seu per gratiam operando posse vere , & proprie , seu de condigno aliquid a Deo promereri , constat ex variis Scripturæ locis , quibus asseritur operibus justorum respondere mercedem apud Deum , & gloriam dari a Deo ut justo Judice , & tanquam coronam justitiae . Et in hoc Deus honori nostro non parum profecto consuluit . nam ut eleganter ait Cassiodorus : *Parum laudis habet virtutum corona , que ex labore non descendit ;*

dit ; potest quidem habere palmam , sed non habet gloriam . Hæc est magnarum ratio virtutum , ut quanto plus homo laborat , tanto plus mercedis acquirat . Neque per justorum merita Christi meritis derogatur , ut garriunt Novatores , sed potius ea magis attolluntur , & amplificantur ; cum maxima gloria sit , quod Christus non solum potuerit pro se mereri , sed etiam suis meritis nobis vim ad merendum obtinere : Sicut quod causæ naturales possint aliquid efficere , non derogat infinitæ potentiaz , & efficientiaz Dei , sed potius illius virtutem ostendit , quatenus non solum virtutem efficiendi habet , sed etiam potest alios efficienes efficere , servata sibi nihilominus semper propria excellentia primæ , & universalissimæ causæ . Hoc præmisso , duo præcipue hic discutienda , & explicanda sunt , nimirum quæ conditiones ad meritum requirantur , & quænam homo possit sibi , vel aliis de condigno , vel de congruo promereri ?

§. I.

De conditionibus ad merendum requisitis.

SEX requiruntur conditiones ad meritum , tres se tenent ex parte actus meritorii , duæ ex parte hominis merentis , & ultima ex parte Dei præmiantis , de quibus hic breviter agendum est .

*Tres conditiones ex parte actus meritorii
requisitæ .*

UT actus sit meritorius , in primis debet esse liber , non solum libertate a coactione , sed etiam a necessitate , ut defi-

nit Innocentius V. in sua constitutione, & expresse docet D. Thomas quæst. 6. de malo artic. unico, ubi ait, quod opinio aliquorum, qui posuerunt, quod voluntas hominis ex necessitate movetur ad aliquid eligendum, quamvis ad id non cogatur, est hæretica, tollit enim rationem meriti, & demeriti ab humanis actibus; non enim videtur esse meritorium, quod aliquis sic ex necessitate agit, quod vitare non possit. Ratio etiam id suadet: nam esse meritorium, vel demeritorium, est proprietas quædam actus humani: Sed actus pure spontanei & a sola coactione, non vero a necessitate immunes, non sunt proprie humani: Ergo nec meritorii, vel demeritorii. Major patet. Minor probatur. *Illæ actiones proprie humanae dicuntur, quæ ex voluntate deliberata procedunt, ut ait S. Doctor in hac parte supra qu. i. ar. i.* Sed actus pure spontanei non procedunt a voluntate deliberata, id est ex deliberatione rationis, & electione voluntatis, ut patet in amore beatifico, & volitione boni in communi: Ergo actus humani proprie dici non possunt. Argumenta, quæ in contrarium fieri solent, in tractatu de voluntario, & involuntario cap. 4. §. 2. proposita, & soluta sunt.

Secundo, ut actus sit meritorius apud Deum, debet esse moraliter bonus, quia opus malum non est dignum præmio, sed poena: opus vero indifferens vel nullum est in individuo, juxta communiorum, & probabiliter sententiam; vel si opus indifferens in individuo admittatur, non est cur potius præmio, quam pena dignum sit; nam si non meretur poenam, quia caret malitia, etiam non meretur præmium, quia caret bonitate morali.

Ter-

Tertio, ut opus sit meritorium, debet fieri in obsequium alterius, illius scilicet, qui mercedem, sive præmium redditurus est: Cum enim meritum respiciat retributionem, oportet ut retributio expectetur, & debeatur a persona determinata; quod enim a nullo debetur, a nullo jure aliquo exigitur: Sed non debetur merces ab aliqua persona, nec ab ea jure exigi potest, nisi actio ad ipsam dirigatur, & in ejus obsequium cedat: Ergo ut opus sit meritorium, debet fieri in obsequium alterius, & cedere in bonum, utilitatem, vel honorem illius, qui mercedem, sive præmium redditurus est.

Due conditiones ex parte personæ merentis necessarie.

PRIMA est status gratiæ, hoc enim supponit Tridentinum sess. 6. cap. 16. & can. 32. & colligitur ex Scriptura Joan. 15. *Sicut palmes non potest ferre fructum, nisi manferit in vite, sic nec vos, nisi in me manferitis, nempe per fidem, & charitatem, ut SS. Patres, & Scripturæ interpretes passim exponunt.* Ratio autem est, quia ad meritum condignum vitæ æternæ non solum opus, sed etiam persona debet esse isti fini proportionata, subindeque ad ordinem divinum, & statum amicitiæ, & filiationis divinæ per gratiam sanctificantem elevata.

Altera est status viæ, ut ex variis Scripturæ testimoniis aperte colligitur. Dicitur enim Eccli. 9. *Mortui non habent ultra mercedem.* Et cap. 11. *Ubi ceciderit lignum, ibi manebit.* Ubi per casum ligni mors hominis designatur, & per ejus immobilitatem, & perma-

nentiam meritum, vel demeritum hominis in alia vita non augeri, vel minui declaratur. Unde Apostolus ad Galat. 6. *Dum tempus habemus, operemur bonum ad omnes.* Et Ecclesiastes cap. 9. *Quodcumque (inquit) facere potest manus tua, instanter operare.* Quia (ut ait Hieronymus in cap. 6. 1. ad Corinth.) *Tempus sementis est præsens vita, cum transferit, operandi tempus aufertur.* Demum ipse Christus Joan. 9. de se dicebat: *Me oportet operari opera ejus, qui misit me, donec dies est. Venit nox, quando nemo potest operari.* Ubi per diem tempus præsentis vitæ intelligitur, per noctem vero mors, seu status post mortem, in quo nemo potest meritorie operari. Unde Origenes homil. 3. in Ps. 36., Dominus Salvator ait, *veniet nox, quando nemo potest operari, & hoc dicit de illo tempore, quo unusquisq; pro malis suis recipiet penas.* Tunc ergo dieit *mortem illam futuram, cum jam nemo potest operari aliquid, sed unusquisq; tunc pascitur ex operibus suis, quæ hic positus operatus est.* Cum ergo nox fuerit, nemo operatur. In illo tempore malo, cum peccatores suppliciis affliguntur, erit sine dubio fames his, qui nullos fructus boni operis collegerunt. In illo autem famis tempore saturabuntur justi, ex fructibus scilicet justitiae suæ. Sicut enim in deserto sex diebus colligebat manna, in sexta autem die non unius diei modum, sed quantum sufficeret ad crastinum, colligebant, & unusquisq; edebat in die sabbati, quæ collegerat in die sexta: ita etiam nunc velut sexta quædam dies putanda est Domini nostri Jesu Christi adventus, & tempus hoc dispensationis ejus, quam passione sua hoc in sæculo procuravit. Et idcirco dum in die sexta sumus, colligamus manna

du-

„ dupliciter, ut sufficere nobis possit, dum
 „ advenerit vera sabbati observatio populo
 „ Dei. Si enim non collegerimus duplices
 „ cibos, qui nobis & in præsenti sæculo suf-
 „ fificant, & in futuro, in diebus famis non
 „ saturabimur.

Hujus conditionis nullam aliam existimo assignari posse rationem, quam divinam voluntatem, quæ disposuit, & ordinavit dare præmium operibus viæ, non autem illis, quæ sunt post mortem. Valde tamen consente ad naturam hominis præfixus est terminus viæ, in puncto mortis, & dissolutionis animæ a corpore; connaturale enim est animæ humanæ, ut mediante corpore suam perfectionem acquirat, & in illo plures habeat occasiones merendi, & pugnandi pro bravio beatitudinis comparando. Congruum enim est, ut creaturæ intellectuales per fidem ad visionem perveniant, & prius intellectum Deo submittant, quam ad illum videndum eleventur.

Quid vero dicendum sit de Enoch, & Elia, in paradiſo terrestri degentibus, & Antichristum, quem debellaturi, & extincturi sunt, præstolantibus, utrum mereantur, necne? problema est utrinque probabile, aliis affirmantibus, aliis negantibus. Unum ex his duobus necessario dicendum existimo, nempe vel illos sanctos viros, ab eo tempore, quo in paradiſum terrestrem translati sunt, non mereri; quia licet mortales sint, non sunt tamen conditionibus mortalitatis subjecti, sicut alii homines, qui lege, & modo communi in corpore mortali vivunt; subindeque nec sunt propriæ viatores, nec comprehensores, sed veluti *æternitatis candidati*, ut loquitur Tertullianus libro de resurrectione carnis.

Vel

Vel si ab eo tempore mereantur, eorumque meritum duret usque ad illorum mortem, quam pro Christo in fine mundi patientur, eos tunc in gratia, & charitate æquaturos Apostolos, ipsumque Joannem Baptistam, subindeque in gloria, & beatitudine pares illis futuros. Nec mirum, cum illi futuri sint secundi Christi adventus præcursores, Apostoli, nec non Martyres ejus gloriosi, qui (ut ait idem Tertullianus) *Antichristum sanguine suo extinguent*. Quid horum probabilius, & verosimilius sit, prudens Lector judicabit.

*Conditio ad meritum ex parte Dei requi-
sita, nempe ordinatio operis ad
præmium.*

Ratio est primo, quia Deus non est causa pax alicujus obligationis erga creaturam, nisi ex ordinatione sua, ut docent D. Augustinus in Psal. 83. his verbis: *Debitorem ipse fecit se, non accipiendo, sed promittendo*, & S. Thomas hic qu. 114. art. 1. ad 3. ubi ait: *Deus non efficitur simpliciter debitor nobis, sed sibi ipsi, in quantum debitum est, ut sua ordinatio impleatur*. Ergo ut actio hominis erga Deum inducat aliquod jus retribuendi præmium, indiget Dei ordinatio. Unde idem S. Doctor in corp. ejusdem articuli sic ait: *Meritum hominis apud Deum esse non potest, nisi secundum presuppositionem divine ordinationis*.

Secundo, cum opera nostra sint pluribus titulis Deo debita, si Deus ea non ordinaret ad præmium, nullum homo posset jus habere ad illud, nec per consequens infallibiliter illud assequi; posset enim Deus opera nostra acce-

acceptare pro aliis titulis sibi debitibus, puta pro titulo creationis, vel supremi dominii, quod habet in omnes creaturas: Ergo ut homo possit apud Deum mereri aliquod præmium, & infallibiliter illud assequi, necesse est, ut Deus ad illud ordinet opera eius. Cujus etiam signum est, quod opera justorum in purgatorio existentium, & liberi Beatorum actus, quamvis a charitate profecti, nihil tamen apud Deum merentur; quia licet interno valore non careant, ea tamen ad præmium Deus non ordinavit.

§. II.

*Retributio præmii pro meritis in Deo non est
actus gratitudinis, aut fidelitatis, sed
strictæ justitiæ non commutativæ,
sed distributivæ.*

Prima pars hujus assertionis probatur primo ex illo Apostoli 2. ad Timoth. 4. *Reposita est mihi corona justitiae, quam reddet mihi Dominus in illa die justus iudex.* Ex quibus verbis hoc potest argumentum deduci: Quod datur ut corona justitiae, & a Deo ut justo judice, tribuitur ex justitia, non vero ex gratitudine solum, aut fidelitate: Sed ex Apostolo vita æterna datur a Deo ut corona justitiae, & ab illo ut justo judice confertur: Ergo datur ex justitia, non vero ex gratitudine solum, aut fidelitate. Unde D. Thomas ibidem lecit. 2. verba illa Apostoli expendens, sic ait: *Corona justitiae dicitur, quia eam Deus ex sua justitia reddit.* Et Augustinus tract. 3. in Joan. Jam debitum flagitat (inquit)
jam

jam debitum exigit: ut ante susciperet gratiam, misericordem patrem opus habebat; ut præmium gratiæ, justum judicem.

Confirmatur ex eodem Apostolo ad Hebræos 6. dicente: *Non est injustus Deus, ut obliviscatur operis vestri: At si ex sola fidelitate mercedem operibus meritoriis debitam retribueret, si eam denegaret, non deberet dici injustus, sed infidelis: Ergo non ex fidelitate, sed ex justitia Deus reddit præmium meritis nostris.* Unde Augustinus de natura, & gratia cap. 2. *Non est injustus Deus, ut justos fraudet mercede justitie.* Et lib. 3. contra Julian. cap. 3. *Deus ipse (quod absit) non erit justus, si ad eius regnum verus non admittitur justus.*

Probatur secundo eadem pars hac ratione: Licet id, quod est debitum merito, possit reddi ex fidelitate, si sit promissum, aut ex gratitudine, si detur in recognitio-
nem beneficii recepti; quatenus tamen est debitum merito ut tali, tanquam præmium scilicet, corona, & merces formaliter, non redditur ex fidelitate, aut gratitudine: tum quia neutra ex illis virtutibus hanc ratio-
nem formaliter respicit: tum etiam, quia si quod redditur ex fidelitate, esset præ-
mium, & corona, sequeretur, quod incar-
natio, quæ ex fidelitate promissionum di-
vinarum fuit data antiquis Patribus, & re-
missio peccatorum, quæ peccatori se con-
vertenti datur ex fidelitate divinæ promis-
sionis, his verbis Zachar. 1. expressæ: *Con-
vertimini ad me, & ego convertar ad vos,*
essent præmium, merces, & corona justitiæ,
quod tamen dici nequit; cum utraque sit
pure gratuita, & non possit cadere sub me-
rito, saltem de condigno; ut de infusione
pri-

primæ gratiæ infra patebit. Similiter si quod datur ex gratitudine, præmium esset, munera, quæ in gratiarum actionem Deo offerimus, haberent rationem præmii, & coronæ, quod etiam absurdum est: Ergo quod est debitum ex merito, quatenus tali, non nisi ex justitia redditur.

Confirmatur: Ex promissione acceptata sub conditione operis æqualis oritur obligatio ex vera justitia, ut patet in obligatione reddendi denarium, conventione facta cum operariis, sub conditione laborandi in vinea. Unde cum Deus promiserit justis vitam æternam, sub conditione bonorum operum, quæ ratione gratiæ, & charitatis, a qua procedunt, habent æqualitatem, seu proportionem cum vita æterna, ut §. sequenti patebit; supposito tali pacto, seu promissione, oritur in Deo obligatio strictæ justitiæ ad remunerandum bona opera justorum, ex gratia, & charitate procedentia.

Quod vero talis justitia non sit commutativa, sed distributiva, constat ex dictis in tractatu de voluntate Dei cap. 5. §. 3. ubi ostendimus, in Deo non dari erga homines justitiam commutativam, sed tantum distributivam; & varias, quæ inter utramque reperiuntur, differentias ibidem exposuimus. Unde brevitati studentes, ad hunc locum Lectorem remittimus, ne eadem hic inutiliter repetamus.

Objicies primo contra primam partem assertoris: Tridentinum sess. 6. cap. 16. sic habet:
„Justificatis hominibus, & bene operantibus
„proponenda est vita æterna, tanquam gratia
„misericorditer promissa: Sed quod datur
ex vera, & stricta justitia, gratiæ nomine
appel-

appellari nequit : Ergo vita æterna operibus bonis , & meritoriis non tribuitur a Deo ex vera , & stricta justitia , sed tantum ex fidelitate , vel gratitudine .

Respondeo , vitam æternam appellari gratiam , vel quia ortum habet ex summa gratia , gratuita scilicet Dei prædestinatione ; vel dicitur gratia in radice , quia prima gratia sanctificans , quæ est principium , & radix meriti vitæ æternæ , gratuito , & misericorditer datur . Non intendit tamen Concilium negare , quod vita æterna detur ex justitia , quatenus est merces bonorum operum , sed id expresse ibidem asserit , subdens : „ & tan-
 „ quam merces ex ipsius Dei promissione ,
 „ bonis ipsorum operibus , & meritis fideliter reddenda : hæc est enim illa corona
 „ justitiæ , quam post suum certamen , & cursum repositam sibi esse ajebat Apostolus ,
 „ a justo judice sibi reddendam . „ Idem colligitur ex Arausiano II. cap. 18. dicente : *Debetur merces bonis operibus , si fiant , sed gratia , quæ non debetur , præcedit , ut fiant .* Id etiam eleganter expressit D. Prosper 2. de vocat. Gentium cap. 2. his verbis : „ Da-
 „ tur unicuique gratia sine merito , unde
 „ tendat ad meritum ; & datur ante ullum
 „ laborem , unde quisque mercedem accipiat secundum suum laborem .

Objicies secundo : Merito non est debitum præmium ex justitia : Ergo redditio præmii non est in Deo actus justitiæ . Consequentia patet , Antecedens probatur . Si meritis hominum præmium vitæ æternæ esset debitum ex justitia , sequeretur , quod si Deus merita nostra non remuneraret , faceret nobis injuriam : Sed hoc non est dicendum : cum enim sit dominus absolutus omnium , nihil adimit non

non suum, & per consequens nulli facit injuriam. unde Augustinus super Psal. 70. Si Deus damnaret justum, quis ei diceret, quid fecisti? Quanta ergo misericordia, ut justificet injustum? Ergo merito non est debitum præmium ex justitia.

Respondeo negando Antecedens, intellectum de merito de condigno, ut debet intelligi: & ad illius probationem dico, quod si præmium vitæ æternæ esset debitum justis ex justitia commutativa, Deus facheret nobis injuriam, si merita nostra non remuneraret; secus vero si sit debitum solum ex justitia distributiva; quia debitum justitiæ distributivæ non nascitur ex jure alterius erga distribuentem, sicut debitum justitiæ commutativæ, sed ex naturali rectitudine, & ipsa lege æquitatis, qua tenetur distributor commensurare præmium meritis, illudque juxta proportionem dignitatis, vel laboris uniuscujusque distribuere. Unde malus distributor non facit proprie injuriam illi, cui non dat præmium æquale merito, sed reipublicæ, cujus est minister, vel legi, & æquitati naturali, quam violat, ut loco citato tractatu de voluntate Dei fusius declaravimus, ubi etiam solvimus objectiones, quæ contra secundam partem nostræ assertionis fieri solent. Unde supereft solum hic explicandum, quid homo de condigno, vel de congruo promereri possit?

§. III.

*Justi per opera ex gratia , & charitate
procedentia de condigno merentur
vitam æternam.*

Constat ex Tridentino sess. 6. cap. 16. ubi dicit, quod *bene operantibus usque in finem, & in Deo sperantibus proponenda est vita æterna, & tanquam gratia filiis Dei per Christum Jesum misericorditer promissa, & tanquam merces ex ipsius Dei promissione bonis ipsorum operibus, & meritis fideliter reddenda.* Et can. 32. *damnat eum, qui dixerit, Justificatum bonis operibus, quæ ab eo per Dei gratiam, & Jesu Christi meritum, cuius vivum membrum est, fiunt, non vere mereri augmentum gratiæ, vitam æternam, & ipsius vite æternæ, si tamen in gratia desserit, consecutionem.*

Ratio etiam suffragatur. In hoc enim distinguitur meritum de condigno a merito de congruo, quod illud habet quandam coaptationem, & æqualitatem saltem proportionis cum præmio, subindeque illud jure exigit; istud vero nullam habet cum præmio æqualitatem, nec debitum strictæ justitiæ, sed solum jus, & debitum amicitiæ importat: Sed opera iustorum, ut procedunt a gratia, & charitate, habent cum visione beatifica proportionis æqualitatem: Ergo illam de condigno promerentur. Major constat, minor probatur. *Gratia est semen gloriæ, & visionis beatificæ, ut constat ex illo I. Joan. 3. Semen Dei manet in illo:* At semen, licet secundum entitatem sit imperfectius fructu, est tamen illi æquale secundum virtutem, & proportionem; quia in

in semine non solum fructus, sed etiam tota arbor virtualiter continetur: Ergo gratia habitualis, & opera, quæ ex illa procedunt, habent æqualitatem proportionis cum gloria. Unde D. Thomas hic ar. 3. ad 3. *Gratia Spiritus Sancti, quam in praesenti habemus, et si non sit æqualis gloriæ in actu, est tamen æqualis in virtute, sicut semen arborum, in quo est virtus ad totam arborem.* Ob eandem rationem gratia appellatur Joan. 4. *fons aquæ salientis in vitam æternam,* quia nimirum fons proportionem habet ad flumen, imo totum flumen virtute continet. Item ad Ephes. 1. vocatur *pignus hereditatis nostræ,* quia sicut in hoc pignus ab arrha differt, quod arrha minoris est pretii, & valoris, quam res, quæ emitur, pignus vero tantum valet, quantum id, pro quo offeritur; ita pariter gratia sanctificans tantum valet, quantum visio beatifica; imo illam superat in perfectione, ut cap. 11. §. 3. corollario 2. ostensum est.

Hanc rationem egregie expendit S. Doctor hic art. 3. ubi ait, quod opus meritorium hominis justi potest dupliciter considerari, uno modo secundum quod procedit ex libero arbitrio, alio modo secundum quod est a gratia sanctificante. Si consideretur secundum substantiam operis, & prout est ex libero arbitrio, non potest esse meritorium de condigno vitae æternæ, propter maximam ejus inæqualitatem, & improportionem cum illa: Si vero loquamur de opere meritorio, secundum quod procedit ex gratia sanctificante, sic est meritorium vitae æternæ, etiam de condigno; quia sub hac ratione habet æqualem valorem cum beatitudine supernaturali. Unde sicut videmus, quod filius

natus ex Rege, & fœmina ignobili, quamvis ex parte matris non habeat jus hæreditarium ad regnum, illud tamen habet ratione patris, a quo nobilitatur: ita similiter, licet bona opera justorum, ut procedunt a voluntate humana, non habeant condignitatem, & sufficientem proportionem cum præmio vitæ æternæ; quatenus tamen sunt a Spiritu Sancto eam movente, & applicante, ac ipsi per gratiam, & charitatem conjuncto, sunt merititia de condigno æternæ beatitudinis.

Objicies primo illud Apostoli ad Roman. 8. *Non sunt condignæ passiones hujus temporis ad futuram gloriam, quæ revelabitur in nobis.* Quo significari videtur, actiones a nobis elicitas, & passiones toleratas nullam habere proportionem, & condignitatem cum gloria, quam expectamus; præsertim cum passiones, & operationes hujus vitæ cito transeant, & gloria perpetuo sit duratura. Unde idem Apostolus 2. ad Corinth. 4. ait, quod *momentaneum, & leve tribulationis nostræ æternum gloriæ pondus operatur in nobis.* Et D. Bernardus serm. 4. de diversis, „Transit hora, transit & pœna; non sic remuneratio, non sic merces ipsa laboris; nescit finem, manet tota simul, & manet in æternum: guttatum pœna bibitur; per minutias transit; at in remuneratione torrens est voluptatis, & fluminis impetus, torrens inundans latitudinæ, flumen gloriæ, flumen pacis.

Respondeo cum D. Thoma hic art. 3. ad 1. quod Apostolus loquitur de passionibus sanctorum secundum earum substantiam, non vero ut a gratia, & charitate procedunt; sic enim cum gloria habent condignitatem, & proportionem, ut ostensum est. Nec obstat,

stat, quod illæ cito transeant, & visio beatifica æternitate mensuretur; ista enim cum sua duratione immutabili, & indeterminabili, in gratia, tanquam fructus in semine, continetur. Unde Bernardus serm. 17. in Psalm. Qui habitat: *Latet gloria, fratres mei, abscondita est in tribulatione: in momentaneo hoc latet æternitas, in hoc levipondus sublime, & supra modum.*

Objicies secundo: Deus ex communi Theologorum sententia remunerat opera justorum ultra condignum: Ergo non est in operibus justorum vera condignitas ad præmium vitæ æternæ.

Sed nego consequentiam. Deum enim remunerare bona opera justorum ultra condignum, non ita accipiendum est, quasi non sint digna præmio vitæ æternæ; sed quod ultra præmium, quod de condigno bonis operibus debetur, Deus ex mera liberalitate, & magnificentia aliquem gradum gloriæ adjungat, ut sic reddat non solum mensuram confertam, qua æqualitas præmii ad meritum designatur, sed etiam coagmentatam, & superfluentem, per quod denotatur aliquis excessus supra æqualitatem.

§. IV.

Ut opera hominis justi sint meritoria de condigno vitæ æternæ, non sufficit, quod per habitum charitatis habitualiter ordinentur in Deum, sed relatio actualis, vel saltem virtualis charitatis requiritur.

PRobatur primo ex SS. Patribus, qui passim docent, charitatem esse radicem meriti

ti vitæ æternæ , subindeque debere in opera
 meritoria actualiter, vel saltem virtualiter in-
 fluere . Augustinus enim de spiritu , & litt. c.
 14. ait , quod fructus non est bonus , qui de cha-
 ritatis radice non surgit . Gregorius homil. 27.
 in Euang. Non habet (inquit) aliquid viridi-
 tatis ramus boni operis , si non manet in radice
 charitatis . Leo Magnus serm. 7. quadragesimæ
 expendens illud Matth. 25. , „ Quandiu feci-
 „ stis uni ex his fratribus meis minimis, mihi
 „ fecistis , sic habet : Quid hoc opere fructuo-
 „ sius ? Quid hac humanitate felicius ? quę uti-
 „ que laude sua fraudanda non esset , si propter
 „ ipsam naturæ communicationem juvando
 „ homini ab homine præberetur : Sed quia
 „ quod non ex fidei procedit fonte, ad præmia
 „ æterna non pervenit , alia est conditio ope-
 „ rum cœlestium, alia terrenorum . Ubi Ponti-
 fex ad opus cœleste , id est præmii cœlestis meri-
 torium, exigit, ut de fidei fonte procedat, fidei,
 inquam, non informis, & mortuę, sed vivę , &
 per dilectionem operantis . Demum S. Thomas
 in 2. dist. 40. q. 5. ar. 5. ad 6. sic discurrit : „ Ad
 „ meritum non sufficit omnino habitualis or-
 „ dinatio actus in Deum ; quia ex hoc , quod
 „ est in habitu , nemo meretur , sed ex hoc ,
 „ quod actu operatur : nec tamen oportet ,
 „ quod intentio actualis ordinans in finem ul-
 „ timum sit semper conjuncta cuilibet actio-
 „ ni , quæ dirigitur in aliquem finem proxi-
 „ mum, sed sufficit , quod aliquando actualiter
 „ omnes illi fines in finem proximum referan-
 „ tur . Et dist. 38. q. 1. ar. 1. ad 4. ait : Id patet in
 „ exemplo , quod Avicenna ponit de artifice ,
 „ qui , si dum opus suum exercet , semper de
 „ regula artis cogitaret , multum in opere
 „ impediretur ; sed sicut prius excogitavit
 „ per regulas artis , ita postmodum opera-
 „ tur ,

„ tur, & sic in opere ejus rectitudo artis sal-
„ vatur., Quo nihil clariss, & expressiss
in favorem nostræ assertionis dici potest .

Eadem veritas triplici ratione suaderi potest . Prima est : Infidelitas , vel status peccati mortalis , concomitans bona opera moralia ordinis naturalis , non vitiat illa , nec facit illa demeritoria , nisi aliquo modo informet ea , referendo in finem malum , ut cap. 3. ostensum est : Ergo pariter gratia , & charitas concomitans bona opera hominis justi non dignificat illa , nec reddit meritoria vitæ æternæ , nisi ea informet per actualem , aut saltem virtualem relationem ad Deum ut ultimum finem.

Secunda . Ut actus nostri sint meritorii de condigno vitæ æternæ , requiritur , ut fiant in obsequium Dei ; cum una ex conditionibus ad meritum requisitis sit , ut actus fiat in obsequium ejus , a quo merces exigitur , ut §. 1. declaravimus : Sed actus nostri non possunt fieri in obsequium Dei , nisi ad ipsum formaliter , vel saltem virtuiter ordinentur : Ergo ad meritum de condigno vitæ æternæ virtualis saltem in Deum ut finem ultimum relatio requiritur .

Tertia . Ut opera nostra sint meritoria de condigno vitæ æternæ , necesse est , quod sint supernaturalia quoad substantiam , vel saltem quoad modum ; quia , ut dicebamus §. præcedenti , opera meritoria de condigno debent esse ejusdem ordinis cum præmio : Sed ex sola concomitantia habitus charitatis opera nostra non possunt effici supernaturalia quoad substantiam , vel quoad modum ; ad hoc enim requiritur aliquis influxus charitatis actualis , aut virtualis , quo ad ordinem supernaturalem eleventur : Ergo ut actus

nostri sint meritorii de condigno vita æternæ, imperium actuale, vel saltem virtuale charitatis exigitur. Unde quando D. Thomas quæst. 2. de malo artic. 5. ad 7. ait, *habentibus charitatem omnis actus est meritorius*, non loquitur de habentibus charitatem solum habitualiter, & sine ullo influxu actuali, aut virtuali in actus aliarum virtutum, sed de habentibus charitatem formaliter, aut virtualiter influentem in hujusmodi actus. Similiter quando Tridentinum sess. 6. cap. 16. dicit, bona opera hominis justificati vitam æternam promereri, loquitur de operibus a gratia, & charitate procedentibus, vel ab ipsa imperatis; ait enim justum mereri *operibus in Deo factis*: Sicut autem quando opera dicuntur fieri in nomine Christi, intelligitur ea fieri ex motivo charitatis; ita & quando in Deo facta appellantur, significatur ea esse facta ex charitatis imperio, & ad Deum ultimum finem, virtualiter saltem, ordinata.

Objicies primo: Ut opera moraliter bona sint satisfactoria de condigno pro peccatis, non requiritur relatio, seu imperium charitatis: Ergo neque ut sint meritoria vita æternæ.

Respondeo, dato Antecedente, de quo in tractatu de pœnitentia, negando consequiam, & paritatem; quia aliunde petitur condignitas satisfactionis, & aliunde condignitas meriti; condignitas enim satisfactionis sumitur ex adæquatione pœnæ cum culpa, juxta illud Apocal. 18. *Quantum glorificavit se, & in deliciis fuit, tantum date illi tormentum, & luctum*: ad hoc autem ut pœna sit æqualis culpæ, charitatis imperium non requiritur: meritum vero de con-

tendigno vitæ æternæ fundatur in proportione actus cum tali præmio, quem opera nostra sine influxu actuali, aut virtuali charitatis habere nequeunt. Unde D. Thomas quæst. 2. de malo artic. 5. ad 7. *Modus charitatis sub necessitate præcepti includitur, secundum quod præceptum ordinatur ad consecutionem beatitudinis, non autem secundum quod ordinatur ad vitandum reatum pœnae.*

Ex hoc intelliges, hominem per opera moraliter bona ordinis naturalis posse implere præcepta naturalia, quamvis illis operibus non possit vitam æternam promerer, nisi fiant ex motivo charitatis, & ab illa virtualiter saltem imperentur. Unde quando Augustinus de spiritu, & litt. cap. 14. ait, *mandatum non servari, nisi ex amore justitiae; non enim fructus est bonus, qui de charitatis radice non surgit;* hoc debet intelligi de observantia mandatorum, ut est meritoria beatitudinis, & prout ad salutem animæ, & vitam æternam conducit: non vero de observantia præceptorum naturalium, quantum ad substantiam; hæc enim non solum ex charitatis radice, sed etiam ex amore boni honesti procedere potest, ut cap. 3. declaravimus.

Objicies secundo: Omnes actus Christi Domini erant infiniti valoris, ex eo præcise quod procedebant a persona infinitæ dignitatis: Ergo similiter in homine justo omnia opera bona meritoria erunt, ex eo præcise quod a persona grata procedant.

Respondeo primo, negando Antecedens. in Christo enim illæ duntaxat actiones erant infiniti valoris, quæ erant reflexivæ supra suppositum Verbi Divini, & quæ a Theologis Theandricæ appellantur, non

vero illæ, in quibus dignitas suppositi divini mere concomitanter, & materialiter se habebat, qualis erat v. g. comedio, aut deambulatio Christi, ut docent Theologi in Tractatu de Incarnatione.

Respondeo secundo, dato Antecedente, negando consequentiam, & paritatem; cum enim gratia sit habitus, subditur voluntati nostræ quantum ad usum: unde si nullatenus in opera nostra influat, & ad ea materialiter solum, & concomitanter se habeat, nullatenus ea significat: persona autem Verbi non subditur usui libero voluntatis, cum substantialis sit, & non possit voluntas sine personæ concursu operari; ideoque significat opera a Christo elicita secundum totum quod potest, & per consequens infinite.

§. V.

Soli charitati præmium esse essentiale beatitudinis tribuitur, aliis autem virtutibus præmium duntaxat accidentale, si illarum actus a charitate non imperentur.

Probatur primo ex Scriptura, quæ variis in locis testatur, coronam gloriæ, & dona, seu bona gloriæ cœlestis promissa, vel præparata esse soli charitati. Jacobi 1. *Beatus vir, qui suffert temptationem, quoniam cum probatus fuerit, accipiet coronam vitæ, quam repromisit Deus diligentibus se.* 1. ad Corinth. 2. *Oculus non vidit, nec auris audivit, nec in cor hominis ascendit quæ præparavit Deus iis, qui diligunt illum.* Cui consonat Oratio illa Ecclesiæ Dominicæ 3. post octavam Trinitatis: *Deus, qui diligenteribus*

tibus te bona invisibilia præparasti , infunde cordibus nostris tui amoris affectum , ut te in omnibus , & super omnia diligentes , promissiones tuas , quæ omne desiderium superant , consequamur . Demum Apocal. 21. Angelus mensura arundinea aurea metitur portas , & murum cœlestis Jerusalem , ut per hoc significaret , charitatem esse mensuram gloriæ essentialis , & gradus luminis gloriæ commensurari gradibus charitatis . Unde Augustinus lib. 83. quæstionum , quæst. 46. *Anima quantum charitati adhærescit , tantum lumine gloriæ illustrabitur .* Et D. Thomas 1. p. quæst. 12. artic. 6. Intelleximus plus participans de lumine gloriæ , perfectius Deum videbit : plus autem participat de lumine gloriæ , qui plus habet de charitate ; quia ubi major est caritas , ibi est majus desiderium , & desiderium quodammodo facit desiderantem aptum , & paratum ad susceptionem desiderati : unde qui plus habebit de charitate , perfectius Deum videbit , & beatior erit .

Eadem veritas triplici ratione probari potest . Prima est , perfectio vitæ Christianæ essentialiter consistit in charitate : Ergo meritū præmii essentialis in illa sola fundatur ; subindeque nulli alteri virtuti , nisi ex ejus motione , & imperio , potest competere . Consequentia patet : præmium enim essentiale patriæ correspondet perfectioni essentiali viæ ; unde tanto major quis erit in beatitudine , quanto præstantior fuerit in perfectione vitæ Christianæ . Antecedens vero docetur expresse a D. Thoma 2. 2. quæst. 184. artic. 1. ubi sic discurrit . *Unumquodque dicitur esse perfectum , in quantum attingit proprium finem , qui est ultima rerum perfectio : Charitas autem est , quæ unit nos Deo , qui est ultimus finis humanae mentis ,*

quia qui manet in charitate, in Deo manet,
 & Deus in eo, ut dicitur 1. Joan. 4. & ideo se-
 cundum charitatem specialiter attenditur per-
 fectio christiane vite. Unde Augustinus de
 natura, & gratia c. 42. Charitas est verissima,
 & plenissima, perfectissimaque justitia. Et
 cap. ultimo: Charitas inchoata, inchoata ju-
 stitia est; charitas provecta, provecta justitia
 est: charitas perfecta, perfecta justitia
 est. Item Bernardus serm. 27. in Cantica,
 magnitudinem animæ, seu perfectionem e-
 jus essentiale in ordine supernaturali, ex
 magnitudine, seu perfectione charitatis docet
 esse metiendam. Quantitas cujuscumque ani-
 mæ (inquit) æstimetur de mensura charitatis,
 quam habet, ut verbi gratia, quæ multum
 habet charitatis, magna sit; quæ parum, pa-
 rva; quæ vero nihil, nihil: dicente Aposto-
 lo, Si charitatem non habuero, nihil sum.

Secunda ratio: Per illud solum meremur
 præmium essentiale, quod consistit in frui-
 tione ultimi finis, per quod in hujusmodi
 finem tendimus: Sed per solam charita-
 tem in Deum ut ultimum finem tendi-
 mus: nam per actus virtutum moralium
 acquisitarum non tendimus nisi in bonum
 honestum ordinis naturalis; per actus vero
 virtutum moralium infusarum, in bonum
 honestum ordinis supernaturalis: Ergo per
 solos actus a charitate elicitos, vel impe-
 ratos præmium essentiale meremur.

Tertia ratio: Non est æquum, nec ra-
 tioni consonum, quod ancillæ, & pedisse-
 quæ habeant idem præmium, & eandem
 coronam, ac domina, & regina, nisi ex
 ejus imperio: Sed charitas est domina, &
 regina aliarum virtutum, quæ sunt veluti
 ejus ancillæ, & pedissequæ: Ergo charita-
 ti

ti specialis debetur corona , nempe gloria essentialis , quæ proinde non tribuitur aliis virtutibus , nisi ex ejus imperio .

Addo , quod , ut actus sit meritorius vitæ æternæ , debet in bonum Dei præmiantis referri , ut constat ex dictis §. 1. explicando conditiones ad meritum requisitas : Sed actus aliarum virtutum non referuntur in bonum divinum , nisi a charitate , quæ sola bonum divinum , seu Deum ut in se bonum respicit : Ergo non sunt meritorii vitæ æternæ , nisi ex charitatis imperio ; & per consequens , nisi a charitate imperentur , illis non datur præmium essentialie beatitudinis , sed duntaxat accidentale .

Objicies primo : Actus fidei est disposi-
tio valde proportionata præmio vitæ æter-
næ , ut docet D. Thomas in hac parte su-
pra qu. 3. art. 3. ubi ait , quod fidei in via
correspondet visio in patria , in qua forma-
liter consistit beatitudo . Idem dici potest de
spe ; tum quia est valde affinis fidei ; tum
etiam quia sicut fidei correspondet clara vi-
sio in patria , ita & spei comprehensio , ut
ibidem asserit S. Doctor . Ergo actus fidei ,
& spei sunt meritorii de condigno visionis
beatificæ , subindeque præmii essentialis .

Respondeo , quod actus fidei est disposi-
tio valde proportionata præmio vitæ æter-
næ , quando est formatus , & a charitate
formaliter , aut virtualiter imperatus ; secus
vero si sit informis , & si non includat , aut
supponat charitatis imperium . Unde quando
D. Thomas ait , fidei in via correspon-
dere visionem in patria , loquitur de fide
formata , & a charitate imperata . Idem ,
servata proportione , de actu spei dicendum
est ; licet enim spes sit virtus theologica ,

& propterea attingat Deum immediate, non tamen attingit Deum, ut est bonus in se, sed solum quatenus est bonum nostrum, & prout a nobis diligitur amore concupiscentiae; unde ut attingat illum, ut in se bonus est, & in ejus obsequium, & bonum referatur, requiritur charitatis imperium.

Objicies secundo: Actus virtutum moralium infusarum habent proportionem cum praemio essentiali vitaeternae: Ergo illud de condigno promerentur. Consequentia patet ex supra dictis, Antecedens vero sic ostenditur. Omnis actus procedens a gratia sanctificante habet proportionem cum vita eterna: Sed actus elicit a virtutibus moralibus infusis procedunt a gratia sanctificante: Ergo habent proportionem cum vita eterna. Minor constat; cum enim omnes virtutes infuse emanent a gratia, sicut proprietates ab essentia, ipsa gratia mediantibus illis operatur, eo modo quo essentia, mediis suis proprietatibus, seu potentiis. Major vero hoc ratione suadetur: Motus cuiuscumque naturae habet proportionem ad finem illius, sicut motus gravium, & levium est proportionatus ad fines ipsorum, & illa ad centrum perducit: Sed proprius finis gratiae est vita eterna; unde Joan. 4. gratia vocatur *fons aquae salientis in vitam eternam*: Ergo omnis actus procedens a gratia sanctificante habet proportionem cum vita eterna.

Respondeo negando Antecedens, & ad ejus probationem, distinguo majorem: Omnis actus procedens a gratia sanctificante habet proportionem cum vita eterna, mediante imperio charitatis, concedo majorem; secluso charitatis imperio, nego majorem.

Ad

Ad probationem illius , distinguo etiam maiorem : Motus cuiuslibet naturæ habet proportionem ad finem illius , si sit perfectus , concedo majorem : si sit imperfectus , nego majorem. Motus vero gratiæ imperfecti sunt , & veluti informes , nisi a charitate imperentur ; unde sine ejus motione , & imperio non possunt efficaciter tendere in finem ultimum , nec per consequens vitam æternam de condigno promereri . Nec obstat , quod gratia Joan. 4. appelletur *fons aquæ salientis in vitam eternam* : per hoc enim non significatur , quod gratia sanctificans immediate per seipsum tendat in vitam æternam , & claram Dei visionem , sed solum mediante charitate , quæ est prima , & principalis ejus proprietas , & formalis tendentia , seu inclinatio in finem supernaturalem . Sicut in naturalibus gravia , & levia per propriam naturam , & substantiam non tendunt ad centrum , sed mediante gravitate , & levitate , quæ sunt principia proxima motus sursum , & deorsum .

§. VI.

Opera bona moralia , e viribus nature profecta , nec de condigno , nec de congruo primam gratiam auxiliantem promerentur .

IN prima parte hujus assertionis , ut in fidei dogmate conveniunt omnes Theologi contra Pelagium , qui cum existimaret liberum arbitrium sufficere ad bene operandum , & per gratiam solum adjuvari , ut facilius posset , consequenter etiam asserebat , primum divinæ gratiæ auxilium dari nobis intuitu alicujus boni operis facti sine gratia , tanquam propter

Q 5 me-

meritum non solum de congruo, sed etiam de condigno. Hic error in pluribus Conciliis damnatus est, præsertim in Milevitano, Palestino, & Arausiano secundo, in quibus Pelagio præcipitur, ut fateatur gratiam Dei non secundum merita nostra dari.

Potest insuper dupli ratione confutari. Prima est: meritum de condigno adæquari debet præmio in morali æstimatione, ut constat ex dictis §. 3. At hujusmodi æqualitas operibus naturæ ad præmium supernaturale repugnat, cum res ordinis naturalis, & inferioris nequeat in morali æstimatione rem superioris ordinis adæquare; ut ex terminis manifestum apparet: Ergo etiam repugnat, quod opera naturalia sint condigne meritoria præmii supernaturalis.

Alteræ est. Prædestinatio Christi est exemplar nostræ: Sed unio hypostatica, quæ est primus, ac præcipuus prædestinationis Christi effectus, fuit pure gratuita, & absque ullis præcedentibus meritis, ut ex variis Scripturæ testimoniorum demonstrat Augustinus capit. 15. de prædest. sanctorum: Ergo similiter prima vocatio, seu primum gratiæ auxilium datur pure gratis, & non cadit sub merito de condigno operum naturalium.

Secunda vero pars assertionis, quæ dicit opera naturalia ne quidem de congruo primam gratiam auxiliantem promereret, est contra Semipelagianos, seu Massilienses, qui Pelagii hæresim aliqualiter temperantes, assertebant nos quidem non posse sine gratia Dei opera aliqua bona facere, sed debere præveniri voluntates nostras ab ipsa, ut aliquid opus bonum vel inchoetur, vel consummetur; Sed tamen dicebant, ante ipsam

psam gratiam præcedere ex parte nostra non quidem bona opera , sed initia quædam fidei , & bonæ voluntatis , quorum intuitu Deus movebatur ad dandam primam gratiam auxiliantem , subindeque aliquod meritum , saltem de congruo , respectu primæ gratiæ admittebant . Hic error videtur proscriptus in Tridentino sess. 6. capit. 4. ubi dicitur exordium nostræ justificationis desumi a vocatione Dei , *qua nullis eorum existentibus meritis vocantur* , &c. Nam particula illa negativa omne meritum tam de condigno , quam de congruo videtur excludere .

Potest etiam confutari ex Scriptura : Apostolus enim ad Ephes. 1. ait , nos esse sorte vocatos , & ad gratiam electos , subindeque nullis præcedentibus meritis , vel occasionibus , aut congruitatibus ; qui enim sorte eligitur , omnem istam præventionem excludit , ut ibidem lect. 4. observat D. Thomas , his verbis : *Quia sors nihil est aliud quam inquisitio rerum , quæ ex divina voluntate fiunt , gratia autem ejus ex sola divina voluntate dependet , inde est quod gratia divinæ vocatio- nis dicitur sors , quia Deus per modum sor- tis , secundum occultam providentiam , non ex alicujus meritis , per gratiam internam vo- cat.*

Demum idem error potest hac ratione refelli : Meritum de congruo potest dupliciter sumi : Primo stricte , & pro jure amicabili ad præmium , per quod distinguitur a merito de condigno , quod debitum strictæ justitiæ , & non solum jus , & debitum amicitiæ importat : Secundo large , & improprie , pro quacumque exigentia formæ , sive sit per modum juris , & condignitatis , sive per modum so-

lius habitudinis connaturalis, quo pacto o-
mnis dispositio potest dici meritum de con-
gruo respectu formæ, ad quam disponit,
quia eam connaturaliter exigit. At opera
naturalia neutro modo primam gratiam au-
xiliantem promerer possunt: Non quidem
primo, cum jus amicabile ex gratia sancti-
ficante media charitate proveniat, & ope-
ra naturalia gratiam justificantem antecedentia
sint ab inimico Dei. Nec etiam secun-
do, cum homo per opera viribus naturæ e-
licita non possit ad primum gratiæ auxilium se disponere, ut capit. 8. ostensum est:
Ergo opera naturalia ne quidem de congruo
primam gratiam auxiliantem promerer possunt.

Præcipuum Pelagianorum, & Semipelagi-
anorum motivum, ad asserendum primam
gratiam intuitu boni operis naturalis, tan-
quam meriti de condigno, vel saltem de con-
gruo, a Deo conferri, erat (ut constat ex E-
pistolis Prosperi, & Hilarii ad Augustinum)
quia si Deus sola sua voluntate, & nulla exi-
stente causa, occasione, vel merito, aut de-
merito ex parte hominis, suam gratiam con-
cederet, aut denegaret, esset personarum
acceptor, ac injustus suorum donorum distri-
butor; quod repugnat Apostolo ad Roman.
2. & ad Ephes. 6. dicenti: *Non est acceptio
personarum apud Deum.*

Sed hoc fundamentum facile potest convelli. vitium enim acceptio personarum tunc
solum incurritur, quando quod debetur plu-
ribus, uni soli confertur: At divina gratia
nulli debetur, alias gratia non esset: Ergo
Deus eam tribuens uni, & non alteri, nul-
lo ex parte eorum præcedente discriminé,
acceptor personarum non est.

Cos.

Confirmatur, & magis illustratur hæc ratio: Personarum acceptio opponitur justitiæ distributivæ, ut docet D. Thomas 2. 2. qu. 63. art. 1. Sed justitia distributiva non habet locum in gratuitis, & indebitis, quæsia sunt dona, & auxilia gratiæ, ut declarat idem S. Doctor in capit. 9. epist. ad Roman. lect. 3. his verbis: „ Justitia distri-
„ butiva locum habet in his, quæ dantur
„ ex debito, puta si aliqui meruerunt mer-
„ cedem, ut plus laborantibus major mer-
„ ces donetur; non autem habet locum in
„ his, quæ sponte, & misericorditer aliquis
„ dat; puta si aliquis duos pauperes in via
„ inventiens, det uni quod potest, vel dis-
„ ponit in eleemosynam dare, non est ini-
„ quus, sed misericors. Similiter si aliquis,
„ duobus æque ipsum offendentibus, uni
„ dimittat offensam, & non alteri, est mi-
„ sericors uni, & justus ad alterum, neutri
„ vero iniquus. Cum ergo omnes homi-
„ nes, propter peccatum primi parentis,
„ damnationi nascantur obnoxii, quos Deus
„ per suam gratiam liberat, sola misericor-
„ dia liberat, & sic quibusdam est miseri-
„ cors, quos liberat, quibusdam autem ju-
„ stus, quos non liberat, neutrism autem ini-
„ quis.

Confirmatur amplius: Absque vitio accep-
tionis personarum Deus ex pluribus creatu-
ris possibilibus quasdam decrevit produc-
re, aliis relictis intra statum possibilitatis; &
tamen ex parte illarum, quas de facto produxit,
nulla ratio inducens ad earum productionem
præcessit. Et ut Deus humanitatem Verbo co-
pularet, nullum ex parte illius meritum præ-
cessit; & tamen ex hoc quod alias humanità-
tes sibi unibiles reliquerit, tale vitium non
incur-

incurrit: Ergo similiter, licet Deus uni, & non alteri suam gratiam largiatur, nullo ex parte illorum præcedente discrimine, non potest argui tanquam personarum acceptor, ac injustus suorum donorum distributor. Unde belle S. Prosper lib. 2. de vocat. Gentium cap. 32. „ De parentum carnalium ju-
 „ diciis conqueri non audemus, cum aliquos
 „ filios suos, ante ulla morum examina,
 „ ante aliqua pietatis obsequia, indulgen-
 „ tiori complectantur affectu. In dominis
 „ quoque erga famulos libera est dispositio;
 „ neque juste quoque reprehenditur, qui de
 „ unius conditionis familia quosdam sibi,
 „ quos benignius honestaret, & quos libe-
 „ ralius erudiret, elegit. Nunquid de sum-
 „ mi Patris, & veri Domini benevolentis-
 „ sima æquitate causandum est, quod in ma-
 „ gna domo ejus innumeris differentiis u-
 „ niversa variantur?

Aliud difficile argumentum contra secun-
 dam nostræ assertionis partem in hunc mo-
 dum proponi potest: Magis distat ordo hy-
 postaticus ab ordine gratiæ, quam ordo gra-
 tiæ ab ordine naturæ; cum illa distantia sit
 infinita, hæc autem finita. Sed non obstan-
 te hac majori distantia, potest ordo hypo-
 staticus cadere sub merito de congruo a-
 ctuum pertinentium ad ordinem gratiæ: ut
 enim docent Theologi in tractatu de Incar-
 natione, antiqui Patres meruerunt de con-
 gruo substantiam, aut saltem circumstantias
Incarnationis: Ergo a fortiori opera ordinis
 naturalis possunt mereri de congruo præ-
 mium pertinens ad ordinem gratiæ, non
 obstante distantia, quæ inter utrumque or-
 dinem reperitur.

Respondeo, majorem esse veram de distan-
 tia

tia entitativa , falsum de distantia proportionis, & habitudinis ; nam hoc modo plus distat ordo gratiæ ab ordine naturæ , quam ordo hypostaticus ab ordine gratiæ : cum enim isti ordines intra genus ordinis supernaturalis contineantur , unus potest terminare habitudinem actuum spectantium ad alium ; e contra vero , cum ordines gratiæ , & naturæ sint omnino diversi , unus non potest ordinari ad alterum , sed forma supernaturalis totius naturæ existentiam excedit .

Hæc responsio , & doctrina potest hoc exemplo illustrari . Plus distat Deus ab intellectu perfuso lumine gloriæ , quam substantia spiritualis ab oculo corporeo ; & tamen potest Deus ab intellectu lumine gloriæ perfuso videri , secus autem substantia spiritualis ab oculo corporeo . Cujus alia ratio esse nequit , nisi quia major illa distantia est in genere entis , non in ratione habitudinis potentiarum , & objecti . Idem cum proportione dicendum est in præsenti , scilicet quod ordo hypostaticus potest attingi ab ordine gratiæ , quamvis ordo gratiæ non possit attingi ab ordine naturæ ; quia licet ordo hypostaticus magis distet ab ordine gratiæ , quam ordo gratiæ ab ordine naturæ ; illa tamen major distantia est in genere entis , non vero in ratione proportionis , & habitudinis , ob rationem , quam assignavimus .

§. VII.

Homo non meretur de condigno primam gratiam justificantem, bene tamen augmentum ejus, & primam gloriam, prima gratiae habituali correspondentem.

Prima pars videtur certa de fide: tum quia ad Roman. 3. dicitur: *Justificati gratis per gratiam ipsius*: tum etiam, quia Concilium Arausicanum can. 17. definit, charitatem esse *donum Dei diffusum in cordibus nostris, nullis ex parte nostra precedentibus meritis*. Et Tridentinum sess. 6. cap. 8. prædicta Apostoli verba exponens, ait: *Gratis justificari ideo dicimur, quia nihil eorum, quæ justificationem præcedunt, sive fides, sive opera, ipsam justificationis gratiam promeretur.*

Ratio etiam suffragatur. nam si homo meretur de condigno primam gratiam justificantem, vel eam mereretur per opera ipsam antecedentia, vel per opera ipsam subsequentia: Non primum: tum quia opera primam gratiam justificantem antecedentia vel sunt pure naturalia, vel imperfecte supernaturalia, subindeque gratiæ justificanti, quæ est perfectissima forma ordinis supernaturalis, impropotionata. Tum etiam, quia omne opus existentis in peccato impeditur ob indispositionem, & statum subjecti, ne habeat rationem meriti apud Deum. Neque secundum: primo quia cum meritum sit veluti motus quidam, & via ad præmium, non potest esse quid posterius illo; unde homo non potest mereri illud, quod jam habet, sicut nec sperare bonum, quod jam

jam possidet. De quo fusius in tractatu de Incarn. cap. 5. Secundo, quia actus non potest esse meritorius illius formæ, a qua totum suum valorem desumit: unde communiter dicitur: *principium meriti non potest cadere sub merito:* Sed actus, qui gratiam justificantem in anima supponunt, & ea sunt posteriores, ab illa totam suam dignitatem, & valorem meritorum desumunt: Ergo illam mereri nequeunt.

Quod vero mereantur augmentum gratiæ, constat ex Tridentino sess. 6. can. 32. ubi anathema dicit ei, qui dixerit, hominis justificati bona opera non vere mereri augmentum gratiæ. Et ex Augustino tract. 5. super epist. Joannis, ubi sic ait: *Charitas meretur augmen-*
ti, ut cuæta mereatur perfici. Id etiam fraudet ratio D. Thomæ hic art. 8. ubi sic discurrit:
 „ Illud cadit sub merito condigni, ad quod
 „ motio gratiæ se extendit: motio autem ali-
 „ cuius moventis non solum se extendit ad ul-
 „ timum terminum motus, sed etiam ad totū
 „ progressum in motu: terminus autem mo-
 „ tus gratiæ est vita æterna; progressus autem
 „ in hoc motu est secundum augmentum cha-
 „ ritatis, vel gratiæ, secundum illud Prov.
 „ 4. Justorum semita quasi lux splendens pro-
 „ cedit, & crescit usque ad perfectum diem,
 „ qui est dies gloriæ: sic igitur augmentum
 „ gratiæ cadit sub merito condigni.

Demum quod justi mereantur primam glo-
 riæ, prime gratiæ habituali correspondētem,
 patet ex jam dictis: cum enim prima gloria nō
 sit principium merendi, sicut prima gratia, sed
 potius terminus meriti, nihil obstat, quomodo
 nus homo per actus contritionis, & charita-
 tis, in instanti justificationis elicitos, primam
 gloriam primæ gratiæ justificanti responden-
 tem mereatur de condigno, quamvis ta-
 lem

lem gratiam per illos actus de condigno mereri nequeat. Unde D. Thomas supra qu. 112. art. 2. ad 1. *Preparatio hominis ad graziam habendam, quedam est simul cum ipsa infusione gratiae; & talis operatio est quidem meritoria, sed non gratiae, quae jam habetur, sed glorie, quae nondum habetur.*

Quæres, an homo per actus contritionis, & charitatis, aliosque actus, quibus ad gratiam justificantem disponitur, eam mereatur de congruo.

Respondeo affirmative, si meritum de congruo large, & improprie accipiatur; nam aetibus charitatis, contritionis, aliisque bonis operibus justificationem antecedentibus peccator ad primam gratiam justificantem disponitur, & eam impetrat a Deo: Sed dispositio dicit congruentiam quandam respectu formæ, ad quam disponit, cum eam connaturaliter exigat. Similiter petitio, & imprecatio alicujus doni aliquod meritum imperfectum dici potest, juxta illud Augustini ep. 105. *Neque ipsa remissio peccatorum sine aliquo merito est, si fides hanc impetrat; neque enim nullum est meritum fidei:* Ergo homo aetibus contritionis, & charitatis, aliisque, quibus ad gratiam justificantem disponitur, eam meretur de congruo, si meritum de congruo large, & improprie usurpetur. Secus vero, si proprie, & stricte sumatur, prout scilicet importat jus amicabile ad premium: actus enim, qui gratiam justificantem per modum dispositionis antecedunt, tale jus habere nequeunt, cum jus amicabile ex gratia justificante media charitate proveniat. Nec obstat, quod actus contritionis, quo homo ad justificationem ultimo disponitur, procedat, in nostra sententia, a gratia habitua-

bituali; quia non procedit ab illa, ut habet rationem habitus, & formæ sanctificantis, ac dantis esse divinum participative, sub qua ratione fundat perfectam hominis cum Deo amicitiam; sed producitur ab illa, prout est in infundi, & gerit vices auxilii, sub qua formalitate non habet fundare jus amicabile ad præmium, sed solum movere voluntatem ad operandum.

§. VIII.

Justus non potest sibi mereri de condigno reparationem post lapsum, neq; perseverantie donum; neque etiam de congruo, si meritum de congruo stricte, & proprie sumatur; bene tamen, si large, & improprie accipiatur.

Prima pars probatur ratione D. Thomæ hic art. 7. Meritum de condigno dependet ex motione Divinæ gratiæ: Sed motio Divinæ gratiæ in justo non potest se extendere ad reparationem ipsius post lapsus, cum per lapsus, seu peccatum subsequens illa interrupatur: Ergo homo justus non potest sibi mereri de condigno reparationem post lapsus.

Confirmatur: Si justus posset sibi de condigno mereri reparationem post lapsus, vel mereretur illam, antequam laberetur, vel postquam esset lapsus: Neutrum dici potest: Ergo, &c. Minor quoad secundam partem manifesta est, quia postquam aliquis est lapsus in peccatum, ante gratiæ recuperationem, non est capax merendi aliquid a Deo de condigno, cum sit ejus inimicus. Probatur vero quoad pri-

primam: Omnia merita hominis justi, quæ sibi comparavit, dum in gratia, & charitate existeret, suspenduntur, & impediuntur per peccatum subsequens: Ergo tale peccatum non potest tolli, nec homo lapsus reparari, ex vi meritorum, quæ habuit, antequam in peccatum laboretur. Peccatum ergo se habet respectu meritorum præcedentium, sicut fictio ad sacramentum: Unde sicut fictio non tollitur ex vi sacramenti facte suscepti, sed requiritur aliquod aliud sacramentum ad ipsam removendam; ita peccatum mortificans, & suspendens merita præcedentia non tollitur vi hujusmodi meritorum, sicque nullus potest, dum est in gratia, mereri sibi de condigno reparationem post lapsum.

Quod etiam sibi mereri non possit de condigno perseverantiae donum, constat ex Augustino de bono persev. cap. 13. ubi sic ait: *Unde satis dilucide ostenditur, & inchoandi, & usque in finem perseverandi gratiam Dei non secundum merita nostra dari.* Quibus verbis aperte docet, quod sicut prima gratia præveniens non cadit sub merito de condigno, ita nec perseverantiae donum. Unde ibidem cap. 2. perseverantiam appellat *magnum Dei donum, quo cætera ejus dona conservantur.* Et Tridentinum sess. 6. cap. 13. dicit, illud donum *aliunde haberini posse, nisi ab eo, qui potens est, eum, qui stat, statuere, ut perseveranter stet, & eum, qui cadit, restituere.*

Observant etiam aliqui Scripturæ interpres, electorum prædestinationem esse veluti auream quandam catenam, qua Deus homines ad se trahit, & a terra ad Cœlum evehit, ex variis Dei beneficiis veluti annulis compositam, nimirum prædestinatione, vocatione, justi-

justificatione, & glorificatione: iuxta illud Apostoli ad Roman. 8. *Quos enim prædestinavit, hos & vocavit, quos vocavit, hos & justificavit, quos justificavit, hos & glorificavit.* Aurea vero fibula, qua annuli illi inter se connectuntur, perseverantia est; hæc enim finem principio, & glorificationem æternæ prædestinationi conjungit. Hac Deus electos ad cœlum attrahit, sed miserans, secundum illud Jeremiæ 31. *In charitate perpetua dilexi te, ideo attraxi te miserans;* quia perseverantiæ donum ex sola Dei misericordia, non vero ex nostrorum operum meritis nobis tribuitur.

Ratio etiam suffragatur: primo quia ut discurrevit D. Thomas hic art. 9. in argu-
mento *sed contra:* Si justus posset sibi per-
severantiæ donum de condigno promereri,
sequeretur, quod nullus justus, vel saltem
pauci essent, qui illud non obtinerent; cum
meritum de condigno infallibiliter conse-
quatur suum præmium: & sic vel nullus,
vel pauci a gloria exciderent, quod repu-
gnat verbis illis Christi, *Multi sunt vocati,*
pauci vero electi. Nec dici potest, i-
deo multos non obtainere donum perseve-
rantiæ, quia per peccatum illi ponunt im-
pedimentum. Nam, ut recte instat S. Doctor
ibidem, hoc ipsum quod est peccare, op-
ponitur perseverantiæ: unde si justus per-
severantiæ donum de condigno mereretur,
Deus non permitteret ipsum cadere in pec-
catum.

Secundo id probat in corpore articuli, hac
ratione: Id, quod se tenet ex parte principii
meriti, non cadit sub merito: Sed donum per-
severantiæ se tenet ex parte principii me-
riti, quia dependet ex motione gratiæ, que
est.

est principium omnis meriti: Ergo non cadit sub merito. Ubi, ut recte observat Cajetanus, S. Doctor non loquitur de quacumque motione gratiæ, sed de motione gratiæ, quatenus est conservativa gratiæ; sic enim non potest cadere sub merito; quia est continuatio prime productionis, & entitative ipsamet prima productio, seu infusio gratiæ, quæ non potest cadere sub merito, cum sit principium omnis meriti. Sicut nemo potest de condigno mereri suam conservationem; quia conservatio non est actio distincta a creatione, quæ non cadit sub merito, sed est ipsa creatio continuata, ut docet D. Thomas 1. p. q. 104. art. 1. ad 4.

Dices. Homo potest de condigno mereri beatitudinem, subindeque perpetuitatem gloriæ in ea contentam: Ergo a fortiori perseverantiam in gratia, quæ non ita nobilis est, ac perfecta, sicut perseverantia in gloria.

Sed nego consequentiam, & paritatem. magnum enim inter perpetuitatem gloriæ, & perseverantiam in gratia intercedit discrimen; quia perseverantia patriæ se tenet ex parte termini meriti, perseverantia vero viæ ex parte principii, ut docet D. Thomas hic ar. 9. ad 2. his verbis: *Perseverantia, quæ erit in gloria, comparatur ad motum liberi arbitrii meritorum, sicut terminus, non autem perseverantia viæ.*

Tertia pars assertionis, quæ dicit justum non posse sibi mereri reparationem post lapsum, vel perseverantiæ donum, merito de congruo stricte, & proprie sumpto, facile probari potest ex dictis §. præcedenti. nam, ut ibidem declaravimus, meritum de congruo stricte sumptum importat jus amicabile ad præmium, & per hoc distinguitur a merito

rito de condigno, quod dicit debitum stricte, & veræ justitiæ, nempe distributivæ: Sed iustus non habet jus amicabile ad reparationem post lapsum, quia per peccatum subsequens destruitur amicitia Dei cum illo; violata autem, ac dissoluta amicitia, jus amicabile subsistere nequit; unde peccatum subsequens non minus mortificat, & suspendit meritum de congruo stricte sumptum, quam meritum de condigno: Ergo sicut propter illam suspensionem, & interruptionem iustus non potest sibi de condigno mereri reparationem post lapsum; ita nec illam potest promereri de congruo, si meritum de congruo stricte, & proprie accipiatur.

Idem dicendum de dono perseverantiae, propter rationem D. Thomæ supra expositam: Quod enim pertinet ad principium meriti, non cadit sub merito etiam de congruo; cum principium meriti neque de condigno, neque de congruo ullus promereri possit, ut constat de prima gratia, quam, quia est principium meriti, nullus de condigno, nec de congruo mereri potest, si meritum de congruo stricte, & proprie accipiatur, ut §. 6. contra Semipelagianos demonstravimus: Ergo si donum perseverantiae ad principium meriti pertineat, ut supra ostensum est, sub merito etiam de congruo proprie accepto cadere nequit.

Quod vero reparatio post lapsum, & perseverantiae donum possint cadere sub merito de congruo large, & improprie sumpto, ex supra dictis manifestum relinquitur: nam opus imperatorium alicujus doni, seu beneficii, & disponens ad illud, large, & improprie meritum de congruo dici potest: Sed plures justi impetrant a Deo suis bonis
ope-

operibus, & orationibus reparationem post lapsum, & perseverantiae donum, & ad talia dona a Deo gratis, & misericorditer recipienda se disponunt: Ergo illa de congruo promiserentur, si meritum de congruo large, & improprius accipiatur. Unde de hoc merito intelligendus est Augustinus, dum lib. de bono persev. capit. 6. loquens de dono perseverantiae ait: *Hoc Dei donum suppliciter emereri potest; sed cum datur fuerit, amitti contumaciter non potest.* Nam adverbium illud *suppliciter* aperte declarat, ipsum ibi loqui de merito large, & improprius sumpto, nempe prout idem significat ac impetratio. Cum vero S. Thomas hic art. 7. ait: *Nullus potest sibi mereri reparationem post lapsus futurum, neque merito condigni, neque merito congrui, intelligendus est de merito congrui stricte sumpto.* Nam ad Hebreos 6. lect. 3. aliquid ejus meritum de congruo, large scilicet, & improprius sumptum, respectu illius videtur admittere.

Quæres, an purus homo possit promiseri alteri de condigno, vel saltem de congruo primam gratiam auxiliantem, vel justificantem, & reparationem post lapsum?

Respondeo neutrum posse promiseri de condigno, bene tamen de congruo, etiam accipiendo meritum de congruo in vera, & stricta significatione, seu prout importat ius amicabile ad præmium.

Prima pars hujus resolutionis est D. Thomas hic art. 6. ubi sic ait: *Merito condigni nullus potest mereri alteri primam gratiam, nisi solus Christus.* Quod probat ibidem hac ratione: Meritum de condigno debet esse ex motione di-

divinæ gratiæ : Deus autem non movet , nec ordinat opera iustorum , nisi ad merendum sibi vitam æternam , vel augmentum gratiæ ; quia talia opera procedunt a gratia adoptionis , non vero a gratia capitali , quæ non reperitur nisi in Christo Domino , qui solus est caput omnium aliorum hominum : Gratia vero adoptionis in hoc a gratia capitali distinguitur , quod illa solum ordinatur ad sanctificandum , & perficiendum subjectum , in quo est , nec se extendit ad aliorum perfectionem , & sanctificationem ; ista vero habet influxum quendam , saltem moralem , in alios (cum proprium capitum sit in membra sibi conjuncta influere) subindeque movet subjectum , in quo est , ad sanctificandum alios , & ad merendum ipsis gratiam de condigno . Sed de hoc fusius in tractatu de Incarnatione , cum agemus de gratia Christi capitali . Hanc rationem insinuat Leo Pa-
„ pa epist. 97. cap. 2. his verbis : Quam-
„ vis multorum Sanctorum in conspectu
„ Domini pretiosa mors fuerit , nullius ta-
„ men insontis occisio redemptio fuit mun-
„ di : acceperunt justi , non dedere coro-
„ nas , & de fortitudine fidelium exempla
„ nata sunt patientiæ , non dona justitiæ .

Secunda vero pars , quæ asserit , purum hominem posse alteri mereri primam gratiam , & reparationem post lapsum , merito de congruo stricte , & proprie sumpto , docetur etiam a D. Thoma articulo cita-
„ to , his verbis : „ Merito congrui potest
„ aliquis alteri mereri primam gratiam :
„ quia enim homo in gratia constitutus
„ implet Dei voluntatem , congruum est
„ secundum amicitiæ proportionem , ut

„ Deus impleat hominis voluntatem in
 „ salvatione aliorum. Quibus verbis decla-
 rat , opera , & orationes justorum habere
 jus quoddam amicabile , ratione cuius a-
 liorum salutem , & justificationem de con-
 gruo mereri possunt. Unde Jacobi 5. dici-
 tur : *Orate pro invicem , ut salvemini ,*
multum enim valet deprecatio justi assidua.
 Tritum est etiam illud Augustini in sermo-
 ne de B. Stephano : *Si Stephanus non o-*
rasset , Ecclesia Paulum non haberet ; sed
ideo electus est Paulus , quia in terra incli-
natus , exauditus est Stephanus.

Quod diximus de prima gratia justifi-
 cante , dicendum est etiam de reparatione
 post lapsum ; tum quia eadem est ratio de
 utraque ; tum etiam quia justus ideo non
 potest sibi mereri reparationem post la-
 psum , merito de condigno , vel de con-
 gruo proprie accepto , quia pro tempore ,
 quo redditur præmium , non est in statu
 remunerabilis , cum pro tunc sit peccator ,
 & Dei inimicus , ut supra declaravimus :
 Sed quando fit reparatio alterius , justus
 pro tunc est in statu remunerabilis , cum
 pro illo tempore maneat justus , & Dei a-
 micus , ut supponimus : Ergo licet justus
 non possit sibi mereri reparationem post
 lapsum , merito de congruo proprie sum-
 pto , eam tamen potest alteri mereri .

APPENDIX AD TRACTATUM DE GRATIA.

*DE VARIIS HÆRETICORUM
Erroribus circa gratiam, &
liberum arbitrium.*

UM plura, quæ diximus in Tractatu de gratia, omnino pendant ex plena, & perfecta notitia eorum, quæ olim in Pelagianis, & Semipelagianis damnavit Ecclesia; ad perfectionem, & complementum illius, de Pelagiana, & Semipelagiana hæresi breviter hic tractandum esse, huicque tractationi pauca de erroribus Manichæorum, Lutheranorum, & Calvinistarum subiungenda esse censuimus.

CAPUT I.

De hæresi Pelagiana.

Circa Pelagianam hæresim duo præcipue hic breviter explicanda sunt: nimirum quæ fuerit prima ejus origo? & quot fuerint gradus, seu status illius?

§. I.

Hæresis Pelagianæ origo.

PRIMAM hujus hæresis originem ad Luciferum , vel Adamum nonnulli referunt , ideoque illos primos hæresis Pelagianæ Patriarchas appellant , ut in Tractatu de Angelis annotavimus . Primum enim Luciferi peccatum fuit superbia , qua summum bonum per seipsum , propriasque vires obtinere , spreto Dei auxilio , præsumpsit , quod ad Pelagianorum errorem pertinet . Unde Bernardus serm . 3. de verbis Isaiae : *Qui sedere præsumpsit , seipso voluit esse contentus* . Et Gregorius Magnus lib . 34. moral . cap . 18. *Relicio eo , cui debuit inherere , principio , suum sibi appetit quodammodo esse principium* . Similiter Adamus appetiit similitudinem Dei , non quantum ad omnimodam æquiparantiam Deitatis , sed quantum ad propriam operandi potestatem , ut scilicet virtute propriæ naturæ beatitudinem consequeretur ; ideoque tam bene Protopelagianus , quam Protoparens non immerito appellari potest . Unde Augustinus in Psalm . 68. ait , ipsum voluisse rapere , & veluti furari divinitatem , & perdidisse felicitatem . Hinc aliqui non incongrue observant , adeo plausibilem , & naturæ corruptæ consentaneam esse Pelagianam hæresim , ut omnes fere homines , naturali ferme instinctu , nisi fide corrificantur , Pelagiani sint ; quia nimis in visceratae nobis , & ab Adamo in posteros omnes transfusæ superbiæ Pelagiana hæresis omnino adulatur .

Alii ad Simone in Magum hujus hæresis originem referunt; ille enim in disputacionibus cum D. Petro Apostolorum Principe initio nascentis Ecclesiæ habitis, ex efficacia divinæ voluntatis, & gratiæ eversiōnem liberi arbitrii sequi contendebat, ut S. Clemens libro 3. recognitionum refert. Scribit etiam Clemens Alexandrinus, qui floruit anno 204. libro 5. Stromatum, Basiliadem, Valentimum, & Marcionem asseruisse, hominem per naturæ vires posse credere, bene operari, & salvari, quæ est ipsissima Pelagianorum hæresis.

Demum alii Origenem primum, aut saltem præcipuum Pelagianæ hæresis architectum fuisse existimant; idque insinuat Hieronymus epistola ad Ctesiphontem, ubi Pelagium alloquens ait: *Vis adhuc & alium nosse tui erroris Principem? Doctrina tua Origenis ramusculus est.* Unde etiam Rufinus, Origenis sectator, & doctrinæ illius ex græco translator, male de divina gratia, & arbitrii libertate sensit, ut colligitur ex eodem Hieronymo libro 1. Commentariorum in Jeremiam, ubi Grunnium (quo nomine Rufinum indigitare solet) *Præcursum Pelagii nuncupat.* Et sane Cœlestius collega Pelagii, cum in Carthaginensi Concilio hæresis negantis peccatum originale argueretur, se sequi Rufinum, libera voce protestatus est, dicens: *S. Presbyter Rufinus, Romæ qui mansit cum S. Pammachio, id dixit.* Ita refert S. Augustinus libro 2. de peccato originali cap. 3.

Ex illorum ergo hæreticorum fæce, ac cineribus, ut virulenta vipera, profilivit Pelagiana hæresis, & obstetricante manu Diaboli, eductus est coluber ille tortuosus,

qui totum gratiæ Dei spiritum morsu veneno extinguerem conatus est.

Fuit autem Pelagius natione Britannus, ut asserit D. Augustinus epist. 106. ad Bonifacium : unde S. Prosper carmine de ingratis sic illum describit :

*Dogma quod antiqui satiatus felle Draconis,
Pestifero vomuit eoluber sermone Britannus.*

Professione vero fuit Monachus, ut testatur in primis S. Chrysostomus epist. 4. ad Olympiadem, ubi sic dicit: *De Pelagio Monacho magno dolore affectus sum: & Augustinus libro de hæresibus, hæresi 88. & libro 2. de peccat. meritis, & remiss. c. 16. & Isidorus Pelusiota lib. 1. epist. 314. quæ est de Pelagio Monacho.* Eumque fuisse ex illis, qui in Ægypto morabantur, refert Cardinalis Baronius ad annum 411.

Illum fuisse ingenio præstanti, & acuto, eloquioque facundum, saepè affirmat D. Augustinus, ut patet ex ejus epistola ad Demetriadem Virginem, adversus quam S. Augustinus aliam, videlicet centesimam quadragesimam tertiam, scripsit ad Julianam matrem Demetriidis, in qua sic ait:

„ Satis enim dici non potest, quantum
„ cupiamus in eorum hominum scriptis,
„ quæ propter acrimoniam, atque facun-
„ diam leguntur a plurimis, apertam con-
„ fessionem illius gratiæ reperiri.

Demum eum adeo fuisse probum, & religiosum, ut pro sancto, & in virtutibus Christianis eximie proiecto haberetur, testatur idem Augustinus lib. 3. de peccat. meritis c. 1. his verbis: *Post paucissimos dies legi Pelagii quedam scripta, viri, ut audio, sancti, & non parvo proiectu Christiani.* Et c. 3. vocat illum *egregie Christianum.*

Item

Item lib. 2. retract. c. 33. affirmat, Pelagii vitam a multis prædicatam. Verum hæc de Pelagio scripsit S. Doctor, dum pelle ovina vestitus, suum occultabat errorem: postquam autem belluina ejus ferocitas cognita fuit, ipsum pestiferum hæreticum appellat. Nam „ in eodem capite subdit: „ Pelagii ipsius „ nomen non sine laude aliqua posui, quia „ vita ejus a multis prædicabatur, & ejus „ illa redargui, quæ in suis scriptis non ex „ persona sua posuit, sed quid ab aliis di- „ ceretur, exposuit, quæ tamen postea jam „ hæreticus pertinacissima animositate de- „ fendit. Isidorus quoque Pelusiota episto- la supra citata, post exploratos attentius Pelagii mores, illum ait fuisse vagabundum, ex uno monasterio ad aliud subinde migran- tem, perscrutandi, & explorandi mensas o- „ mnium causa: „ Tibi (*inquit*) annorum „ turba canitiem invexit, & tamen rigi- „ dum, atque inflexum animum habes, ex „ alio monasterio ad aliud subinde migrans, „ atque omnium mensas perscrutans, & „ explorans. Quamobrem si carnium nidor, „ atque obsoniorum condimentum tibi cu- „ ræ est, iis, qui Magistratus gerunt, po- „ tius blandire, atque urbium caminos ve- „ stiga; neque enim homines Eremitæ fa- „ cultates eas habent, ut te, quemadmo- „ dum tibi gratum est, excipere valeant. Id ipsum testatur Orosius in Apologia, ubi de Pelagio loquens, ipsum Monoculum ap- pellat, & cutem suam paulo magis curasse, quam Monachum deceret, affirmat. Et cer- te non potuit inimicus gratiæ Christi ven- tris non esse amicus, & male blandas carnis delicias effuse quærens, non potuit, inquam, escis carnalibus non inhiare, qui gratia

Dei non curabat stabilire cor ; illa enim e
cruce Christi , & vulneribus ejus effluxa ,
amorem crucis , & deliciarum , ac volupta-
tum contemptum inspirat .

§. II.

Præcipui errores Pelagii circa gratiam.

PRÆcipui errores Pelagii circa gratiam ad sex istos revocari possunt . Primo quod homo vivere potest sine peccato . Secundo quod omnia divina præcepta servare potest sine gratia . Tertio quod possit se præparare ad gratiam sine auxilio gratiæ . Quarto quod potest homo mereri sine gratia . Quinto quod principium boni operis est ex nobis , consummatio ex Deo . Sexto quod gratia Dei secundum merita nostra datur . Hos errores deduxit Pelagius ab alio , quo negabat peccatum originale a nobis contrahi , & ex Adamo in ejus posteros derivari : ex hoc enim inferebat , liberum hominis arbitrium non esse infirmatum , nec læsum in suis naturalibus viribus , sed sanum in illis , & integrum . Ex quo rursus deducebat , non indigere aliquo gratiæ adjutorio vires ipsi tribuente , ad divina servanda mandata , ad bonos mores habendos , perficiendamque justitiam , sed posita illorum cognitione , ea omnia efficere posse suis sanis , & integris viribus arbitrium ipsum . Unde negavit omne auxilium gratiæ , sive efficax , sive sufficiens , quod vires aliquas sive efficaces , sive sufficientes arbitrio daret ; sufficientes enim , imo efficaces vires habere arbitrium hominis ad divina servanda mandata contendebat , iliasque sanas , & integras in illo esse dicebat . Sicut autem ex negatione originalis peccati ne-

necessitatem gratiæ negabat Pelagius, modo explicato; ita negationem originalis peccati ex priori alio deducebat principio, ex libertate videlicet arbitrii, quam intelligere non valebat, nisi eam sanam, firmam, & fortem, ac sine læsione aliqua originalis peccati constitueret, sicut fuerat in primo parente ante peccatum. Unde inferebat, extinctum fore liberum arbitrium ad bonum, si infirmum, ac læsum diceretur per originale peccatum, & impotens ad divina servanda mandata, & justitiam perficiendam. Quare prætextus iste servandæ humanæ libertatis fuit præcipua causa, cur & peccatum originale, & gratiæ necessitatem negaverit.

§. III.

Varii gradus, seu status hæresis Pelagianæ.

QUI accuratius SS. Patrum volumina scrutati sunt, varios Pelagianæ hæresis status, seu gradus distinguendos esse censem. Primus fuit veluti Ethnicismus a Philosophis acceptus; in quo Pelagiani, nulla facta mentione gratiæ, naturam hominis sufficere dicebant ad quæcumque opera virtutum exercenda, ad servanda omnia Dei mandata, & vivendum sine ullo peccato, ac denique ad veram, & æternam felicitatem consequendam. Unde Pelagius Epistola ad Demetriadem nobilissimam virginem cap. 2. sic ait.
 „ Quoties mihi de institutione morum, &
 „ sanctæ vitæ conversatione dicendum est,
 „ soleo primo humanæ naturæ vim qua-
 „ litatemque monstrare, & quid effici
 „ possit, ostendere, ac jam inde audien-
 „ tis animum ad species incitare vir-

R 5 „ tu-

„ tutum, &c. Optima enim animi incita-
 „ menta sunt, cum docetur aliquis posse,
 „ quod cupiat.

Hunc Pelagii errorem variis in locis reprehendit, ac detestatur Augustinus: nam lib. 3.
 „ contra Julian.cap. 3. hæc scribit: „ Natura
 „ ista in tantas, & tam manifestas collapsa mi-
 „ serias, liberatorem, mundatorem, redempto-
 „ rem Christum habet necessarium, non Ju-
 „ lianū, non Cœlestium, non Pelagium lauda-
 „ torem. Et lib. 3. contra duas Epistolas Pela-
 „ gian.cap. 14. Non sic (*inquit*) debemus lauda-
 „ re Creatorem, ut cogamur dicere, imo vero
 „ convincamur dicere superfluum Salvatorem.
 „ Naturam hominis dignis laudibus honore-
 „ mus, easque laudes ad Creatoris gloriam
 „ referamus; sed quia nos creavit, ita simus
 „ grati, ut non simus, quia sanat, ingrat.

Hunc vero statum Pelagianismi ad Paganissimum potius, quam ad hæresim diximus pertinere: quia asserere, hominem ipsum sibi, repudiato omni sive Dei, sive alterius adjutorio, ad omnem virtutem, sapientiam, felicitatemque sufficere, purum putumque Ethnicæ Philosophiæ somnium est; ut patet ex his verbis Senecæ Epistola 53. Pelagio præcientis: *Est aliquid quo sapiens antecedat Deū; ille naturæ beneficio, non suo sapiens est. Ecce res magna, habere imbecillitatem hominis, securitatem Dei. Ecce suo beneficio, non Dei auxilio, sapientem fieri hominem putat.* Unde Epist. 20. *Huc (inquit) cogitationes tuæ tendant, hoc cura, hoc opta, omnia alia vota Deo remissurus, ut contentus sis temetipso, & ex te nascentibus bonis. Quæ potest esse felicitas Deo propior? Quasi cæterorum bonorum vota Deo essent remittenda, ad parandas vero animi opes homo sibi ipsi sufficeret.*

ret. Quare rursus Epist. 124. ait, *Unum bonum esse, quod beatę vitę causa, & firmamentum est, SIBI FIDERE.* Similia habet Tullius in libro de natura Deorum, ubi in persona „ Cottæ inquit, „ Quia sibi quisque virtutem „ acquirit, neminem unquam acceptam Deo „ retulisse: propter virtutem enim jure lau- „ damur, & de virtute recte gloriāmur: quod „ non contingere, si id donum a Deo, non „ a nobis haberemus. Et paulo post subdit: „ Judicium hoc unicum mortalium est, for- „ tunam a Deo petendam, a seipso sumen- „ dam esse sapientiam.

Ex his impuris prophanæ, & gentilis Philosophiæ lacunis hausta videntur illa Pelagii verba, quæ tantopere Augustinus detestatur: *Spirituales divitias nullus tibi præter te con- ferre poterit. In his ergo jure laudanda es, in his merito ceteris preferenda es, QUÆ NISI EX TE, ET IN TE ESSE NON POS- SUNT.* Unde Faustus lib. 1. de gratia cap. 1. hæc scribit: *Pelagius dicit, quod ad obtainen- dam salutem natura hominis sibi sola sufficit.*

Secundus status, seu gradus Pelagianæ hæ- resis fuit veluti semiethnicismus, in quo Pe- lagiani naturam ipsam, tanquam gratiam co- gnoscere, & prædicare cœperunt. Cum enim Pelagius male audiret apud Catholicos, quod necessitatē gratiæ negaret, ad declin- andam invidiam, & fucum Catholicis fa- ciendum, moderationem quandam suę sen- tentiæ specie tenus adhibuit, cœpitque nomi- ne gratiæ liberum arbitrium intelligere, quia gratis a Deo, id est nullis nostris præce- dentibus meritis, in ipsa creatione nobis col- latum est; & eatenus affirmavit, gratiam esse necessariam ad bene operandum, & pecca- tum vitandum, quatenus sine libero arbitrio

neque bene agere , neque a malo abstinere possumus. Sic testatur Augustinus serm. 11. de verbis Apostoli cap.7.ubi de Pelagianis ait:

Disputantes contra gratiam pro libero arbitrio , fecerunt auribus piis , & Catholici cisis offenditionem ; cuperunt horri , cuperunt ut certa pernicies devitari , cepit de illici dici , quod contra gratiam disputarent , & invenerunt ad relevandam istam invidiatiam tale commentum ; Non , inquit , contra gratiam Dei dispuo . Unde probes ? Eo ipso (*inquit*) non contra gratiam Dei dispuo , quod liberum arbitrium defendo . Videlicet acumen , sed vitreum : quasi lucet vanitate , sed frangitur veritate . *Et infra commentum suum interpretantes Pelagiani dicunt :* Quia hominem Deus creavit , & liberum donavit arbitrium , quidquid homo potest de libero arbitrio , cuius gratiae debetur , nisi ejus , quieum condidit cum eo libero arbitrio ? Nomine autem liberi arbitrii intelligebant naturale bonum libertatis , cum reliquis necessariis ad libere operandum , quae naturaliter nobis insunt ; cuiusmodi sunt facultas consultandi , & expendendi rationes , & motiva agendi , vel non agendi , naturalisque propensio ad bonum , & avertio a malo , ut ibidem testatur Augustinus , & lib. de hæresibus , hæresi 88. nec non Hieronymus Epist. 1. ad Ctesiphontem , & lib. 1. dialogi contra Pelagianos .

Porro hic status solo nomine distat a præcedenti : easdem enim omnino naturæ vires præditat , hoc solum discrimine , quod iste causam proferat , quae ipsi tantas vires gratis dedit , & gratiae nomine utatur , ne gratiam omnino neglexisse videatur . Diximus autem eum *semibanicum* posse vocari : quia etiam Philo-

phi

phi Gentiles eam gratiam agnoscebant, licet eo nomine non uterentur. Unde Seneca Ep. 90. *Quis dubitare potest* (inquit) *quoniam deorum immortalium munus sit, quod vivimus; Philosophiae, quod bene vivimus?* Itaque tanto plus nos debere huic, quam Diis, quanto maius beneficium est bona vita, quam vita? Audin' superbiam extollentem fese aduersus Deum, ac supra Deum? Ne tamen divinæ gratiæ oblitus omnino videtur, quasi puduisse cum arrogantiæ, corrigendo subjicit: *Pro certo deberetur, nisi ipsam Dii Philosophiam tribuissent.*

Non diu in isto statu, & in hac sola naturali gratia profitenda perstittit Pelagius. Cum enim statim Catholici inteligerent sibi fucum fieri, & gratiæ nomine eandem iterum naturam obtrudi, hanc gratiæ confessionem, veluti prorsus fraudulentam, irriserunt, & condemnarunt: quare Pelagius adhuc pulsatus fidelium objurgationibus, easque declinare volens, ad illam speciem gratiæ, a natura, & libero arbitrio distinctam, consugit, ad legem scilicet, & doctrinam divinitus traditam, cuius auxilio confessus est hominem indigere, ut declinet a malo, & faciat bonum. Unde Augustinus de spiritu, & littera cap. 2 .de Pelagianis sic ait: *Cum urges cœperint, quomodo id presumant afferere fieri sine ope divina, reprimunt se, nec hanc vocem audent dimittere, quoniam vident, quam sit impia, & non ferenda, sed ajunt, id eo ista sine ope divina non fieri, quia & hominem Deus creavit cum libero voluntatis arbitrio, & dando precepta ipse docet, quemadmodum homini sit vivendum.* Et infra: *Neque quisquam cum verecundatus fuerit dicere, per nos ipsos fieri nos justos, &c. quia videt hoc a fide.*

fidelibus, & piis credi non posse, cum dici-
tur: ad hoc se convertat, ut dicat, ideo sine
operatione gratiæ Dei nos justos esse non posse,
quia legem dedit, quia doctrinam instituit,
quia bona præcepta mandavit.

Hinc Pelagiani, quo melius hoc suum de
gratia legis, & doctrinæ commentum sta-
bilirent, magnis laudibus legem extolle-
bant, ut testatur idem S. Doctor lib. 4. ad
Bonifacium cap. 5. ubi hæc verba Pelagii in
Epistola ad Demetriadem refert. „ Lege ve-
„ lut lima natura expolitur, & fulgori pri-
„ stino redditur. Et ista: Quandiu recen-
„ tioris adhuc naturæ usus viguit, nec hu-
„ manæ velut quandam caliginem longus
„ usus peccandi obduxit, sine lege dimissa
„ est natura; ad quam Dominus nimiis jam
„ vitiis obrutam, & quadam ignorantia
„ rubigine infectam limam legis admovit,
„ ut hujus frequenti admonitione expolire-
„ tur, & ad suum posset redire fulgorem. „
Sicut ergo priores Hæretici diviserunt Chri-
stum, alii Divinitatis ejus veritatem, alii
veritatem carnis ejus abnegantes: ita &
Pelagius crucem ejus evacuavit; nam ut
inquit Apostolus ad Galatas 2. *Si per legem
justitia, gratis Christus mortuus est.*

Hic est tertius, vel potius secundus Hære-
sis Pelagianæ status, qui ab Ethnicismo dif-
fert, & ad Judaismum declinat: nam initio
nascentis Ecclesiæ plures ex Judæis, inter
quos præcipuus fuit Cherintus, de gratia
Christi male senserunt, & se per legem justi-
ficari, sufficiente ad eam custodiendam libero
arbitrio, docuerunt: contra quos Apostolus
Epistolam ad Romanos scripsit, in qua my-
steria divinæ gratiæ, & prædestinationis fu-
se exponit, ut sentire videtur Hieronymus,
præfa-

præfatione in Epistolam ad Galatas.

Doctrinæ legis addebant Pelagiani exempla Christi, & remissionem peccatorum. Nam primis quidem sæculis, ab Adamo usque ad Moysen, sufficientem dicebant legem naturalem: quia propter illam primæ conditionis integritatem adhuc perseverantem, & vigorem legis naturalis, illæsamque libertatem arbitrii, non erat opus alia gratia: postea vero licentia, & consuetudine peccandi sensim magis invalescente, naturam, mala educatione, & pravis exemplis corruptam, eguisse legis scriptæ subsidio, quam Deus per Moysen dedit: cumque postea ob nimiam humani generis corruptionem, quæ peccandi consuetudine inoleverat, lex illa non sufficeret amplius ad pie sancteque vivendum, venisse Christum, veluti tanti morbi medicum, qui homines gratia sua medicinali sanaret, & remissionem peccatorum, doctrinam euangelicam, & virtutum exempla præberet. Unde Augustinus l. de pecc. orig. c. 26., Non igitur, sic ut Pelagius, & ejus discipuli, tempora dicimus; dicentes primum vixisse justos homines sub natura, deinde sub lege, tertio sub gratia. Ex natura, scilicet ab Adam tam longa ætate, qua lex nondum erat data; tunc enim, ajunt, duce ratione cognoscatur Creator, & quemadmodum esset vivendum, scriptum gerebatur in cordibus, non lege litteræ, sed naturæ. Verum vitiatis moribus (*inquiunt*) ubi cœpit non sufficere natura tam decolor, lex ei addita est, qua velut lima fulgori pristino, detrita rubigine, redderetur. Sed postea quam nimia, sicut disputat, peccandi consuetudo prævaluit, cui sanandæ lex parum vallet, Christus adyenit, & tanquam morbo, despœ.

, desperatissimo , non per discipulos , sed
 „ per seipsum medicus ipse subvenit .

Itaque Pelagiani , ne gratiæ Dei viderentur inimici , multiplex genus gratiæ comminiscabantur : nam ipsum naturale arbitrium voluntatis gratiam appellabant ; legem Moysis necessariam fuisse confitebantur , qua velut lima fulgori pristino , detrita rubigine , natura redderetur : doctrinam , & revelationem divinam recipiebant , quæ nobis demonstraret , quid facere debeamus ; remissionem peccatorum , & Christi exempla ad vitam rite instruendam esse necessaria prædicabant . Unde illi fuere philosophia Ethnici , lege Judæi , solo nomine Christiani , & mutabilitate Prothei , in varias sese species transformantes , ut veram Christi gratiam abolerent .

Hæc sunt certa , & indubitata apud omnes Theologos : sed quædam inter illos versantur difficultates , & controversiæ , que stiunculis sequentibus breviter discutiendæ , & dirimendæ .

Quæres ergo primo , an Pelagius , præter gratias illas externas jam explicatas , gratiam aliquam interiorem tandem aliquando admiserit , subindeque tertius , vel quartus Pelagianæ hæresis status admittendus sit ?

Respondeo , Pelagium post multas disputationes cum S. Augustino , & aliis SS. Patribus habitas , admisisse tandem gratiam interiorem , intellectum illustrantem , & voluntatem moraliter excitantem . Patet hoc ex Augustino l. de gratia Christi c. 7. ubi refert verba Pelagi dicentis : *Adjuvat nos Deus per revelationem , & doctrinam , dum cordis nostri oculos aperit , dum futura demonstrat , dum Diaboli pandit insidias , dum nos multi-*

tiformi, & ineffabili dono gratiae cœlestis il-
luminat. Et cap. 10. rursus ipsum sic lo-
quentem inducit: Operatur in nobis velle,
quod bonum est, velle, quod sanctorum est, dum
nos terrenis cupiditatibus deditos, mutorum
more animalium tantummodo præsentia dili-
gentes, futuræ gloriæ magnitudine, & præ-
miorum sollicitatione succedit; dum revela-
tione sapientiae in desiderium Dei stupentem
fuscitat voluntatem, dum nobis (quod tamen
alibi negare non metuit) suadet omne, quod
bonum est. Quibus ultimis verbis, quod ta-
men alibi negare non metuit, aperte decla-
rat Augustinus, Pelagium initio quidem suæ
hæresis negasse gratiam intellectum illumini-
nantem, & voluntatem moraliter excitan-
tem, sed postea (id est post Concilium Pa-
læstinum, pluresque concertationes cum i-
pso Augustino, & aliis SS. Patribus habitas)
illam admisisse. Addit tamen S. Doctor i-
bidem, per hoc non recessisse Pelagium a
commendatione legis, atque doctrinæ; cum
munus, & officium legis, & doctrinæ sit
docere, illuminare, ostendere quid facien-
dum sit, & ad id hortari, suadere, ac ex-
citare, non vero dare vires ad faciendum,
& implendum mandata, ut fuse prosequi-
tur toto libro de spiritu, & littera. Unde
cap. 24. libri citati de gratia Christi de
Pelagianis loquens, eorumque doctrinam re-
fellens, sic ait: Legant ergo, & intelligant,
intueantur, atque fateantur, non lege, at-
que doctrina insonante forinsecus, sed inter-
na, occulta, mirabili, atque ineffabili pote-
estate operari Deum in cordibus hominum,
non solum veras revelationes (ut fatebantur
Pelagiani, & sufficere credebant) sed et-
iam bonas voluntates. Item D. Prosper in

car-

carmine de ingratis expresse docet , veram Christi gratiam non tantum illuminare intellectum , & excitare voluntatem , sed etiam eam intus reformatum , ac immutare , ut constat ex his versibus :

*Non hæc consilio tantum , hortatuque benigno
Suadens , atque docens , quasi normam le-
gis haberet*

*Gratia , sed mutans intus mentem , atque
reformans ,*

Vasq; novū ex fracto fingens virtute creandi .

Quæres secundo , an Pelagius auxilium possibilis , seu quod dat nobis posse , admiserit ?

Respondeo affirmative , id enim constat ex Augustino lib. de gratia Christi c. 3. ubi de Pelagio sic ait : „ Cum tria constituantur , atque distinguantur , quibus divina mandata dicit impleri , possibiliter voluntatem , & actionem : possibiliter scilicet , qua potest homo esse justus : voluntatem , qua vult esse justus : actionem , qua justus est : horum trium primum , id est possibiliter , datum constitutum a creatore naturæ , nec esse in nostra potestate , sed eam nos habere , etiam si nolimus : duo vero reliqua , id est voluntatem , & actionem , nostra esse asserit , atque ita nobis tribuit , ut non nisi a nobis esse contendatur . Denique gratia Dei non ista duo , quæ nostra omnino esse , id est voluntatem , & actionem , sed illam , quæ in potestate nostra non est , & nobis ex Deo est , id est possibiliter , perhibetur adjuvari : tanquam illa , quæ nostra sunt , hoc est voluntas , & actiones , tam sint valentia ad declinandum a malo , & faciendum bonum , ut divino adjutorio non indigeant : illud vero , quod nobis ex Deo est , tam sit invalidum , id est possibilis , ut semper gratiæ adjuvetur auxilio . Et capite sequenti sic Pelagium in- „ du-

„ dicit loquentem . Nos sic tria ista distingui-
 „ mus , & certum velut in ordinem digesta par-
 „ timur : Primo loco posse statuimus , secundo
 „ velle , tertio esse . Posse in natura , velle in ar-
 „ bitrio , esse in effectu locamus . Primum illud ,
 „ id est posse , ad Deum proprie pertinet , qui
 „ illud creature sue contulit : duo vero reliqua ,
 „ hoc est velle , & esse , ad hominem referen-
 „ da sunt , quia de arbitrii fonte descendunt .
 „ Ergo in voluntate , & opere bono laus ho-
 „ minis , imo & hominis , & Dei , qui ipsius vo-
 „ luntatis , & operis possibilitatem dedit , quiq;
 „ ipsam possibilitatem gratie sue adjuvat sem-
 „ per auxilio ; quod vero homo potest velle bo-
 „ num , atque perficere , solius Dei est . Et pau-
 „ lo post . Ut generaliter universa complectar ,
 „ quod possumus omne bonum facere , dicere ,
 „ cogitare , illius est , qui hoc posse donavit , qui
 „ hoc posse adjuvat : quod vero bene vel agi-
 „ mus , vel loquimur , vel cogitamus , nostrum
 „ est , qui hec omnia vertere etiam in malum
 „ possumus . Et c . 5 . ejusdem l . Augustin . lo-
 „ quens de Pelagio , sic ait : Possibilitatem , vo-
 „ luntatem , actionem tanta subtilitate curavit
 „ distinguere , ut quandocumque legimus , &
 „ audimus divinę gratię adjutorium confite-
 „ ri , sive in lege , & doctrina , sive ubilibet con-
 „ stituat , sciamus , quod loquitur , nec herea-
 „ mus aliter eum intelligendo , quam sentit .
 „ Scire quippe debemus , quod nec voluntatē
 „ nostram , nec actionem divino adjuvari cre-
 „ dit auxilio , sed solam possibilitatem volun-
 „ tatis , atque operis , quam solum ex his tribus
 „ nos habere affirmat ex Deo : tanquam hoc
 „ sit infirmum , quod ipse Deus posuit in natu-
 „ ra ; cetera vero duo , que nostra esse voluit ,
 „ ita sint firma , & fortia , & sibi sufficientia , ut
 „ nullo indigeant ejus auxilio ; & ideo non ad-

„ juvet, ut velimus, non adjuvet, ut agamus, sed tantummodo, adjuvet, ut vellem, & agere valeamus „ Denique idem S. Doctor c. 67. totam de auxilio gratiae controversiam ad hoc unum reducit, ut Pelagius non solum possibilitatis, sed etiam voluntatis, & actionis auxilium confiteatur; & subdit: *Si ergo consenserit nobis (Pelagius) non solam possibilitatem in homine, sed ipsam quoque voluntatem, & actionem divinitus adjuvari, nihil de adjutorio gratiae Dei, quantum arbitror, inter nos controversie relinquetur.*

Quæres tertio, an Pelagius admiserit gratiam cooperationis, & coefficientiæ?

Respondeo affirmative, & probo primo ex D. Hieronymo lib. 1. contra Pelagium in principio, ubi refert Pelagium dixisse: *Quidquid in me boni habeo, illo suggestente, & adjuvante completur.* Et interroganti Hieronymo, *quod agis bonum, tuum est, an Dei?* respondet: *Meum est, & Dei: ut ego operer, ille adjuvat.*

Probo secundo ex D. Augustino in Enchirid. cap. 32. & lib. 1. ad Simplician. qu. 2. ubi clare supponit Pelagium docuisse, *propterea dictum esse ab Apostolo, Non est volentis, neque currentis, sed misericordis Dei, quia ex utroque fit, id est ex voluntate hominis, & misericordia Dei: & tanquam diceretur, non sufficit sola voluntas hominis, si non sit etiam misericordia Dei:* Ergo supponit, Pelagium gratiam cooperationis, & coefficientiæ admisisse.

Quæres quarto, An Pelagiani veram Christi gratiam, quæ facit velle, & operari, tandem aliquando admiserint?

Respondent aliqui cum Jansenio, Pelagianos, post ubique damnatum Pelagium, de sua per-

pertinacia aliquid remittentes, veram Christi gratiam, quæ facit velle, & operari, admisisse, sed eam dupliciter adulterasse, & corrupisse; primo quia dixerunt talem gratiam non dari gratis, sed ex merito; secundo quia illam non ad boni operis initium, sed dun taxat ad ejus perfectionem, & consummationem requiri affirmabant, subindeque illos cœpisse tunc deflectere ad Semipelagianismum. Unde Augustinus lib. 2. ad Bonifacium cap. 8. *Isti* (loquitur de Pelagianis) *volunt in homine ab ipso homine incipere cupiditatem boni, ut hujus cœpti meritum etiam perficiendi gratia consequatur.* Et lib. de hæresibus hæresi 88. sic habet: *Denique Pelagius increpatus a fratribus, quod nihil tribueret adjutorio gratiae Dei, correptioni eorum hactenus cessit, ut non eam libero arbitrio præponeret, sed infideli calliditate suppone ret, dicens ad hoc eam dari hominibus, ut quæ facere per liberum jubentur arbitrium, facilius possint implere per gratiam.*

Verum licet ex his, & similibus Augustini testimoniis, quæ profert Jansenius, manifeste constet, Pelagianos, post damnatam suam hæresim sub Zosimo Papa, ad Semipelagianismum deflectere cœpisse, & docere gratiam ex meritis bonæ voluntatis dari, eamque solum ad facilius operandum requiri; dubium tamen, ac incertum est, an illi tunc veram Christi gratiam, quæ nos facit velle, & operari, admiserint? Augustinus enim cap. 47. lib. de gratia Christi, quem post damnatam hæresim Pelagii a Zosimo Papa edit (ut ipse ait lib. 2. retract. cap. 50.) totam inter ipsum, & Pelagium de auxilio gratiæ controversiam ad hoc reducit, ut Pelagius non solum possibilitatis, sed etiam voluntatis, & actio-

& actionis auxilium confiteatur. Et subdit, quod si tale auxilium vellet admittere, nihil de adjutorio gratiæ Dei, quantum arbitrator, inter nos controversiæ relinquetur. Quod certe non debuisset dicere Augustinus, si Pelagius eo tempore gratiam efficacem, quæ dat velle, & operari, ut datum ex meritis, & ad perfectionem, & salutem adipiscendam utilem, non tamen necessariam admisisset; sed potius asserere debuisset, quod si ille talem gratiam, ut pure gratuitam, & ad volendum, & operandum necessariam vellet concedere, nulla inter ipsos esset de gratia Christi contentio. Addo, quod idem S. Doctor in libro de hæresibus, quem in fine vite scripsit, unde & imperfectum morte præventus reliquit, affirmat, Pelagium quantumlibet varium, versicolorem, & multiformem, in eo semper persistisse, quod omnem gratiam in lege, atque doctrina constituerit.

Sed dices. Quænam ergo est gratia illa, quam Pelagiani tandem admiserunt, & modis prædictis adulterarunt, dicentes eam dari ex meritis, & solum ad facilius agendum requiri?

Respondeo, auxilium illud, quod tunc Pelagiani admiserunt, esse aliquid præter legem, & communem notitiam mandatorum, nimirum specialeм illuminationem, habitam per Spiritus Sancti revelationem, & se tenentem etiam ex parte potentiae, & non solum ex parte objecti, id est auxilium elevans intellectum ad melius percipiendam legem, & doctrinam a Spiritu Sancto revelatam. Ita colligitur ex Augustino, libro sape citato de gratia Christi, quem post damnatam a Zosimo Papa Pelagii hæresim, con-

contra Pelagium, & Cœlestium edidit: nam cap.7. ubi retulit verba Pelagii dicentis: *Deus gratiae suæ auxilium subministrat, ut quod per liberum homines facere jubentur arbitrium, facilius possint implere per gratiam;* subdit de eodem Pelagio: *Et tanquam explicaturus, quam dicat gratiam, adjunxit dicens: Quam nos non, ut tu putas, in lege tantummodo, sed & in Dei esse adjutorio confitemur.* Ubi aliquod adjutorium videtur ponere præter legem, seu cognitionem mandatorum Dei, quod dicit ad facilius dari. Sed quod, & quale illud sit, patet ex verbis, quæ Augustinus subjungit: „Quis non desideret, ut „ostendat quam vult intelligi gratiam? hoc „enim maxime de illo expectare debemus, „ut dicat hoc, quod dicit, non in lege tan- „tummodo se gratiam confiteri; sed nobis „hac expectatione suspensis, quid addiderit, „intuemini; adjuvat enim nos, inquit, Deus „per doctrinam, & revelationem suam, dum „cordis nostri oculos aperit; dum nobis, ne „presentibus occupemur, futura demonstrat, „dum diaboli pandit infidias; dum nos mul- „tiformi, & ineffabili dono gratiæ cœlestis „illuminat: „Ecce quomodo Pelagius gratiam internæ illuminationis agnovit, non ut simpliciter, & absolute necessariam ad implenda legis præcepta, sed ut utilem ad melius, & facilius ea servanda.

Dices: *Gratia illuminationis reducitur ad legem, & doctrinam,* ut supra ex Augustino ostendimus: Sed gratia illa, quam Pelagius post damnatam suam hæresim a Zosimo Papa admisit, non reducitur ad legem, & doctrinam, cum Augustinus eam appelleat *Magnum adjutorium divinæ gratiæ*, & dicat benedicendum esse Deum, quod

quod Pelagiani talem gratiam tandem aliquando admiserint : Ergo aliam gratiam diversam a gratia illuminationis Pelagius admisit.

Respondeo , duplicem esse gratiam illuminationis; unam , quæ se tenet ex parte objecti , & ad sufficientem ejus propositionem , seu applicationem pertinet , quam Pelagius , etiam antequam a Zosimo Papa damnaretur , admisit ; alteram se tenantem ex parte potentiarum , seu intellectus , per quam roboratur , & elevatur ad assentiendum objecto tali modo proposito ; & hanc admisit Pelagius solum postquam ejus haeresis a Zosimo Papa damnata fuit : haec vero gratia , cum potentiam roboret , & confortet , non pertinet ad legem , quæ habet solum objectum manifestare , & proponere , subindeque ab Augustino *Magnum gratiæ adjutorium* appellatur .

Quæres quinto , utrum Pelagiani gratiam habitualem sanctificantem , & a peccatis mundantem agnoverint ?

Respondeo affirmative contra Suarez : Tum quia Pelagius nunquam fuit accusatus , quod talem gratiam negaverit , & de illa nulla fuit disputatio inter Pelagianos , & SS. Patres , sed tantum de gratia actuali , ut ingenue fatetur Vasquez disp. 196. cap. 3. num. 13. his verbis : *Scholastici , qui putarunt cum Pelagio disputatum fuisse de necessitate gratiæ habitualis , & remissionis peccatorum , ad servanda præcepta , ignoratione vocis , & historicæ lapsi sunt , existimantes nomine gratiæ intelligi gratiam habitualem , & remissionem peccatorum . Tum etiam , quia Baptismus secundum Pelagianos donum aliquod supernaturale*

ad-

addebat. Julianus enim apud Augustinum lib. I. contra ipsum cap. 6. ait: *Hac de causa etiam infantes baptizamus, cum non sint coquinati peccato, ut eis detur, vel addatur sanctitas, justitia, adoptio, hereditas, fraternitas Christi, ut ejus membra sint.* Et ne dicatur Julianum per illam sanctitatem a Baptismate parvulis concessam intellectisse tantum externam Dei benevolentiam, & favorem, nihil intus producentem, iterum audiendus est apud eundem Augustinum lib. I. operis imperfecti folio 58. ubi loquens de gratia baptismali, ait: *Hanc gratiam locupletem spiritualibus donis credimus, & multis optimam munibus, ac reverendam virtutibus.* Quibus verbis Julianus aperte profitetur, gratiam baptismalem esse donum aliquod supernaturale, in anima receptum, & variis dotibus eam exornans.

Dices. Augustinus lib. de gratia Christi cap. 30. affirmat se nusquam in scriptis Pelagii, & Cælestii gratiam, qua justificamur, & qua charitas Dei diffunditur in cordibus nostris per Spiritum Sanctum, potuisse invenire: Ergo Pelagiani habituatis gratiæ dona non admiserunt.

Respondeo Augustinum non dicere absolute, quod in scriptis Pelagii, & Cælestii gratiam illam, qua justificamur, &c. inventire non potuerit, sed addere, quemadmodum confitenda est: quia gratia habitualis, & habitus infusi, qui ab ipsa diminant, admitti debent, non solum ad sanctificandam, mundandam, & ornandam animam, sed etiam ad influendum una cum ejus potentiis in actus supernaturales; ob quem usum Pelagiani talia dona non admiserunt, cum

nullum auxilium supernaturale applicans liberum arbitrium ad agendum admiserint.

Quæres sexto , an Pelagiani circa liberum arbitrium erraverint?

Respondeo eos circa liberum arbitrium errasse dupliciter . Primo , quia existimabant , voluntatem hominis lapsi esse in perfecto æquilibrio , sicut erat in statu innocentiae , & æque pronam in bonum , ac in malum ; subindeque dicebant , liberum arbitrium non fuisse læsum , & debilitatum per peccatum Adami , nec ratione concupiscentiae magis propendere ad bonum delectabile , contrarium rationi , quam ad bonum honestum , & rationi consonum , ut refert D. Prosper in epistola ad Augustinum , præfixa libro de prædestinatione sanctorum , ubi eos „ dicit affirmasse , „ quantum quisque ad „ malum , tamtundem habere facultatis ad „ bonum , parique momento animum se „ ad vitia , vel ad virtutes movere .

Secundo , quia libertatem arbitrii generaliter definiebant per indifferentiam ad bonum , & ad malum ; ita ut neminem liberum esse dicerent , nisi qui posset indifferenter bene , vel male operari , ut liquet ex Augustino lib. 1. operis imperfecti contra Julian. pagina 150. ubi eum , aliosque Pelagianos reprehendit , quod libertatem generaliter sumptam restringerent ad potestatem indifferentem circa bonum , & malum , seu quæ posset bene , & male agere ; quia ex hoc sequeretur , quod nec Deus , nec Angeli , aut homines beati , qui non possunt peccare , seu male appetere , vel eligerre , non essent liberi : *Si liberum non est (inquit) nisi quod duo potest velle , (id est bonum , & malum) liber ergo Deus non est , qui*

ad Tractatum de Gratia. 411
qui malum non potest velle, de quo ipse di-
xisti, Deus esse nisi justus non potest. Sicci-
ne Deum laudas, ut ei auferas libertatem!

C A P U T II.

De Hæresi Semipelagiana.

Circa Hæresim Semipelagianam tria bre-
viter hic exponenda sunt, nempe unde illa originem traxerit? quæ fuerint præ-
cipua Semipelagianorum dogmata? & qui
fuerint hujus hæresis Authores, vel Secta-
tores præcipui?

§. I.

Origo hæresis Semipelagianæ.

Occasione scriptorum D. Augustini con-
tra Pelagianos, duo errores circa gra-
tiam, inter se oppositi, orti sunt, unus in
Africa, & alter in Gallia. Primus fuit Mo-
nachorum Adrumetinorum, qui (ut refert
D. Augustinus lib. 2. retract. c. penultimo) le-
cta ejus epistola centesima quinta ad Sixtum,
duas in partes divisi sunt; quarum altera, du-
ce Floro, credebat gratiam Dei a D. Augu-
stino ita prædicari, ut tolleret libertatem ar-
bitrii, & correptionis necessitatem; altera
vero pro liberi arbitrii defensione pugnabat,
& gratiæ negabat efficaciam, ut arbitrii de-
fenderet libertatem. Ut hanc dissensionem
S. Doctor tolleret, & discordiam illam com-
poneret, scripsit duas epistolas ad Valenti-
num Adrumetini monasterii præfectum,
totidemque libros, unum de gratia, & li-
bero arbitrio, alterum de correptione, &
gratia, quibus diserte ostendit, per effica-
ciam divinæ gratiæ non tolli libertatem ar-
bitrii,

bitrii , neque necessitatem , aut utilitatem correptionis : ut ipsemet testatur lib. 2. retract. cap. 66. his verbis : „ Propter eos , „ qui cum defenditur Dei gratia , putant „ auferri liberum arbitrium , scripsi librum „ de gratia , & libero arbitrio . Ad eos autem scripsi Monachos Adrumetinos , in „ quorum monasterio de hac re cœperat „ esse contentio , ita ut me consulere eorum aliqui cogerentur . Rursus ad eosdem scripsi alterum librum , quem de correptione , & gratia prænotavi , cum mihi nuntiatum esset , dixisse ibi quendam , neminem corripiendum , si Dei præcepta non facit , sed pro illo , ut faciat , tantummodo orandum .

Verum occasione hujus secundi libri ortus est secundus error in Gallia , apud Massiliam , in ipsa fere ultima D. Augustini ætate . Cum enim quidam Massilienses Presbyteri & Galliæ Episcopi in eo legissent , quæ de proposito Divinæ voluntatis , & prædestinationis dicuntur , quo salvandi a peritutris discernuntur , & de efficacia Divinæ gratiæ , qua indeclinabiliter agitur voluntas nostra , maxime turbati , & scandalizati sunt , & unde Africani plenius instructi suum depositu errorem , exinde Galli novæ lucis aspectu excœcati , in varios errores prolapsi sunt , ut testatur Prosper in epistola ad Augustinum in principio , ubi sic ait : „ Multi servorum Christi , qui in Massiliensi urbe consistunt , in sanctitatis tuæ scriptis , quæ adversus Pelagianos hæreticos condidisti , contrarium putant Patrum opinioni , & Ecclesiastico sensui , quidquid in eis de vocatione electorum secundum Dei propositum disputasti . Et „ cum

„ cum aliquandiu tarditatem suam culpare
 „ maluerint, quam non intellecta reprehen-
 „ dere, quidamque eorum lucidiorem super
 „ hoc, atque apertiores beatitudinis tuæ
 „ expositionem voluerint postulare, evenit
 „ ex dispositione misericordiæ Dei, ut cum
 „ quosdam intra Africam similia movissent,
 „ librum de correptione, & gratia, plenum
 „ divinæ authoritatis emitteres. Quo in no-
 „ titiam nostram insperata opportunitate
 „ delato, putavimus omnes querelas resisten-
 „ tium sopiendas; quia universis quæstioni-
 „ bus, de quibus consulenda erat Sanctitas
 „ tua, tam plane hic, absoluteque respon-
 „ sum est, quasi hoc specialiter studueris,
 „ ut quæ apud nos erant turbata, compo-
 „ neres. Recensito autem hoc Beatitudinis
 „ tuæ libro, sicut qui sanctam, atque Apo-
 „ stolicam doctrinæ tuæ autoritatem an-
 „ tea sequebantur, intelligentiores multo,
 „ instructioresque sunt facti; ita qui per-
 „ suasionis suæ impediebantur obscuro, a-
 „ versiores, quam fuerant, recesserunt.

Exordium ergo hæresis Semipelagianæ
 cœpit a Massiliensibus, qui idcirco *Semipe-
 lagiani*, seu *reliquæ Pelagianorum* dicti
 sunt, quia in multis a doctrina Pelagii re-
 cedentes, in aliquibus tamen ei adhæsere;
 præsertim in eo quod dicebat, primam gra-
 tiam, & vocationem ex meritis bonæ vo-
 luntatis dari. Nonnulli tamen existimant,
 Vitalem Carthaginensem Semipelagianis-
 mum in Africa inchoasse: ajebat enim
 initium fidei ex libero arbitrio esse, non ex
 motione gratiæ, neque esse donum Dei,
 sed esse in nobis ex nobis, ut infra pate-
 bit, cum de Authoribus, & sectatoribus pre-
 cipuis Semipelagianæ hæresis differemus.

§. I I.

Præcipua Semipelagianorum dogmata.

PRÆCIPUA SEMIPELAGIANORUM, seu Mafiliensium dogmata, in epistolis Prospere, & Hilarii ad Augustinum eleganter descripta, ad hæc præcipua capita reduci possunt.

Primo, licet admitterent omnem hominem Adamo peccante peccasse, & neminem per opera sua, sed per Dei gratiam regeneratione salvari; attamen universis hominibus propitiationem, quæ est in sacramento sanguinis Christi, æquali voluntate dicebant esse propositam, nec speciалиori affectu Deum electos prosequi asserebant, sed potius eos in regnum suum prædestinasse, quos gratis vocatos, dignos futuros electione, & de hac vita bono fine excessuros esse præscierit.

Secundo inde colligebant, doctrinam Augustini de gratuita prædestinatione esse rejiciendam, contendentes neminem ante Augustinum eum Apostoli ad Romanos epistolæ sensum dedisse, quem ille dederat; quin & doctrinam illius ædificationi audientium esse contrariam, & etiam si vera esset, minime esse prædicandam. Hinc nolebant certum esse prædestinatorum numerum, sed posse minui, vel augeri, ne locum apud infideles, & negligentes cohortationum incitamenta non habeant.

Tertio dicebant, quod si Dei constitutio humanas præveniat voluntates, tollitur humani arbitrii libertas, & fatalis necessitas inducitur.

Quar-

Quarto, si omnia opera bona Deus in nobis operatur, meritum omne nostrum excludi.

Quinto, ex prædestinatione, quam S. Augustinus admittebat, sequi Deum ad peccatum prædestinare. Item illam desperandi necessitatem injicere, lapsis curam adimere resurgendi, sanctis afferre torporis occasionem, præceptis, & exhortationibus adversari, & audientium ædificationi esse contrariam.

Sexto asserebant, quod Dei gratia humana non præveniat, sed sequatur voluntatem, ut non ideo velit, quia adjuvatur a Deo, sed a Deo adjuvetur, quia prius voluerit.

Septimo, per Dei gratiam non opus ipsum,
sed operis tantum possibilitatem donari.

Demum, ut refert Hilarius epistola ad Augustinum, in voluntate nostra vires ad bene operandum distinguebant a viribus ad bene desiderandum, petendum, credendum, &c. quæ pertinent ad initium bonæ operationis; addebantque, quod voluntas nostra, dum esset integra ante lapsum, poterat non solum petere, & desiderare, sed etiam bene velle, & operari; adeoque quod tunc gratia adjuvabat hominem bene volentem, & operantem, seu bonam ejus voluntatem: corrupta autem per peccatum originale natura, non remanere volebant in nobis vires ad bene operandum, & recte volendum, (quæ sunt operationes hominis sani) sed tantum ad desiderandam salutem, & petendum remedium; & has vires dicebant esse semina quædam virtutum, naturaliter insita animæ nostræ. Et quia nemo potest desiderare salutem, & eam petere, nisi prius credit Salvatorem; ideo etiam credulitatis affectum ex nostra voluntate

esse, gratiamque Christi antecedere affirmabant: sicut æger licet non habeat vires ad ambulandum, & faciendum alia opera hominis fani, potest tamen desiderare salutem, quærere medicum, ac petere medicinam. Unde ista initia bonæ voluntatis non in solo credulitatis affectu, sed etiam in petitione, pulsatione, desiderio sanitatis, & similibus actibus imperfectis constituebant; dicebantque illa in hominibus prærequiri, ut Deus gratiam ad credendum, sperandum, diligendum, & alios actus perfectos eliciendos tribuat; adeoque gratiam Dei non fore nisi hominem jam appetentem bona; ita quod prior sit obedientia nostra, quam Dei gratia, nostrasque Deus expectet voluntates, ut purgari, & sanari velimus, non autem per suam gratiam efficiat, ut sanitatem animæ quæramus, ac desideremus. Idque asserebant, tum ne Deus videatur injustus, & personarum acceptor, quosdam sua gratia præveniendo, alios vero relinquendo, ac spernendo; tum etiam ne naturalis arbitrii nostri libertas, & inclinatio ad bonum per originale peccatum omnino extincta videatur, si ne quidem sanitatem suam homo ex se possit desiderare, ac petere, opemque medici implorare. Unde Hilarius in epistola ad Augustinum de Massiliensibus ait: *Conveniens afferunt veritati, vel congruum prædicationi, ut cum prostratis, & nunquam suis viribus surrecturis annuntiatur salutis obtainendæ occasio, eorum merito quo voluerint, & crediderint a suo morbo se posse sanari, & ipsius fidei augmentum, & totius sanctitatis suæ consequantur effectum.*

Quod autem de inchoatione fidei, hoc etiam
de

de in ea usque ad finem perseverantia dicendum esse putabant, nimirum utramque humanæ voluntati pariter adscribendam, ut testatur D. Augustinus libro de bono persev.

c. 17. ubi ait: „ Hi initium fidei, & usque in „ finem perseverantium sic in nostra consti- „ tuunt potestate, ut Dei dona esse non pu- „ tent; neque ad hæc habenda, atque retinen- „ da, Deum operari nostras cogitationes, & „ voluntates, cætera vero ipsum dare conce- „ dunt, cum ab illo impetrantur credentis fi- „ de. Et infra: Sed hæc, inquiunt, ut a Deo „ dentur nobis, fides impetrat, quæ incipit a „ nobis; quam fidem & incipere habere, & in „ ea usque in finem permanere, tanquam id „ non a Domino accipiamus, nostrum esse „ contendunt. „ Hinc apud S. Prosperum, fi- „ dem, & permansionem in fide ad præscientiam, „ non ad prædestinationem revocabant, dicen- „ tes: „ Qui autem credituri sunt, quive in ea fi- „ de, quæ deinceps per Dei gratiam fit juvan- „ da, mansuri sunt, Deum præscisse ante mun- „ di constitutionem, & eos prædestinasse.

Errabant etiam circa perseverantium in vir- „ tutibus, & earum operibus, quam licet fateren- „ tur inter Dei dona connumerari, nullum ta- „ men volebant dari perseverantiæ donum, quo fieret, ut sancti, & prædestinati certo, & infalli- „ biliter perseverarent, seu quo non nisi bene o- „ perantes, ac in bonis operibus perseverantes „ essent, quale docet Aug. c. 11. & 12. libri de correptione, & gratia. Ita refert Hilarius in epistola ad Augustinum, ubi de Massiliensi- bus scribit: „ Deinde moleste ferunt ita di- „ vidi gratiam, quæ vel tunc primo homini „ data est, vel nunc omnibus datur, ut ille ac- „ ceperit perseverantiā, non qua fieret ut per- „ severaret, sed sine qua per liberum arbitriū

„ perseverare non posset : nunc vero sanctis
 „ in regnum per gratiam prædestinatis non
 „ tale adjutorium perseverantiae datur , sed
 „ tale , ut eis perseverantia ipsa donetur ; non
 „ solum ut sine isto dono perseverantes esse
 „ non possint , verum etiam ut per hoc donum
 „ non nisi perseverantes sint . His verbis San-
 „ ctitatis tuæ (lib. de corrept. & gratia c. 11.
 „ & 12.) ita moventur , ut dicant quandam
 „ desperationem hominibus exhiberi . , Ex
 quo patet , quod licet illi hæretici auxilium
 sufficiens , & voluntati subditum , quo volun-
 tas potest operari , si velit , libenter admitte-
 rent ; auxilium tamende se , & ex natura sua
 efficax , quod subjicit sibi voluntatem , &
 eam ad agendum applicat , ac infallibiliter
 cum actu conjungit , omnino repudiabant ;
 quia falso existimabant cum tali auxilio li-
 bertatem , & indifferentiam voluntatis nostre
 non posse componi .

Quæres primo , an Semipelagiani ad ini-
 tiūm fidei , & bonæ voluntatis gratiam ali-
 quam admiserint , vel illud in nuda natura
 posuerint ?

Respondeo , aliquos ex illis admisisse ad ra-
 le initium interiorem illustrationem , & ex-
 citationem , alios ad illud non admisisse a-
 liam gratiam , quam legem , atque doctri-
 nam ; subindeque in nuda natura , omni-
 jorsus auxilio interno gratiae destituta , ini-
 tiūm fidei , & bonæ voluntatis collocasse .

Prima pars hujus resolutionis suadetur ex
 eo , quod Semipelagiani eam solam Christi
 gratiam rejiciebant , quam nocere libertati ,
 & inutilem reddere correptionem existima-
 bant : Sed gratia interius mentem illuminans ,
 & moraliter duntaxat excitans , ac usum , &
 determinationem voluntatis expectans , illa
 in-

inconvenientia non parit, ut de se patet: Ergo talem gratiam plures ex Semipelagianis non rejiciebant, sed eam pro initio fidei, & bonæ voluntatis admittebant. Id constat in Gennadio, quem Semipelagianis adhæsisse, & de eorum secta fuisse, capite sequenti ostendemus. Ille enim in libro de Ecclesiasticis dogmatibus hæc scribit:,, Manet itaque ad „ quærendam salutem arbitrii libertas, id est „ rationalis voluntas, sed admonente prius „ Deo, & invitante ad salutem, ut vel eligat, „ vel sequatur, vel agat occasione salutis, hoc „ est inspiratione. Et infra: Initium ergo sa- „ lutis nostræ Deo miserante habemus; ut ac- „ quiescamus salutiferæ inspirationi, nostræ „ potestatis est; ut adipiscamur, quod acquie- „ scendo inspirationi cupimus, divini est mu- „ neris.,, Ubi pro initio salutis admittit sa- „ lutiferam inspirationem, subindeque gratiam moraliter excitantem. Id ipsum non minus aperte tradit Cassianus collat. 13. cap. 3. ubi ait, quod Deus *initia sancte voluntatis inspirat, & virtutem, atque opportunitatem eorum, quæ recte cupimus, tribuit peragendi.* Ipse etiam Vitalis, Semipelagianorum præcursor, & qui, ut infra dicimus, Semipelagianismum inchoavit in Africa, quamvis fidem esse in nobis ex nobis doceret, ut patet ex Augustino epist. 107. gratiæ tamen interioris moralem excitationem non excludebat. Nam in eadem epistola ajebat, *hominem posse, Dei suâsione precedente, consequente consensione, libertate naturali credere.*

Secunda pars, quæ asserit aliquos ex Semipelagianis ad initium fidei non admisisse aliam gratiam, quam legem, atque doctrinam, constat ex S. Prospero epist. ad Rufinum, ubi de quibusdā Semipelagianis sic ait:,, Hoc a-

„ pud se ingenio servarunt, ut ad incipien-
 „ dum, & proficiendum, & perseverandum
 „ in bono necessariam homini Dei gratiam
 „ proflerentur, sed in hac professione quo-
 „ modo vasa iræ molirentur irreperere, ipsa Dei
 „ gratia vasis misericordiæ revelavit. Intelle-
 „ ctum est enim, saluberrimeque perspectum,
 „ hoc tantum eos de gratia confiteri, quod
 „ quædam libero arbitrio sit magistra, seque-
 „ per cohortationes, per legem, atque do-
 „ ctrinam, per creaturam, per contempla-
 „ tionem, per miracula, perque terrores ex-
 „ trinsecus judicio ejus ostendat, quo unus-
 „ quisque secundum voluntatis suæ motum, si
 „ quælierit, inveniat, si petierit, accipiat, si
 „ pulsaverit, introeat: quia scilicet gratiæ i-
 „ psius vocatio hoc primum circa nos agit, ut
 „ nostræ facultatis arbitrium admoneat, nec
 „ aliud sit gratia, quam lex, quam Propheta,
 „ quam Doctor. Ait etiam in epist. ad Au-
 „ gustinum, quod *quidam horum in tantum a Pelagianis semitis non declinant*, ut dicant
 hominem per naturalem virtutem, & faculta-
 tem posse ad gratiam, qua in Christo renasci-
 mur, pervenire, petendo, quærendo, pul-
 sando: ut ideo accipiat, ideo inveniat,
 ideo introeat, quia bono naturæ bene u-
 sus, ut ad istam salvantem gratiam ini-
 tialis gratiæ ope meruerit pervenire.

Ex his constat, aliquos ex Semipelagianis in
 nuda natura, omni prorsus interno gratiæ au-
 xilio carente, initium fidei, & meriti collo-
 casse, contra quos esse videtur Canon ille A-
 trausicanæ Synodi, quo dicitur: *Si quis sine*
gratia Dei credentibus, volentibus, & pulsan-
tibus nobis misericordiam conferri dicit, &c.
 Ex quo intelliges, hanc propositionem, quam
 damnavit Innocentius X. *Semipelagiani ad-*
 mitte-

mittebant prævenientis gratiæ necessitatem ad singulos actus , etiam ad initium fidei , falsam esse : si enim aliqui Semipelagiani initium fidei , & bonæ voluntatis in mera natura omni gratia interna destituta colloca-rint , profecto indefinita propositio æquiva-lens universalis , qua dicitur Semipelagianos admississe prævenientis gratiæ necessitatem ad singulos actus , etiam ad initium fidei , vera esse non potest .

Quæres secundo , quam vim merendi gratiam tribuerint Semipelagiani initio fidei , & bonæ voluntatis , an de condigno , vel tan-tum de congruo ?

Respondeo , illos in hujusmodi fidei , & bonæ voluntatis initiis vim tantum merendi de congruo posuisse . Constat hoc ex Fausto , & Cassiano , præcipuis Semipelagianæ hæresis sectatoribus . Primus enim (ut refert Gen-nadius in ejus vita) dieere solebat : *Quid-
quid libertas arbitrii pro labore p[ro]i[er]t mercedis
acquisierit , non esse proprie meritum , sed
gratiæ donum* . Unde in epistola ad Lucidum-ait : *Nostri laboris fructum , officii rem esse ,
non meritum* . Alter vero Collat . 13 . cap . 13 .
dicit , Deum dare suam gratiam *sub colore cu-
jusdam desiderii , & laboris* . Et ibidem c . 8 .
& 11 . docet , voluntatis nostræ conatus non es-
se meritorios gratiæ , sed potius occasionses
& veluti ansas , quas Deus apprehendit .
Quæ verba quandam solum congruitatem ,
& decentiam , non vero strictum , & rigo-
rosum debitum significant , Unde Synodus Arausicana illum Semipelagianorum errorem proscribens , quo vim merendi gratiam tribuebant initio fidei , & bonæ voluntatis , sic ait : *Si quis sine gratia Dei credentibus ,
volentibus , desiderantibus , & pulsantibus*

nobis misericordiam conferri dicit, &c. Quibus verbis Concilium aperte declarat, Semipelagianos non docuisse gratiam ex justitia dari credentibus, volentibus, desiderantibus, & pulsantibus, sed solum ex misericordia; nec per consequens ex aliquo merito de condigno, sed tantum de congruo. Unde quando D. Prosper contra Collatorem cap. 16. affirmat, ex Semipelagianorum sententia, gratiam dari operibus naturalibus ut debitum, non vero conferri ut donum, loquitur de debito ex quadam decentia, & congruitate, non vero de debito ex stricta, & rigorosa justitia, quale ex merito perfecto, & condigno resultat.

C A P U T III.

Qui fuerint Semipelagianæ heresis Authores, vel Sectatores præcipui?

AD complementum hujus tractatus, & perfectam Semipelagianæ hæresis intelligentiam supereft, ut declaremus, qui fuerint ejus Authores, vel Sectatores præcipui.

§. I.

De Vitali Carthaginensi.

VITALI Carthaginensis, ad quem D. Augustinus epistolam 107. scripsit, videtur Semipelagianismum inchoasse in Africa, & veluti Semipelagianorum Præcursor fuisse. Dixit enim, initium fidei, & bonæ voluntatis esse in nobis ex nobis, & ex libero arbitrio, non vero ex motione gratiæ procedere, ut in eadem epistola S. Doctor declarat,

clarat, his verbis: „ Si ea, quæ de te au-
„ dio, vera sint, initium fidei, uti etiam i-
„ nitium bonæ, hoc est piæ voluntatis,
„ non vis esse donum Dei, sed ex nobis nos-
„ habere contendis, ut credere incipiamus,
„ cætera autem religiosæ vitæ bona Deum
„ per gratiam suam, jam ex fide petenti-
„ bus, quærentibus, pulsantibus donare
„ consentis. „ Ecce quomodo Vitalis ini-
tia fidei, & bonæ voluntatis dicebat esse ex
nobis, cætera vero opera ex gratia Dei.
Quem errorem fortiter, ac nervose confu-
tat ibidem Augustinus, argumento desum-
pto ex orationibus fidelium, qui orant
Deum, ut infidelium mentes ad fidem con-
vertat, & faciat eos ex nolentibus volen-
tes, & ex repugnantibus consentientes, &
gratias illi agunt, cum eos ad fidem con-
vertit. Unde feliciter Vitalem ab illo er-
rore revocavit, & Semipelagianismum in
Africa nascentem penitus extinxit, & in
suo veluti fonte præfocavit.

§. II.

De Cassiano.

Jannes Cassianus, Chrysostomi primum
Diaconus, deinde apud Massiliam in Gal-
lia Presbyter, qui floruit anno 449. & degebat
Massiliæ tempore, quo occasione libri S. Au-
gustini de correptione, & gratia exorta est
apud Massilienses magna illa turbatio, cuius
supra meminimus, fuit unus ex præcipuis Se-
mipelagianæ hæresis sectatoribus, ut constat
ex Collatione 13. de protectione Dei cap.
14. Ibi enim illam Centurionis fidem, ita
a Domino in Euangeliō laudatam, qua-

pro,

propterea erat, prout ad salutem oportet, docet ex solis naturæ viribus illius Centurionis fuisse; in tantum quod asserit, quod nullius laudis esset, ac meriti, *si id in eo Christus, quod ipse laudaverat, prætulisset.* Item ibidem ait, fidem Abraham non fuisse illi a Domino inspiratam, sed ex solius naturæ viribus habitam. Docet etiam in eadem Collatione cap. 7.8.& 12. hominem posse per semetipsum bonum velle, quam bonam voluntatem, veluti emicantem scintillam, confovet Deus, suaque inspiratione confortat; quia nihil, inquit, prodest sanitatis gratiam concupisse, nisi Dominus, qui vitæ ipsius usum tribuit, etiam vigoris incolumitatem impertiat. In eo tamen Cassianus ab aliis Semipelagianis discrepavit, quod alii omnes initia fidei, & bonæ voluntatis ex nobis procedere affirmarunt; ille vero putavit necessarium non esse, quod semper gratiam præcederent, sed quandoque divinam gratiam, seu excitacionem priorem esse asserebat. Unde duos hominum ordines constituebat, quorum alii libere veniebant ad Christum, & bonum velle incipiebant, & a gratia adjuvabantur, & recipiebantur; alii vero taliter a gratia præventi, in illis suis actibus nullam habebant libertatem. Unde ut recte observavit S. Prosper contra Collatorem cap. 9. utrumque simul amplexus est Pelagianorum, & Manichæorum errorem. Dicendo enim aliquos incipere, & a Deo adjuvari, Pelagianus fuit; asserendo autem in aliquibus Deum incipere, & homines venire absque ipso rum libertate, Manichæus extitit. Unde mirum est, quod Vasquez i. p. q. 23. disp. 89. c. 4. §. *Deinde, de Cassiano, aliisque Semipelagianis hæc audeat scribere: „Hi omnes,*

„ut-

„ utpote viri alioquin catholici , & religiosi ,
„ contra Pelagium , & Celestium gratiam
„ Christi fatebantur non solum utilem , sed
„ etiam necessariam ad justificationem , per-
„ severantiam , & merita vitæ æternæ , qua
„ nisi adjuventur conatus nostri , non solum
„ difficile consequerentur , quod contendi-
„ mus , verum etiam irriti essent , & inanes
„ ad justificationem , & merendam vitam æ-
„ ternam . „ Mirum etiam , quod ibidem
c. 5. Chrysostomum , Doctorem egregium ,
in hac materia , & causa cum Cassiano con-
jungat , dicens , *Cassianus* , & *Chrysostomus*
egregie admodum de gratia loquuntur : quæ
enim conventio lucis ad tenebras ? & Ca-
tholici , ac eximii Doctoris , cum hæretico ,
& Semipelagiano ? in quem D. Prosper a-
riter invehitur per totum fere librum ,
quem contra ipsum conscripsit .

§. III.

De Fausto Regiens.

Faustus ex Abbatे Monasterii Lyrinensis ,
Regii , quæ Galliæ urbs est , Episcopus fa-
ctus , floruit ad annum 480. medio tempore
inter Prosperum , & Fulgentium . Ille Pe-
lagium damnasse , ejusque errores refellere vi-
deri volens , incidit in errores Juliani , &
Cassiani , ut constat ex duobus libris , quos scri-
psit de gratia , & libero arbitrio , in quibus
primo docet cum Juliano , peccatum origina-
le non esse veram culpam in parvulis , quæ ar-
bitrii vires laderet , & extenuaret , sed tan-
tum esse pœnam ; unde quoties peccatum ori-
ginale nominat , sub hac tantum ratione illud
admittit , ut ex primo libro non difficile colli-
gi-

gitur; totum enim primum, & secundum caput fere consumit in probando contra Pelagium, non futuram esse mortem, si peccatum primi parentis non esset. Cum enim tam ex professo Pelagium in materia peccati originalis impugnet, & mortem solum nominet, nec culpæ mentionem unquam faciat, hæresim Juliani ponentis non culpam, sed mortem in posteros sine dubio sequutus est.

Secundo ex hoc principio infert liberum hominis arbitrium non esse laesum, nec viribus attenuatum, subindeque ex sua naturali facultate sufficientes vires habere ad desiderandam, quaerendam, & petendam salutem, cui sic desideranti, quaerenti, & pententi quaesita lux se ingerit. Unde initium boni operis ante gratiam in homine ponit, cui detur ex merito infallibiliter gratia, quæ est ipsissima Semipelagianorum hæresis. Ita habet lib. I. cap. 15. 16. & 18.

Tertio, in tantum liberum arbitrium sanum, & integrum viribus constituit, ut dicat posse ipsum ex sua innata libertate, si velit, mandata servare. Nam lib. I. cap. 13. ex illo Eccles. 15. *Si volueris mandata servare, conservabunt te,* hoc infert: *Videmus ergo, & in bonam, & in contrariam partem posse humanae mentis transfire consensum.* Et intelligit hoc posse hominem ex solis viribus liberi arbitrii, cum illud constituat sanum, & integris viribus, ut jam diximus. Unde in libero arbitrio agnoscit vires sufficientes ad diligendum Deum super omnia, quod est primum, & maximum mandatum: in quo S. Augustinus passim docet, totam Pelagianorum hæresim fundari.

Quarto hæc verba Psalmi 226. *Nisi Dominus ædi-*

ædificaverit domum, &c. quæ Patres de vera gratia interpretantur, de gratia externa ille exponit lib. I. cap. II. ubi sic ait: Nunquid aliter ædificat, & cognoscit Ecclesiam, quam per labores, & officia Sacerdotum, per ministeria, & exempla Sanctorum, per Apostolorum virtutes, & Martyrum mortes? Quin verba illa Salvatoris: Nemo potest venire ad me, nisi Pater, qui misit me, traxerit eum, quæ de vera gratia unanimis Catholicorum sensus intelligit, sic ille c. 17. exponit: „ Quid est attrahere, nisi prædicare, nisi Scripturarum consolationibus excitare, nisi incrementationibus deterrere, desideranda propone, intentare metuenda, judicium comminari, præmium polliceri?

Demum prædestinationem post præscientiam statuit, & ex illa certitudinem ejus derivari affirmat: ait enim lib. I. cap. II., Igitur dum liberi interemptor arbitrii in alterum partem omnia ex prædestinatione stauit, & definita esse pronuntiat, etiam super prema remedia pœnitentiæ sensu abruptæ impietatis evacuat. Et l. 2. c. 2. Prædestinationem Dei male intelligunt astruentes, quod inde humanorum actuum causa nascatur. Et paulo post subdit: Generalis itaque præscientia, quæ de statu mundi totius apud Deum manet, de potentia nascitur; sed circa statum hominis, qualitates, & species prænoscendi de humani actus inspectione mutuatur. Et infra ait: Magis de origine voluntatis humanæ genus præscit tigis divinarum deriviari, quam opera, & voluntates hominum de nutu, & impulsu providentiarum cœlestis incipere. Et tandem capite sequenti sic concludit: Nisi præscientia exploraverit, prædestinationis nihil decernit.

Hos

Hos libros Fausti Gelasius Papa, canone *Sancta Romana Ecclesia*, damnavit, & inter apocryphos numeravit. Unde prudens, & notatu digna est hæc Cardinalis Baronii admonitio, tomo sexto, anno Domini 490.

„ Cum igitur Fausti sententiæ ubique ab „ Ecclesia Catholica fuerit contradicendum, „ videant quanto periculo quidam ex Re- „ centioribus, dum in Novatores insur- „ gunt, ut eos confutent, a Sancti Augu- „ stini sententia de prædestinatione rece- „ dant, cum alioqui arma non desint, qui- „ bus Hæretici profligentur.

§. IV.

De Gennadio.

Gennadius Massiliensis Presbyter, qui vivit tempore Gelasii Papæ ad annum 490. Semipelagianis adhæsisse, & de ipsorum secta fuisse creditur: siquidem libro de viris illustribus Cassianum, & Faustum laudat, eorumque de gratia sententiam Prosperi doctrinæ anteponit; Rufinum Aquilejensem Presbyterum, Pelagii Præcursorum, ac Pelagianæ hæresis Architectum (a quo, ut supra vidimus, se audivisse non traduci peccatum originale, affirmavit Celestius) Hieronymo præfert: ideoque Gelasius Papa opera ejus inter libros Apocryphos rejicit. Hinc Baronius anno 443. num. 28. Gennadium ait ejusdem esse farinæ cum Cassiano; & anno 490. num. 45. fuisse unum e Presbyteris Gallianis, de quibus Prosper, & Hilarius apud Celestimum Papam conquesti sunt, quod Augustini doctrinæ adversarentur; sed addit ipsum Gelasii opera resipuisse, & ad Episcopatum

ad Tractatum de Gratia. 429
tum Massiliensem assumptum fuisse, & orthodoxum, ac Catholicum e vivis abiisse.

§. V.

De Severo Sulpitio.

PLures etiam existimant, Severum Sulpitium, Sancti Martini, cuius vitam scripsit, Discipulum, ac S. Paulino, Nolano Episcopo, amicitia conjunctissimum, Massiliensis erroris fermento vitiatum fuisse: quia Gennadius libro de viris illustribus cap. 19. hæc scribit: „ Severus Presbyter, cognomento Sulpitius, virginere, & literis nobilis, & paupertatis, ac humilitatis amore conspicuus: & in fine, post enumeratas ejus lucubrationes ista subdit: „ Hic in senectute sua a Pelagianis deceptus, & agnoscens loquacitatis culpam, silentium usque ad mortem tenuit, ut peccatum, quod loquendo contraxerat, tacendo penitus emendaret. „ Subscribit Baronius anno 431. nu. 189. Gennadiumque sic interpretatur, ut velit Severum non omnibus Pelagii placitis adhaesisse, sed iis tantum, quæ Massilienses recipiebant. At refragatur Guibertus Abbas, in compendio Apologiæ pro Severo: ubi ait: „ Nunquam nisi in Gennadio legi Severum a Pelagianis seductum, qui nescio utrum hoc ipse alicubi legerit, an ex sola fama, quæ facta, infectaque docet, didicerit. „ Ut ut sit, constat Severum Orthodoxum, & Catholicum obiisse: nam in Martyrologio Romano die 29. Januarii in Sanctorum canonem refertur, & virtutibus, ac eruditione conspicuus dicitur.

Hunc aliqui dicunt fuisse Episcopum Bituricens-

censem, quia Guibertus citatus, qui pro eo Apologiam scripsit, ipsum Archiepiscopum Bituricensem appellat. Sed hoc alii negant cum Baronio citato, ubi sic ait: *Neminem reperi antiquorum, qui hunc Severum, de quo est sermo, Episcopum nominet, verum tantummodo Presbyterum, sicut & Honorius retexens catalogum clarorum virorum.* Et sane Gennadius Massiliensis, sui temporis res gestas scribens, libro supra citato, non nisi Presbyterum eum nominat, & in eo ordine pœnitentem esse defunctum ait.

§. VI.

De Joanne Chrysostomo.

VAsquez r. p. dist. 91. cap. 8. omnes ingenii vires intendit, ut ostendat Chrysostomum, & alios ex Patribus Græcis in errorem Semipelagianorum esse lapsos, atque Cassianum Chrysostomi discipulum, errorem supra relatum, quem habet collat. 13., a suo magistro didicisse afferit. Et capite sequenti plures affert Theologorum interpretationes, quibus Chrysostomi testimonia, quæ Semipelagianis favere videntur, conantur exponere, & in Catholicum sensum pertrahere; quas omnes parvipendit, & totis viribus conatur evertere.

Sed ab hoc errore, seu potius calumnia recte Chrysostomum vindicat noster Sixtus Senensis, libro 5. Bibliothecæ annotat. 101. ubi ait, Joannem Oecolampodium, Lutheranæ hæresis professorem, hunc errorem ei primo imposuisse; pluraque adducit hujus sancti Doctoris testimonia, quibus aperte gratiam prævenientem admittit, ac docet,

nostræ fidei , & salutis exordia a gratia ,
 non vero a nuda natura procedere . Istud ,
 quod habet tomo 1. homil. de Adam , &
 Eva , celebre est : „ Omnia bonorum af-
 „ fectuum , atque operum , & omnium stu-
 „ diorum , omniumque virtutum , quibus ab
 „ initio fidei ad Deum tenditur , Deum pro-
 „ fitteamur Authorem ; & non dubitemus ab
 „ ipsius gratia omnia hominum merita pro-
 „ venire , per quam etiam fit , ut aliquid
 „ boni & velle incipiamus , & facere .
 Plura alia possent adduci Chrysostomi te-
 stimonia , sed istud sufficit pro defensione
 hujus sancti Doctoris , quem Anastasius 7.
 Hexam . Christi fluvium appellavit : Theo-
 doretus Dialog . 1. Magnum orbis lumen ,
 admiratione dignissimum Doctorem : Isidorus
 Pelusiota lib . 2. Epist . 42. Ecclesiarum o-
 mnium oculum : & denique Innocentius I.
 Epist . 30. Mellitam Constantinopolitanae Ec-
 clesiæ linguam .

§. VII.

De Vincentio Lyrinensi .

Certum est , de numero Semipelagianorum
 fuisse Vincentium quendam , doctrinæ
 S. Augustini impugnatorem , contra quem
 extant responsiones Prosperi ad objectiones
 Vincentianas : sed quis fuerit ille Vincentius ,
 non ita manifestum est . Nonnulli arbitran-
 tur , Vincentium istum fuisse illum Mona-
 chum de Conventu Lyrinensi , quem satis no-
 tum nobis reddit famosus ille liber , volumine
 parvus , sed sententiarum pondere magnus ,
 & elegantissimus , quem pro fidei Catholicæ
 antiquitate , & veritate , aduersus prophanas
 omnium

omnium hæresum novitates conscripsit. Sed iniqua est ista suspicio. Primo, quia libellus ille plane aureus, modo relatus, testatur illum fuisse novitatum maximum impugnato-rem. Secundo, quia in ultimo capite illius allegant Cœlestini epistolam ad Episcopos Galliæ, in qua aperte Semipelagiani inveniuntur damnati, eamque summopere laudat: quomodo autem ille Semipelagianus potuit esse, qui damnationem Semipelagianorum ita laudando concelebrat? Tertio, quia Gennadius in libro de viris illustribus hunc ei nævum non appingit, sed validissimum contra hæreticos athletam fuisse memorat. Unde Baronius ad annum 431. num. 188. vere tradit, Vincentium, cuius sunt objectiones Vincentianæ apud Prosperum, fuisse alium ejusdem nominis Presbyterum Gallum, cuius meminit prædictus Gennadius lib. de viris illustribus cap. 80. nam c. 94. de Vincentio Lyrinensi mentionem facit.

C A P U T I V .

*Errores Manichæorum, Lutheranorum, & Calvinistarum circa gratiam, & libe-
rum arbitrium.*

CUm opposita juxta se posita magis elu-
cescant, errores Manichæorum, Lu-
theranorum, & Calvinistarum, qui Pe-
lagianorum, & Semipelagianorum erroribus
direcťe opponuntur, breviter hic describen-
di sunt.

§. I.

De erroribus Manichæorum.

MAnichæi posuerunt duo esse æterna, seu sibi coæterna principia, unum bonum, alterum vero málum: Ex quo inferebant duas in homine esse naturas, alteram bonam, determinatam ad bonum ex illo bono principio: alteram malam, & determinatam ad malum ex alio malo principio. Ita docet Augustinus variis in locis, præsertim lib. 1. ad Bonifacium cap. 8. his verbis: *Manichæi, quod etiam te nosse satis indicasti, duas naturas, alteram boni, alteram mali, ex diversis, atque inter se adversis, coæternisque principiis, vanitate sacrilega nefandi erroris inducunt.* Ex hoc etiam deducebant, hominem nullo modo libertatem habere, sed omnia, sive bona, sive mala, ex necessitate naturæ operari; vel ex natura illa boni, & ad bonum determinata, vel ex natura mali etiam determinata ad malum. Unde Hieronymus in proæmio dialogi aduersus Pelagianos ait: *Manichæorum esse hominum damnare naturam, & liberum auferre arbitrium.* Plures alii erant Manichæorum errores. Nullum enim peccatum originale admittebant, unde baptismum ad illius emundationem non recipiebant, ut docet Augustinus lib. 2. ad Bonifacium cap. 2. ubi sic ait: *Manichæi dicunt lavacrum regenerationis, id est quam ipsam esse superfluum, nec prodeesse aliquid prophano corde contendunt.* Volebant etiam nuptias esse malas, quia cum libidine, & concupiscentia carnis, quam ex prædicta mali natura esse dicebant, e-

xercentur. Item legem veterem justificare impotentem, tanquam malam reprobabant, & Patres veteris testamenti, tanquam insignes peccatores traducebant. Verum hæc præsentis instituti non sunt, quia hic solum agimus de erroribus, qui versantur circa gratiam, & liberum arbitrium.

§. II.

De erroribus Lutheranorum, & Calvinistarum circa liberum arbitrium.

RECTE observat D. Thomas opusc. 19.c. 2. quod hæc est errantium consuetudo, ut, quia in medio veritatis non possunt consistere, unum errorem declinantes, in contrarium dilabantur: Quod ibidem probat exemplo Arrii, & Sabellii, Nestorii, & Eutychetis, Pelagii, & Manichæi. Unde egregie Tertullianus contra Praxeam: *Varie Diabolus æmulatus est veritatem, affectavit illam aliquando defendendo concutere. Unicum Deum vindicat omnipotentem mundi conditorem, ut & de unico hæresim faciat.* Idem constat exemplo Lutheri, & Calvini, qui ut Pelagianorum errores devitarent, in Manichæorum hæresim inciderunt; ut enim divinæ gratiæ necessitatem, & efficaciam contra Pelagianos defenderent, liberum arbitrium cum Manichæis negarunt. Unde Concilium Senonense contra Lutheranos celebratum anno 1528. in præfatione de Luthero sic ait: *In errorum Manichæi incidit Lutherus, dum nimis anxie, & scrupulose devitat Pelagium: mezuens namque liberum arbitrium cum Pelagio efferre, omne opus bonum, quod est in homine, Deo tribuit, & divinæ gratiæ, nihil pror-*

prorsus arbitrio: Sicque tollens omnino liberum arbitrium Lutherus, factus est Manicheus, dum refugit esse Pelagianus. Ex diversis tamen principiis Manichæi, Lutherani, & Calvinistæ liberi arbitrii negationem, seu extinctionem deduxerunt. Manichæi enim eam derivari affirmarunt ex dupli illa natura, determinata respective ad bonum, & ad malum, de qua §. præcedenti. Lutherani vero, & Calvinistæ eam referunt ad peccatum originale, & ad divini decreti, & motionis ab eo promanantis efficaciam, & causalitatem.

Prima ergo hæresis, aliarum quasi basis, & fundamentum, quam in materia liberi arbitrii, per os Lutheri, & Calvini, qui sunt veluti duo præcipua antiqui draconis capita, Diabolus exsufflavit, hæc est: *Per peccatum originale fuit in nobis extinctum liberum arbitrium, & determinatum ad malum, sine viribus, ac libertate aliqua ad bonum; ita quod manserit res de solo titulo, vel titulus sine re.* Ita Lutherus in assertion. Articulorum ad Leonem X. art. 36. & libro, qui inscribitur: *Operationes in Psalmos,* super Psalm. 5. & libro de servo arbitrio, & Calvinus lib. 1. Instit. c. 15. num. 8. & lib. 2. c. 3. §. 7. Quamvis autem in hoc Calvinus cum Luthero conveniat, per hoc tamen ab eo discrepat, quod Lutherus ita afferuit extinctum liberum arbitrium per peccatum originale, ut contendat etiam contra omnem Philosophiam, illud mere passive se habere, recipiendo scilicet motum, seu actum a solo Deo productum; Calvinus vero non afferit liberum arbitrium ita ex se extinctum, ut mere passive se habeat, sed vult illud active in nostras operationes

influere, at non libere, sed sponte tantum ad modum brutorum, & sicut equus moveatur a sessore. Unde lib. 2. in Pighium:
 „ Si coactioni (*inquit*) opponitur libertas,
 „ liberum esse arbitrium & fateor, & con-
 „ stanter assevero, ac pro hæretico habeo,
 „ si quis secus sentiat: si hoc, inquam,
 „ sensu liberum vocetur, quod non co-
 „ gatur, aut violenter trahatur, sed spon-
 „ te trahatur iua, nihil moror.

Secunda hæresis Lutheranorum, & Calvinistarum in materia de libero arbitrio est: Ex decreto Dei antecedente, & præveniente gratia efficaci tollitur hominis libertas. Ita Lutherus libro de servo arbitrio, ubi sic per-
 „ verse discurrat: „ Gratia prædicatur: Ergo
 „ liberum arbitrium tollitur. Auxilium gra-
 „ tiæ commendatur: Ergo liberum arbitrium
 „ destruitur. Et iterum: Quotquot sunt lo-
 „ ca in Scripturis divinis, quæ meminerunt
 „ auxiliū, tot sunt, quæ tollunt liberum arbi-
 „ trium. Lutherο concinit Calvinus. nam in c.
 „ 6. Joannis sic ait: Pronuntiat Christus effi-
 „ cacem esse Spiritus Sancti gratiā, qua
 „ trahuntur, ut necessario credant. His pro-
 „ fus evertitur tota liberi arbitrii potestas,
 „ quam sibi somniant Papistæ. Et contra Pi-
 „ ghium: Ita efficaciter formari voluntatem
 „ nostram constituo, ut Spiritus Sancti du-
 „ etum sequatur necessario. „ Idem docet lib.
 2. instit.c. 3. §. 10. & in antidoto ad Concilium
 Trident. ad Canonem 4. sessionis sextæ.

Ex his intelliges primo, Lutherum, & Cal-
 vinum dupli causa, & titulo negare liberum
 hominis arbitrium. Primo quia afferunt per
 peccatum originale libertatem fuisse in ho-
 mine penitus extinctam. Secundo quia ex-
 stimant ex divino decreto antecedente, &
gra-

gratia præveniente, & efficaci tolli hominis libertatem. Quod si quæras, qua ratione hæc inter se cohærere, & conciliari valeant? Si enim per peccatum originale liberum arbitrium omnino sublatum sit, ac extinctum, quomodo potest iterum tolli, & destrui per efficacem gratiæ motionem? Respondeo primo, proprium esse hæreticorum in multis minus consequenter loqui. Secundo dico, illos sentire, quod ablata libertatem per originale peccatum adhuc magis aufert efficax motio Dei. Tertio dici potest, eos velle, quod si libertas non esset extinta in homine per peccatum originale, talis est natura efficacis Dei motionis, ut illam omnino tolleret; quia illa ratione suæ efficaciæ, & infrustrabilitatis necessario infert actum, ad quem datur, ita ut nulla remaneat potentia ad oppositum.

Intelliges secundo, hæreticos, qui liberum negarunt arbitrium, ex quadruplici causa ad illud negandum motos fuisse, seu in quatuor diversa principia necessitatem, liberum arbitrium tollentem, reduxisse. Gentiles enim, & Stoici talem necessitatem in fatum reducebant, quo fati nomine seriem inevitabilem causarum naturalium, & præcipue cœlorum influxum intelligebant. Unde hæc erat Stoicorum vox (ut refert D. Thomas qu. 6. de malo artic. unico) *Talis est voluntas in hominibus, qualem induxit pater virorum, deorumque; id est cœlum, vel sol, ut ibidem explicat S. Doctor. Manichæi vero (ut supra declaravimus) talem necessitatem in duplum naturam determinatam respective ad bonum, & ad malum reducebant. Lutherani autem, & Calvinistæ illam referunt ad duplum causam supra allegatam, nempe ad pec-*

catum originale , & ad divini decreti , & motionis ab eo promanantis efficaciam , & causalitatem . Unde Calvinus lib. 1. instit. c. 16. sect. 8. hæc scribit : „ Nos etsi de verbis non
 „ litigamus , fati tamen vocabulum non re-
 „ cipimus : tum quia est ex eorum genere ,
 „ quorum prophanas novitates refugere nos
 „ Paulus docet : tum etiam quia ejus odio co-
 „ nantur gravare Dei veritatem . Dogma vero
 „ false , ac malitiose objectatur : non enim cum
 „ Stoicis necessitatē comminiscimur ex per-
 „ petuo causarum nexu , & implicita quadam
 „ ferie , quæ in natura contineatur ; sed Deum
 „ constituimus arbitrum , ac moderatorem
 „ omnium , qui pro sua sapientia ab ultima
 „ æternitate decrevit quid facturus esset , &
 „ nunc sua potentia , quod decrevit , exequitur .

Intelliges tertio , Pelagium , Lutherum , & Calvinum suas haereses , quamvis inter se op-
 positas , ex eodem tamen principio deduxisse ,
 nempe ex isto : *Liberum arbitrium cum præveniente , & efficaci Dei motione stare nequit .*
 Pelagius enim sic discurrebat : *Non est liberum arbitrium , si indiger auxilio , ut resert D. Hieronymus in Epist. ad Ctesiphontem .* Vel , quod idem est : *Gratia Dei præveniens , ac efficax , & humani arbitrii libertas simul stare nequeunt :*
Sed in homine est liberum arbitrium : Ergo ad operandum non indiger auxilio Dei præveniente , & efficaci . E contra Lutherus , & Calvinus ex eodem principio conclusionem omnino op-
 positam , nempe non dari liberum arbitrium , inferebant . Sic enim arguebant , ut supra ex Lutero vidimus : *Gratia Dei præveniens , ac de se efficax , & liberum arbitrium simul stare non possunt : Sed gratia Dei præveniens , & de se efficax ponenda est , ut ex Scriptura , & S. Augustino constat : Ergo non datur in nobis liberum .*

arbitrium. Vel si utramque hæresim ad enthy-
mema, quod brevius, & facilius est, reduce-
re velimus, clarius apparebit hæc veritas.
Sic ergo Pelagius arguebat: *Est in homine li-
berum arbitrium: Ergo Dei non indiget auxi-
lio:* Vel: *Est in homine liberum arbitrium: Er-
go non datur præveniens, & efficax Dei au-
xilium.* In quo Antecedens posuit de fide, ex
quo hæreticam deduxit consequentiam. Lu-
therus e contra, & Calvinus sic discurrebant:
*Datur efficax gratiæ prævenientis motio, ut ex
Scriptura, & S. Augustino constat: Ergo non
est in homine liberum arbitrium.* Ubi ex An-
tecedenti Catholico, opposito consequenti
ipsius Pelagii hæretico, inferebat oppositum
Antecedentis Catholici, quo Pelagius dixerat
esse in nobis liberum arbitrium. Unde de istis
hæreticis merito dici potest, quod de aliis ait
Innocentius III. relatus in capite *Excommu-
nicamus*, extra de hæreticis, nimirum quod illi
facies quidem diversas habent (cū illorum er-
rores diversi sint, & inter se oppositi) *sed cau-
das ad invicem colligatas; cum suas hæreses de-
ducant ex eodem principio, in quo colligan-
tur, nempe ex isto: Liberum arbitrium cum præ-
veniente, & efficaci Dei motione stare nequit.*

Demum ex jam dictis intelliges, doctrinam
Thomistarum directe, & e diametro opponi
Pelagianorum, & Calvinistarum erroribus,
cum Thomistæ negent falsum illud, & per-
versum principium: *Arbitrii nostri libertas
cum efficaci gratiæ prævenientis motione sta-
re nequit*, ex quo, ut jam ostendimus, il-
li hæretici suas hæreses deduxere; imo cum
Angelico Doctore passim doceant, divinæ
voluntatis efficaciam esse primam totius
libertatis, & contingentiarum rerum radicem,
ut in tractatu de voluntate Dei fuse declara-

vimus. Unde sicut ille, qui fundamentum aliquius domus evertit, vel radicem arboris evellit, statim talem domum, & arborem destruit: sic Thomistæ falsum illud Pelagianæ, & Calvinianæ hæresis principium, ac fundamentum negantes, & destruentes, utramq; hæresim funditus evertunt, & utramque pestiferam, ac virulentam plantam radicibus tollunt, & evellunt. E contra vero, cum Molina, Suarez, & alii Recentiores, assertores, vel defensores scientiæ mediæ, prædicium Pelagianorum, & Calvinistarum principium admissant, & passim doceant, ac contendant contra Thomistas, arbitrii nostri libertatem cum prævenienti, & physica, ac de se efficaciam divinæ gratiæ motione stare non posse, Pelagii, & Calvini erroribus præter intentionem favent: & tot hæreticis illis arma cedunt, ac subministrant, ut suos tueantur errores, quot argumenta ex Molinæ officina deprotrahunt contra Thomistas ad probandum, gratiam Dei prævenientem, & de se efficaciam arbitrii nostri libertatem destruere. Unde Doctores Lovanienses in sua censura recte observarunt, Molinæ sententiam magis aptam esse ad stabiliendam, quam ad evertendam Pelagianorum, & Calvinistarum hæresim. De quo fuse in Apologia Thomistarum, quam in Clypeo nostro, ad calcem tractatus de voluntate Dei, in nova editione, apposuimus.

§. III.

Calvini errores in materia de gratia.

PLures sunt Calvinii errores in materia de gratia, quos breviter hic describemus. In primis asserit, quod efficax gratiæ auxilium facit secum homines operari sponte, non libere,

re, ad modum, quo jumentum sequitur spontanea, non libere fessoris ductum. Ita lib. 2. instit. cap. 3. §. septimo, & in Antidoto ad canonem quintum sessionis sextæ Concilii Tridentini, ubi hæc scribit: *Quid ergo sibi vult Augustinus, cum de libertate voluntatis loquitur? nempe quod toties repetit, non cogi homines invicta Dei gratia, sed voluntarios regi, ut sponte pareant, ac sequantur.* Unde vult auxilium divinæ gratiæ ita esse efficax, ut indifferentiam voluntatis absorbeat, impositaque consentiendi necessitate, dissentiendo potentiā consumat, sola spontaneitate, seu immunitate a coactione in voluntate relicta. Quare in responsione ad primum articulum de occulta Dei providentia, hæc scribit: *Quod de absoluta potestate nugantur Scholastici, non solum repudio, sed etiam detestor.* De quo suffe in prædicta Apologia Thomistarum.

Secundo Calvinus docet, sic totum tribendum esse gratiæ, ut nostræ postea electionis non sit motioni ejus obtemperare, aut refragari. Ita lib. 2. institut. cap. 3. §. 10.

Tertio, posita gratia efficaci, hominem non posse non velle, nec dissentire. Ita lib. 3. de libero arbitrio contra Pighium pag. 285. & in antidoto Concilii Tridentini ad Canonem 4. sessionis sextæ, in quo damnatur hic error, qui primo affinis est, & veluti illius consecutarium.

Quarto, auxilium prævenientis gratiæ, quo Deus facit nos velle, & facere, movere quidem efficaciter voluntatem, sed non eam excitare moraliter. Ita lib. 2. instit. cap. 3. §. 10. De quo Bellarminus libro I. de gratia, & libero arbitrio cap. II.

Quinto, omne auxilium, prout venit a Deo, esse efficax, & nullum tantum sufficiens. Ita locis proxime citatis.

Sexto, gratiam Dei sic dare ipsum velle, & operari, ut creata voluntas ei libere non cooperetur. Ital. 2. instit. c. 3. n. 11. & 12. ubi & Catholicos ridet, quod liberi arbitrii cum gratia concurrentiam ex hoc S. Pauli loco confirmant: *Plus omnibus laboravi non ego, sed gratia Dei mecum.* Quem in errorem inductos esse ait ex præposta versione, in qua græci articuli vis omissa fuit, quæ si exprimatur, hunc sensum efficiet: *Non ego, sed gratia Dei, quæ mihi aderat.* Qua de re pluribus agit in Commentariis ad hunc S. Pauli locum.

Ex his liquet, Calvinum admisisse quidem gratiam efficacem, moventem spontanee voluntatem, sed negasse sufficientem, moraliter excitantem, & cooperantem, subindeque totaliter extra gratiam fuisse, ut enim ait D. Prosper epistola ad Demetriadem cap. 7. *Gratia Dei nisi tota suscipitur, tota repellitur: sicut enim alienus est a numero fidelium, & a sorte sanctorum, qui in aliquo a Catholica veritate dissentit; ita extra gratiam efficitur, qui aliquid de ejus plenitudine difficeretur.*

Constat etiam ex dictis, juxta doctrinam Calvini, & Sectatorum ejus, homini, in statu naturæ lapsæ, mandata esse omnino impossibilia: cum in illo statu nullum agnoscant auxilium sufficiens, quod tribuat potentiam ea adimplendi. Unde Melancton ad caput 13. epistolæ ad Romanos ait: *Cum mandat lex diligere, perinde impossibile jubet, ac si præcipiat nobis, transvolare Caucasum.*

*Finis Tomi quarti Manualis
Thomistarum.*

IN-

INDEX TOMI IV.

MANUALIS THOMISTARUM..

T <small>RACTATUS VI.</small> De legibus ..	pag. 3
Cap. I. <i>De lege in communi.</i>	ib.
§. I. <i>De existentia, & essentia legis..</i>	ibid.
§. II. <i>Quænam sit legis divisio?</i>	13
§. III. <i>Officia, effectus, & actus legis.</i>	17
Cap. II. <i>De lege eterna.</i>	19
Cap. III. <i>De lege naturali.</i>	22
§. I. <i>Quid sit lex naturalis?</i>	ibid.
§. II. <i>Quænam pertineant ad legem naturæ?</i>	24
§. III. <i>Utrum lex naturalis pari possit mutationem, dispensationem, aut interpretationem?</i>	27
§. IV. <i>An possit dari ignorantia invincibilis juris naturalis, seu preceptorum legis naturæ?</i>	35
Cap. IV. <i>De lege humana.</i>	54
§. I. <i>De existentia, & quidditate legis humanae..</i>	ibid.
§. II. <i>De potestate legis humanae..</i>	61
§. III. <i>Quinam legibus humanis subjiciantur?</i>	66
Cap. V. <i>De aliquibus speciebus legum humanarum..</i>	69
§. I. <i>De lege pœnali.</i>	70
§. II. <i>De consuetudine..</i>	73
§. III. <i>De privilegiis..</i>	75
Cap. VI. <i>De interpretatione legum humanarum per epiikiam..</i>	78
Cap. VII. <i>De dispensatione a legibus humanis.</i>	80
Cap. VIII. <i>De abrogatione legum humanarum..</i>	83
Cap. IX. <i>De lege divina veteri..</i>	86
	§. I.

I N D E X.

§. I. Præmittuntur quæ de lege veteri apud omnes sunt certa.	ib.
§. II. De præceptis legis veteris.	90
§. III. An, & quando lex vetus abrogata fit?	96
§. IV. Utrum lex Mosaica statim atque cessavit obligare, fuerit mortifera?	106
Cap. X. De lege divina nova, sive Evangelica.	111
Tractatus VII. De gratia.	117
Cap. I. De necessitate gratiæ ad cognitionem veri.	120
§. I. Homo sine auxilio Dei speciali, & cum solo generali concursu potest plures, imo & singulas divisive veritates naturales cognoscere, non tamen omnes collective.	ib.
§. II. Solvuntur objections.	127
§. III. Ad cognoscendas veritates supernaturales, & assentiendum mysteriis nostræ fidei, non sufficit externa revelatio, sed necessario requiritur gratia interna, non solum in intellectu, sed etiam in voluntate.	132
Cap. II. De necessitate gratiæ ad volitionem, & operationem boni.	138
§. I. Confutantur tres primæ sententiae, & quarta statuitur.	139
§. II. Solvuntur objections.	152
Cap. III. De necessitate gratiæ in ordine ad dilectionem Dei.	165
§. I. Resolvitur difficultas quoad utramque partem de homine in utroque statu naturæ lapsæ, & pure considerato.	167
§. II. Solvuntur objections.	172
Cap. IV. De necessitate gratiæ ad observantiam legis naturæ.	177
§. I. Triplici conclusione difficultas resolvitur.	178
§. II. Solvuntur objections.	180
Cap. V.	

I N D E X.

- Cap. V. De necessitate gratiæ ad victorianæ
 tentationum. 185
 Cap. VI. De necessitate gratiæ ad diu vitan-
 da omnia peccata mortalia, quæ sunt con-
 tra legem naturæ. 194
 Cap. VII. De necessitate gratiæ ad vitanda
 peccata venialia. 202
 Cap. VIII. De necessitate gratiæ ad se præ-
 parandum ad illam. 210
 §. I. Utraque sententia rejicitur. ibid.
 §. II. Solvuntur objectiones. 219
 Cap. IX. De necessitate gratiæ ad perseve-
 rantiam finalē. 225
 §. I. Perseverantia finalis est donum Dei spe-
 ciale, a gratia habituali, & communibus
 auxiliis distinctum, & consistens in conjunc-
 tione gratiæ cum morte, ex efficaci glori-
 ficationis intentione imperata. 226
 §. II. Solvuntur objectiones. 235
 Cap. X. De divisione gratiæ. 240
 Cap. XI. De essentia gratiæ habitualis, seu
 gratum facientis. 256
 §. I. Gratia habitualis, seu gratum faciens est
 donum aliquod homini intrinsecum, nempe
 aliqua qualitas supernaturalis, in anima
 permanens, subindeque habens rationem ha-
 bitus, & non dispositionis. 257
 §. II. Gratia sanctificans est participatio for-
 malis naturæ divinæ, non solum qua na-
 tura, sed etiam qua infinita est. 262
 Cap. XII. Quibusdam Corollariis magis ex-
 plicatur natura, & perfectio gratiæ sancti-
 ficantis. 270
 Coroll. I. Repugnat dari plures species gra-
 tiæ sanctificantis, physice, & essentialiter
 inter se diversas. ibid.
 Coroll. II. Gratia sanctificans est simpliciter
 perfectior charitate, lumine gloriae, visione
 beati

I N D E X.

- beatifica, & quocumque alio ente supernaturali; licet visio beatifica in modo essendi exce-
dat, & sit perfectior secundum quid. 273
- Coroll. III. Gratia sanctificans per se ita pec-
catum expellit, ut repugnet utrumque in eo-
dem subjecto sociari. 276
- Coroll. IV. Gratia habitualis realiter distin-
guitur a charitate. 282
- Coroll. V. Gratia habitualis subjectatur im-
mediate in anima, non autem in poten-
tia ejus. 285
- Cap. XIII. De causa gratiae habitualis, &
actione, per quam producitur. 287
- Cap. XIV. De primo effectu gratiae habitualis, nimirum adoptione hominis in filium
Dei. 294
- §. I. Forma constituens hominem filium Dei
adoptivum neque est divinitas Spiritus San-
ti, nobis extrinsece unita, seu assistens, ne-
que habitus charitatis, sed gratia habitualis
adæquate, nulloque favore extrinseco ex-
pectato. 296
- §. II. Solvuntur objectiones. 300
- §. III. Tria Corollaria notatu digna. 304
- Cap. XV. De justificatione peccatoris, quæ
est secundus gratiae habitualis effectus. 310
- §. I. Gratia sanctificans est causa formalis
justificationis, non vero actus contritionis,
vel charitatis. 315
- §. II. In statu naturæ elevatæ ad ordinem, &
finem supernaturalem non potest dari alia
justificationis forma, quam gratia sanctifi-
cans, bene tamen in statu naturæ puræ. 318
- §. III. Solvuntur objectiones. 322
- §. IV. Corollarium notatu dignum. 327
- §. V. De dispositionibus ad justificationem
requisitis. 330
- §. VI. Actus contritionis, & charitatis effe-
ctus. 334


I N D E X.


- Etive procedunt a gratia habituali, ad
· quam disponunt. 335
- Cap. XVI. De merito justi, quod est terminus
gratiae habitualis effectus. 344
- §. I. De conditionibus ad merendum requisitiis. 345
- §. II. Retributio premii pro meritis in Deo
non est actus gratitudinis, aut fidelitatis,
sed strictæ justitiae, non commutativæ, sed
distributivæ. 351
- §. III. Justi per opera ex gratia, & charitate
procedentia merentur vitam æternam. 356
- §. IV. Ut opera hominis justi sint meritoria de
condigno vitæ æternæ, non sufficit, quod per
habitum charitatis habitualiter ordinentur
in Deum, sed relatio actualis, vel saltem
virtualis charitatis requiritur. 359
- §. V. Soli charitati præmium esse entiale beatitudinis tribuitur, aliis autem virtutibus præ-
mium duntaxat accidentale, si illarum actus
a charitate non imperentur. 364
- §. VI. Opera bona moralia, ex viribus naturæ
profecta, nec de condigno, nec de congruo pri-
mam gratiam auxiliantem promerentur. 369
- §. VII. Homo non meretur de condigno pri-
mam gratiam justificantem, bene tamen aug-
mentum ejus, & primam gloriam, primæ
gratiae habituali correspondentem. 376
- §. VIII. Justus non potest sibi mereri de con-
digno reparationem post lapsum, nec perse-
verantiae donum; neque etiam de congruo, si
meritum de congruo stricte, & proprie su-
matur, bene tamen si large, & impropre
accipiatur. 379
- Appendix ad Tractatum de Gratia.
- De variis Hereticorum erroribus circa gra-
tiam, & liberum arbitrium. 387
- Cap. I. De hæresi Pelagiana. ibid.
- §. I.


I N D E X.

§. I. Hæresis Pelagianæ origo.	388
§. II. Præcipui errores Pelagii circa gratiam.	392
§. III. Varii gradus, seu status hæresis Pelagianæ.	393
Cap. II. De Heresi Semipelagiana.	411
§. I. Origo hæresis Semipelagianæ.	ibid.
§. II. Præcipua Semipelagianorum dogmata.	414
Cap. III. Qui fuerint Semipelagianæ hæresis Auctores, vel Sectatores præcipui?	422
§. I. De Vitali Carthaginensi.	ibid.
§. II. De Cassiano.	423
§. III. De Fausto Regiensi.	421
§. IV. De Gennadio.	428
§. V. De Severo Sulpitio.	429
§. VI. De Joanne Chrysostomo.	430
§. VII. De Vincentio Lyrinensi.	431
Cap. IV. Errores Manicheorum, Lutheranorum, & Calvinistarum circa gratiam, & liberum arbitrium.	432
§. I. De erroribus Manicheorum.	433
§. II. De erroribus Lutheranorum, & Calvinistarum circa liberum arbitrium.	434
§. III. Calvini errores in materia de gratia.	441

F I N I S.









45
367

5.529

25